

Жсаҳон

АДАБИЕТИ

Адабий-бадиий, ижтимоий-публицистик журнал



МУАССИСЛАР:

ЎЗБЕКИСТОН МАТБОУТ
ВА АҲБОРОТ АГЕНТЛИГИ

ЎЗБЕКИСТОН ЁЗУВЧИЛАР
ҮЮШМАСИ

РЕСПУБЛИКА МАҶНАВИЯТ
ВА МАҶРИФАТ КЕНГАШИ

1997 йил июндан чиқа бошлаган

№ 10/221

2015 йил, октябрь

Бои мұхаррір:
Шұхрат РИЗАЕВ

Жамоатчилик кенгаши:

Эркин ВОХИДОВ
Абдулла ОРИПОВ
Омонулла ЮНУСОВ
Мұхаммад АЛИ
Мұхаммаджон ҚУРОНОВ
Қаҳрамон ҚУРОНБОЕВ
Ибровым ФАФУРОВ
Низом КОМИЛОВ
Шұхрат СИРОЖИДДИНОВ
Мұхаммаджон ХОЛБЕКОВ
Хурийд ДҮСТМУХАММАД

Таҳрір ҳайъати:

Амир ФАЙЗУЛЛА
Назира ЖҮРАЕВА
Омонулла РИЗАЕВ
Отабек САФАРОВ
Дилдорхон АЛИЕВА
Алимурод ТОЖИЕВ
Фозил ЖАББОРОВ
Алишер ОТАБОЕВ
Севара АЛИЖОНОВА

МУНДАРИЖА

НАВОИЙ САБОҚЛАРИ

Алишер НАВОИЙ. “Фарҳод ва Ширин” дос-
тонидан 3

НАСР

Ж.ГОЛСУОРСИ. Мулқор. Романдан парча.
(Рус тилидан Ҳ.Зиёхонова тарж.). 11
Ю.В.ЧАМАНЗАМИНЛИ. Икки ўт орасида.
Роман. (Озарбайжон тилидан Ф.Шоҳисмоил
тарж.). 43

ШЕЪРИЯТ МИНТАҚАЛАРИ

С.ЕСЕНИН. Энг улкан ишқ – Ватанга муҳаббат.
(Рус тилидан Э.Воҳидов тарж.). 38

АДАБИЁТШУНОСЛИК. ФАЛСАФА

Л.РОСС. Хемингүэй портрети. (Рус тилидан
О.Абдуллаев тарж.). 81
И.ҲАҚҚУЛ. Рухоният ва нафсоният тазоди. 93
УДОЛИМОВ. Жаҳонгашта ижодкор. 100
Қ.ЙЎЛДОШ. Постмодернизм: моҳият, илдиз-
лар ва белгилар. 108

УСТОЗ ТАРЖИМОНЛАР БИСОТИДАН
ШАВКАТ РАҲМОН. 73

ГЛОБУС ИСПАНИЯ

Испания Қироллиги. 163
Испания шеърияти. 177
Унутилмас сиймолар. 201

ҲИКОЯ ҲАҚИДА ҲИКОЯ

О.ОТАХОН. Сарҳадлар. 189
Ш.И.ТАЙБО. Одамлар, кимсиз ўзи? Х.БЕНЕТ.
Райхенау. Ҳикоялар. 191

ЖАРАЁН

Икки авлод овози. (Б.Карим ва У.Ёқубов жа-
воблари). 133

ЖАҲОН МАДАНИЯТИ ВА САНЪАТИ

О.МАТЁҚУБОВ. Ўзбек мусикаси. 152

Муқомамизда. 203
Таквим. 204



“ФАРХОД ВА ШИРИН” ДОСТОНИДАН

Достонни рус тилига
Қодиржон ЭРГАШЕВ
насрий таржисма қилган

X¹

*Тезрав хомани мистар шохроҳига киурмак ва содарў нома
майдонини шоҳ мадҳи айтурга киприк била супурмак, балки
обдор нуктадин сув уруб ул хомани маддоҳлардек бу майдонга
солиб маърака тутмак ва бу гарм маърака бирла ҳар маддоҳеки
бир шоҳ учун мадҳ этиб туурур маъракасин совутмак.*

*Водить перо по широкой линии мистара² и подметать
веником из ресниц площадь этих простоватых писаний
с целью восхваления шаха и опрыснуть водой тонких
мыслей и вывести перо на площадь как апологетов,
устроить собрание и этим горячим собранием охлаждать
любого другого апологета, восхваляющего каждого шаха.*

*Қазо килки чу тортиб нақши дилкаши,
Жаҳон авроқини қилди мунаққаш.*

*Когда перо предопределения, начертив приятные
сердцу узоры,
Украсил страницы мира орнаментом.*

*Сипеҳр ажзосини бериштау банд
Анингдек бир-бирига берди пайванд.*

*Тела³ небесные без нити и связок
Так прикрепил друг другу.*

*Ки, ҳар жузвиға чунким бўлди толиб,
Хирад табъига ҳайрат бўлди голиб.*

¹ Давоми. Бошланиши ўтган сонларда.

² Мистар – письменная принадлежность, употребляющаяся для того, чтобы строчки были ровные на одной линии.

³ Здесь употреблено многозначное слово «ажзо» которое означает еще и «часть», «страница». Так что эти строки можно перевести и так: «Часть несбоклона без нити или связок». Или «Страницы неба без нити и связок».

*И когда разум хотел постичь одного из них,
Смятение овладело всем его существом.*

*Чекиб кўкнинг сутунсиз боргоҳин,
Муҳайё қилди олам коргоҳин.*

*Сделал без колонн (без опор) портал небосвода,
Создал мастерскую мира.*

*Жаҳонда зоҳир айлаб кўп заройиф,
Жаҳон аҳлин доги қилди тавоийиф.*

*Много интересного проявил в мире,
Людей мира разделил на разные слои.*

*Тавоийиф чунки бўлди муҳталифваши,
Бу ердек паст, ул ўтдек тунду саркаши.*

*Когда эти слои стали разнообразными,
И один стал низким как земля, другой высок и
непокорный как огонь.*

*Буларга вожиб эрди интизоми,
Адолат важҳидин бермак низоми.*

*Требовалось установить среди них порядок,
Дать законы, соответствующие справедливости.*

*Бу ишга анбиёни қилди ирсол
Ки, бўлгайлар улуска дин сори дол.*

*Для этого он послал пророков,
Чтобы направили людей по пути религии.*

*Алардин сўнг салотин топти таъзим
Ки, бергайлар алар уммид ила бим.*

*После них султаны были удостоены почетом,
Чтобы внушили людям и надежду и страх.*

*Нечукким анбиё раъсу раиси
Муҳаммаднинг эрур зоти нафиси.*

*Как предводителем и главой пророков,
Является прекрасная персона Мухаммеда.*

*Расул хайлига сархайли сипаҳ ул,
Алар бори сипаҳ, хайл ичра шоҳ – ул.*

*И он является предводителем войска пророков,
И все они воины, а он среди них – шах.*

*Салотиннинг ҳам андоқ сарфарози
Эрур гўё азалдин Шоҳи Гозий.*

*Точно так же среди султанов как бы от сотворения
Самым великим является Шах Гази¹.*

*Газо майдони ичра Ҳайдар ойин,
Ривожи шаръ аро пайгамбаройин.*

*В поле сражения за веру он как Ҳайдар²,
В деле развития религии как пророк.*

*Наби шаръига берган зебу зайн ул,
Салотин сарвари Султон Ҳусайн ул.*

*Придавший украшения религии пророка – он,
Предводитель султанов Султан Ҳусайн он.*

*Зихи олам – садаф, зотинг – дурри пок,
Анингдекким, қуёш дуррига афлок.*

*Этот прекрасный мир – раковина, а твое существо
жемчуг в ней,
Точно также как небеса являются раковиной
для жемчуза – солнца.*

*Куёшидин ҳам ёргуғ ройи муниринг,
Фалакдин ҳам бийик олий сариринг.*

*Светлый ум твой ярче, чем солнце,
Твой высокий престол выше, чем небо.*

*Мурассаъ маснадинг аъло жумондин
Фалак фирузаеким тушимии ондин.*

*Твой трон украшен ожерельем,
Небо – один изумруд, выпавший из него.*

*Шукухунг жабҳасидин чун Сурайё
Ети қатра арақдек етти дарё.*

*Лоб твоего величия высок как созвездие,
И семь рек перед ним как семь капли пота.*

*Чу қаҳринг тундбоди эсти, олам –
Бисотин тоғлардин қилди маҳкам.*

*Когда сильный ветер твоего гнева дует,
Весь мир свое имущество укрывает горами.*

¹ Так Навоий величает Султан Хусайна Байкара. Словарное значение «Шах – воитель за веру».

² Прозвище Али ибн Абу Талиба, который является зятем пророка и четвертым халифом.

*Етиб чун гулишани лутфунг шамими,
Кўрунуб элга ўт жаннат насими.*

*Когда дует ветерок из цветника твоей милости,
То он кажется людям как ветерки рая.*

*Ою кун боги жоҳингдин ики гул,
Тун ул гулишанда мушкинфом сунбул.*

*Солнце и луна – два цветка из сада твоего величия,
Ночь – гиацинт из этого цветника, с цветом мускуса.*

*Кавокиб бирла ул тун ранги дарҳам,
Тўкулмии гўйи сунбулга шабнам.*

*Звёзды и цвет ночи черной,
Как будто капли росы на гиацинте.*

*Қиличингдин ҳам эл ғамгину ҳам шод,
Судиндор мулк ҳам вайрон, ҳам обод.*

*Меч твой приносит народу и горе и радость,
Ибо вода может разрушать и благоустроить страну.*

*Қилиб мавжи бало ҳам зоҳир ул сув,
Бўлуб ҳам фатҳ рухсорига кўзгу.*

*Та вода проявляет и волну бедствий,
А также является зеркалом, отображающим лиц победы.*

*Хадангинг марг тайридин нишона,
Адув жисмини айлаб ошёна.*

*Стрела твоя как птица смерти,
Тело врага делает своим гнездом.*

*Вале ул ошёнга бўлмайин ром,
Ўтуб етгач замоне, тутмай ором.*

*Но она не привыкает к этому гнезду,
Ни на миг не остановится там и проходит.*

*Бўлуб ахзар синонинг сарв монанд,
Анинг устида барги бед пайванд.*

*Твое зеленое копье как кипарис,
На котором прикреплены листья вязи.*

*Яшил айлаб ани заҳри ҳалоҳил,
Бўлуб барча хилоф аҳлига қотил.*

*Убивающий яд сделал его зеленым,
И он является убийцей всех врагов.*

*Сафи ҳайжоки ўқ келгай ёгиндеқ,
Камандинг ташлагон шакли ҷоқиндеқ.*

*В строю боя, когда пули летают как дождь,
Петля, брошенная тобой, похожа на молнию.*

*Чоқин йўқ, ришида иқболу таъийид,
Бўлуб маҳкам зафар бўйнига жсовид.*

*Нет, она не молния, а нить счастья,
Которой навечно укрепилась на шее победы.*

*Самандинг ул саҳоби барқрафтор
Ки, суръатдин қадам то фарқ рафтор.*

*Конь твой – облака с молнией,
Из-за своей быстроты ступающий на самую высокою
точку неба.*

*Замона аблаки янглиғ хироми,
Юрурда шарқ то гарб икки гоми.*

*Его ход похоже на ход пегого коня времени¹
От востока на запад ему два шага.*

*Хироми ўрга чиқмоқта тутундек,
Эгармак вақти дашиб узра қуюндеқ.*

*При поднятие на высоту он как дым,
В беге по кругу как вихрь на степи.*

*Куюн йўқум ҳаюни девзод ул,
Демонким девзод ул, девбод ул.*

*Нет, он не вихрь, а конь, рожденный дивом,
Нет, не конь рожденный дивом, а вихрь дива.*

*Замониким жаҳонга тушигай ошуబ,
Замин бирла замонга тушигай ошуబ.*

*В это время когда в мире начинаются смуты,
Земля и эпоха будут объяты смутами.*

*Чиқиб чарх узра ҳайжо аҳли гарди,
Қолиб гард ичра чархи ложуварди.*

¹ Пегий конь времени – так поэты Востока называют день и ночь.

*Пыль, поднятая войском, поднимается до небес,
Синее небо остается в пыли.*

*Ики саф ҳар бири бир кўҳи бедод,
Саросар тиги онинг тиги фўлод.*

*Два сражающихся ряда, каждый как гора насилия,
Мечи у них от начала до конца из стали.*

*Жаҳонни тийра гард айлаб қаронгу,
Синонлар шамъи солиб анда ёғду.*

*Когда мир становится темным от пыли,
И в нем светятся только копья как свечи.*

*Кавурга даҳр аро солиб гиреви,
Нечукким маст бўлгай нарра деви.*

*Большой барабан гремит на весь мир,
Как ревёт опьяневший див.*

*Ўқи андоқки сарсар лола элтиб
Шафақнинг жомидин паргола элтиб,*

*Как сильный ветер вырывает и уносит тюльпаны,
Стрелы сломают чашу зари и уносят ее куски.*

*Баҳодирлар фалакдек барча хунрез,
Шиҳобосо синонлар айлабон тез.*

*Богатыри, как небо, проливающие кровь,
Обтачивая свои копья как молнии.*

*Адам қўргонига қочиб амонлиқ,
Фалак олам аро сочиб ямонлиқ.*

*Мир и спокойствие убегают в крепость небытия,
Небо наполняет весь мир злом.*

*Сен ул соат салобатдин сипехре,
Кўлунгда тигдин рахшанда меҳре.*

*В тот час, ты как небосклон,
В руках твоих меч как блестящее солнце.*

*Маозаллоҳи, гардундек жанобинг
Таҳаррук тонса азм айлаб рикобинг.*

*Твое высочество как врачающийся небосвод,
Приходит в движении и сядет на конь.*

*Суруб ҳар лаҳза бир ён тортибон тиг,
Шукуҳи тундлукта ўйлаким миг.*

*И направит его в разные стороны, рубя саблей,
В гневе и величии уподобляясь туче.*

*Солиб ҳар сори тиги лоуболи,
Адувдин қилгасен оламни холи.*

*Без страха бъешь мечом,
Освободишь мир от врагов.*

*Қилиб ул навъ тиги бемадоро,
Жаҳон ичра қиёмат ошкоро.*

*Таким образом бескомпромиссный меч,
Проявляет признаки Судного дня.*

*Күёши ботқай узорин дарҳам айлаб,
Фалак қочқай равон қаддин хам айлаб.*

*Солнце закатывается, скрывая свое лицо,
Небо убегает, согнув свой стройный стан.*

*Ёниб майдондин этсанг азми айвон
Тушуб айвонга силкиб гарди майдон.*

*Когда ты возвратишься с поля и идешь в свой чертог,
Остановишься в портале, встряхиваешь пыль поля.*

*Тутуб Жамишед тахти узра ором,
Тилаб хуршед янглиг лаългун жом.*

*На троне Джамишида получаешь наслаждение,
Приказав принести чашу с цветом рубина, как солнце.*

*Куюб оғзингга ул жоми Каёний,
Ичибким бўлсун оби зиндагоний.*

*Пусть, что из чаши Каянидов льётся в твой рот,
И ты пьешь, будет живой водой.*

*Не мулкиким олиб ул разм ичинда,
Багишлаб барчани бу базм ичинда.*

*Все страны, завоеванные в результате этого сражения,
Ты раздаёшь как пожалование на этом пиру.*

*Демон ҳар мулкини бир подшоға,
Ҳар икки мулк балким бир гадоға.*

*Не говорю, что ты каждую страну будешь
пожаловать одному царю.
Нет, ты пожалуешь две страны одному нищему.*

*Чу баҳиши топиб андоғ мулку жоҳе,
Бўлуб ул дам гадо ҳам подиоҳе.*

*Получив в качестве милостыни такую страну и богатства,
Нищий в том же миг превратится в царя.*

*Гадодин бўлмасун озурда ройинг,
Эрур чун подшаҳлар ҳам гадойинг.*

*Пусть твое сердце не обидится на нищего,
Ведь перед тобой цари являются нищими.*

*Ало то подшаҳлиг боқий ўлгай,
Тараб базмида маҳваши соқий ўлгай.*

*Эй, пока вечным будет царство,
Пока будет на радостном пиру кравчий муноликий.*

*Бинойи салтанат зотингга боқий,
Саодат маҳваши базмингда соқий.*

*Пусть здание царства персоне твоей принадлежитечно,
Луноликий красавец счастья будет кравчим на твоем пиру.*

*Бу соқий илгидин жоминг паёпай,
Зулоли Хизр ул жоминг аро май.*

*Чтоб ты из рук этого кравчего пил чашу одну за другой,
Чтоб вином в этой чаше была прозрачная вода Хызыра.*

*Кетур, соқий, шароби арманисоз,
Тут они шоҳ мадҳин айлаб оғоз.*

*Принеси, кравчий, армянское вино,
Поднеси его с восхвалениями шаха.*

*Қил аввал нўшу берким, мен қиласай нўш,
Кўши ичсанг тутки, мен дозги ичай қўши.*

*Сначала сам пей, потом мне дай пить,
Если ты пьёшь пару кубков, я тоже буду пить пару.*

(Давоми келгуси сонларда)



NASR

Jahon
ADABIYOTI



Жон ГОЛСУОРСИ

(1867–1933)

ФОРСАЙТЛАР ҲАҚИДА ҚИССА

Трилогия

1-китоб

МУЛКДОР¹

*Рус тилидан
Ҳабиба ЗИЁХОНОВА
таржимаси*

Таржимон хақида

Ҳабиба Зиёхонова 1912 йил 18 февралда Тошкентда Зиёхон эшоннинг серфарзанд оиласида таваллуд топди. Эшон бобонинг тўрт ўғли ва тўрт қизи бор эди. Тақвадор оиласдан келиб чиқишиларига қарамай, Эшон бобонинг қизлари ўз тақдирларини “эскича” эмас, “янгича” яшаши асосига қурдилар. Тўнгич қизлари Шоҳидахон Маъзумова ўз ҳаётини театри иши ва ўқитувчилик фаолиятига бағишилади. Иккинчи қизи Зарифахоннинг қисмати бошқаларидан бутунлай бошқача кечди – у Тошкентда биринчи троллейбус ҳайдовчиси сифатида танилди. Кейинги қиз – Таматхон тўнгич опасининг изидан кетди ва Муқимий номидаги мусиқали драма театри актрисаси бўлди.

Эшон бобонинг ўртманча қизи Ҳабибахон эрта турмушига чиқди, аммо унинг баҳти узоққа чўзилмади, эри “халқ душмани” сифатида қатагон қилинди ва 20 йилга қамалиб кетди. Ҳабиба қизи Раъно билан ёлғиз қолди. Тақдирга тан бермай илож қанча, бошга тушганини кўз кўради, деганлариdek, 1936 йили қизини ота-онасига ташлаб, Ҳабиба Қозогистонга ўқишга кетди, у ердаги тиббиёт билим юртини тугатди ва шифокор-стоматолог касбига эга бўлди.

30-йилларнинг охирида республикада машъум қатагон тўлқини жунбишга келди. Шу йилларда кўплаб оиласларда ичига қотган нон солинган халталар шай турарди. Тунлари яқинлашиб келаётган машина овозидан одамлар зир титрар әди.

Мана шундай оғир дамларда оиласиниг дўсти, файласуф, муаллим Илҳом Исҳоқов ёрдам қўлини чўзди – у Ҳабибахоннинг қўлини сўради. Илҳом Ҳабибахоннинг биринчи никоҳдан бўлган қизи Раънога ҳақиқий ота бўлди.

JAHON ADABIYOTI 2015/10

¹ Романдан парча.

Уруш йилларида Ҳабиба ва Илҳомнинг оиласидаги икки қиз – Ҳолида ва Шоҳиста дунёга келди. Урушдан кейин эса узоқ куттилган орзулари ушалди – Ҳудо уларга қўчкордай ўғил берди, яхши ният билан унга бутун оила Жасур деб исм қўиди.

Эр-хотин фарзандларига яхши таълим-тарбия беришди. Уларнинг ҳар бури Ўзбекистонда фан ва маданият, адабиёт ва кино санъатининг муносаб вакиллари бўлиб етишиди. Раъно Ҳамроқулова университетда рус тили ва адабиёти бўйича нақ қирқ йил дарс берди. У Йўлдош Аъзамовнинг “Мафтунингман” фильмида олтин тасмаларга Замира роли билан муҳрланиб қолган. Иккинчи қизи, тиббиёт фанлари доктори Ҳолида Исҳоқова режиссёр Шуҳрат Аббосовнинг “Маҳаллада дув-дув гап” фильмидағи Сайёра ролидаги кино ихлосманларининг ўлмас муҳибига айланди. Кичик қизи, филология фанлари номзоди Шоҳиста Исҳоқова инглиз тилидан таржима бобида етук мутахассис бўлиб етишиди. Жасур Исҳоқов – сценарийнавис, кинорежиссёр, театр драматурги сифатида республикада таникли ижодкор.

Ҳабиба Зиёхоновага истеъоддан Ҳудойим тўкиб берган экан – фортепъяно чалишини мустақил ўрганиб олди, дутор чертишини нақ эшиб юборар, ўзбек мумтоз ашулатарини қиёмига етказиб ижро этарди. Унинг истеъододида яна бир олмосдек чақноқ ва ўткир қирра бор эдикни, бу ҳам бўлса – адабиёт! Ҳабиба Зиёхонова замондошлари ҳаёти тўғрисида ҳикоялар ёзишини усталик билан дўндирав, у ёзган бири-бираидан дақиқ ва ҳақиқ ҳикоя-новеллалар “Ўзбекистон хотин-қизлари” журнали ва турли рӯзномалар саҳифаларини тўлдириб, фусункор қилиб юборар эди. Чоп этилган ҳикоялар жамланиб, “Унумилмас мактуб” сарлаөваси остида тўплам қилиб нашр этилди.

Айни пайтда Ҳабиба Зиёхонова рус тилидан ўзбек тилига таржима қилишида ҳам эътиборга тушди. Дарҳақиқат, “Норинж сувлари”, “Яширин обком ҳаракатда”, Собит Муқоновнинг “Бўтакўз”, Антон Чеховнинг кулгили ҳикояларининг ўзиёқ таржимон маҳоратини кўрсатиб туради. Фёдор Достоевскийнинг Ҳабиба Зиёхонова таржимасидаги “Хўрлангандар ва ҳақоратланганлар” романи асосида Ўзбекистон телевидениесидаги саҳналаштирилган телевизион фильм эфирга катта муваффақият билан узатилганди.

1973 йили ўзбек китобхонлари Ҳ.Зиёхонова шарофати ила француз адабиётининг мумтоз намояндаси Гюстав Флобернинг “Бовари хоним” романи билан танишиди. Мазкур китобнинг бир нусхаси Франциядаги Гонкур академиясидаги сақланмоқда.

Ҳабиба Зиёхонова қўл урган наебатдаги таржима инглиз мумтоз адаби, Нобель мукофоти совриндори Жон Голсурорсининг машҳур “Форсайтлар ҳақида қисса” асари эди.

Шу ўринда романнавис ҳақида ҳам тўхталиб ўтсак. Атоқли инглиз ёзуви чиши драматурги Жон Голсурорси 1867 йил 14 авгуустда Лондон яқинидаги шаҳарчада бадавлат оиласидаги түғилган. Ота-онаси бир қанча компания ва завод эгаси эди. Жон отасининг изидан бориб, Оксфорд университетидаги хукуқшунослик бўйича таҳсил олди. Шу дәверда У.Теккерей, Ч.Диккенс, Г.Мелвилл каби адабилар ижодини кўлдан қўймай ўқиди, бироқ адабиётни танлашига рағбат кўрмади. Кейинчалик тасодиғи англиялик ёзуви Жозеф Конрад билан танишишиб қолди ва айнан у Жонда ижод иштиёқини уйғотди.

Жон Голсурорси самарали ижод қолди. “Жослин” (1898), “Вилла Рубейн” (1900), “Фарисейлар ороли” (1904), “Кўрғон”, “Чорбог” (1907), “Қардошлиқ” (1909), “Патриций” (1911), “Фрилендлар” (1915) каби романлари, “Жой” (1907), “Кураш” (1909), “Адолат” (1910) сингари пьесаларининг ўзиёқ унинг ижодий мероси баракали эканини кўрсатади. Аммо Голсурорсига чинакам машҳурликини бадавлат Форсайтлар оиласи тақдирига бағишиланган йирик эпопея – “Форсайтлар ҳақида

қисса” (1906–22), “Замонавий комедия” (1924–28), “Бобнинг якуни” (1931–33) трилогиялари ва шу туркумга кирувчи ҳикоялари олиб келди.

Моҳир мутаржим Ҳабиба Зиёхонова “Форсайтлар ҳақида қисса” романининг биринчи китоби – “Мулкдор” асари таржимасига иштиёқ билан киришган эди, бироқ хасталик бу хайрли ишини якунлашига имкон бермади.

Ҳабиба Зиёхонова 1989 йил 6 июлда вафот этди.

Гарчи таржимон оламдан кўз юмган бўлса-да, ўзи ёзган ва она тилимизга ўгирган асарларда – ижодий меросида ҳамон тирик. Ҳ. Зиёхонова таржима қилиб улгурган “Мулкдор” романидан айрим бобларни чоп этиб, азиз китобхонлар ҳукмига ҳавола этишдек савобли ишини “Жаҳон адабиёти” журнали ўз зинмасига олди. Ҳа, чин ихлос билан қилинган иш ҳеч қачон ўлмайдигина эмас, янгидан куртак очиб, гуллайверади.

Амир ФАЙЗУЛЛА



Биринчи қисм

I

КЕКСА ЖОЛИОННИКИДА ҚАБУЛ МАРОСИМИ

Форсайтларнинг оилавий анжуманига таклиф этилишга мушарраф бўлган кишилар учун ғоят ажиб ва ибратли манзара – инглиз жамиятининг юкори табақасига мансуб бўлган, бор ҳашами билан ўзини кўз-кўз қилаётган бир оила намоён бўларди. Бордию, ўша баҳтиёрлардан биронтаси зеҳн солиш қобилиятига эга бўлса (чунончи, бу қобилият ҳеч қанақа пул қийматга эга бўлмагани учун Форсайтларнинг дикқат-эътиборини ўзига жалб этолмасди), унинг кўз ўнгидага фақат завқ берувчи гўзалликкина эмас, балки инсониятнинг теран жўмбоқларидан бирини ечиб берувчи бир ҳолат гавдаланарди. Бошқача қилиб айтганда, бир-бирини ёқтиргайдиган оиланинг ҳар учала авлоди ўртасида меҳр-оқибатнинг нишони ҳам қолмаган бу хонадоннинг жамулжам бўлиши зийрак кузатувчига оиланинг ижтимоий ҳаётнинг

қудратли занжирига айлантирган, бутун бошли жамиятни жозибали қилиб ўзида аниқ гавдалантирадиган сирли, сира сўнмаслик белгиларини пайқашда ёрдам берарди. Ўша кузатувчига жамият тараққиётининг турли йўлларини кўришга, патриархал турмуш, ибтидоий тўдаларнинг кўчиб юриши, халқнинг юксалиши ва инқизотга учраши ҳакида баъзи бир нарсаларни аниқлаб олишга имконият туғилади. У ўзининг яшовчанлиги, шароитга мослашиши билан бошқа нозик, заиф, чидамсиз ўсимликлар қуриб кетган ерда омон қола олган, бир кун келиб чаманчаман гуллаган, кўм-кўк япроқлар билан қоплаган ва ўз салобати билан кишини деярли чўчитадиган ёш ниҳолни кўрган одамга ўхшарди.

1886 йил ўн бешинчи июль, соат тўртларга яқин кекса Жолион Форсайтнинг Стенхоп-Гейтдаги уйига келган тасодифий кузатувчи Форсайтлар хаётининг айни гуллаб-яшнаган пайтини кўра оларди.

Бу қабул маросими кекса Жолион Форсайтнинг набираси Жун Форсайт билан мистер Филип Босинини унаштириш шарафига бағишилаган эди. Барча оила аъзолари бу ерга тўпланишиб, оқ қўлқоплар, оқ нимчалар, уқпарлар, либосларини кўз-кўз қилишарди. Ҳатто Энн амма ҳам келган эди. Энди унинг кунлари укаси Тимотининг уч авлод портретлари осиб қўйилган яшил меҳмонхонасида қўлида китоб ёки тўкув билан ўтиб, бу бурчакни камдан-кам тарк этарди. Ҳа, ҳатто Энн амма ҳам шу ерда эди. Унинг тик қомати ва картайган юзидаги хотиржамлик, сиполик бутун оиласига хос бўлган мулкдорликнинг енгилмас руҳини акс эттиради.

Форсайт унаштириш, тўй-ҳашам ёки туғилган кунни нишонласа ҳамма Форсайтлар жам бўлишарди. Форсайт ўлса-чи... бироқ шу чоққача Форсайтларда бу мусибат бўлган эмас. Улар ўлишмайди. Ўлим уларнинг ақидаларига зид бўлиб, улар ўлимга қарши барча эҳтиёт чораларини кўрадилар. Яъни, худди мол-мулкига чанг согланларга қарши исён қўтарган жони қаттиқ одамлар каби табиатан эҳтиёткор эдилар. Бугун бошқа меҳмонлар билан аралашиб юрган Форсайтлар одатдан ташқари ясаниб-тусаниб, савлат тўкишар, уларнинг ўта димоғдорлигига қанақадир сергаклик, синчковлик бор эди. Улар гўё кимнингдир жиғига тегиши учун ўзларига зеб бергандек эдилар. Сомс Форсайтнинг юзида одатдаги димок-фирок ифодаси уларнинг юзида ҳам акс этиб турарди. Улар ҳар нарсага қодир эдилар.

Уларнинг шуурсизлик билан эгаллаган ҳукмдор мавқелари хона-дон тарихида қандайдир руҳий босқич бўлса, кекса Жолионникидаги йиғилиш эса оиласига юз берган воқеаларга дебоча бўлди.

Форсайтлар ҳар бири алоҳида-алоҳида эмас, балки бутун оила бир бўлиб нимагадир қарши норозилик билдиримоқда эди, бу норозилик уларнинг бекаму кўст кийинишларида, қариндошларнинг бир-бирига сермулозаматликларида, оила ролини улуғлашларида ва нафрат билан қарашларида ифодаланар эди. Форсайтлар ҳар қандай жамиятнинг – тўдаларми, алоҳида шахсларми, барибир асосий белгиларини фош этиши муқаррар бўлган хавфни сезмоқда эдилар. Хавф-хатарни сезиш уларни қурол-аслаҳаларга жило беришга мажбур этганди. Шунча вақтдан бери оила биринчи марта қандайдир ғайриоддий ва омонат бир нарсанинг бевосита яқинлашаётганини беихтиёр сеза бошлади.

Рояль олдида норғул, басавлат одам турар, унинг кенг кўкрагини унча дабдаба бўлмаган пайтларда кийиладиган жавоҳирли тўғнағич қадалган битта атлас нимча ўрнига ёқут тўғнағич қадалган иккита нимча сириб

турарди. Унинг соқоли тоза қиртишланган, заҳил, тўртбурчак юзи ва оқимтири кўзлари бўйнидаги атлас галстук тепасидан улуғвор порларди. Бу Суизин Форсайт эди. Тоза ҳаводан кўпроқ нафас олиш кулагай бўлган дераза ортида Суизиннинг эгизаги Жеймс турарди. Кекса Жолион уларга “семиз ва қилтириқ” деб лақаб қўйганди. Суизинга ўхшаб Жеймснинг бўйи ҳам олти футдан ошиқ, аммо туғилганидан бошлабоқ ўз озғинлиги билан укасининг семиз-бақалоқлигини ювиб кетмоқчи бўлгандек қоқсуяқ эди. Жеймс одатдагидек буқчайиб турар ва атрофга хўмрайиб қаради. Унинг кулранг кўзларида қанақадир ташвишли фикр ҳукмрон, бундан у вақти-вақти билан чалғир ва атрофдагиларга тез-тез, шоша-пиша кўз югуртириб қўярди. Иккита бир хил ажинли чакаги, ботиб кетган ёноғи, мўйлови қирилган ва чўччайиб турган устки лабини пахмоқ чакка соқоли ўраб турарди. У кўлида чинни гулдонни айлантиради. Сал нарироқда унинг якка ягона ўғли Сомс турарди. Унинг юзи рангпар, қора сочлари сийраклаша бошлаган, соқол-мўйлови тоза қиртишланган. Афтидан, унинг табиати ниҳоятда тирриқ – юзида ҳали юқорида эслатганимиз – манфур ифода билан даҳнни чўзганча ёнида турган жигарранг кўйлакли, аллақандай хонимнинг сўзларини тингларди. Сомснинг ортида унинг амакиваччаси – Форсайтнинг бешинчи фарзанди Роджернинг ўғли, баланд бўйли Жорж навбатдаги аскияни ўйлаётганди. Унинг гўштдор юзида қаҳрли табассум ўйнарди. Бугунги воқеада аллақандай бир сир бўлиб, бу ҳаммага ҳам даҳлдор эди.

Бир-бирига зич бўлиб уч леди қатор ўтиришарди: Энн, Эстер (иккиси ҳам қариқиз) ва Жули аммалар (Жулиянинг қискартириб айтилгани) – у ёши ўтиб кетаётганидан вахимага тушиб, касалманд Септимус Смолл деган кишига тегиб олган эди. У эридан кейин анча йил яшади. Энди Жули опаси, синглиси билан бирга, олтинчи ва кенжা укаси Тимотининг уйида, Бейсуготер-Родда яшарди. Учала ледининг кўлида биттадан елпигич бўлиб, ҳар қайсисининг эгнида бу куннинг дабдабали эканини белгиловчи безаги гулдор, рангдор укпар ёки тўғноғич тақилган кўйлак бор эди. Хонанинг ўртасида, қандил тагида мезбондан такозо қилинадиган одат бўйича оила бошлиғи Жолионнинг ўзи турар эди. Ажойиб оқ жингалак соchlари, дўүнг пешонаси, тўқ кулранг жимит кўзлари ва йирик даҳанидан осилиб турган узун оқ мўйлови мана бу саксон ёшли қарияни, яноқларининг ориқлиги ва чаккаларининг ботиб кетганига қарамай, гўё мангу ёшлиқ сир-асорларини биладиган нуроний бузрукка ўхшатиб турарди. У қаддини расо тутар, ўткир осойишта кўзлари эса ҳали ҳам жилоли нурини йўқотмаганди. Буларнинг барчаси кекса Жолионнинг умри шубҳалар, ғиди-бидилар билан ўтадиган паст одамлардан юқори туришини англатарди. Узоқ йиллар давомида у ўз ақлига суюниб яшади ва ўзининг устунлиги билан ном чиқарди. У ўз шубҳаларини бировга айтишни ва бирордан гина қилишни хаёлига ҳам келтирмасди. Жолион ва бу ерда ҳозир бўлган бошқа тўрт инилар – Жеймс, Суизин, Николас, Роджерлар ўртасида катта тафовут ҳам, катта ўхшашлик ҳам бор эди ва ўз навбатида тўрт оғайни бошқалардан ажralиб турар, бир-бирларига жуда ўхшардилар.

Беш оға-инининг юз тузилишлари, ифодалари турлича бўлиши асносида, баъзи бир арзимас тавофтларни мустасно қилганда асос қилиб авлоднинг даҳан катталигини эътиборга олиш мумкин эди. Унинг кай замонлардан бери авлоддан-авлодга ўтиб келаётганлигини кузатиш ҳам, оила фаровонлигининг ҳақиқий намунаси ва гарови бўлмиш бу даҳнлар ҳакида баҳслашиш ҳам мушкул эди.

Кичик авлод: баланд бўйли, каттакон Жорж, рангпар серҳаракат Арчибалъд, мулойим, беозоргина, хирахандон ёш Николас, димоғдор, олифтанамо Юстас – ҳаммаларида ҳам эҳтимол унча аниқ бўлмаса ҳам, аммо оиланинг руҳига жо бўлиб кетганлигидан далолат берувчи ўша белги шубҳасиз мавжуд эди.

Шунчалик хилма-хил ва айни пайтда бир-бирига шунчалик ўхшаш ана шу чехраларда шу кун бир неча бор гумонсираш ифодаси пайдо бўлди ва бу гумонсирашнинг сабабчиси шубҳасиз бир одам эдики, аслида шу одам билан танишиш боисидан бу ерга тўпланишган эдилар.

Филип Босинининг ҳеч қанақа мол-дунёси йўқ йигит экани ҳаммага маълум, лекин Форсайтлар оиласидан чиқсан қизлар шундай кишиларга унаштирилган, ҳатто эрга тегишган ҳам эди. Демак, Форсайтларнинг гумонсирашларига асосий сабаб бу эмас. Улар ўзлари ҳам фаҳмига ета олмайдиган оиласи фисқу фасодлар ичида фарқ бўлиб кетган бу адоватнинг қаердан пайдо бўлганини айтишга ҳам қодир эмас эдилар. Ҳарқалай мана бундай миш-мишлар бор эди. Кунлардан бир кун Филип Босини Энн, Жули ва Эстер аммаларнинг ҳузурига расман учрашиш учун келибди. Унинг бошида кулранг, юмшоқ, анча эскириб қолган шляпаси бор экан. Устига-устак бош кийими қийшайган ва чанг босган эмиш. Шу чоқ ёруғ тушмайдиган кичкина йўлакдан ўтиб кетаётган Эстер амма курсида турган шляпани дайди мушук деб ўйлаб ҳайдамоқчи бўлибди. “Тавба, бу қанақаси!” дебди ичида. (Эстер амманинг кўзи хира эди). “Томмининг ғалати-ғалати дўстлари бор-да!” Мушук жойидан қимирламаганидан кейин амма қаттиқ ташвишга тушибди.

Вазият, жой ёки одамнинг барча энг муҳим томонларини ўзида гавдалантирган бирон-бир ёрқин кичик унсурни қидириб топишга уринган рассом каби Форсайтлар – онгизз рассомлар ҳам – беихтиёр шу шляпага ёпишиб олганди. Улар учун юз бераётган барча воқеаларнинг моҳиятини ўзида акс эттириб турган ёрқин деталь, унсур, нарса ана шу шляпа эди. Уларнинг ҳар қайсиси ўз-ўзига: “Мана, масалан, мен шунака учрашувга шундай борармидим, тағин анавинақа шляпада-я?” деб савол берарди ва ҳар қайсиси “йўқ” деб жавоб қиларди. Ўзини жуда фаросатли деб билган баъзилари эса: “Бу менинг хаёлимга ҳам келмасди!” – деб қўшиб қўйишарди.

Жорж шляпа ҳақидаги гапларни эшитиб, тиржайиб қўйди. Босини ҳазил қилмоқчи бўлгани шундоққина кўриниб турибди-ку. Жорж бунақанги ҳазилларни яхши кўрарди.

– Димоғдор йигит экан, – деди у, – чинакам денгиз қароқчиси!

Мана шу “қароқчи” сўзи оғиздан-оғизга ўтиб, Босинининг лақаби бўлди-қолди. Шляпа воқеасидан сўнг учала амма Жунга ёпишишди:

– Унинг бунақа киликларига нимага индамайсан, жонгинам?

Ушоққина бўлишига қарамасдан иродаси кучли Жун ҳар доимгидек амrona товуш билан:

– Хўш, нима бўпти? Филип учун нима кийишнинг фарқи йўқ! – деб шартта жавоб берди.

Шу қадар қўпол жавобга ҳеч ким ишонмади. Нима кийишнинг фарқи йўқ эмиш? Йўқ! Йўқ! Хўш, кекса Жолионнинг меросхўри Жунга унаштирилиши билан шу қадар омади чопган анави йигитчанинг ўзи ким экан? У архитектор эди, аммо бунақа шляпа кийиш учун бу сабаб бўйламайди-ку, ахир. Форсайтлар орасида архитекторлар йўқ эди, лекин улардан бири икки архитекторни биларди, лекин бу архитекторлардан

биронтаси ҳам бунақа учрашувга, айниқса, Лондонда мода авжига чиққан пайтда бундай шляпада келишмаган бўларди. Ҳа, шубҳали, ростдан ҳам шубҳали!

Гарчи ҳали ўн тўққизга тўлмаган бўлса ҳам, инжиқлиги билан ном чиқарган Жун бу гапларга унча эътибор бермади, албатта. Ахир жуда бежирим кийинадиган миссис Сомсга укпаринг ярашмабди, деган шу Жун эмасми? Миссис Сомс ҳақиқатан ҳам шундан кейин укпар тақмайдиган бўлди. Жиккаккина Жун андишасизлик билан мана шунақа ишларни ҳам қотирарди. Бироқ на гумон, на хавфсираш, на ошкора ишончсизлик форсайтларнинг кекса Жолионнида йиғилишига халақит берди. Стенхоп-Гейтда ўтказиладиган қабул маросимлари жуда камай-иб кетган, охирги ўн икки йил ичидаги бирор марта уюштирилмаганди. Ҳа, кекса миссис Жолион вафотидан кейин бирор марта ҳам йиғин қилинмаганди.

Стенхоп-Гейтда бунақангичи тадбир ҳеч қачон бўлган эмас. Форсайтлар ўзининг бунақа хилма-хилликларига қарамай, қандайдир зимдан жипслашиб, умумий хавфга қарши шай бўлиб туришарди. Гёё яйловда итни кўриб қолган подадек бир бўлишиб, бегонани янчиб ташлашга ҳозирланишди. Улар яна қанақа совғалар тайёрлаш кераклигини билиш учун ҳам бу ерга келгандилар. Тўёна масаласи одатда: “Николас қошиқ олиб беради, сен нима қилмоқчисан?” тарзида ҳал қилинарди. Аммо кўп нарса куёвга ҳам боғлик-да, ахир. Агар куёв тоза, ҳатто олифтароқ кийинган, кийиниши бадавлатга ўхшаса, унга яхши нарсалар ҳадя этмоқ даркор. Негаки, у яхши нарсалардан умидвор бўлади. Ахийри бориб кимга нима тайинланса, ўшани беришади. Бутун оила жам бўлганида, биржада пулнинг кучи қандай белгиланса, тўёна рўйхати ҳам тахминан шундай тузиларди. Майда-чуйда тафсилотлари эса Бейсуготер-Родда, Тимотининг Энн, Жули, Эстер аммалари турадиган ойналари боққа қараган кенг, данғиллама гиштин уйида ҳал этиларди.

Шляпани эсга олишнинг ўзиёқ Форсайтларни ташвишга солиб қўярди. Сиртига оро беришга шунчалик қизиққан ҳар бир оила учун (бу курдатли бадавлат қавмнинг ўзига хос хислати бўлиб мангу хизмат қиласди) бу ҳолатда ташвишдан бошқа бир нарсани ҳис қилиш нақадар бемаънилил ва хатолик бўларди!

Бу ташвишларнинг айбори нариги эшик олдида Жун билан гаплашиб турарди. Унинг жингалак соchlари хурпайиб турар, бу атрофдаги ҳамма нарса унга ғалати кўринаётган эмасмикан? Бунинг устига у худди бирор нарсадан мийигида кулаётганга ўхшарди.

Жорж укаси Юстасга секингина шивирлади:

– Анави ажаб қароқчи жуфтагини ростлаб қолмасайди ҳали бу ердан!

Кейинчалик миссис Смолл ўзича “ғалати йигит” деб атаган Босини ўрта бўйли, бақувват, юзи оч буғдойранг, мўйлови кулранг бўлиб, янок суяклари бўртиб турарди. Унинг серғудда ясси пешонаси ҳайвонот боғидаги қафасларда турган арслонларнинг пешоналарини эслатар, кўй кўзлари гоҳо паришонлик, шуурсизлик билан боқарди. Бир куни у билан Жунни театррга олиб борган кекса Жолионнинг извошчиси хизматкори билан гаплашиб туриб, Босини тўғрисида:

– Бу одамга сира тушунмайман. Худди яримёввойи қоплонга ўхшайди-я, тавба! – деганди.

Аҳён-аҳёнда Форсайтлардан битта-яримтаси унга яқинроқ борарди-да, Босини атрофида айланиб, унга дикқат билан разм солар эди.

Кимдир бир куни “Қалин соchlари ҳурпайған, табиати ғалати” деб таърифлаган шу қиз – мовий қўзлари чақнаган, чайир юzlари қип-қизил, тилларанг малла соchlари чўзинчоқ юзи ва нозик жуссасига ярашмай, ғалвайиб турган Жун қаллиғи ёнида туриб, уни бекорчи синчковликлардан муҳофаза қиласди.

Форсайтлардан бири бир куни маъжусийлар маъбудасига ўхшатган новча, қадди-қомати келишган аёл хиёл жилмайиб икковини кузатарди. Аёл юмшоқ, кулранг чарм қўлқоп кийган қўлларини қовуштирганча бошини бир ёққа хиёл эгиб турар, унинг яқинида турган эркаклар эса бу хотиржам, жозибали чехрадан кўз уза олмасдилар. Унинг гавдаси хиёл тебранар ва борди-ю шабада эсиб қолгудек бўлса, унинг мувозанатини бузиб юборадигандек кўринарди. Унинг яноклари гарчи қизил бўлмаса ҳам ловуллаб турар, шаҳло қўзлари майин порларди. Лекин эркаклар унинг билинар-билинмас табассум қўнган, савол ва жавоб ибораси яши-ринган лабларига қарашарди: бу лаблар шу қадар нозик, дилрабо ва майин эдики, худди жозиба ва муаттар хид уфуриб турган гул сингари улардан ҳам илиқлик ва хушбўйлик тарапларди.

Ёш келин-куёв индамай кузатиб турган маъбудани сезишмасди ҳам. Дастрлаб архитекторнинг кўзи унга тушди-ю, бу ким, деб сўради. Шундан кейин Жун куёвини сарвқомат аёлнинг ёнига олиб борди.

– Бу Ирэн – менинг энг яқин дўстим, – деди у Босинига, – марҳамат қилиб сизлар ҳам дўстлашиб олинглар.

Ёш беканинг буйруғини эшитиб, улар жилмайиб қўйишиди. Худди шу дақиқада индамай келган Сомс Форсайт сохибжамол аёлнинг ортида пайдо бўлди. Аёл унинг рафиқаси эди ва у Жунга қараб:

– Мени ҳам таништир, – деди.

У Ирэннинг бир ўзини камдан-кам қолдишарди. Ҳатто оқсуякларга хос одатлар уларни бир-биридан ажратиб қўйганда ҳам Сомс қандайдир дили фаш бўлиб уни кузатарди.

Сомснинг отаси Жеймс дераза олдида ҳамон чинни гулдоннинг тамғасини қўздан кечирарди.

– Ҳайронман, қандай қилиб Жолион унаштиришга роли бўлдийкан, – деди у Энн аммага мурожаат қилиб. – Тўй ҳам Худо билади, анча кейинга сурилди, дейишяпти. Босинининг (у биринчи бўтинга ургу берди) ҳеч вақоси йўқ эмиш. Уинифрид Дартига турмушга чиқаётганида ҳар бир пеннини писанда қилганман, яхши қилган эканман, акс ҳолда ҳеч балосиз қолдишарди!

Бахмал креслога энгашиб ўтирган Энн амма Жеймсга қараб қўйди. Амманинг пешонасидаги оқ гажаклар тараф қўйилган, ўн йиллаб ўзгармайдиган бу гажаклар туфайли оила аъзолари вақт қандай ўтганини сезмай қолишарди... Энн амма индамади, у ўзининг кучини йўқотган овозини асраб кам гапираварди. Бироқ виждани безовта қилаётганида Ҳеймсга унинг боқиши ҳар қанақа гапдан ортиқ маънони англатди.

– Ҳа, – деди Жеймс. – Ирэннинг ўз моли, сепи йўқ эди, мен нима ҳам қила олардим? Сомснинг сабри чидамади, бўлажак хотини унинг атрофига шундай гирдикапалак бўлдики, ҳатто озиг кетди.

Жеймс қўлидаги гулдонни жаҳл билан рояль устига қўйди-да, эшик олдида турган бир гуруҳ одамларга қаради.

– Амма, менимча, – деб тўсатдан қўшиб қўйди у, – охири баҳайр бўлади.

Энн амма ундан бу ғалати гапнинг маъносини тушунтириб беришини сўрамади. У укасининг фикрини тушунди. Ирэннинг ўз маблағи

бўлмаганидан кейин, хаёлига келганини қилолмайди-да, чунки мишмишлар юради... у ўзига алоҳида хона сўраганмиш, деган узунқулоқ гаплар ҳам йўқ эмас. Лекин табиийки, Сомс рози...

Жеймс унинг хаёлини бўлди.

– Тимоти қани? – сўради у. – У келмадими?

Энн амманинг қимтинган лабларида майин табассум пайдо бўлди.

– Йўқ, Тимоти ҳеч қаёқка бормасликка жазм этган, ҳозир ҳамма ерда бўйма касали хуруж қилган, у бўлса жуда нозик.

– Ҳа, у ўзини эҳтиёт қиласи, – деди Жеймс. – Мана мен эса ўзимни у каби асрашга илож тополмайман.

Бу сўзларда нима қўпроқ: ҳавасми, ҳасадми ёки нафратланишми, айтиш қийин эди. Тимоти ҳақиқатан ҳам кам кўринарди. Оиланинг кенжаси, касби ноширлик бўлган Тимоти бундан бир неча йил муқаддам, ишлари айни авж олган пайтда бир куни қелиб иши юришмай қолиши мумкин бўлган ҳавфни олдиндан сезиб – тўғри, касод ҳали бошланганича йўқ, аммо кўпчиликнинг фикрига қараганда, албатта бошланиши керак эди – асосан диний китоблар чоп этиладиган нашриётдаги улушини сотиб, кўлга кирган мўмайгина маблағни эса уч фоизли консолига¹ тикиди. Бу хатти-ҳаракати билан у ўзини нокулай ахволга қўйди, негаки, Форсайтларнинг биттаси ҳам тўрт фоиздан камига қаноатланган эмас: бу нокулайлик аста-секин, лекин муттасил шусиз ҳам ўзини беҳад эҳтиёт қиласидан Тимотининг руҳини тушириб юбораётганди. Тимоти аллақандай афсонавий зотга – таъминланган даромад рамзига айланиб қолганди, ахир бусиз Форсайтлар дунёсини тасаввур қилиб бўлмайди-ку. У уйланишдек номаъқулчиликни қилишга журъат этмади, ҳар қанақа шароитда ҳам бола-чақа орттиришни истамади.

Жеймс бармоғи билан чинни гулдонни чертиб, яна гап бошлади:

– Бу ҳақиқий Вустер² эмас. Жолион, бу йигит ҳақида сенга гапиришгандир-а? Билишимча, унинг на дурустроқ иши, на даромади, на бир тузукроқ таниш-билиши бор; аммо мен ҳеч нарса билмайман – менга ҳеч ким ҳеч нима демайди.

Энн амма бош чайқади. Унинг қирғий бурунли қаримсиқ юзи ва ялпок ияги титраб кетди; у ориқ, ўргимчаксимон кафтини қисиб, гўё киши билмас куч йиғаётгандай бармоқларини чалиштириди.

Форсайтларнинг энг каттаси бўлган Энн амма оилада ўзига хос ўрин тутарди. Унча-мунча учраб турадиган тутуриқсиз, худбин Форсайтлар (аслида бошқа яқин қариндошлари ҳам улардан қолишмасди) қаттиқўл Энн аммадан ҳайиқишаради. Бордию, жудаям тутуриқсиз ишлар қилишга тўғри келса, унинг кўзига кўринмай қўя қолишдан бошқа чора тополмасдилар!

Узун оёкларини чалиштириб, ҳамон дераза ёнида турган Жеймс яна гапга тушди:

– Жолион, албатта, ўз билганини қиласи. Унинг фарзанди йўқ... – шу ерга етганда у тилини тишлаб қўя қолди. У Жолионнинг ўғли, Жуннинг отаси, ёш Жолион борлигини, бир вакълар аллақандай бир мураббияни деб хотини ва боласини ташлаб кетиб номаъқулчилик қилганини, ўз ҳаётини расво этганини эслади. – Шуниси ҳам борки, – деб қўшиб қўйишга шошилди Жеймс, – нима қилса қилаверсин, унинг ҳаққи бор. У Жунга қанча бермоқчи экан? Эҳтимол, йилига минг берар, ахир унинг бошқа меросхўри йўқ-ку!

¹ Консоли – муддатсиз ва узоқ муддатли давлат заёмлари.

² Вустер – чиннидан идиш-товоқ ясадиган устахонанинг номи.

Жеймс башанг кийинган, соқол-мўйлови тоза қирилган, тепакал, узун бурни қийшиқ, лаблари дўрдоқ, қалин қошлари тагидан қулранг кўзлари совуқ боқиб турган одамга қўлини узатди.

– Э, Ник, – ғудурлади у, – қалайсан?

Бу күшдек серҳаракат ва ёшига нисбатан ўсиб кетган мактаб боласига ўхшаган Николас Форсайт эди (у бир неча компанияларга директор бўлиб юриб, қонуний йўл билан каттагина сармоя тўплади). У Жеймснинг совуқ кафтига ўзининг ундан ҳам совукроқ бармоклари учини кўйди-ю, шу заҳоти тортиб олди.

– Ёмон, – деди у димоғдорлик билан, – охирги кунларда ўзимни жуда ёмон ҳис қиласяпман, кечалари ухлай олмайман. Нима гаплигини доктор ҳам билмаяпти. Докторнинг ўзи чакки эмас, бўлмаса мен у билан пачакилашиб юрармидим, бироқ ундан ҳисоб-китоб ишларидан бошқасини кўрмаяпман.

– Доктормиш! – деди асабийлашиб Жеймс. – Лондонда қанча доктор бўлса, ҳаммаси мени даволаган. Бироқ бундан нима фойда? Оғизига келганини вайсашиди, вассалом. Мана, масалан, Суизин, ёрдам беришдими унга? Жуда семириб кетибди-ку. Бир қоп гўшт! Нима, сал озишига ёрдам беришибдими? Қараб кўйинг унга!

Норгул, елкалари кенг Суизин Форсайт ғаройиб, ялтироқ нимча сириб, худди тўшдор каптарни книга ўхшаб чиқиб турган кўкрагини кериб, виқор билан уларнинг олдига келди.

– Э-э... Салом бердик, – деди у пўримлардай керилиб, – салом бердик!

Оға-инилардан ҳар бири дардини кичрайтириб айтишга уринишини олдиндан билгани учун қолган иккитасига адоват билан қаради.

– Биз ҳозиргина сен ҳақингда гаплашиб турган эдик, – деди Жеймс, – Сира озмабсан-ку!

Суизин хира, думалоқ кўзларини чақчайтириб, унинг гапларига дикқат билан қулоқ солди.

– Озмабманми? Ҳозирги вазним айни муддао, – деди у бироз олдинга энгашиб, – сизга ўхшаган қилтириқ эмасман! Аммо шу туришда кўкраги кенг кўринмаслигини эслаб, Суизин ўзини орқага ташлади-да, ғўддайиб тураверди, зоро, у савлатдан бошқа ҳеч нарсани қадрламасди.

Энн амма хира тортган кўзларини дам у укасига, дам бу укасига юргутиради. Унинг боқишилари ҳам мулоим, ҳам жиддий эди. Ўз навбатида оға-инилар ҳам Эннга тикилишарди. Кейинги вақтларда опаларининг анча мазаси кетиб қолди. Ажойиб аёл! Етмиш еттига қадам кўйди. Яна ўн йилча яшаса керак, буни қаранг, нимжон бўлса ҳам шунча йил яшапти. Эгизаклар Суизин билан Жеймс бор-йўғи етмиш бешга киришди. Николасни ҳали гўдак деса бўлади, энди етмишга кирди ёки шунга яқинроқ. Ҳаммалари отдек, сира арзи бандалик қиласидиган ери йўқ. Бутун мулклар ичida уларни энг кўп қизиқтирган нарса бу саломатлик эди, албатта.

– Мен анча яхшиман, – давом этди Жеймс, – фақат асаблар ишдан чиқкан. Арзимаган нарсадан дикқатим ошиб кетади. Батга бориб келишга тўғри келади.

– Бат эмиш! – деди Николас. – Мен Херроу-Гейтга бориб кўрдим. Фойдаси бўлмади. Менга денгиз ҳавоси зарур. Ҳаммадан яхшиси Ярмут. У ерда ҳар ҳолда яхши ухлайман-ку.

– Менинг жигарим безовта қиляпти, – шошилмасдан унинг гапини бўлди Суизин. – Манави ерим қаттиқ оғрийди, – деди ва қўлини ўнг биқинига кўйди.

– Кўпроқ ҳаракат қилиш керак, – ғудранди Жеймс чинни гулдондан кўзини узмай. Кейин шошилиб қўшиб қўйди, – менинг ҳам ўша еrim санчиб-санчиб қўяди.

Суизин қип-қизариб куркага ўхшаб кетди.

– Кўпроқ ҳаракат қил, эмиш! – деди у. – Шундок ҳам оёғим тинмайди: клубда ҳеч қачон лифтдан фойдаланмайман.

– Қайдам, – шошиб деди Жеймс. – Менинг ҳеч нимадан хабарим йўқ, менга ҳеч ким ҳеч нима демайди.

Суизин унинг кўзига тик қараб туриб сўради:

– Шу оғриқка қарши нима ичасан?

– Мен, – деб гап бошлади Жеймс, – ҳалиги, суюқ дори...

– Яхшимисиз, буважон?

Жун кўлини чўзганча Жеймсга бошдан-оёқ разм солиб унинг олдида тўхтади.

Жеймснинг чехрасидаги завқ-шавқ шу заҳоти йўқолди.

– Хўш, ўзинг қалайсан? – деди у хўмрайганча Жунга тикилиб. – Эртага Уэлсга жўнайсанми, қаллифингнинг амма-холаларини зиёрат қилмоқчимисан? У ерда ҳозир ёғингарчилик. Бу ҳақиқий Вустер эмас, – деди у гулдонни бармоғи билан чертиб, – анави, мен онангнинг тўйига ҳада қилган сервис жуда аломат эди.

Жун амакилари билан бирма-бир сўрашиб чиқди ва Энн аммасининг олдига келди. Кекса хонимнинг юзи меҳрдан товланди, у ҳаяжонланиб, қизининг яноғидан “чўлп” этиб ўпди.

– Бундан чиқди, роса бир ойга кетар экансан-да, жонгинам?

Жун нари кетди ва Энн амма унинг кетидан ушоққина, келишган қоматига тикилиб колди. Кекса хонимнинг қушникига ўхшаш думалоқ, парда боса бошлаган кулранг кўзлари тарқала бошлаган меҳмонларга аралашиб кетган Жуннинг ортидан маъюс кузатарди; бармоқларининг учи эса бу дунёни тарқ этиш учун куч йиғишга ёрдам бергандек борган сари қаттироқ қисиларди.

Ха, – дилидан ўтказди Энн амма, – ҳамма уни эркалатяпти; уни табриклиш учун шунча одам йиғилди. У жуда баҳтли бўлса керак.

Меҳмонлар кетишга тайёрланишарди. Эшик олдига йиғилган, башанг кийинган докторлар, адвокатлар, биржа корчалонлари оиласидан чиққанлар ва йирик буржуазияга мансуб жамики соҳанинг вакиллари турган тўда ичиди Форсайтлар ҳаммаси бўлиб йигирма фоиздан кўп эмасди, аммо ҳамма Энн аммага Форсайтлар бўлиб кўринарди, – йиғилганлар ўртасидаги фарқ ҳам унчалик катта эмасди-да, – шунинг учун у ҳамма ерда ўз жигарини кўрарди. Унинг ёруғ жаҳони мана шу оила эди, бошқа жаҳонни эса билмасди, эҳтимол, ҳеч қачон билмагандир ҳам. Уларнинг майда сирлари, уларнинг тан соғлиғи, касаллиги, унаштириш ва тўй маросимлари, ишларининг қай тахлитда бориши, қандай қилиб пул йиғишлари – барчаси унинг ўзлиги, жон роҳати, унинг ҳаёти эди, бу ҳаётдан ташқаридаги борлиқ эътибор беришга арзимайдиган воеа ва чехраларнинг ноаниқ, ғира-шира шарпаси бўлиб кўринарди. Вақти келиб бу оламдан ўтганда шуларнинг барини – ўз қадр-қимматини ҳис этиш ва шахсий афзалликнинг бебаҳо туйғуси (ахир ҳеч қайсимиз бусиз яшай олмаймиз-ку) туфайли эришилган барча нарсаларни тарқ этади. Шунинг учун у ўқиниб, тарқ этиладиган шу нарсаларга кундан-кунга батттарроқ ёпишарди. Майли, ҳаёт ундан юз ўгирсин, лекин у сўнгги нафасигача ёпишаверади.

Энн амма Жуннинг отасини, ажнабий аёлнинг ёнига кетиб қолган ёш Жолионни эслади. Эх, унинг отасига ҳам, ҳаммаларига ҳам қанчалик қаттиқ зарба бўлди бу! Бу боладан умид жуда катта эди. Нақадар оғир зарба! Ҳайрият, ҳаммаси силлиқцина, элга ошкор бўлмай тинчили, негаки, Жонинг хотини талоқ хати талаб қилмади. Анча бўлиб қолди шунгаям! Бундан олти йил бурун Жуннинг онаси вафот этгач, ёш Жолион ўша аёлга уйланди. Энди уларнинг иккита фарзанди бор, дейишади. Шундай бўлса ҳам ҳар қалай унинг бу ерга келиш хуқуқидан маҳрум экани Энн амманинг бир вақтлар кўксига тўлиб-тошган бекиёс фахр туйғусига соя солди. У не-не умидлар баҳш этган жиянини ўпид-қучиб яйрашдан энди маҳрум эди. Эх, қанчалар фахрланар эди-я! Шу алам йиллар оша қайсар, кекса Энн амманинг юрагини изтиробга соларди. Энн амманинг кўзи намланди. У астагина нафис батист рўмолча билан ёшини артди.

– Хўш, сиз нима дейсиз, аммажон? – кимнингдир товуши эшитилди ортидан. Елкаси тор, бели ингичка, тоза қирилган юзи узунчоқ, лекин шунга қарамай қиёфаси тунд одамга ўхшайдиган Сомс Форсайт худди уни яхшилаб кўриб олмоқчи бўлгандаи, бурни устидан Энн аммага кўз қирини ташлаб турарди.

– Бу гапларга сиз нима дейсиз? – сўради у.

Энн амма ғурур билан унга тикилди. Ёш Жолион қадрдон уясини тарқ этиб кетганидан кейин жиянлар ичидан энг каттаси Сомс унинг арзандаси бўлиб қолган эди. Энн амма Сомсни оила руҳининг – ўзи кўриқлайвериб чарчаган руҳнинг ишончли посбони деб биларди.

– Йигитча учун жуда ҳам яхши бўлди, – деди у. – Кўриниши бинойидек. Лекин дилбандимиз Жунга шунаقا куёв лозиммиди, шунисига ҳайронман.

Сомс тилла суви юритилган шамдон ушлаб қўйди.

– “Гах” деса қўлига қўнадиган қиласи уни, – деди у ва ҳеч кимга сездирмай бармоғининг учини ялаб, шамдоннинг жимжимадор қуббасини артиб кўрди – асл қадими лок, энди бунақасини ишлатишмайди. Жобсонда¹ бунга яхшигина баҳо беришади! – Бу гаплар кекса аммасига далда бераётганини сезгандек Сомс ўз гапидан роҳатланарди. У камдан-кам холларда шундай сергап бўларди. – Мен ўзим жон-жон деб олардим бундай нарсани, – қўшиб қўйди у, – қадими лок ҳамиша юқори баҳода юради.

– Сен бунаقا нарсаларнинг фарқига борасан, – деди Энн амма. – Хўш, Ирэн қалай, соғми?

Сомснинг лабларидаги табассум шу заҳоти сўнди.

– Тузук, – деди у, – уйқусизликдан шикоят қиласи-ю, ўзи мендан кўра яхши ухлайди. Кейин эшик олдида Босини билан гаплашиб турган хотинига қараб қўйди.

Энн амма уҳ тортди.

– Балки, – деди амма, – хотинингнинг Жун билан камроқ қўришиб тургани маъқулмикан. Жунимиз жуда шартаки-да!

Сомс қизарип кетди, агар Сомс қизарса бу қизиллик дарров қаншарига ўтарди-да, ҳаяжонини сездириб, тамғага ўхшаб тураверарди.

– Билмадим, бу қақажоннинг нимаси унга ёқиб қолдийкан, – деди қизишиб Сомс, аммо энди ўzlари ёлғиз эмасликларини пайқаб тескари қаради ва яна шамдонни силайверди.

¹ Жобсон – ким ошди савдоси зали.

– Жолион яна битта ҳовли олганмиш, дейишади, – Сомс ёнгинасидан отасининг товушини эшилди. – Унинг пули кўп бўлса керак, қаерга қўйишини билмайди! Монпелье-Скверда шекилли, Сомсга яқин эмиш! Менга бўлса ҳеч нима дейишмади, Йрэн менга ҳеч қачон ҳеч гапни айтмаган.

– Жуда ажойиб жой, меникидан икки дақиқалик йўл, – Суизиннинг овози эшитилди, – клубга бўлса мен саккиз дақиқада бораман.

Форсайтлар учун ҳовли-жойнинг қаердалиги жуда муҳим бўлиб, бунинг ажабланадиган ери ҳам йўқ эди, чунки ҳовли-жой уларнинг ҳаётий ютуқлари моҳиятини ўзида гавдалантириб турарди.

Уларнинг оталари аср бошларида Лондонга келиб қолган дорсетширлик фермер эди.

Унинг яқинлари “Такаббур Доссет Форсайт” деб аталган кимсаннинг касбу кори ғишт терувчилик бўлиб, кейинроқ қурилиш ишлари бўйича пурратчилик даражасига кўтарилмоқчи эди. Ёши ўтиб қолганда у Лондонга келади-да, то вафотига қадар қурилишларда ишлайди ва Хайет қабристонига дафн этилади. Ота вафотидан кейин ўн фарзандга ўттиз минг фунт стерлингдан ортиқроқ пул мерос қолади. Аҳён-аҳёндагина бир эслаб қўядиган кекса Жолион отаси тўғрисида гапириб: “Отамиз тиришқоқ эди, худди тараашланмаган чақмоқ тош эди”, – деб қўярди. Форсайтларнинг иккинчи авлоди бундай ота уларга айтарли шон-шараф келтирмаслигини пайқашганди. Улар “Такаббур Доссет”нинг феълатворидан илғаб олган аслзодаларга хос биттагина фазилат бу унинг мадерага¹ ихлос қўйгани эди, холос.

Оила тарихини яхши биладиган Эстер амма отасини шундай таърифларди:

– Эсимни танибманки, унинг бирор иш билан шуғулланганини билмайман. Ҳеч ҳам эсимда йўқ. У... э-э... унинг ҳовли-жойлари бор эди, қарофим. Сочининг ранги, тахминан Суизин амакингникига ўхшарди: анча миқтидан келган одам эди. Бўйи баландмиди, дейсанми? Йў-ўқ, унчалик эмас. (“Такаббур Доссет”нинг бўйи беш футу² беш дюйм³, юзини ҳуснбузар босганди). Икки ёноғи қип-қизил. Эсимда, доимо мадера ичарди. Яхиси, Энн аммангдан сўра. Унинг отаси нима иш қиларди, дейсанми? Унинг... э-э... Дорсетширда, кирғоқ бўйида ерлари бўларди.

Кунлардан бир кун Жеймс ота-боболари туғилиб ўсган ерларни ўз кўзи билан кўриш ниятида Дорсетширга жўнади. Бориб қарасаки, иккита эски ферма, арава ғилдираклари ним пушти ерга чуқур из солган, тегирмонга олиб борадиган йўл, тўсиқларига тирговуч қўйилган кичкина черков ва ёнгинасида яна битта ундан ҳам кичик, ҳаммаёғини мөгор босган бутхона бор экан. Тегирмонни ҳаракатга келтирадиган ариқ суви шариллаб оқиб, майда ариқчаларга таркалади. Унинг атрофика эса чўчқалар юришарди. Бутун атрофни сийрак туман босганди. Бурунги Форсайтлар асрлар давомида ҳар якшанба денгизга қараганча лойга ботиб, мана шу сойлиқдан черковга секин-аста бориб келган бўлишса керак.

Жеймс меросдан умидвор бўлдими ёки ўша ёқдан дикқатга шоён бирор нарса топарман деб хаёл қилиб у ерга бордими – бу номаълум. Лекин Жеймс у ердан Лондонга хафсаласи пир бўлиб қайтди ва иши юришмаганини нима билан бўлса ҳам силлиқлашга ҳаракат қилди.

¹ Мадера – вино тури.

² Фут – 30 см 479 мм.

³ Дюйм – 25,4 миллиметр.

– Арзигулик ҳеч нарса йўқ у ерда, – деди у, – дунё каби қўхна бир қишлоқ экан.

Қишлоқнинг дунё каби қўхналиги ҳаммасига тасалли берди. Баъзан ҳаддан зиёд тўғрисўзлиги тутиб кетган Жолион ўзининг аждодлари ҳақида: “Эҳ, иоменлар, иоменлар, ҳар қалай, уларнинг таги паст бўлган”, деб қўярди. Шундай деса ҳам, у худди кўнгли жойига тушадигандек “иоменлар” сўзини такрорлайверарди.

Форсайтлар ўз ишларини шунчалик йўлга қўйиб юборган эдиларки, очигини айтганда, “казо-казолар” бўлиб олишганди. Улар ўз бойликлари ни Тимотига ўхшаб консолига эмас, балки бошқа турли-туман қимматли қофозларга айлантиришарди, чунки уларни дунёда ҳамма нарсадан ортиқ кўрқитадиган нарса бу – уч фоизли фойда эди. Бундан ташқари, улар суратлар тўплашар ва бетоб бўлиб қолган хизматкорларига фойдаси тегадиган хайрия жамиятларига аъзо ҳам бўлишар эди. Қурувчи отанинг касби кори болаларига ҳам юқсанди. Уларнинг аждодлари бирон-бир ибтидоий мазҳабга аъзо бўлишган бўлса керак. Эндиғи Форсайтлар эса турган гапки, инглиз черковлари қучоғида ўсдилар ва хотин, бола-чақалари пойтахтнинг энг ҳашаматли ибодатхоналарига мунтазам қатнашларини кузатиб юрдилар. Уларнинг тоат-ибодатлари заррача шубҳа туғдирса, бу Форсайтларни қаттиқ ташвишга соларди. Улардан баъзилари черковдан доимий ўрин олиб, пул тўлаб қўйишар ва бу билан Исо таълимотига бўлган хайриҳоҳликларини амалда изҳор этар эдилар.

Форсайтларнинг уй-жойлари Хайд-парк атрофида, бир-биридан маълум бир масофада жойлашган эди. Бу уйлар Форсайтларнинг ният-орзулари жамуљам бўлган жой – Лондоннинг ажойиб қўксини чайир кўлларидан чиқариб юбормаслик ва оила обрўсини тўкиб қўймаслик учун худди сокчилардек ундан кўз-кулоқ бўлиб турардилар.

Кекса Жолион Стэнхоп-Плейсда, Жеймс оиласи билан – Парк Лейнда, Суизин – Хайд-парк ёнидаги кимсасиз дабдабали тўқ-сариқ ҳаворанг уйида, (у уйланган эмас, йўқ, кечириб қўясиз!) Сомс хотини билан Найт-сбрит яқинидаги ўз маконида, Роджер Принсез-Гарденса (Роджер ўша, тўрт ўғлига янги ҳунар ўргатмоқчи бўлиб, шу ниятини амалга оширган машхур Форсайт эди. “Энг яхши иш бу кўчмас мулк орттиришdir! – дерди у. – Мен факат шу билан шуғулланаман!”). Хэйменлар (миссис Хэймен – Форсайтларнинг турмушга чиқкан биттаю битта сингиллари) Кэмпен-Хилл чўққисида, жирафага ўхшаган баланд уйда туришарди, бу уй шунчалик баланд эдики, унга қарасанг, бўйнинг қийшайиб колиши ҳеч гап эмасди. Николас оиласи билан Лэдброк-Гровда, арzon гаровга олинган кенг ҳовлида ва ниҳоят, Тимоти Бейсуотер-Родда, ўз қарамогидаги Энн, Жули ва Эстерлар билан бирга яшарди.

Шу чоққача ўз хаёли билан банд бўлган Жеймс мезбон акасидан Монпелье-Сквердаги ҳовлига қанча тўлаганини сўради. Унинг ўзи ҳам мана икки йилдирки, шунга ўхшаш ҳовли-жойга кўз ташлаб юрган экан-у, лекин жуда қиммат сўрашяпти экан. Кекса Жолион ўзининг хариди ҳақида батафсил гапириб берди.

– Битим йигирма икки йилгами? – такрорлади Жеймс. – Ҳа, бу ўша, мен олмоқчи бўлган ҳовли. Жуда қимматга олибсан!

Кекса Жолион хўмрайди.

– Менга керак эмас, – деди шошиб Жеймс. – Баҳоси тўғри келмайди. Ўша ҳовлини жуда қимматга олганингни Сомс ҳам билади. У тасдиқлаши мумкин. Ҳар қалай Сомснинг фикрида жон бор.

– Унинг фикри билан неча пуллик ишим бор, – деди кекса Жолион.
 – Ҳа, сен доим билганингни қиласан, – деб ғудранди Жеймс, – лекин Сомснинг фикри бамаъни эди. Ҳа, майли, яхши қол! Биз Ҳарлингемда бироз айланмоқчимиз. Жун Уэлсга кетармиш, деб эшитдим. Бир ўзинг зерикиб ўтириб нима ҳам киласан, эртага бизникига бора қол.

Кекса Жолион Жеймснинг таклифини рад этди ва уларни эшиккача кузатиб қўйди, ўзининг жаҳли чиққанини ҳам унтиб, уларнинг фойтунга ўтираётганига қараб, қўзини қисиб қўйди: новча, кўркам, қўнфир сочли миссис Жеймс билан Йрэн ёнма-ён рўпарага қараб ўтириди. Йрэн Жеймснинг чап томонида эди, иккала эркак – ота-ўғил худди ожизаларни қўриқлашаётгандек уларнинг қаршисига ўтиришди. Кекса Жолион уларнинг жўнаб кетишини кузатиб турди. Улар чурқ этмай йўлга тушиши, қуёш чараклаб турарди. Фойтун силкинганида улар ҳам пружинали ёстиқчаларда чайқалиб боришарди.

Жимликни миссис Жеймс бузди:

– Шу ҳам зиёфат бўлди-ю! – деди у.

Сомс бош ирғади ва ярми юмуқ қовоқлари остидан унга қарадида, Йрэннинг ўзига сирли боқиб турганини сезиб қолди. Форсайтлар оиласининг барча аъзолари тўда-тўда бўлиб кекса Жолионнинг қабул маросимидан қайтаётганларида худди шу гапни айтишлари турган гап эди, албатта.

Тўртинчи ва бешинчи инилар Николас билан Роджер охирги меҳмон билан бирга чиқишиди ва Хайд-парк бўйлаб Прэд-стритдаги ер ости темир йўли станциясига қараб жўнашди. Барча улуғ ёшдаги Форсайтлар каби уларнинг ҳам отлари бўлиб, иложи борича ёлланган фойтунлардан фойдаланмасликка ҳаракат қиласидилар. Июнь ойининг баҳаво куни эди, боғдаги дараҳтларнинг барглари кўм-кўк яшиш турарди, бирок оға-инилар сайр ва сухбатга рух баҳш этаётган табиатнинг бу ҳадясини сезишмасди шекилли.

– Ҳа, – деди Роджер. – Сомснинг хотини жуда ҳам гўзал. Лекин айтишларича, иккови унча чиқишиолмас эмиш.

Роджернинг пешанаси кенг ва юзининг ранги бошқа Форсайтларга нисбатан тоза эди. У оч ранг кўзларини тикиб, йўл четидан қатор кетган уйларнинг олд томонини томоша қилиб борарди. Ҳар замонда Роджер соябонини кўтарар ва ўзи айтгандек “уларни белгилаб”, соябон билан уйларнинг баландлигини ўлчаб кўтарди.

– Хотинининг ўз маблағи йўқ, – деди Николас.

Николас бадавлат қизга уйланди, бу эрга теккан хотинларнинг молмулки ҳақидаги қонун кучга кирмаган анави ажойиб даврда бўлган эди, шу боисдан Николас хотинининг сепини жуда жой-жойига қўйиб ишлатганди.

– Унинг отаси ким экан?

– Фамилияси Эрон, ўзи профессор экан.

Роджер бошини чайқади.

– Ундей бўлса пулдан дарак ҳам йўқ экан, – деди у.

– Онасининг отаси цемент билан савдо қилган, дейишади.

Роджернинг чехраси очилди.

– Лекин бизнеси синган экан, – давом этди Николас.

– Эй, бундок дегин! – деди Роджер. – Шу хотини туфайли Сомснинг боши кўп ғалвага қолади ҳали. Шу гапим эсингда турсин, ғалвага қолади, бу хотиннинг баъзи қиликлари ажнабийларникига ўхшаб кетади.

Николас лабини ялади.

– Жуда чиройли-да, – деди у ва “йўлни бўшат” дегандек кўча супурвчига қўл силтаб қўйди.

– Шундай хотинни қаёқдан топдийкин-а? – сўради тўсатдан Роджер.

– Кийим-кечакларининг ўзи ҳам ҳазилакам турмаса керак!

– Энн менга айтганди, – жавоб берди Николас. – Сомс ўшани деб эсҳушини йўқотиб кўйган экан. Қиз беш марта йўқ, деб қайтарган эмиш. Менимча, Жеймс ўшалардан ташвиш тортади.

– Эй! – деди Роджер яна. – Жеймсга ачинасан, киши. Дарти туфайли оз-мунча азоб чекканмиди.

Унинг қизил юzlари пиёда юришдан баттар қизариб кетди, у соябонини тез-тез кўтара бошлади. Николаснинг юzlари ҳам мамнунликдан ёришиб турарди.

– Менимча, юзи жуда рангпар, – деди у, – аммо қомати келишган!

Роджер индамади.

– Менимча, кўриниши жуда олийжаноб, – деди ниҳоят у. Бу Форсайтлар лугатида энг олий мақтов эди. – Анави ўспирин Босинидан бирор бамаъни иш чиқишига ақлим бовар қилмайди. Буни қарангки, Баркитницида уни жуда истеъодли дейишади. Инглиз архитектурасини яхшилаш ниятида эмиш, э, бунақада пул топиб бўларканми? Бу ҳақда Тимоти нима деркин, шуни эшитмоқчидим.

Улар кассага келишди.

– Сен қайси классда кетасан? Мен – иккинчиди.

– Иккинчини бошимга ураманми, – деди Николас, – бир балони юқтириб олиш ҳеч гап эмас.

Николас Ноттинг-Хилл-Гейтгача биринчи классга, Роджер эса Саут-Кенсингтонгача иккинчи классга чипта олди. Бир дақиқадан сўнг поезд келди, оға-инилар хайрлашиб, ҳар ким ўз вагонига чиқиб кетди. Икковиям мен билан узоқроқ ҳамсухбат бўлиш учун иним кундалик тартибидан воз кечиб турса бўлармиди, деб бир-биридан хафа бўлди. Роджер: “Ник эшақдек қайсар, ҳамиша ҳам ўзи шунақа!” – деб ўйласа, Николас: “Роджер доим нолигани-нолиган!” – деб дилидан ўтказди.

Бу оила аъзолари тантиқлик қила олмасдилар. Форсайтлар томонидан эгалланган ва уларнинг барчасини маҳлиё этиб кўйган улкан Лондон тантиқлик қилиб юришга қўйиб қўярмиди?

II

КЕКСА ЖОЛИОН ОПЕРАГА БОРАДИ

Эртаси куни соат бешда кекса Жолион ёлғиз ўзи сигара чекиб ўтирас, ёнидаги кичкина столчада бир финжон чой ҳам турарди. У ўзини хорғин ҳис этарди, шунинг учун сигарасини чекиб бўлмасданоқ пинакка кетди. Бошига пашша қўнди, ок мўйловлари тагидаги устки лаби чўччайиб турарди. Сигара томирлари бўртиб чиқсан, буришган қўлидан сирғалиб, совуқ каминга тушди-да, ўша ерда ёниб тамом бўлди.

Кўча кўринмаслиги учун деразасига рангли ойналар солинган, унча катта бўлмаган ним қоронғи кабинет қизил ёғочдан ясалган, тўқ яшил баҳмал қопланган ўйма нақшли жиҳозлар билан тўлдирилган эди. Кекса Жолион бу жиҳозлар ҳақида бир неча бор гапириб, бир кунмас-бир кун

улар учун мўмайгина пул тўлайдилар ва буни хеч қанақа ажабланарли ери йўқ, деганди.

У вақти келиб, бу нарсалар учун қачонлардир тўлаган пулидан ортиқроқ олишини ўйлаб, дили яйрарди.

Форсайтлар уйининг оддий хоналарига хос қуюқ долчинсимон ранглар ичида баланд суюнчиқли кресло ёстиқасига суюнган Жолионнинг Рембрантга ўхаша сочи оқ, боши катта қиёфасини фақат унинг ҳарбийча мўйлови бузиб турарди. Деярли ярим аср илгари, ҳали уйланмаган чоғида олган қадимий соат бир зайлда чиқиллаб, кекса хўжасининг ўтган умри дақиқаларини ҳисобларди.

У бу хонани сира ёқтирамасди ва агар бурчакда турган япон қутичасидан сигара олишга кирган чоғларини ҳисобга олмаганда, бу ерга хеч қачон мўраламасди ҳам, энди хона ундан ўч олаётганди.

Унинг туртиб чиқкан чаккалари, ёноқлари ва ияги – барчаси ухлаб ётганда тортишиб-буришиб, кекса Жолионнинг чиндан ҳам қариб қолганлигидан далолат бериб турарди.

У уйғонди. Жун кетди! Жеймс унга ёлғиз зерикб қоласан, деганди. Жеймс аҳмоқроқ эди. У Жеймсни доғда қолдириб уй сотиб олганини хузур қилиб эслади. Ажаб бўпти, хасисликнинг жазоси бу, фикри-зикри пулда. Ёки ростдан ҳам қиммат олдимикин-а? Бошдан-оёқ таъмирлаш керак. Шуни комил ишонч билан айтиш мумкинки, то Жун масаласи бирёқлик бўлмагунча, қанча пули бўлса, ҳаммаси керак бўлади... Унаштиришга розилик бермаслик керак эди. Жун анави Босини билан Бейнзларникида – Бейнз ва Байлдбой деган меъморларникида танишган. Афти қари хотиннинг юзига ўхшайдиган Бейнз – Босинига почча, холасининг эри экан. Ўшандан бери Жун қайлифи ортидан ютургани-ютурган, бир нарсани миясига қўйиб олдими, тамом, уни тўхтатиб бўлмайди. У мудом аллақандай “бечоралар” билан ўралашиб юради. Ҳамёнида бир мириси йўқ, ҳаётда ҳали минг хил қийинчиликларга дуч келиши эҳтимолдан холи бўлмаган ўша bemuloхaza, fўr йигит билан бир ёстиққа бош қўйишга интилиб эси кетяпти.

Жун бир куни ҳовлиқиб кириб келди-да, ҳар доимгидек томдан тараша тушгандай қилиб бор гапни тўкиб солди, тағин тасалли бергандек қўшиб қўйди:

– Фил жуда ҳам ажойиб одам, у ҳафталаб фақат какао ичиб кун кўра олади.

– Нима, у сени ҳам фақат какао ичиб кун кўргин деяптими?

– Йўғ-эй! У энди йўлини топиб олади.

Кекса Жолион учлари сарғайиб кетган мўйловлари остидан сигарасини олди ва Жунга, қалбини ўзига бутунлай ром қилиб олган шу момиқ пардай набирасига қараб қўйди. Нимасини айтасан, ахир у бу “йўл”нинг қандайлигини набирасидан кўра кўпроқ билади-ку. Лекин Жун унинг тиззаларини қучоқлади-да, юзларини суриб, мушукдек суйкаланиб илтижо қилди. Шундан кейин Жолион сигара кулини қоқиб, бақириб кетди:

– Баринг бир гўр, мурод-мақсадингга етмагунча кўнгилларинг ўрнига тушмайди. Агар пешонанг шўр бўлса, азобини тортмай иложинг йўқ. Мен қўлимни ювиб қўлтиққа урдим.

У чиндан ҳам кўлинини ювиб қўлтиққа урди, Босини хеч бўлмаса йилига тўрт юз фунт топадиган бўлгандагина тўйга рухсат берилади, деб шарт қўйди.

– Сенга кўп нарса беролмайман, – деди у, (бу гапни Жун биринчи

эшитиши эмас.) – Балки анавинда, ҳаҳ, оти нимайди? Какаога етарли пул бордир?

Шу ғавғолар бошлангандан бери у Жунни деярли кўрмаганди. Ҳа, ишларнинг мазаси йўқ. Жолион набирасига бир талай пул бериб, шу билан ўзи сира билмаган одамни бойвачча килиб ўйнатиб қўйишни хаёлига ҳам келтирмасди. Бундай ишларни у илгари ҳам кўрган, лекин бундан бирор тайнинли натижа чиққан эмас. Ҳаммадан ёмони шу эдикни, Жунни раъиидан қайтаришга заррача ҳам умид қолмаганди, у ўлгудек қайсар, асли болалигидан шундай эди. Бу ишлар нима билан тугашини Жолион тасаввур ҳам этолмасди. Кўрпангга қараб оёқ узат, дейдилар. То Босинининг шахсий даромади борлигига ишонч ҳосил қилмагунича у бўш келмайди. Пул ҳақида заррача тушунчага эга бўлмаган одам билан Жун ҳали кўрадиганини кўриши кундай равшан. Унинг ховлиқиб Уэлсга – Босинининг холалариникига кетганига келсак, Жолионнинг ишончи комилки, холалари ўтакетган bemaza кампиршолар, вассалом.

Кекса Жолион ўрнидан қимирламай, тўғри деворга қараб ўтирас, агар кўзи очиқ бўлмаса, уни ухлаб ўтирибди деб ўйласа бўларди... Қаранг-а, анави мишиқи Сомс унга маслаҳат берармиш-а! Бу мишиқи нуқул бурнини кўтариб юарди ўзи! Ҳали қарабсизки, у мулкдор ҳам бўлиб олади, шаҳар четида иморат ҳам солади! Мулкдор! Ҳм! Ҳудди отасининг ўзи, қаердан кўпроқ фойда чиқаркин, деб найранг ишлатади, беандиша муттаҳам!

Кекса Жолион ўрнидан турди, ғаладон олдига бориб, шошилмай яқиндагина юборилган кутидан сигара олиб, портсигарани тўлдира бошлиди. Сигаралар ёмон эмас, анча арzon, лекин ҳозирги вақтда яхши сигара тополмайсан, ҳозирги сигараларни илгаригилари билан солиштириб бўладими? Хэнсон ва Брижерлардан олинадиган “Сьюперфайнос”ларчи! Ана уларни сигара деса бўларди!

Бу хаёл уни худди хиёл сезилаётган ҳидга ўхшаб ўтмишга, тушдан сўнг сигара тутатиб, Ричмонддаги “Тахт ва салтанат ҳассаси” пешайвонида Николас Трефри, Трэкуэр, Жек Хэлинг ва Антони Торнуорсилар билан ўтирган ажойиб оқшомларга олиб кетди. Қанақа ажойиб сигаралар бўларди у вақтларда! Бечора Ник ўлиб кетди, Жек Хэлинг ҳам ўтиб кетди бу оламдан. Трэкуэр-чи, унинг бошига хотини етди. Торнуорси бўлса кейинги вақтларда анча чўкиб қолибди (иштахаси шу бўлса бунинг ажабланадиган ери йўқ).

Шу улфатлардан (агар Суизинни ҳисобга олмаса) битта ўзи қолди, шекилли, Суизин бўлса шундай семириб кетганди-ки, уни ҳисобга қўшмаса ҳам бўлади.

Бу ишлар бир вақтлар бўлганига ишониш қийин, у ҳалиям ўзини қирчиллама йигитдек хис этарди! Кекса Жолион сигара санаб туриб хаёлидан ўтказган фикрларнинг энг оғири, энг аччиғи шу эди. Сочлари оқариб, ёлғизлик азобини тортса ҳамки, у ўзини ёшдек сезарди, юраги бақувват эди. Э, анави Хэмстед-Хисда ўтказиладиган якшанба кунларичи! Ӯшанда ёш Жолион у билан бирга Спэнъярдс-Род орқали Хайгет, Чайлдс Хиллга бориб сайр этишарди, яна “Жек Соломини қасри”да овқатланиш учун Хис орқали орқага қайтишарди. Қанақа ажойиб сигаралар бўларди у вақтларда! Ҳаво-чи, ҳаво! Эндигиси билан сира тақкослаб бўлмайди.

Жажжи Жун беш яшарлигига у ҳар якшанба анави меҳрибон аёллар – онаси ва бувисидан сўраб, қизалоқни ҳайвонот боғига олиб борарди

ва соябонининг устига булочкалар қўйиб, Жун яхши қўрадиган айик қафасига тиқарди. Ўшанда қанақа хушбўй сигаралар бўлар эди-я!

Сигаралар! У шу чоққача ҳам ўзининг нозик дидини, эллигинчи йилларда одамлар бир мезон деб билган ва кекса Жолион ҳақида: “Ха, Форсайт! Э, бунака чашнанини бутун Лондонда тополмайсан!” – деб гапириб юрадиган машхур дидини ҳали ҳам йўқотмаган эди. Бу нозик дид ўз эгасига ва машхур “Форсайт ва Трефри” чой фирмасига бир қадар давлат келтирди, бошқа хеч кимда топилмайдиган бу ажиб хушбўй чой жуда ажойиб эди. Ситидаги “Форсайт ва Трефри” фирмаси сирли ишлари ва уддабуронлиги билан ҳам ном чиқарганди, бу фирма маҳсус кемалар ҳақида маҳсус портларда маҳсус шарқ савдогарлари билан битимлар тузарди.

Фирма ўз вактида хўп ишлади! Ўшанда қандай ишлашни билишарди! Эндигина она сути оғзидан кетмаган гўдаклар бу сўзнинг маъносини тушуниб етишлари гумон. У фирманинг икир-чикиригача хабардор эди, фирмада нималар бўлаётганини биларди, баъзан кечалари қолиб ҳам ишларди. У агентларни ҳамма вакт ўзи танлаб олар ва бу билан фахрланарди. Кўпинча ютуқларимнинг сир-асорори одамни танлай билишимда, дерди, бу унга чиндан ҳам ёқарди. Шунчалик қобилиятга эга бўлган одам учун бу унча муносиб мавқе эмасди, албатта. Ҳатто ҳозир ҳам, фирма “Лимитэд компани” деб қайта тузилган ва унинг ишлари тобора ортга қараб кетаётган бўлса-да (у ўз акцияларини аллақачон жойлаштириб қўйган), кекса Жолион ўша вақтларни эсласа юраги туз сепгандай ачишиб кетади. Умрини нақадар соз ўтказса бўлар эди-я! Ундан ажойиб адвокат чиқиши мумкин эди! Ҳатто баъзан “Ўз номзодими парламентга қўйсам нима бўларкин?” – деб ўйлаб қўярди. Николас Трефри неча марта: “Жо, агар ўзингни бунчалик асраб-авайламасанг, истаган нарсангга эришардинг!” – деганди. Э, биродарим Ник! Жуда ажойиб, лекин бегам, парвойи фалак одам эди. Ҳаммага маълум ва машхур Трефри. Ахир жонини аямаган ўзи-ку. Мана, ўлди-кетди. Кекса Жолион чайир қўллари билан сигараларини қайтадан санаб чиқди ва кўнглида: “Чиндан ҳам ўзимни ҳаддан зиёд авайладиммикин-а?” деган шубҳа ғимирлади.

У тамакидонини ички чўнтағига солиб, сюргутининг тугмаларини қадади ва оғир одим ташлаб, қўли билан панжарани ушлаганича баланд зинапоядан ўз ётоқхонасига кўтарилиди. Уй ҳаддан ташқари катта. Жун турмушга чиқса, борди-ю, ростдан ҳам ўша одамга эрга тегса, – энди бунга шубҳа йўқ, – ўшанда бу катта уйни ижарага кўяди, ўзи эса чоғрок бир хонадонни ижарага олиб кўчиб чиқади. Қиладиган ишининг тайини бўлмаган бир гала малайларни сақлаб нима зарур?

Кўнгироқ чалган эди, узун бўйли, серсоқол, юрганини киши сезмайдиган, оғзига талқон солгандек миқ этмай юрадиган малай кирди. Кекса Жолион унга фракини тайёрлашни буюрди, овқатланиш учун клубга боради.

– Фойтун вокзалдан қачон қайтди? Соат иккидами? Унда олти яримда тайёр бўлсин, айтинг.

Роса соат еттида кекса Жолион кириб борган клуб яхши давраларни бошдан кечирган йирик буржуазиянинг сиёсий муассасаларидан бири эди. Лекин извогарлар клубнинг куни битиб қолди, деб гап тарқатишларига қарамай ёки шу фисқу фасодлар туфайлими, клуб ҳамон бирдек ишлаб турарди. “Нифок” ҳадемай ёпилади, деб жаврайвериш

ҳамманинг кўнглига текканди. Кекса Жолион ҳам шундай дерди-ю, аммо ўзи бу холатга клуб муҳлисларининг жигира тегадиган лоқайдлик билан қаради.

– Нега сен анави ердан кета қолмайсан-а? – деб сўрарди кўпинча Суизин ич-ичидан куйиб-пишиб. – “Полиглот”га ўтиб қўя қолсанг бўлмайдими? Ўзимизнинг Хайдсик виномизга ўхшаган винони бутун Лондонда бир шишиасини йигирма шиллингдан камига тополмайсан, – кейин у товушини пасайтириб илова қилди, – Атиги беш минг дюжина қолди. Худонинг берган куни ичиб ётибман.

– Ўйлаб кўраман, – жавоб берарди кекса Жолион, бироқ ҳар гал шуни ўйлаганида унинг олдида эллик гинея кириш бадали ва клубга аъзо бўлиш учун тўрт-беш йил кутиш кераклиги кўндаланг турарди. Шундан кейин кекса Жолион яна хаёл суриб юраверарди.

Бирдан либерал бўлиб олиш учун энди у анча қартайиб қолганди, ўз клубининг сиёсий ақидаларига кўпдан бери ишонмай қўйган, ҳатто уларни ошкора “сафсатабозлар” деб атарди ҳам, аммо нуктаи назарлари бутунлай қарама-қарши бўлса ҳам, клуб аъзоси бўлишдан ҳузур қиласади. Кекса Жолион бу ерга қўп йил бурун, тижорат билан шуғулланиши сабаб бўлиб, “Турли-туман” клубидан сайловдан ўтмай қолгандан кейин аъзо бўлган эди, шунга қарамай, доимо бу муассасадан нафратланиб юради. Худди бошқалардан кам ери бордай! Кекса Жолионнинг ўзини қабул қилган клубдан нафратланиши табиий эди, албатта. У ердаги одамлар ўртамиёна бўлиб, кўплари ситилик биржа даллоллари, адвокатлар, кимошди савдоси ходимлари, ҳар хил пасткашлар эди! Кўпчилик сингари иродаси кучли, лекин бирон жиҳати билан ярқ этиб кўзга ташланмайдиган кекса Жолион ўзи мансуб бўлган синф ҳақида унча яхши фикрда эмасди. Кекса Жолион бу синфнинг ижтимоий ва бошқа ҳар қандай қонунларига амал қилса-да, дилида бунаقا одамларни қаланғи-қасанғилар деб атарди.

Адоғи йўқ ўй-хаёллар билан ўтган йиллар унинг “Турли-туман”да учраган мағлубияти ҳақидаги хотираларни секин-аста ёдидан кўтарди, энди бу маскан унинг назарида энг яхши клубга айланганди. Жолион аллақачон клубининг аъзоси бўлиб олиши мумкин эди, лекин унинг кафил турган одами Жек Хэринг ишларнинг шундай пачавасини чиқариб юбордики, кекса Жолион номзодига қарши чиқиб, қандай хатога йўл кўйишаётганини клубдагиларнинг ўзлари ҳам тушунмай қолишиди. Ахир унинг ўғли Жони шу заҳотиёқ қабул қилишиди-ку ва эҳтимол, ўғли шу чоққача ҳам ўша ерга аъзо бўлса ажаб эмас. У ўғлидан саккиз йил бурун ўша клуб орқали мактуб олганди.

Кекса Жолион кўп ойлардан бери клубида қорасини кўрсатмасди, шу давр ичida клуб биноси пуллаш мақсадида эски уй ёки кемаларга пардоз бергандек ола-була қилиб наридан-бери таъмирланганди.

“Чекадиган хонани мохов қилишибди, – деб ўйлади у. – Ошхона яхши чиқибди”.

Ошхонанинг у ер-бу ерига оч яшил ранг ишлатилиб, жигар рангга бўялгани унга ёқди.

Кекса Жолион овқат буюрди-да, бундан йигирма беш йил бурун ёш Жолион билан бирга кириб ўтирадиган ўша бурчакдаги столчага ўтирди, бу ўша столча бўлса ҳам ажаб эмас (салкам радикализм қоидалари ҳукмронлик қилган “Нифоқ”да ўзгариш кам эди), таътил вақтларида

у ўғлини тез-тез олиб бориб турадиган “Друрилейн”га¹ жўнаш олдидан ота-бала шу ерга кириб туришарди.

Ўғли театрни жуда яхши кўрарди, шундан сўнг кекса Жолион рўпарасида ўтирган ўғли ўзини бепарволикка солиб, ҳаяжонини яширишга бехуда уринганларини эслаб кетди.

Кекса Жолион шуни эсладио ўша вақтларда ўғли хуш кўрадиган шўрва, қовурилган балиқ, котлет ва ширин пирог буюрди.

Эҳ, қани энди ҳозир рўпарасида ўтирган бўлса!

Улар ўн тўрт йилдан бери кўришгани йўқ. Шу ўтган ўн тўрт йил мобайнида кекса Жолион бир неча марта ўғлимнинг бошига тушган оғир савдога ўзим ҳам бироз айборд эмасмикинман, деган хаёлга борди. Антони Торнуорсининг қизи, анави енгилтак Даная Торнуорси, ҳозирги Даная Белью билан охири баҳайр бўлмаган ошиқ-маъшуқлик ўғлини Жуннинг онаси қучоғига отди. Улар жуда ҳам ёш эдилар, балки бу никоҳга йўл бермаслик керакмиди. Аммо Жонинг кирдикори ошкор бўлгач, у иложи борича тезроқ ўғлининг боши иккита бўлишини истаб қолди. Тўрт йилдан кейин эса фалокат рўй берди. Ана шу фалокат юз бериб турган вақтда ўғлининг хулқ-авторини оқлашнинг асти имкони йўқ эди; кекса Жолион хатти-харакатларининг мезони – қудратли омиллар уйғунлиги – соғлом ақл ва тарбия оқлаш имконияти йўқлигини таъкидлаб турарди, аммо унинг қалби туғён уради. Бу бемаъни воқеа қалбни ўртаб, зинхор тинчлик бермасди. Сариқ соchlари товланиб турувчи митти Жун туғилгач, унинг борлигини банд этиб, атрофика ўралашди, парвона бўлди. Жажжи, ожиз вужудга эрмак ва севимли паноҳ бўлиш учун яратилган қалбida Жуннинг меҳри қолди. У ўзига хос зийраклик билан ё ўғлидан, ё невараси Жундан жудо бўлиши тайин эканини, бу ишда дўқ-пўписа ёрдам бермаслигини пайқади. Фожия ҳам ана шунда эди. Нихоят, жажжи қизчанинг меҳри устун келди. У икки жаҳон овораси бўлиб юролмасди, шунинг учун ўғлидан кечди.

Бу жудолик шу чоққача чўзилди.

У ёш Жолионга илгаригига қараганда озрок бўлса-да, пул билан ёрдам бермоқчи бўлди, аммо ўғли бу таклифни рад этди, эҳтимол, бу рад жавоби уни ҳаммасидан кўпроқ таҳқирлагандир, чунки бошқача йўл билан тасалли тополмаган қўнглини эрмаги ҳам чиппакка чиқди, бу дард-алам жудоликнинг амалий исботи бўлиб, шунчалик кучайиб, шунчалик сезилиларли бўлиб қолди, мол-мулкни топшириш шартномасини тузиш ёки уни бекор қилиш вақтидагина киши шу кўйга тушади.

Таом унга чучмал туюлди. Шампань виноси бемаза, тахирроқ сувнинг ўзи, қадимги “Клико беваси”га сира ўхшамасди.

Қаҳва ичиб ўтириб унинг хаёлига операға бориш фикри келди. У “Таймс” газетасини олиб, бугун кечқурунги дастурга қаради. Бошқа газеталарга кекса Жолион ишонмасди. “Фиделио” операси кетаётган экан.

Худога шукурки, анави Вагнернинг қанақадир янги чиққан немисча пантомимаси эмас экан.

У кийилавериб гардиши тикка бўлиб кетган, кенг тўрлик – илгариги ажойиб замонларнинг нишонаси – цилиндрини кийди, пальтоси чўнтагида доимо портсигари билан бирга турганидан ўткир тери ҳиди анқиётган эски, жуда юпқа очранг қўлқопини олиб, кэбга² ўтириди.

Кэб кўчалардан тарақлаб борарди, кекса Жолион кўчалар одатдан ташқари гавжумлигини кўриб таажжубланди.

¹ Друрилейн – Лондондаги театр.

² Кэб – бир от кўшиладиган извosh.

“Меҳмонхоналар тоза пул ишласа керак”, деб ўйлади у.

Бир неча йил муқаддам бу меҳмонхоналарнинг ном-нишони ҳам йўқ эди.

У бу жойларда ерлари борлигидан хушнуд эди. Эҳтимол, уларнинг нархи кун сайин ошаётгандир! Бу ерлар жуда серқатнов бўлиб кетибди!

Аммо шундан кейин у Форсайтларга сира хос бўлмаган ғалати хаёлларга берилиб кетди, унинг бошқалардан устунлиги ҳам қисман шунда эди. Одамлар чумолидай-а, ҳисобига етиб бўлмайди! Бориб-бориб нима бўларкинмиз-а?

У кёбдан тушиб, сал орқага тисарилди, кучерга қанча тўлаш керак бўлса, шунча тўлади, креслога чипта олиш учун кассага борди ва ҳамёнини қўлига олганича тўхтади, – у пулни ҳамма вакт ҳамёнида олиб юрар, ҳозирги ёшларга ўхшаб пулни шундок чўнтакка тикиб кетаверишни ёқтириласди. Кассир худди уясидан бошини чиқарган қари итдек бўйини чўзиб дарчадан қаради.

– Э-ҳе, қаёдан шамол учирди! – деди у таажжубланиб. – Ахир бу мистер Жолион Форсайт-ку! Худди ўзлари! Қўришмаганимизга ҳам анча бўлди, сэр. Ҳа! Ҳозир замон бутунлай бошқача! Ахир сиз укангиз билан, яна мистер Трэкуэр ва мистер Николас Трефри ҳам ҳар мавсумда олти-еттита кресло олардинглар. Ахволларингиз қалай, жаноб? Ҳа, энди ёш бўлармидик!

Кекса Жолионнинг кўзлари чараклаб кетди, у бир гинея¹ тўлади. Уни ҳали унудишишибди. У худди жанг майдонига қадам қўйган жангчидек мусиқа садолари остида залга кирди.

Жолион цилиндирини қўлига олиб, креслога ўтиреди, одатдаги ҳаракат билан чўнтагидан қўлқопини олди ва театрнинг ҳаммаёғига яхшилаб разм солиш учун дурбинни кўзига тутди. Ниҳоят, дурбинни цилиндири устига қўйиб, саҳна томон юзланди. Кекса Жолион даври ўтганини ҳозир ҳар қачонгидан ҳам яққолроқ сезди. Аёллар, театрни тўлдириб ўтирадиган гўзал аёллар қаёқда қолди? Юраги гуп-гуп уриб, машҳур хонанданинг чиқишини кутганлари қаёқда қолди? Ҳаётдан маст-аласт бўлишлару унинг гаштини суришлар қани?

Бир вақтлар у театрга жуда ишқибоз эди! Опера йўқ энди! Бу Вагнер ҳаммасини барбод этди – на куй, на овоз бор. Қанақа ажойиб хонандалар бўларди! Энди улар йўқ. У эски, таниш саҳналарни ижро этаётган актёрларга қараб, юраги увушаётганини ҳис этди. Кекса Жолион илгарилари ҳар куни кечкурун бу ерга келиб юрганида қандай бўлса, ҳозир ҳам деярли шундай қадди-қомати тик, кўзлари ўтири, деярли аввалгидек эди. Бироқ бу ҳорғинлик ва ихлос қайтиши ҳиссиёти-чи!

У умр бўйи ҳамма нарсадан, ҳатто битмаган ишлардан ҳам – битмаган ишлар эса жуда кўп эди – барчасидан завқланди. Энди бўлса ҳаётдан роҳатланиш ва унга фалсафий нуқтаи назари ила қарашиб ҳам йўқ, энди даҳшатга тушиб, куни битишини ҳис этиш қолди, холос. На маҳбуслар хорию, на Флорестан арияси ёлғизлиқдан юрак сиқилишларини ёзарди.

Қани энди Жо у билан биргага бўлса! Ўғли қиркقا кириб қолган бўлса керак. У яққаю ягона ўғлини ўн тўрт йилдан бери кўрмасди. Жо энди жамиятда пария² эмас. У уйланди. Кекса Жолион унинг бу ишини маъқуллашдан ўзини тийиб тура олмади ва ўғлига беш юз фунтга чек юборди. Чек “Турли-туман” клубидан қуидагича мазмундаги хат ичидаги қайтиб келди:

¹ Гинея – қадимги инглиз тилла тангаси.

² Пария – хукуқсиз, эзилган, мазлум одам.

“Мехрибон отажоним!

Сизнинг олийхўмматлик қилиб юборган совғангизни олиб, бошим осмонга етди – бу менинг ҳақимда ёмон фикрда эмаслигингиздан далолат беради. Мен чекингизни қайтараман, лекин сиз совғангизни бизнинг исм фамилиямиздаги ўғилчамизга (биз уни Жолли деб атаймиз) беришни лозим кўрсангиз, сиздан бекиёс миннатдор бўлардим.

Чин дилдан ишонаманки, сиз бурунгидек соғ-саломат ва бардамсиз. Сизни севувчи ўғлингиз Жо”.

Мактуб фарзандининг ўзгинасидан эди. У ҳамма вақт ҳам мана шундай хушмуомала эди. Кекса Жолион қуидагича жавоб юборди:

“Азизим Жо!

Пулни (500 ф.ст.) ўғлинг Жолион Форсайт номига ўтказганим китобимга ёзиб кўйилди; шунга яраша 5 фоиз фойда тугади. Ишонаманки, ҳозир ишларинг яхши. Саломатлигим ёмон эмас.

Сени севиб қолувчи отанг Жолион Форсайт”.

Ҳар йили биринчи январда у шу суммага юз фунт ва фоизини қўшиб юбораверди. Пул кўпаяверди, келаси янги йилда ҳисобда бир минг беш юз фунт стерлингдан ошикроқ пул бўлади. Ҳар йили бўладиган бу пул муомаласи кекса Жолионни қанчалик қувонтирганини таърифлаш қийин. Бироқ хат ёзиш тўхтаб қолди.

Ўғлига бўлган меҳр-муҳаббатига қарамай, қисман туғма, қисман ўзи мансуб, ишбилармон дунёсига яқин бошқа юзларча одамлар каби, бошқалар аҳлоқига жиддий нуқтаи назардан эмас, балки шу аҳлоқдан чиқиб келадиган натижалар асосида баҳо беришга мажбур этувчи инстинктга қарамай, кекса Жолион кўнгли нотинч бўлаётганини сезарди. Шароит шундай бўлиб қолгандини, унинг ўғли ҳалок бўлиши керак эди. У качонлардир ўқиган романида, эшитган ваъзларида, кўрган пъесаларида жар солинган қонун эди бу.

Чек қайтиб келганда кекса Жолионга қандайдир бир қўнгилсиз воқеа бўлаётгандек туюлганди. Нечун унинг ўғли ҳалок бўлмади? Бироқ бу саволга ким ҳам жавоб бера оларди?

У Жо Сент-Жонс-Вудда, Вистария-авенюдаги боғи бор чоғроқ ҳовлида яшашини, хотини билан ўзининг ҳар қалай анча шубҳали бўлса ҳам таниш-билишлари борлигини, яна уларнинг иккита фарзандлари: ўғилчаси Жолли¹ (кекса Жолион барча шароитларни эътиборга олиб, бу исмни бемаъни деб топди, ўзи бўлса бемаъниликни ёмон кўрар ва ундан чўчир эди) ва қизчаси Холли (у тўйдан кейин туғилган) борлигини албатта эшитган, тўғрироғи, суриштириб билиб олган эди. Ким билади, ўғли қандай шароитда яшаётганийкин? Жо онасининг отасидан қолган меросини нақд пулга айлантирган ва Ллойдга сугурта агенти бўлиб ишга кирган эди; бундан ташқари, у рассомлик ҳам қиласиди – акварел билан чизарди. Булар кекса Жолионга маълум эди, чунки бир кун кўргазмада акварелда Темза тасвирланган суратни кўриб қолди, сурат тагида ўғлининг имзоси бор эди, шундан бери у ўғли чизган суратларни билдирамай сотиб оладиган бўлди. У акварелни ёқтиरмасди ва ўғлининг имзоси бўлгани учун бу расмларни деворга остирмасди, уларни яшикка солиб, қулфлаб кўярди.

Кенг залда ўтиаркан Жолионнинг кўксига ўғлини бир кўриш орзузи туғён уриб кетди. Бурунги ажойиб дамлар, сурупдан костюм кийган ўғлини тиззасига олиб, аллалаган пайтлар унинг эсига тушиб кетди.

¹ Jolli – шўх-шодон (инг.).

Ўшанда у пакана от ёнида чопиб, Жога от минишни ўргатарди. У Жони мактабга олиб борган биринчи кунни ҳам эслади. Жо ажойиб, хушфеъл бола эди! У Итонда одоб-аҳлоққа ўрганаётисб, балки бироз ҳаддидан ошгандир, одоб-аҳлоқ қоидалари кекса Жолионга аён бўлишича, факат мана шундай ерларда катта пул эвазига ўрганилар эди, лекин ўғли доимо яхши ўрток бўлиб қолаверди. Ҳатто Кембриждан кейин ҳам, эҳтимол, олган билими туфайли салгина қуюлган бўлса ҳам, ҳар доимгидек яхши ўртоқлигича қолаверди. Кекса Жолионнинг ёпиқ мактаб ва дорилфу-нунларга бўлган муносабати сира ўзгармади: у имтиёзлилар учунгина мўлжалланган, аммо ўзи эриша олмаган тарбия тизимини қанчалик ҳурмат қилса, шунчалик ишонмас ҳам эди... Мана ҳозир Жун уни деярли бутунлай ташлаб кетган бир пайтда ўғли билан дийдор кўришса, кўнгли таскин топармиди. Кекса Жолион ўз оиласига, ўз ақидаларига, ўз син-фига хоинлик қилаётганини сезиб қолиб, ашула айтаётган аёлга нигоҳ ташлади. Шу ҳам томоша бўлди-ю! Флорестан-чи, нақадар тутуриқсиз!

Опера тугади. Одамларнинг кўнглини олиш қанчалик осон бўлиб қолди энди!

У кўчада, одамлар тўдасида ўзидан анча ёш, басавлат жентльменнинг нақ тумшуғи тагидан кэбни илиб кетди. Кекса Жолионнинг йўли Пэл-Мэл орқали ўтарди, аммо кучер муюлишда Грин-парк бўйлаб кетиш ўрнига, Сент-Жеймс-стритга бурилди. Кекса Жолион дарчадан қўлини тикиди (биров унинг одатига хилоф иш тутса, жони чиқиб кетарди), аммо ўгирилиб қаради-ю “Турли-туман”нинг рўпарасидан кетаётганини кўрди ва куни билан оромини бузган истак устун келди. Жолион аравани тўхтатишни буюрди. У кирадию, Жо ҳали ҳам клубга аъзоми, деб сўрайди.

У ичкари кирди. Холлда ҳеч нарса ўзгармаган, бари Жек Хэлинг билан овқатланишга келиб юрадиган вақтлардагидек эди, ахир бу ерда Лондоннинг энг зўр ошпази ишларди-да. Кекса Жолион тешиб юборгудек бўлиб деворларга зеҳн солди, ана шу боқишлири туфайли ҳам умр бўйи бошқа кўпчилик одамларга нисбатан кўпроқ унинг хизматида бўлишарди.

- Мистер Жолион Форсайт ҳали ҳам клубга аъзоми?
- Ҳа, сэр, у киши ҳозир шу ердалар, сэр. Хизмат, буюрсинлар?
- Кекса Жолион гангиди қолди.
- Унинг отасиман, – жавоб берди у.

У шундай деб камин олдига борди-да, елкасини оловга ўгириб ўтириди.

Клубдан кетишга тараффудланган ёш Жолион шляпасини кийиб, энди холлга чиқмоқчи бўлиб турганда, олдига дарбон келди. Жо ҳам энди навқирон эмасди, соchlарига оқ оралаб қолган, юзи худди отасиникидек, факат сал чўзинчоқ, қалин мўйлови ҳам отасиники сингари осилиб турарди, киёфасидаги ҳорғинлик аломатлари яққол сезиларди. Унинг ранги ўчиб кетди. Шунча йилдан кейин учрашиш – бу даҳшат-ку ахир, чунки дунёда бундан ёмони йўқ. Улар бир-бирига яқинлашиб, индамай қўл беришиб қўришишди, сўнг ота овози титраб:

- Салом, ўғлим! – деди.

Ўғил:

- Салом, ота! – деди.

Кекса Жолионнинг очранг юпқа қўлқоп кийган қўли титрарди.

- Агар йўлнимиз бир бўлса, – деди у, – мен сени элтиб қўйман.

Кейин улар гўё одат бўлиб қолгандек ҳар куни кечқурун бир-

бирларини уйига кузатиб кўйиш учун кўчага чиқиб, кэбга ўтиришди.

Кекса Жолионнинг кўзига ўғли анча улғайгандек кўринди. “Жуда етилибди”, – дилидан ўтказди у. Ўғлининг юзидан сира аримайдиган мулойимлик ўрнини энди гўё ҳаёт шароити уни совут кийишга мажбур этгандек, истехзо эгаллаганди. Чехрасидан феъл-автори Форсайтларга ўхшали яққол сезилиб турар, аммо юз ифодасида кўпроқ олим ёки файласуфларга хос ҳаёлпастлик бор эди. У шубҳасиз, мана шу ўн беш йил мобайнинида кўп ўйлаганга ўхшайди.

Илк дақиқаларда отасининг кўриниши ёш Жолионни ҳанг-манг қилиб кўйди. Отаси ўзини жуда олдириб, қариб қолибди, лекин кэбда отаси унча ўзгармагандек туюлди, у хотиржам боқарди, бу нигоҳни яхши эслайди, қадди-қоматини аввалгидек тик тутар, нигоҳи ўша-ўша ўткир эди.

– Кўринишингиз яхши, ота.

– Бир нави, – жавоб берди кекса Жолион.

Отани хавотир қийнамоқда эди, шунинг учун у ичимдагини очиқ ёрмасам бўлмайди деб ўйларди. Мадомики, ўғлини қайтариш учун шундай йўл танлабдими, боласининг молиявий ишлари қандай ахволда эканини билиши керак.

– Жо, – деди у, – қандай ҳаёт кечираётганингни билмоқчи эдим. Эҳтимол, қарзларинг бордир-а?

У ўғлининг тан олиши учун шундай гап бошлади.

Ёш Жолион истеҳзоли оҳангда жавоб берди:

– Йўқ, менинг қарзим йўқ.

Кекса Жолион ўғлининг жаҳли чиққанини тушунди ва унинг қўлига тегиб кўйди. У таваккал қилди, лекин таваккал қилишга арзирди, бундан ташқари Жо илгари хеч қачон отасидан хафа бўлмасди. Улар бир оғиз сўзлашмасдан Стэнхоп-Гейтгача боришли. Кекса Жолион ўғлини уйга киришга таклиф этди, аммо ёш Жолион бош чайқади.

– Жун уйда йўқ, – деди шошилиб отаси, – у бугун меҳмонга кетди. Уни унаштиридик, хабаринг бўлса керак?

– Ростдан-а? – ғудурлади ёш Жолион.

Кекса Жолион извошдан тушди ва кучерга пул тўлаётиб умрида биринчи марта янгишиб шиллинг ўрнига соверен бериб юборди.

Кучер тангани оғзига солиб, зимдан отнинг қорнига урди ва кетишига ошикли.

Кекса Жолион астагина калитни бураб, эшикни очди ва ўғлига бош иргади. Ёш Жолион отасининг пальто осишига қараб турди: отаси сипо эди, лекин олча ўғирламоқчи бўлган болага ҳам ўхшаб кетарди. Емакхона эшиги очиқ эди; газ паст қилиб ёқиб кўйилган, патнисда спиртли лампа ёниб турар, ёнгинасида – столда мушук талтайиб ухлаб ётарди. Кекса Жолион шу заҳоти уни столдан хайдади. Бундан у енгил тортди, ортидан цлиндирини тапиллатиб кўйди.

– Бургаси бор, – деди у мушукни хонадан чиқаратуриб. Холлдан ертўлага тушадиган эшик олдида туриб у гўё мушукни ҳайдаётгандай бир неча бор “пишт-пишт” деб кўйди, худди шу пайт қаёқдантир пайдо бўлиб қолган малай ертўла зинасидан чиқиб келди.

– Ётиб ухлашингиз мумкин, Парфит, – деди кекса Жолион. – Эшикни ўзим беркитаман, чирокни ҳам ўзим ўчираман.

У яна емакхонага кираётганда аксига олиб мушук унинг олдига тушиб олди ва малайдан қутулиш учун ишлатган найрангингга аллақачон тушунганман, дегандек думини диккайтириб юриб кетди.

Бугун тақдир тақозоси билан кекса Жолионнинг барча содда муғомбирликлари фош бўлмоқда эди.

Ёш Жолион ўзини кулгидан тўхтата олмади. Бу оқшом рўй бераётган ишлар: мушук воқеаси ҳам, ўз қизининг унаштирилиши ҳам – ҳаммаси унинг назарида кандайдир кулгилидай эди. Демак, кекса Жолионнинг кучи мушукка етмагандек, Жунга ҳам етмас экан-да! Бу ажиб ҳақиқатнинг жойида қарор топиши унинг юрагини жизиллатди.

– Жун ҳақида гапириб беринг, ҳозир унинг кўриниши қанақа? – сўради у.

– Бўйи пастаккина, – жавоб берди кекса Жолион, – айтишларича, менга ўхшармиш, лекин бу сафсата. У кўпроқ онангга ўхшайди – кўзи ҳам, соchlари ҳам худди ўзи.

– Шунақа денг! Чиройлими?

Кекса Жолион Форсайтлигига бориб бирон нарсани, айниқса, ўзи сидқидилдан завқланадиган нарсани очиқ-ойдин мақтамасди.

– Чакки эмас, Форсайтларнинг ўзгинаси. Кетиб қолса, жуда зерикиб қоламан-да, Жо.

Унинг юз ифодаси ота-бола учрашган дастлабки дақиқадагидек ёш Жолионни яна ҳайратга солди.

– Энди бир ўзингиз нима қиласиз, ота? У энди фақат куёвингизни ўйласа керак, а?

– Мен нима ҳам қилардим? – деб такрорлади кекса Жолион, унинг товушида зарда бор эди. – Бир ўзинг тургандан кейин юрак сиқилишидан бошқа нима бўларди. Охири нима бўлишини ўзим ҳам билмайман. Мен истардимки... – у шундай деди-ю, тўхтаб қолди, кейин қўшиб қўйди: – ҳамма гап шундаки, ҳовлини нима қилишимни билмайман.

Ёш Жолион хонани кўздан кечирди. Хона кенг, хувиллаб турарди, деворларида катта-катта натюромортлар осиглиқ эди, буларни у болалик вақтлариданоқ биларди. Суратда сабзи боғламларига тумшуқларини тиқиб, пиёз боғлари ва узумга ҳайрон бўлиб қараб ётган итлар тасвирланганди. Ҳовли ҳақиқатан ҳам энди ортиқча ташвиш эди, лекин у отасининг кичик ҳовлида яшашини тасаввур ҳам этолмасди, бу эса бугун кўрган, ёшитган, билган нарсалари каби истехзоли кулгини кўзғарди, холос.

Кекса Жолион ўз оиласи, синфи, диний эътиқодининг нишонаси бўлиб, китоб кўядиган таглиги бор катта креслода ўтиради, унинг оқ сочли боши, дўнг пешонаси эса сиполик, тартиб ва мулкдорликка муҳаббат тимсоли эди. Бугун Лондонда энг ғариб чол шу эди.

Ўқинчли дабдаба қуршовида ўтирган бу одам буюк кучлар қўлида бир қўғирчоқ бўлиб, бу кучлар оиласа ҳам, синфга ҳам, диний эътиқодга ҳам шафқат қилмай, автомат каби сирли мақсад сари даҳшат билан олға босарди. Бир четда туриб ҳаётни кузатишни билган ёш Жолион мана шу нарсаларни кўрди.

Бечора кекса отажони! Отаси мана шуларни деб умрини киши ҳайрон қоладиган мўътадиллик билан ўтказган экан-да! Қариган чоғида бир ўзи, қолган умрини тирик инсон овозини эшитишга зор-интизорлик билан ўтказаркан-да!

Кекса Жолион ҳам ўз навбатида ўғлига тикилар эди. У шунча йилдан бери чурқ этмай келаётган кўп нарсалар ҳақида гаплашишни истарди. Соҳо туманидаги ерларнинг нархи ошади, деб ичидаги гапларини Жунга айта олмайди-ку, ахир! Ўзи анчадан бери раислик қилиб келаётган “Янги кўмир компанияси”нинг иш бошқарувчиси Типпиннинг қовоқ-тумшуғини осилтириб ғиқ этмай юриши туфайли ичидан қиринди

ўтаётганини Жунга айта олмайди-ку! “Америка Голгофаси” акцияларининг кун сайин тушиб кетаётганлигидан норозилигини гапиролмайди-ку! Ахир қиз бола билан ўзининг вафотидан сўнг қоладиган меросдан қандай қилиб солик тўламаслик тўғрисида маслаҳатлашиб ўтирумайди-ку! Шундок бўлса ҳам, паришонлик билан қошиқ айлантириб ўтирган чой таъсирида кекса Жолион ниҳоят гап бошлади. Унинг учун янги эркинлик йўллари очилди: Истаганингча гапира оладиган, оху надомат ва пушаймонлар тўғонида бекиниш учун сокин қароргоҳ бўладиган, барча йиққан-тергандарини ҳисоб-китоб қилиб вафотидан кейин қоладиган ягона нарсани абадийлаштиришга қаратилган турли-туман ҳйила-найранглар афюни билан кўнгилни тинчитадиган муқаддас ер бор-ку, орзули дунё бор-ку!

Ёш Жолион гапга қулоқ солишини биларди: бу ҳамиша унинг энг яхши фазилати эди. У отасидан кўз узмас, ҳар замонда савол ташлаб қўярди.

Соат бирга занг урди. Кекса Жолион бўлса ҳали юрагидаги гапларни айтиб улгурмаганди, бироқ соат занг уриши билан у ҳам қоидани бузгиси келмай қолди. У таажжубланганича чўнтак соатини олди.

– Ётадиган вақтим бўлибди, Жо!

Ёш Жолион ўрнидан турди ва отасининг туришига ёрдам бериш учун қўлини чўзди. Бу қари юз унга ҳорғин ва сўлғин кўринди: отаси зўр бериб четга боқарди.

– Алвидо, ўғлим, ўзингни эҳтиёт қил.

Бир дақиқадан сўнг ёш Жолион пошнасида гир айланиб, эшикка қараб юрди. Унинг кўзига деярли ҳеч нима кўринмас, жилмайган лаблари тит-ратди. У ҳайётнинг ҳазилакам нарса эмаслигини англаған онидан кейин ўтиб кетган мана шу ўн беш йил мобайнида яшаш ниҳоятда мураккаб эканини бугунгидек равshan ҳис қилмаганди.



Сергей ЕСЕНИН

(1895–1925)

ЭНГ УЛКАН ИШҚ – ВАТАНГА МУҲАББАТ

Таржимон Эркин ВОҲИДОВ,
Ўзбекистон Қаҳрамони, ҳалқ шоири

Бу йил жаҳон шеърияти мухлислари улуғ рус шоири таваллудининг 120 йиллигини нишонладилар! Есенин ҳақида гап кетганда унинг ўзбек тилида жаранглаган шеърлари ёдимизга тушади:

Мен Босфорда бўлмаганман ҳеч,
Уни сўйлаб беролмам сенга.
Лекин мовий кўзларинг ҳар кеч
Денгиз бўлиб кўринар менга.

Саркаш шоирнинг Шарқ шеъриятини нуҳоятда қадрлагани “Форс тароналари” туркумидан олинган мазкур парчада бутун фасоҳати билан намоён бўлади. Гарчи бу рязанлик йигитнинг қалб кечинмалари бўлса-да, биз уни ўз она тилимиздаги жарангидан катта завқ оламиз. Француз шоири Томас Элиот чинакам поэзияни таржима қилиб бўлмайди, деганида назмни азбаройи капалакка ўхшатиб, унинг бирорта болакай қўлига тушиб озор чекишини истамаган бўлса, ажабмас. Аммо устоз Эркин Воҳидов ўғирган кўйма сатрларда ўша гўзал капалакнинг ўзбек шеърияти гулшани аро пареоз қилаётганига амин бўламиз. Шеърхон бу гулзорга кирад экан, бутун борлигини унумади. Оҳанглар бор фасоҳати билан қабариқ шаклда гавдаланади. Бу шеърларни ўқир эканмиз, гўзал манзарага йўл олгандек бўламиз. Саёҳатга чиқиши учун эса мутолаанинг ўзи етарлидир.

Шеърият бир улкан ишқ – Ватанга муҳаббат билан тирикдир, деган эди шоир мухлислари билан бўлган суҳбатларида. Шунинг учун бўлса керак, Сергей Есенин сатрларида гўзаллик ва дард, ошуфталик ва қайсарлик ёнма-ён келади.

Таҳририятдан

* * *

Тонгда мени уйғот эртароқ,
Меҳрибоним, мушфиқ онажон!
Мен йўлларга кўз тутай муштоқ,
Бизнинг уйга келмоқда меҳмон.

Эрта тонгда меҳмон келади
Ой шапкасин боишга қўйиб дол.
Учқур оти равон елади,
Кокиллари товланади ол.

Ўрмон ичра бугун, онажон,
Гилдиракнинг изларин кўрдим.
Еллар уни айлаб зар камон,
Тортқиласан кезларин кўрдим.

Шеър айтаман меҳмонга ул дам,
Сенга, онам, ўсган еримга.

Гўдакликдан маълум ҳар одам,
Бола бошдан деган гап тўэри.
Мабодо мен шоир бўлмасам,
Бўлар эдим безори, ўгри.

Жиккаккина шум бола эдим,
Тенгдошларим ичра “қаҳрамон”.
Кайтар эдим кўчадан доим
Бурним пачоқ, усти-бошим қон.

Кўрқиб кетган онам қошида
Дердим тутиб ўзимни маҳкам:
“Хечқиси ўйқ. Қокилдим тошига.
Эртагача қолмас ўрни ҳам”.

Йиллар ўтди, кетди болалик,
Ниҳоя ўйқ армонларимга.
Ёшликтаги шўхлик, оловлик
Кўчди шеъру достонларимга.

Болалигим кетди борини
Сатрларда қолдириб бутун.
Шеърларимда шум, безорининг
Хислатлари акс этар бу кун.

Магрургигим ҳамон қолмаган,
Ҳамон баланд ўтли кўкрагим.
Болаликда бурним қонаган,
Бугун эса қондир юрагим.

Шаҳинам, о менинг Шаҳинам,
Билсанг, шимол Ватандир менга.
Далалардан сўйлайми сенга.
Ой нур сепган бошоқлардан ҳам.
Шаҳинам, о менинг Шаҳинам.

Билсанг, шимол Ватандир менга.
Унда ой ҳам юз бора улкан.
Шероз қанча бўлмасин кўркам
Азиз ўлка Рязандир менга.
Билсанг, шимол Ватандир менга.

Саҳар туриб соққан сутинг ҳам
Куйлади менинг шеъримга.
Мени саҳар уйгот, онажон,
Чироқларни ёқиб қўй ҳозир.

Дейдиларки, бўлмоғим аён
Россияда шуҳратли шоир.

* * *

Мендан кулган тўда қошида
Дейман тутиб ўзимни маҳкам:
“Хечқиси ўйқ! Қокилдим тошига,
Эртагача қолмас ўрни ҳам”.

Мени сўқманг! Бўлар иши бўлди,
Сўз сотувчи савдогармасман.
Олтин бошим қуий эгилди,
Бу дунёдан совидим, бас, ман.

Шаҳарда ҳам қолмоғим маҳол,
На қишилоқча майл сезарман,
Бир ўйл қолди; ўстириб соқол
Россияни дайдиб кезарман.

Хайр, дейман достон, шеърларга,
Йўлга тўрва олурман, холос.
Кўчадаги бир дарбадарга
Шамоллар ҳам қўшиқ айтар соз.

Пиёз, туруп ҳидин таратиб,
Билганимни қилиб юарман.
Бурним оқса енгимга артиб,
Пешонамда борин кўрарман.

Қор қуюнин тингларман беҳис,
Бахт керакмас бундан зиёда.
Бундай ажисиб турфа шиларсиз,
Яшамасман ёргу дунёда.

* * *

Далалардан сўйлайми сенга?
Сочим олмиш бугдойидан ранг.
Бармогингга ўра хоҳласанг,
Зарра оғриқ сезилмас менга,
Далалардан сўйлайми сенга?

Ой нур сепган бошоқлардан ҳам
Олтин сочим сўйласин, дилдор,
Кул, ўйна-ю, даламни зинҳор
Эслатмагин менга, жонгинам,
Ой нур сепган бошоқларни ҳам.

Шаҳинам, о менинг Шаҳинам,
Шимол ёқда бир нозанин бор:
Сенга ўхшар, гоятда дилдор,
Балки мени ўйлар ул санам...
Шаҳинам, о менинг Шаҳинам.

* * *

Дединг: Саъдий доимо ёрнинг
Сийнасидан оларкан бўса.
Худо ҳаққи, шошима, дилдорим,
Қочмас ахир ўрганиши бўлса.

Дединг: — “Куръон сўзи азалдан
“Алқасосу миналҳақ” тамом!”
Мен тугилган бўлсам Рязанда
Қайдан таниши бўлсин бу калом.

Сен куйладинг: “Фром ортида,
Гуллар борки, қизлардан гўзал!”
Вой бўлсайдим қўшиқ бобида
Тўқир эдим бошқа бир газал.

Гар қизлардан бўлса зиёда
Мен гулларни кесардим буткул,
То кўрмайин ёргу дунёда
Шаҳинамдан сулувроқ бир гул.

Ўгит билан қийнама энди,
Ўгитларинг менга не даркор?!
Шоир бўлиб дунёга келдим,
Шоир каби ўпаман, дилдор.

* * *

Мен Босфорда бўлмаганман ҳеч,
Уни сўйлаб беролмам сенга.
Лекин мовий кўзларинг ҳар кеч
Денгиз бўлиб кўринар менга.

Қилмаганман Бағдодга сафар,
Карвон билан элтмадим хино,
Аммо бир зум тин олсанам нетар
Тиззангга боши қўйиб, дилрабо!

Шафқат айла, жонгинам, дерман,
Ҳам қилурман қанча илтижсо,
Россияда машҳур шоирман,
Нечун зарра қилмайсан парво?!

Кўй таратар қалбимда гармонь,
Қайдадир ит ҳурап ойдин кеч,
Эрон қизи, мовий, бепоён
Юртни кўргинг келмайдими ҳеч?

Бунда кўнгил ёзгани эмас,
Излаб келдим хаёлан сени.
Оқкушиқанот қўллар ҳар нафас
Огушига чорлади мени.

Нолишиим йўқ ўтган умримдан,
Аммо ҳоргин дил излар ором.
Дилбар, менга қувноқ юртингдан
Бирор нарса сўйла бу оқишом.

Афсун билан тарқат ўйларим,
Токи чиксин кўнглимдан гармонь,
Токи ўша шимол дилбарин
Ўйламайин, қилмайин армон.

Мен Босфорда бўлмаганман ҳеч,
Аммо сўйлаб берурман сенга.
Чунки мовий кўзларинг ҳар кеч
Денгиз бўлиб кўринар менга.

* * *

Заъфар юртга нур тўкар оқишом,
Богда гуллар жавлон урган пайт,
Кел, жонгинам, қўшиқ, айт, Хайём –
Куйлаб ўтган қўшиқлардан айт
Богда гуллар жавлон урган пайт.

Ой нурига гарқ бўлган Шероз,
Парвонадек учар юлдузлар.
Менга ёқмас, ўртанааман, рост,
Хижоб тутса дилрабо юзлар,
Ой нурига кўмилган Шероз.

Қизлар юзни сақлар ҳижобда,
Иссиқданми бўлиб асралмоқ,
Ё куймасин дерлар офтобда.
Севсин учун йигитлар кўпроқ
Қизлар юзни сақлар ҳижобда.

Ҳижоб билан дўст бўлма, гулрӯ,
Ёз сўзимни ёдинг лавҳига,
Умр ўзи гоят қисқа-ку,
Тўймоқ қийин толе шавқига,
Ёз сўзимни ёдинг лавҳига.

Қисматларда не қаролик бор,
Қолмас бир зум баҳши этсангроҳат.
Гуноҳ бўлур шу сабаб, дилдор,
Бу дунёда яширсанг талъат,
Бергач уни она-табиат.

Богда гуллар тебранар оқшом,
Юрагимда ўзга бир диёр,
Ўзим сенга қўшиқ айтай, ёр!
Бу қўшиқни билмаган Хайём.
Богда гуллар тебранар оқшом...

* * *

Ҳаво тоза, мусаффо, зангор,
Гулзор бўлди менга сайилгоҳ.
Уғқларга йўл олган сайёҳ,
Етолмайсан саҳрогоға зинҳор.
Ҳаво тоза, мусаффо, зангор.

Далалардан ўтасан танҳо,
Боғлар сенга очади қучоқ.
Чиннигулга бўлиб маҳлиё,
Қаршисида чўкарсан ногоҳ.
Далалардан ўтганда танҳо.

Шитирлар, йўқ, шивирлар барглар,
Нафис, гўё Саъдий газали.
Кўзларингга кўкнинг гўзали —
Олтин ойдан ёғилади зар,
Нафис, гўё Саъдий газали.

Дил қўшигинг басталар пари,
Най сасидек майин, дилрабо.
Огушига олса ул барпо
Кетар дилдан гам, ҳижрон нари,
Най кўйлайди майин, дилрабо.

Мана, узоқ кезиб пиёда
Чарчаганинг эзгу матлаби:
Эсар салқин, хушибўй шаббода,
Шимиради қакраган лабим.
Эсар салқин, хушибўй шаббода..

* * *

Хурсонда бир дарвоза бор,
Остонаси гулга кўмилган.
Унда яшар бир париурхсор,
Хурсонда бир дарвоза бор,
Ҳайҳот, уни очолмадим ман.

Қўлларимда куч ҳам етарли,
Сочларимдан олтин ранг олган,
Асир этди мени ул пари,
Қўлда гарчи кучим етарли,
Ул эшикни очолмадим ман.

Мардлигим не ишиқ майдонида.
Айтинг, кимга қилай шарҳи гам?!
Севмас бўлса Шаҳи жонидан,
Ул эшикни очолмас бўлсам,
Мардлигим не ишиқ майдонида?!

Яна тушиби Русь сари йўлим,
Эрон, сендан кетгумми ҳали.
Наҳот, сени боз кўрмас бўлдим?
Она-юргита меҳрим туфайли
Яна тушиби Русь сари йўлим.

*Хайр энди, хайр, паризод!
Дарвозангни очолмасам-да,
Ширин гаминг бирла умрбод
Күйлаб ўтай сени ўлкамда.
Хайр энди, хайр, паризод!*

* * *

*Фирдавсийнинг мовий диёри,
Кўпни кўрган эй, кўхна диёр!
Ўйчан нигоҳ, кўзи зангори
Ўрусингни унумта зинҳор!
Фирдавсийнинг мовий диёри.*

*Ажойибсан, гўзалсан, Эрон,
Лолаларинг бамисли чироқ,
Улар менга олис бепоён.
Бир ўлкани эслатар ҳарчоқ,
Ажойибсан, гўзалсан, Эрон.*

*Сипкорурман энг сўнгги бора
Шароб янглиг мушикин бўйингни,
Жоним Шаҳи, дилбар кўйингни
Айриларкан сендан, начора,
Тинглагайман энг сўнгги бора!*

*Кўйинг мангу қалбимда қолар,
Сени асло унумтам, жонон!
Тоғлар ошиб, келиб сахролар
Сен ҳақингда кўйлайман достон,
Кўйинг мангу қалбимда қолар.*

*Гамларингдан қўрқмасман сира,
Фақат мени сақла ёдингда,
Русъ ҳақида бир куй қолдираи!
Мени эсла куйлар онингда,
Кўшиқ бўлиб яшай ёнингда.*

* * *

*Талпинма кўп, девона кўнгил,
Барчамиздан юз ўғирмиши баҳт.
Шафқат тилар гадолар фақат...
Талпинма кўп, девона кўнгил.*

*Фусункор ой кийиб зар либос,
Шуъла тўйкар каштанлар узра:
Кўйиб Лаълим сийнасига бош,
Пардасини тортаман юзга.
Талпинма кўп, девона кўнгил.*

*Биз барчамиз гўдакмиз бироз,
Гоҳ кўзда ёш, гоҳ лабда кулгу,
Бўлмиши ушибу дунёда мерос
Барчамизга шодлик ва қайгу.
Талпинма кўп, девона кўнгил.*

*Кўрганман кўп элатларни мен,
Толе излаб кезганман жаҳон.
Юрагимнинг эзгу истагин
Энди ортиқ қидирмам сарсон.
Талпинма кўп, девона кўнгил.*

*Умидим бор ҳаётдан ҳали,
Тугамаган кўнглимда бардоши,
Кел, бир нафас ором ол, қалбим,
Ухла қўйиб ёр кўксига бош,
Умидим бор ҳаётдан ҳали.*

*Зора тақдир бошимиз силаб,
Саодатга ёр этса бизни,
Толе булбул овози билан
Аллаласа пок севгимизни.
Талпинма кўп, девона кўнгил.*



NASR

Jahon
ADABIYOTI

Юсуф Вазир ЧАМАНЗАМИНИ

(1887–1943)

ИККИ ЎТ ОРАСИДА

Роман¹

Озарбайжон тилидан

Файзи ШОҲИСМОИЛ таржимаси

22

Маммад бекнинг гурухи Қаҳризлига етиб келди. Баҳорнинг гўзал пайти эди: атроф ям-яшил, бинафшалар очилган, оқ ва пушти гуллар дараҳтларни ясанган келинчакка айлантирганди. Мингларча асалари гўё қуёшнинг юлдузи торларига тегиниб мўъжизакор оҳанглар ҳосил қилаётгандай. Еру осмон жўшиб, завқланар, фақат шу гўзалликлар ичра яшаётган одамлар хурсанд эмасди. Эркаклар йил бўйи урушда: кимдир ўлган, кимдир жароҳат олган; аёллар оғир ишларда, юзбоши бўлса эшикни қоқиб, “Солиқни тўла!” дерди.

Аслида Маммад бекни қишлоқ аҳли ошкора шодлик билан кутиб олди, юракларида эса: “Тангри паноҳида асрасин, бу шаҳардан келувчилардан сира хайрли иш чиқмаганди”, – деб ғам белбоғини боғлашга шай турадилар.

Юзбоши Маммад бекнинг келганини эшитиб, ўзининг оғалик уйига етиб келди ва қўлинини ёғ босган кўксига қўйиб, базур эгилиб, таъзим қилди:

– Қурбонинг бўлай, оға, – деди, – хуш келибсан! Мехмонларингнинг ҳам илк қадамларига ҳасанот!

Бир дақиқада икки қаватли уйнинг айвонига жой солинди, оғалар боғдан оқиб ўтаётган қаҳриз сувидга ювиниб келиб, ўтиришди. Отларнинг ҳар бири бир ҳовлига боғланди, юзбоши эса, қишлоққа одам чиқариб, тўй ҳаки йиғдира бошлади.

Маммад бек оппок гулларга бурканган боғларга фахр билан қараб:

– Ҳой йигитлар, – деди, – мулкимиз сизларга ёқдими?

Ҳамроҳлари:

– Жуда яхши!

– Жуда зўр!

– Худди жаннатнинг ўзи! – дея маъқулладилар.

Маммад бек кўзларини қисиб:

– Қараб туринглар, сизларни шундай маза қилдирайки! – деди оғзини чапиллатиб...

JAHON ADABIYOTI 2015/10

¹ Давоми. Бошланиши 8-сонда.

Қароллар боғда ўчоқ ёқиб, талашиб-тортишиб оловга туфлаб, кўз ёшларини йиртиқ-ямоқ кийимларининг енглари билан артардилар. Бир томонда сўйилган қўзининг териси шилинар, ариқчада кўкатлар ювиларди. Даҳанини парда билан беркитган бир аёл кириб дастурхон ёзди. Юмюмалоқ, чўян ўчоқда ёпилган нон келтиришди. Пишлок, тузланган сузма ва қатиқ қўйилди.

— Болалар, бисмиллоҳ! – деди-да, Маммад бек қўлини дастурхонга чўзди. Дастурхон атрофида ўтирган меҳмонлар овқатлана бошлишди. Айвон четида меҳмоннавозлик кўрсатётган юзбоши Маммад бекка мулоим бир табассум билан мурожаат қилди:

— Оға, курбон бўлай, қорнингизни нон-сузмага тўлдирманг, сажичи¹ ҳозир тайёр бўлади.

Чиндан ҳам мис қозон ўчоқ устига қўйилганди, қароллар қўзи гўштини унга ташлашарди. Ёш мол гўштининг жизиллаган товуши, хушбўй гўшт ҳиди йўлдан келган меҳмонларга лаззат бағишиларди. Кўп ўтмай сажичи тайёр бўлди, устига қатиқ қуиб, меҳмонларга жўнатишиди. Бардоқларда сув келтириб қўйишиди.

Бироздан кейин айвоннинг олдида жулдур кийимли қишлоқ болалари тўпланди. Юзбошининг жаҳли чиқиб, уларни ҳайдади.

Маммад бек бошини сарак-сарак қилиб:

— Тегманг, тураверишсин! – деди ва улар томон бир-иккита суяқ ташлади.

Болалар суяқ учун бир-бири билан талашиб-тортишар, Маммад бек бу манзарадан завқланиб, мақтанар ва қайта-қайта суяқ ташларди.

Наҳордан кейин юзбоши учун бир баҳона бўлди: унинг одамлари ҳали ҳам уйма-уй юриб тўй улуши йиғишарди. У ер-бу ерда ушланган товуқларнинг қақағлаши, қишлоқ аёлларининг қарғиши атрофни тутганди.

Меҳмонлар уйғонгандан қуёш ҳали ботмаганди. Туришиб, яна Қаҳриз бўйига тушдилар, мириқиб сув ичиб, қишлоқни айланмоқчи бўлдилар.

Маммад бек кўз қисиб:

— Қани, кўрайлик-чи, арзидиган бирор нарса бормикин? – деди.

Чиқишиди. Қора уйлар у ер-бу ерда солинганди. Орқаларига тезак уюмларини тахлаб ташланганди. Ҳар ер-ҳар ерда ранги унниқкан кийимли чоллар ва аёллар кўзга чалинарди. Бир гурух болалар уларнинг ортидан эргашиб борар, борган сари сонлари ортиб, кўпаярди. Боғлар орасида қулоқлари ва бурунлари кесилган бир неча одамни учратишиди.

Қишлоқдан чиқишиди. Бир гурух ёш қизчалар елкаларида кўза билан Қаҳриз бошига сувга боришаётган экан. Улардан биттаси қизларга нималарнидир гапираварди. Гапира туриб қиё боқаркан, бекка қўзи тушди. Ёноқлари чўғдай қизарди. Бу ҳуркак нигоҳ Маммад бекнинг хаёlinи ўғирлади. У қизларнинг кетидан аста-секин юриб, зимдан кумуш тангали узун соchlари, ингичка бели ва қуёшдан қорайган тўла ва яланғоч болдиrlарини томоша қиласарди. Қизлар уларнинг кузатишаётганини кўриб, қадамларини тезлаштирди. Қаҳриз бошига етишди, энгашиб кўзаларини сувга тўлдиришиди. Маммад бек чеккадан туриб қизни кузатарди. Бирдан у ҳаяжонли товушда:

— Хой, қиз, исминг нима? – деди.

Қиз ерга қараб индамас, ора-сира бошини кўтариб тўқнашгач, мағлуб нигоҳини олиб қочарди.

— Исминг нима? – дея яна сўради бек.

Қиз ҳуркак бир бокиш-ла унга қараб:

— Ойиша! – деди қизариб.

¹ Сажичи – маҳсус мис идишда пишириладиган қовурма (қозонкабоб).

– Кимнинг қизисан?

– Тегирмончи Усмоннинг.

– Менга тегасанми, сенга уйланаман?! – деди бек виқор билан қўлини ханжарининг дастасига қўйиб.

Қизлар бир-бирини туртди. Ойиша бўлса қип-қизариб, кулимсиради, қўзасини елкасига қўйиб, Қаҳриздан узоқлашди.

Қизлар жадал одимлар билан қишлоқ томон шошиб борар, Маммад бек ҳам дараҳтга суюниб, ҳасрат-ла уларни кузатар, кўксини доғларди.

– Йигит, – деди у, – золимнинг қизи иймонимни ўғирлаб кетди!

Юзбоши ихлосманд бир таъзим-ла:

– Оға, – деди, – иймонингни нега ўғирлайди, қиз нима дегани, уни деб кўксингни чангалляпсанми? Оқ пайтавалим соғ бўлсин, майли, топилмаган қиз бўлсин!.. Ўша қизларнинг қайси бирини хоҳласанг, хизматингга тайёр.

Маммад бек оғир қадамлар билан қишлоққа қайтарди. Юзбоши унинг атрофида парвона бўлиб:

– Оға, – деди, – истасанг борай, совчилик қилай. Отаси бироз қўрс одам, бермаса, майли, худди шу кечади олиб қочамиз.

Маммад бек индамади, оғир ўйга толиб, кўприк четида ўтириди. Ҳамроҳлари ҳам сув бўйига тиззалашди.

Ҳеч ким гапирмасди, гўё Маммад бекнинг қайғуси ҳаммани заҳарлагандай эди. Факат юзбоши бирор хизмат кўрсатиш истар, қўлларини тез-тез тўшига уриб, афтида ялтоқ бир ифода акс эттиради.

– Оға, – деди, – сен йилда-айёмда бир марта бу ерга ташриф буюрасан, шунда ҳам бу ердан хафа қайтасан, бунақаси кетмайди. Рухсат бер, ҳозироқ бориб отаси билан гаплашай.

Маммад бек унинг юзига маънодор бир назар билан қаради. Юзбоши бу қаравдан ниманидир ўқиб, қўллари кўқсида – ёни билан юриб чиқиб кетди.

Ойишанинг отаси уйда йўқ эди. Юзбоши катта-катта қадамлар ташлаб тегирмон томон юрди. Тегирмон ариғи бўйидаги тол дараҳти остида кекса бир киши ўтирар, сёқларини эндиғина ювиб, дам олаётганди. Юзбоши уйга яқинлашганда, у вазиятини ўзгартирмади ҳам, юзини сал ўзгартириб, саломга жавоб берди, кейин:

– Марҳамат, ўтириб, – деди.

Юзбоши ўтириб, ҳамишагидан ҳам меҳрибон бир рафтор-ла гап бошлиди:

– Нима қиласапсан, деб бир кўргим келди-да...

– Нима бўларди... Эшиздим, оға келибди. Тўй улушига келишганди, ярим қоп ун бердим. – Тегирмончи йиртиқ шимини юқорироқ кўтариб, тиззасининг пастидан қайирди ва юзбошига қиё қараб, унинг тўла қизил юзига, йирик гавдасига разм солди. – Бор-будимни олиб кетишиди. Биласанку, экиним йўқ, зўрга кун кўраяпман, боқимимда эса етти жон бор.

Юзбоши кулиб унинг гапини бўлди:

– Хайрли хабар бор, энди дардинг бўлмайди!

Тегирмончи яхшилик кутмаган кўзлари билан юзбошининг юзига қараб:

– Хайрли хабар нима бўлиши мумкин? – дея лоқайд бир ҳолда жавоб кутди.

– Оға мени... сенинг ёнингга совчиликка юборди, сал олдинроқ Ойишани Қаҳриз бошида кўрган экан.

Тегирмончи жаҳлини яшира олмай:

– Ҳой, юзбоши, – деди, – оға менинг тенгим бўлмайди!.. Йўқ, бу иш

менинг кўнглимга ўтиrmади. – Кейин диққат-ла юзбошининг кўзларига қараб қатъий бир оҳангда: – Йўқ, бир-биримизга тент эмасмиз! – деб, жим қолди.

Юзбоши ширин тилини ишга солди: Ойишанинг баҳтли бўлишини, оғалик уйга келин бўлишини гапирса ҳам, уй эгаси рози бўлмади. Юзбоши уни қайта-қайта ишонтиришга уринди:

– Сен ҳам манфаат кўрасан, ҳеч қандай солиқ тўламайсан, оиланг роҳат-фароғатда яшайди.

Тегирмончи гапни бўлиб, ўнг қўли билан юзбошининг елкасига қоқиб, деди:

– Биласан, биродар, беш қизим бор, Тангри менга ўғил раво кўрмади. Мен Ойишани шундай йигитга беришни истайманки, мен ҳам бошимни ерга кўйганда хотиржам бўлай, билайки, ўрнимга ўғил кўйиб кетаяпман, болаларимга кўз-кулoқ бўлади... Оға менга бўйинтуруқ ўйлдошим бўла олмайди! Билдингми! Сўзнинг рости яхши!

Юзбоши қанчалар тушунтирмасин, тегирмончи ўз билганидан қолмади. Юзбоши унинг кўрслигини аввалдан ҳам биларди.

Халқ орасида тегирмончини ўжар Усмон дейишарди. Ишқилиб, умидсиз бир ҳолда келиб, Маммад бекнинг гурухига қўшилди, лекин яна умидвор қилиб уни овутди.

Масала уч кун чўзилди. Юзбоши Маммад бекка таскин бериш учун уни яқин орадаги ўрмонга овга олиб борди, бошини айлантиришга уринди ва айни чоғда қишлоқ оқсоқолларидан Усмонга совчилар юборди. Усмон айтганларидан қайтмади. Охири Ойишани булоқ бошидан олиб қочишдан бошқа чора қолмади.

24

Аёзли оқшом эди. Кундуз ёқкан қор тўхтамаган, ой оламга садафий нур сочарди. Воқифнинг уйда ўтиришга токати қолмади. Ўчоқнинг у томонида ўтириб пайпоқ тўқиётган Қизхоним томон юаркаркан:

– Ҳой, Қизхоним, тургин, бир хонлик томон бориб келайлик, – деди.

Қизхоним жавоб бермаса ҳам пайпоқнинг кегайларини суғурмай букиб, оёққа турди-да, нариги хонага ўтиб кетди. Лала Воқифнинг тўни билан телпагини олиб келди.

Ўн беш дақиқада тайёр бўлишди. Қизхоним чети мўйнали бахмал чакмонни кийганди, оёқларига нимпайпоқ кийиб, тиззасидан боғлаганди. Бошида жун матодан қалпоги бор эди. Воқиф ҳам сувсар пўстинини кийиб йўлга чиқишиди. Ой ёруғига қарамай, кўлида фонус ушлаган иккита қарол олдинда, иккитаси орқадан келарди. Фонуларнинг қалайланган мис доиралари ой ёруғида ярқиради, мўркон шаклидаги бир аршин осилиб турган қават-қават оқ мато эса янгидан оҳорланиб мумланганди. Пастки мис доирада ёнаётган шамнинг шуъласи ойдин кўринмаса ҳам мумли матодан ўтиб, йўлни ёритар ва меҳмон бўлиб бораётган сафга алоҳида бир дабдаба бахш этарди.

Саройга келгач, Қизхоним хонимлар даврасига, Воқиф эса хоннинг қишики хонасига ўтди. Ўчоқда чарсиллаб ўтин ёнар, ёруғи деворлардаги рангли нақшларга, алвон пардаларга ва гиламларга тушарди. Ўчоқ мўрконининг икки томонидаги токчага қўйилган шамдонларга шуъла сочиб шамлар ёнарди. Иброҳим хон шойи ёстикларга ястаниб, дарга Оғаси бек билан финжон ўйини ўйнарди. Ёш бир хос хизматчи ҳам чеккада тик

туриб, амрга тайёр холда кутарди. Финжон ўйини унчалик мураккаб нарса эмасди: қалайи бир тахтачага ўн иккита жез финжон тизилади, улардан бирининг ичига узук яширилади. Ўйиннинг ютуғи узукли финжонни тошида эди. Вокиф ичкари кирганида хос хизматчи финжонларни янгидан тузиб чиқкан эди; кўл хонда эди, ўйлаб финжонлардан бирини кўтармоқчи эди, Вокифнинг келишини кўриб, қах-қах урди.

– Охунд, жуда вақтида келдинг-да. Дарғани хўрозга ортгандим. Энди гул ураман¹.

Вокифга жой кўрсатиши, ўчоқнинг чеккасидан ўтири. Хон унга ғолибона назар билан қараб, яна мактана бошлади.

– Дарға мени Алимаммад деб ўйлайди, кўзини очирмайман дейди, шекилли-да. Мана қара, бу ҳам биттаси! – дея хон тахтачанинг чеккасига тизилиб, доира ҳосил қилган финжонлардан биттасини кўтарди. Унда узук йўқ эди.

Оғаси бек қулимсиради. Хон мулзам бўлиб, нариги томонидан ҳам битта финжон кўтарди, узук яна чиқмади. Фазаби яна ошди. Оғаси бек хоннинг иягини титратишнинг фарқини тушуниб, жим қолди. Хон жаҳл билан қўлинни ҳавода ўйнатиб, учинчи финжонга кўл чўзганда дарғанинг ранги ўчди; у бу сафар узукнинг чиқишини самимият билан истарди. Лекин аксига олиб, узук яна чиқмади. Хон учинчи финжонни тахтачанинг ўртасига уриб, хос хизматчига ўшқирди:

– Ол, мана буларингни йиғишиштир! – Унинг овозидан атрофга ваҳима чўқди.

Вокиф хоннинг ғазабини юмшатиши учун масалага бутунлай дахли бўлмаган сухбатни бошлади.

– Хон, – деди, – бугун қўлимга ажойиб китоб тушиб қолди. Бу ўлканинг жуда қадимти ахволи ҳакида ёзилган экан. Биласиз-ку, тарихга қизикаман.

Хон қизиқандай бўлди, жаҳлдан тушди. Вокиф хонда бўлган ўзгаришни сезиб, сўзида давом этди:

– Ҳали хижрат²дан минг йил бурун бизнинг ушбу Қорабоғда зардуштийлар яшаган. Турон эллари Дарбанддан, Садди Искандардан ўтиб, бу жойларни яғмо қиларканлар. “Шоҳнома”да ривоят қилинган Эрон-Турон уруши бизнинг Кура билан Араз орасида юз берган... Бизнинг ўлкамиз бошидан жуда кўп воқеалар ўтган.

– Раҳматлик Паноҳ хон Афшар Фатали хон устига юриш бошлагандা, хабарингиз бор, мен ярадор бўлиб, анча вақт Ардабилда ётдим. Бекларбеги мени бир дарвеш бошпанасига топширганди. У ерда бир кекса шайх бор эди. Кечаю қундуз ибодат қиларди. Ўзи ҳам ҳакими ҳозиқ эди: жароҳатимни тузатган ҳам ўша эди. Ибодатдан сўнг ҳузуримга келиб тўшагим ёнида ўтиради. У ҳам бу воқеаларни менга гапирганди. Унинг айтишича, Орон буюк бир ўлка экан, марказий шаҳри ҳам Ганжа экан. Аммо Оллоҳ бир гўзал ўлкага илоҳий ғаним яратган экан.

Иброҳим хон бутунлай жим қолиб, қизиқиб сўради:

– Хўш, бу арманилар қаерда экан?

Вокиф паст овозда:

– Арманилар бу ерларга анча кейин келишган; улар Босқинчилар зулмидан қочиб, бу тоғларга сифинишган. Кўрмайсизми, арманилар яшайдиган жойларга “сигинок” дейдилар... арманилар боши балоли тоифа бўлганлар.

Сухбат қизиди. Вокиф шарқ тарихига доир хоннинг шу пайтгача эшитма-

¹ “Гул урмок” – илк қўлдаёқ узукни топиш демакидр.

² Хижрат – Муҳаммад пайғамбарнинг Маккадан Мадинага кўчиши.

ган кўўпгина нарсалари ҳақида гапирди. Кейин латифалар бошланди, бошдан ўтган можаролар ва воқеалар ҳикоя қилинди. Воқиф Қорабоққа янги кўчиб келган вақти Ҳонмаммад билан айлангани боргани ҳақида айтди:

– Ёш вақтимиз эди, – деди, – тўпхонага айлангани боргимиз келиб қолди. Жўралар ийғилдик. Ҳонмаммаднинг пули йўқ экан.

– Ҳеч бўлмаса уйга бориб ёғ, бир нечта тухум олиб кел, дедик.

Ҳонмаммад кетдию гум бўлди. Кутдик, келмади. Мени орқасидан юборишиди. Бордим, қарасам онаси уни тандир ёнига ўтиргизиб кўйган, ўзи нон ёпаётибди. Жўрамиз нонларни сихдан ўtkазиб, хом жойларини тандирда қизартираётган экан. Айлангани боришимизни онаси билмасди. Билдирмасдан чиқиб кетмоқчи эди. Хуллас, четдан туриб Ҳонмаммадни кузатардим. Бир вақт қарасам, белбоғидан ёғ оқаяпти. Онаси буни кўриб:

– Қаранглар-а, ёғни ўтирглаб қаерига қистирибди! – дея косов билан бошига бир-икки туширди. Синган тухумлар суюғи Ҳонмаммаднинг чеккасидан пастга оқиб туша бошлади. У тухумларни ҳам онасидан сўрамай олиб, телпаги остига яширган экан...

Хон яйраб ўтирди. Кулавериб, дарғанинг кўзларидан ёш чиқиб кетди. Латифалар айни қизиган пайтда хос хизматчи патнисда олма, нок, анор, беҳи келтириб, меҳмонлар олдига қўйди. Булар қишлоқлардан юборилган мевалар эди.

Иккинчи қисм

4

1783 йилнинг июнь ойида Русия билан Гуржистон ўртасида аҳднома тузилиб, Гуржистоннинг Русия химоясига ўтиши ҳақидаги хабар Озарбайжон хонларига етганидек, Иброҳим хонга ҳам етиб борди. Шу хабарга кўра, Гуржистон хони мустақил бўлиб ўрнида қолади, салтанат ҳуқуқи Ираклийдан кейин авлодларига ўтарди. Гуржистоннинг ўзи пул ҳам чиқара оларди.

Тифлисга юбориладиган икки бўлук рус қўшини ўлкани ҳар эҳтимолга қарши мудофаа қилиши керак эди.

Иброҳим хон давлат арбобларини, оғалар ва бекларни кенгашга чақирди. Масала атрофлича музокара қилинди. Баъзилар Эрондан, айримлар Туркиядан мадад сўралишини илгари сурди. Валиаҳд Маммадҳасан сўз сўраб, оҳиста овозда:

– Ўрислар билан музокаралар олиб бориш зарур, – деди. – Зеро, уларнинг ўзлари ҳам бунга муҳтожлар: Апраксин деган биттасини бу ёққа юборганлари маълум. Катта мамлакат, қонуний қўшини бор.

Маммадҳасан оғанинг таклифи баҳс туғдирди. Оғалардан биттаси таассуфли бир овозда:

– Ислом мамлакатига кофирни киритиб бўладими? Қуръони Каримни оёқ остига олишларини истайсизми? Йўқ, Оллоҳ менга у кунни қўрсатмасин! – деди норози бўлиб.

Хон ҳаяжонланди ва ўзини қўлга олиб:

– Хонликни ўруслга бераман деган ким ўзи? – деди. – Мен тирик эканман, бунга розилик берарканманми?

Хоннинг овози бўғилди, ранги қочди, кейин чилим чекиб ўзига келди. Хоннинг аҳволи мажлис аҳлини ҳам сукутга солди. Чуқур сукунатни Вокифнинг юмшоқ, лекин ишонч бағишловчи овози бузди:

– Хон соғ бўлсинлар. Ожизингиз фикрича, хафсаласизлик кўрсатиб бўлмайди, эшикни душман қоқаётгани йўқ-ку! Ит билан ҳамроҳ бўл, лекин калтагинг қўлингда бўлсин, деган ота-боболаримиз! Биз ҳам ҳамишагидек, аввал яхши калтак тайёрлашимиз керак. Хон уч минг лазги асраб турибди, тўрт минг ўз қўшинимиз бор. Умар хонга хат ёзиб, ўн минг лазги сўрашимиз лозим. Хоннинг бениҳоя хазинаси ва озиқ-овқат захираси катта лашкарнинг уддасидан чиқа олади. Кейин Тифлисга элчилар юбориш керак: волийни табриклаш баҳонасида вазиятни ўрганишсин, ўриснинг каттаси билан учрашиб, фикр-мулоҳазаларини эшитиб кўрсинлар. – Шу ерда Воқиф гапдан тўхтаб, атрофдагиларни кўздан кечирди. Ҳамма дикқат билан Воқифни тингларди. У шу вазиятдан фойдаланиб, охирги фикрни айтди: – Нима айби бор, майли, элчиларимиз бизнинг ҳам ўрис ҳимоясига кириш орзумизни ўрис каттасига эшиittiришсин. Шу сўзни айтиш билан ҳимояга кирибок қолганимиз йўқ-ку.

Воқифнинг сўнгги фикри мажлисдагиларнинг баъзисини ҳаяжонга солди. Эътиrozлар бошланди. Яна диннинг бузилиши, кофирининг зафар қозониши каби масалалар қалқиб чиқди. Воқиф мулоқотларни охиригача тинглаб, кулимсираб бир эртак айтди:

– Кунлардан бир куни, бир подшо жар солдириб айтдики, кимда-ким менинг эшагимга тил ўргатса, унга бир қопчиқ тилла бераман, ўргата олмаса, бошини уздираман. Бир кекса косиб подшо ёнига келиб: “Мен ўргатаман”, – деди. Тиллаларни олди ва уч йил муҳлат сўради. Уйига қайтиб келганида хотини унга таъна қилди: “Эшак ҳам тил ўрганадими, уч йил бирпаста ўтиб кетади, подшо сенинг бошингни олдиради, мен бўлсан ора йўлда қолиб кетаман”. “Ҳой хотин, – дея кулди эри, – ҳали уч йил муҳлатим бор, шу уч йил мобайнида ё подшо ўлади, ё эшак, ёки мен”. Энди, оғалар, ҳимоя деган билан ҳимояга кирамидик. Вакт бор, имкон бор, кўрамиз, кенгашимиз нима қарорга келса, шуни қиласиз.

Воқифнинг фикри ва латифаси ҳаммага маъқул бўлди. Хоннинг ҳам кайфияти кўтарилиди, кулимсираб чилимини оғзидан кўймас, чилимнинг шишаасига чизилган киз расмига қараб хаёл сурарди. Бирдан хаёллари тарқаб, мажлисни кўздан кечирди. Ҳамма кўзини унинг оғзига тикканди. Хон бирор қарорга келиши лозимлигини сезиб:

– Демак, бундай, – деди. – Охунд Мулла Панохнинг ўзи Тифлисга боради. Унга беклардан ҳам кўшамиз. Ёзув-чизувини Мирза Жамол қиласи, яхши хат-саводи бор. Охундга тўла ихтиёр бераман. Маслаҳат қандай бўлса, шундай қиласи: ўзи оқил ва одил одам.

Хоннинг таклифини мажлис сукут билан маъқуллади.

6

Воқиф бошчилигига Тифлисга жўнатилган Қорабоғ ҳайъати йўлда корбўронга учраб анча азоб тортганди. Тифлисга етар-етмас Ираклий хоннинг одамлари уларни зодагонлардан бирининг уйига олиб бориб меҳмон қилди.

Ҳайъат аъзолари ҳам, уларнинг отлари ҳам ҳолдан тойганди. Воқифнинг биринчи ўйи таърифини кўп эшиитган Тифлис ҳаммомини зиёрат қилиш эди. Мирза Жамол ўзига хос мулоҳимлик билан:

– Охунд, – деди, – узоқ йўлдан кейин бу қорли ҳавода ҳаммомга борилса, сизни Ҳудо асрасин, зотилжамга чалиниш мумкин.

Воқиф ёноқлари қизил бу йигитга оталик меҳри билан қараб деди:

– Болам, мен тоғда ўсганман, совук, изгирин менга кор қилмайди. Сув йўл чарчоғини аритади, сўнг бир-икки кун уйда ўтириб дам оламиз.

Мезбон янги отлар тайёрлаганди. Воқиф сувсар пўстинини кийиб йўлга тушди, қўлтиғига нақшли буғчани қистириб олган хизматчиси ҳам унга эргашди.

Қишининг дастлабки ойи эди. Тифлисни қор қоплаганди. Шунга қарамай, рус қўшини етиб келган ва Тифлисга катта қувонч бағишилаганди. Аҳоли Эрон бўйинтуруғидан ва лазги хужумидан кутулгандай кўринарди. Воқиф Тифлиснинг ахволини энг аввал ҳаммомда ходимгар Ўжоқкулидан эшилти.

Ўжоқкули Воқифни тош супада чўзилтириб, совун суркаб, уни ок кўпикка белаб, икки қўлини кўпик ичиға чўзганча баданини ишқаларди. Воқиф бундан бадани яйраб, мастга ўхшаб баъзи саволлар бера бошлади. Ўжоқкули шарқ воқеалари ичида катта бўлган ва бу ҳодисалардан муайян сабоқ олган одам бўлгани учун Воқифга эҳтиётлик билан қаради ва ўзи ҳам уни саволга тутди:

– Оға, кечирасиз, меҳмонга ўхшайсиз?

– Балли, бу ерлик эмасман.

Ўжоқкули Воқифга маънодор тикилиб:

– Оға, – деди. – Тифлисда ахвол ёмон эмас, иншооллоҳ, янада яхши бўлади. Бироз қийинчилик кўрдик. Кейинги пайтларда Эрондан карвон келмай қолди. Корни кўраяпсиз-ку.

Совунсургич сўзларини тамомлаб, ғалати қулимсираганча Воқифга қаради. Бу қаравшда қанча маъно пинҳон эди: уни фақат шарқда яшаган кўпни кўрган одамларгина изоҳлай оларди. Ўжоқкулининг гапларини содда тилга ўтирасак шундай маъно англашиларди: “Тифлисда ҳаёт жуда оғир, аҳоли кундалик зарурий нарсалардан ҳам маҳрум. Чунки Эрондаги ва Озарбайжондаги тожу салтанат урушлари оддий ҳалқ ҳаётини заҳарламоқда. Эҳтимол, ҳали турмуш яхшиланиб кетар, лекин бунга шубҳа бор”. Ҳар ҳолда Ўжоқкулининг “Корни ҳам кўриб турибсиз-у” жумласининг масалага дахли йўқ эди: истибодод исканжасида яшаган одамлар бундай жумлаларни кўп ишлатар, буни “кириш йўли” дейдилар.

Воқиф масалани англаб қулимсираганча:

– Қаерликсан? – деди.

Ўжоқкули яна айни ифода билан:

– Табризликман... – деди. – Бу ерга зиёратга келганман. Яна юртимга қайтаман, оиласам ўша ерда.

Воқиф масалани тушунди. Ўжоқкули бекорга урушларда судралиб юрмай деб, юридан бош олиб кетган, хотини, бола-чақасини ташлаб, бу ёқларга қочиб келишга мажбур бўлган.

Ўжоқкули Воқифни кузатаркан:

– Оға, хайрли иш билан келганга ўхшайсиз. Бундай об-ҳавода сафарга хайрли иш учун чиқадилар, – деди. Унинг юзида яна маъноли табассум сезилди.

– Яхши бўлади, иншооллоҳ! Яхши бўлади! – унга қўшилди Воқиф.

Воқиф ҳаммомдан сўнг икки кун уйдан чиқмай, Тифлис ва волийсига битта шеър, Алюнга ҳам яна битта шеър бағишилаб ёзди. Кўчириш учун шеърларни ўзи билан келган хаттотга берди. Шаҳарни айланиш учун чиққан Мирза Жамол қайтиб, Умар хон билан Фатали хон вакилларининг Тифлисга келганини хабар қилди. Бу масала Воқифни ўйлантириб қўйди. У Умар хоннинг вакиллари билан учрашиш ниятида бўлса ҳам эҳтиёт бўларди: бу учрашув янглиш гап-сўз тутдириши мумкин эди, чунки Фатали

хоннинг одамларига бир баҳона керак эди. Воқиф ана шу мулоҳазаларга бориб, Ираклий хонни расман табриклагунга қадар бирор билан учрашишни лозим топмади. Лекин Воқиф билан учрашишни истаганлар борлиги маълум бўлди.

Воқиф келганининг учинчи куни хизматчи бир тожирнинг келганини айтди.

- Нима иш қиларкан, ким ўзи? – сўради Воқиф қизиқиб.
- Оға, қўлтиқчи¹ экан, ипак мол олиб келибди.

Воқиф эҳтиёткор бўлса-да, розилик берди. Ичкарига гуржиларга ўхшаб кетадиган, текис соқолли бир одам кирди.

– Рухсат этасизми, афандим ҳазратлари? – деганида Воқиф бу одамнинг Рум диёридан эканини сезди.

– Марҳамат! Марҳамат! – деди-да ўчоқ ёнидан жой кўрсатди. Кейин ишора қилиши билан ичкаридагилар бошқа хонага ўтишиди.

Қўлтиқчи молларини очиб кўрсатди. Чиройли фаранг ва Истанбул газламалари шоирни ҳайрон қолдирди. Савдогар молларни кўрсатаркан, асл мақсадини мулойим бир тил билан тушунтира бошлади. Бу одамнинг Ахисха ҳокими Сулаймоннинг вакили экани маълум бўлди. Тифлисга яширин равишда Озарбайжон хонлари вакиллари билан учрашишга келган ва сир очилмаслиги учун тожир кийимида кирган эди. Масала русларнинг Терек дарёси устига кўприк солиб, тоғлардан йўллар очиб Тифлисга келиши хусусида эди.

– Биродар, бу йўллар фақат аскар эмас, оғир тўплар ва замбараклар ташиб келтириш учун курилмоқда. Бугун Тифлис, эртага, Қорабоғ, кейинги кун эса Эрон ва Усмония давлати ерларига бостириб киришади ва кофир ханжари ислом бўғзига санчилади.

Сулаймон пошонинг вакили руслар хусусида узоқ гапирди, барча хонликларни бирлашишга даъват этди. Воқиф вакилни жимгина тинглар, ора-сира ўчоқни оташкурак билан ковлаб қўярди:

– Усмонли давлати билан Русиянинг алоқаси қандай? – деб сўради Воқиф.

Вакил кўзларини чақнатиб ҳаяжон билан:

– Афандим, – деди, – саккиз йил бурун Кичик Қайнарча битимиға мувофиқ Москов билан сулҳ ҳолатида эканимизни биласиз. Бу олти йиллик шиддатли жангларнинг бир хужжати сифатида бизни ҳозирча бা�ъзи ташаббуслардан маҳрум қилаётir. Аҳвол шундай давом этса, албатта...

Шу пайт эшик очилиб, хизматчи мезбоннинг келганини хабар қилди. Воқиф вазиятини ўзгартирмай:

– Марҳамат қилсинлар! – деди ва газламанинг ўрамини қучоғига олиб, вакилга буюрди: – Мана бу менга маъқул келди, наригиларини ҳам оч-чи, бир кўрай...

Мезбон ичкарига кирганда Воқифнинг газламаларни танлаш билан машғул эканини кўрди, у савдо билан шу қадар банд эдики, мезбоннинг ичкари кирганини гўё сезмай қолганди. Бирдан газламаларни қўйиб:

– Кечир, ўғлим, – деди, – марҳамат, ўтири!

Мезбон тавозе билан деди:

– Ойнинг йигирма саккизида, эртага эмас, индинга расмий зиёрат бўлади, шуни хабар қилгани келдим. Шу куни подшо ташрифингизни кутади...

Воқиф дарров:

– Жуда соз, ўғлим, – деди.

¹ Қўлтиқчи – савдогар.

Шу аснода кўчадан мусиқа товуши эшитилди. Воқиф деразага ёндошли: кўчадан зирҳли суворийлар ва гуржи жарчилари мусиқа дастаси билан бирга юриб байрам бўлишини эълон қиласидилар.

Рус зобитларидан бири олдинга чиқиб Ираклий хонни Русия ҳимоясига ўтиши муносабати билан табриклади, кейин Петербургдан юборилган ҳадяларни бирма-бир кичик зобитлар олиб Ираклийга берди. Нихоят, кумуш ва олтин билан жило берилган жилдга солинган фармонни тақдим этди. Ираклий хон ҳадяларни тик туриб қабул қиласидиларга берарди, фақат тож ва чўқморми ўз ёнида баҳмал ёстиқлар устига кўйди.

Маликанинг фармони тақдим этилиши билан ташқаридан 101 замбаракнинг ўт очиши эшитилди. Шундан сўнг Ираклий хон етти ўғлини ва икки ўғил неварасини таҳтнинг зиналарига кўйиб ўзи таҳтга чиқди ва ўша ердан ҳадяларни тақдим этган рус зобитига ташаккур билдириди.

Шу билан маросим тугади, Русия вакиллари бирма-бир олдинга чиқиб Ираклий хоннинг қўлини қисар ва табрикларди. Гуржи аъёнлари ва маъмурлари ҳукмдорнинг қўлини ўпарди, баъзилари ҳаяжондан йиғларди. Навбат Воқифга келди виқор-ла юриб бориб Ираклий хон билан қўл олишида, сал энгашиб:

— Аждодингиз таҳтида пойи қадим бўлингиз,—деди.—Қорабоғ ҳукмдори, фахримиз Иброҳим Халил хон олий ҳазрат-ла йигирма йилдан бўён дўст ва иттифоқ бўлиб тинч яшаб келаяпсизлар, иншоллоҳ, келгусида ҳам садоқат ва вафодорлигимиизда пойдор бўлгаймиз.

Ираклий қошлари остидан Воқифга қараб, туркча деди:

— Шубҳа қилмайман! Дўстим Иброҳим Халил хонга кўпдан-кўп саломларимни етказинг.

Воқиф гапиравкан унинг сўзларини таржимон таҳт ёнида турган полковник Бурнашов таржима қиласидилар, у ҳам Воқифни дикқат билан кузатиб бошини тебратарди.

Маросимдан кейин меҳмонлар тамаддихонага чақирилдидилар. Гуржи зодагонларидан биттаси тулумбоши – тамада қилиб сайланди, дабдабали зиёфат бошланди. Тамадданинг таклифига биноан чоғирлар мугуз қадаҳларга қўйилди.

Малика Екатеринанинг шарафида нутқ айтилиб, тикка туриб ичилди: ташқаридан яна 101 марта замбарак отилди. Иккинчи қадаҳни “Зоти ҳазратлари” (битимга кўра Гуржистон подшосига шу унвон берилганди) Ираклийнинг соғлигига кўтаришди, 51 замбарак гумбурлаши остида қадаҳлар сипкорилди...

...Кейинги куни Воқиф калисога бориб, Ираклийнинг Русия билан тузилган битимга содик қолишига доир ичган қасами маросимида иштирок этди. Воқиф Тифлисда икки ҳафта қолди. У Ираклий хон билан бошка учраша олмади, чунки битимга кўра Гуржистон подшоси фақат полковник Бурнашов воситаси билангина алоқага кириша оларди ва Русия вакилининг маслаҳатисиз бирор қадам босолмасди. Ираклийнинг бу вазиятидан мамнун бўлмаган Воқиф расмий оламни тарқ этиб, Тифлисни томоша қиласидиларди. У энди фақат бир шоир, гўзалларнинг хассос ошиғи эди...

Воқиф Қорабоғ хонлигининг куч-қудратини намойиш қилиш учун алоҳида бир дабдаба билан Чор вакили полковник Бурнашов ёнига борди: кумуш эгар-жабдуқли отини минди; икки жиловдор отни етаклар, кўриқчи орқасидан борар, қуролли навкарлар ҳам гўзал Қорабоғ аргумоқларини йўрттириб кетишарди.

Сафар ҳам отини олдинда ҳайдаб, йўл бўшатиш учун хабардорлик қиласди. Воқиф бекларнинг боришини лозим топмади. Ўзи билан факат ҳайъат котиби Мирза Жамолни олган эди.

Воқиф Бурнашов яшаётган уйнинг айвонида устки пўстинини ечди, навкарлардан биттаси унинг елкасига сувсар мўйнали ипак хирка ташлади, шу қиёфада ичкари кирди. Бурнашов столининг ёнида тик турарди. Унинг тиззасигача тортилган пайпоклари, ингичка пойабзали, уқали чакмони, тумори, кўксидаги хоч ва юлдузлари, ниҳоят, майда сочли парик ва қиришиланган юзи Воқифга таниш бўлса ҳам уни қайтадан қизиқтириди.

Столнинг орқа томонига илинган қимматбаҳо гиламнинг устидан Екатеринанинг улкан расми осиб қўйилганди. Воқиф малика расмини илк марта кўраётганди, у бу суратга бир қараб, назарини Бурнашовга бурганда, бу икки сиймо орасида қандайдир ўхшашлик сезди: юмалоқ юз, ола кўзли Бурнашов ҳам аёлга, хусусан, Екатеринага ўхшарди.

Негадир Воқиф сезилмас бир табассум-ла “Мол эгасига ўхшамаса ҳаром ўлади”, деган мақолни эслади. Бурнашов Воқифга назокат-ла қўл бериб, столининг олдидаги юмшоқ ўриндиқдан у ва котибига жой кўрсатди. Ўтиришди. Тилмоч ҳам келди. Назокат юзасидан бир қатор расмий сўзлардан сўнг Бурнашов Екатеринанинг адолат ва марҳаматидан, Тифлисга қўшин юборишида хеч қандай истило фикрида бўлмаганидан, факат аҳолига осоиишталик ва баҳтиёрлик тилашидан гапириб, асосий масалага ўтди.

– Биз муҳтарам ҳукмдорингиз Иброҳим Халил хон билан ҳам дўст бўлиш ниятидамиз. Марҳаматли малика сизларга ҳам ҳимоя қўлини чўзишни истайди. Хон факат бизнинг ҳимоямиздагина ўз тахтида боқий қола олади.

Воқиф бу сўзларни тинглар ва синчковлик билан Бурнашовнинг ингичка лабларини ва оппоқ тишларини томоша қиласди. Бурнашов сўзини тугатиши билан Воқиф бошлади: Қорабоғ хонининг Чингиз наслига ва Аргун сулоласига мансублигини, Шуша сингари шарқнинг қалити ҳисобланган мустаҳкам бир қаъзага молик эканлигини, куч ва қудратини, Табризга қадар ҳукми етишини бирма-бир гапириб берди ва:

– Аъло ҳазратлари малика билан ҳам, – деди, – дўст бўлиб яшашга муштоқ ва умиддамиз. Лекин...

Шу ўринда Воқиф тўхтаб, жиддий бир қарап билан Бурнашовга тикилди ва Ираклийнинг тузган битимиға ишора қилиб, айни шу шароитни Иброҳим Халил хоннинг ҳам мақбул қўришини сезтирди.

Бурнашов кулимсиради. Бу кулимсирашда чор Русияси вакилининг ушбу вазиятга рози бўлмагани ошкора қўринди. Воқиф масалани англади, лекин бўш келмади: Эрон воқеаларига ўтди. Иброҳим хоннинг Эрон тахтини қўлга олиши сингари қилинган таклифларни эслатиб ўтди.

Бурнашов чехраси аста-секин тундлашиб, яна очилди:

– Сиз, – деди, – аълоҳазрат маликанинг олийжаноблигига ишонишингиз керак. Сизлар учун бу марҳамат улуғ бир неъмат бўла олади.

Воқифнинг ҳам юзи бироз қатъйлашиб.

– Марҳамат катта неъматdir, – деди, – тўғри марҳамат қиласиз, аммо мамлакатлар ўртасидаги муносабат ва алоқаларнинг ҳам қонун ва қоидалари бор.

Бурнашов яна ишонч ва марҳамат масаласини ўртага ташлади, маликанинг Крим хонига нисбатан қилган “адолати”ни далил қилиб келтирса-да, Воқифни қониқтира олмади. Воқиф Ираклий билан тузилган битимиғи назарда тутиб, ишоралар қилиди, бу фикрлар ўз шахсий фикрлари бўлиб, Иброҳим Халил хоннинг ҳали гўё қандай райда эканини билмаслигини

илгари сурган ҳолда Бурнашовни оғзидан илинтиришга ҳаракат қилди. Нихоят, Бурнашовнинг насроний Гуржи斯顿га ва мусулмон Қорабоқса бошқа бир назар билан қараётганини сезиб, дилтанг бўлди.

Энди Воқиф айни сұхбатга яна қайтишни истамасди, шу боис Бурнашовнинг ўжарлигига жавоб тариқасида ушбу масалага бутунлай дахли бўлмаган сұхбатларга ўтиб, Чор вакилининг ҳафсаласини пир қилди.

Воқиф Шушага келиши билан Иброҳим хоннинг ҳузурига кириб, Тифлис ҳақида гапириб берди. Русларнинг гуржиларга муносабати ва Қорабоғнинг шартсиз-битимсиз Русия тобелигига ўтиши ҳақидаги таклифи хонни жиғибийрон қилди. Унинг ҳамишагидек факат ияги эмас, бутун вужуди ғазабдан титрай бошлади.

— Майли, — деди, — аммо сен менинг куч-қувватимни, қалъанинг мустаҳкамлигини айтмадингми?

Воқиф паст овозда жавоб берди:

— Хон, ҳаммасини айтдим... Барини гапирдим, тушунтирдим...

— Ҳўш, нима бўлди?

— Ўз билганидан қолмади.

Хон индамади, лекин асабийликдан ич-этини тирнарди. Оташкурак билан ўчоқнинг чўғини титкилар, ўйланарди. Воқиф хонни тинчлантириш учун:

— Хон, — деди, — ит итнинг оёгини босмайди, дейдилар. Ираклий ҳам, ўрис ҳам насроний. Бизга нисбатан адоватлари бор. Бунинг устига ўрисларнинг оёқлари ерга тегди: усмонлиларни енгишди, Қrimни олишди. Бу ғалабалар ўрисларни қутуртириди. Уларнинг эса низомли қўшинлари, замбарак, тўпхоналари, дастгоҳлари жойида.

Хон индамас, яна титроқ қўллари ўчоқни ковларди. Бирдан ҳушига келгандай бўлди:

— Алимаммаднинг орқасидан одам юборганман, келсин, кўрамиз, маслаҳатимиз қандай бўлишини, — деди.

Воқиф некбин бир овозда:

— Хон, — деди, — ўрисларни юмшатмоқ учун восита кўп: ҳозирча қалъани янада мустаҳкамлаш, янги замбараклар олиш, қурол-яроғимизни, озиқ-овқат захирамизни кўпайтиришимиз лозим. Тайёргарлик кўраётганимизни арманилар Тифлисга хабар қилишлари тайин. Кўрайлик-чи, нима бўлади,

— Воқиф бироз жим қолди, кейин эҳтиёткорлик билан қўшимча қилди: — Фатали хон Оллоҳ дегудек бўлса, эҳтимол...

Хон Фатали хон сўзидан яна ғазабланди:

— Ўша қанжиқни гапирма! — деди. — Унинг ваъдасига ишониб бўлармиди? У кофирдан ҳам ёмон!

Эшик очилди, Мирза Алимаммад оға ичкари кирди. Совуқдан бурни қизарган, киприклари қиров боғлаганди. Салом бериб ўтириди. Қизарган қўлларини бир-бирига ишқалаб, ўйчан бир ҳолда ойналари турланган рангин деразага қаарди. Хон оташкуракни ерга қўйиб, юзини ўнг томонида ўтирган Мирза Алимаммад оғага ўгириди:

— Қандай янгилик бор?

Мирза Алимаммад оға итоаткорона қўлларини тиззалари устига қўйиб гап бошлади:

— Ўша кунги хабардан бошқа янги бирор нарса йўқ: ўрислар Оғамаммад

хонга жуда кўп совғалар ва тўнлар юборишибди. Аввал танишни истамасдилар, энди негадир қилиқ чиқаришяпти. Алимурод хон Исфаҳонда маҳкам ўтириб, Оғамаммад хонни танишни хоҳламаяпти. Бош кўмондон Содик хонни таҳтдан ағдариб, ўн саккиз ўғли билан бирга ҳалок қилган. Тожирлар олиб келган хабарга кўра Фарангистон Исфаҳонга элчи юбориб, суриштиришлар олиб бормоқда.

Воқиф бу суҳбатларни тинглаб, тасбех ўгирап ва ўйларди. Мирза Алимаммад сўзини тугатгач, хон Воқифнинг юзига қаради, бу ишора эди: Воқифдан маслаҳат сўради. Воқиф қад рослади, кўзлари чақнади:

– Хон, – деди, – бу хабарлар шуни кўрсатадики, ҳозирча Эрондан бизга озор етмайди. Ит ит билан талашаса, йўловчининг иши ўнгидан келади. Ҳамма гап ўрис масаласида. Ўрис билан бўлган муаммони изга солмоқ лозим. Куч-қувватга қолса, биз эплай олмаймиз. Биз томондан ўзи, иккинчи томондан Фатали хон... – Воқиф гапдан тўхтади, негадир ўчоқнинг четига тушиб қолган касовни оташкурак билан олиб, оловнинг ичига отди ва сўзида давом этди: – Тадбир ишлатишими керак. Сулаймон пошо билан алоқага кириш лозим. Умар хон хужумга тайёрланиши даркор. Хонлиги қўлидан олинган Оғаси хонга ёрдам беришимиз керак: Шамахи хони Маммадҳасаннинг устига бостириб борсин; биласиз, Фатали хоннинг кизи Маммадҳасаннинг ўғлида, қариндошлиқ баҳонасида Фатали хон Ширвонни идора қиласяпти. Шаки хони Ҳожи Абдулқодир ҳам тинч тургани йўқ, у Фатали хон билан апоқ-чапоқ. Бунга нисбатан ҳам бирор чора топиш керак бўлади... Бу тадбирлар кўрилмаса, бошимизни омон саклай олмаймиз.

Хон ғамгин бир оҳангда:

– Абдулқодир... Абдулқодир... – дея бошини сарак-сарак қилди ва алам билан давом этди: – Кимга ишониш мумкин! Нон-намак ҳаққи-хурмати қолмаган бўлса?! Бу Абдулқодир Макка зиёратидан қайтиб, Кўра соҳилига сифинганди. Бошини қаерга уришни билмасди. Қўмуқ хони Маммад келиб акаси Оғакиши хонни ўлдириб, Шаки хонлигига эга чиққан эди. Акасининг ўғли Ҳусайн хон Оғаси хондан ёрдам олди. Маммад хонни қувиб Шакида хон бўлди. Бу Абдулқодир хўтиқ ёнимга одам юборди, ялиниб-ёлворди. Раҳмим келди... ҳамда Фатали ёғий бўлади деб ўйладим. Ёрдам юбордим. Шакига хужум қилиб, акасининг ўғли Ҳусайн хонни бўғдириб, ўрнига ўтириди... Бунинг эвазига энди менга ёғий бўлиб ўтирибди... Эҳ, Охунд, инсоннинг юзи тескари бўларкан!

Воқиф кулимсиради.

– Хон, – деди, – дунёнинг ишлари ҳамиша шундай бўлган, шундайлигича қолади! Зўравонлик ва хийла! Гардиши давроннинг лойи зўравонлик ва хийла билан қорилган. Инсофга сифмаса ҳам шундай! Ҳожи Абдулқодирнинг удласидан яна шўрлик Ҳусайн хон Муштоқнинг ўғли Маммадҳасан хон чика олади. Ўшандан бери у бу ерда бекор ўтирибди. Эртага буюр, бориб Жар томонда кўшин тадоригини кўрсин.

Воқифнинг таклифи хонга маъқул келди. Ҳожи Абдулқодир хон Дордоққозда кўшин тўпларкан, Шаки хукмдори Ҳусайн хон Муштоқ ўғли Маммадҳасан хонни Абдулқодирнинг ёнига юбориб ярашувни таклиф қилганди, у ҳам акасининг невараси бўлган Маммадҳасан хонни ушлаб, қўли боғлиқ ҳолда уни Иброҳим хон ўлдирисин деб Шушага юборганди.

Ўша пайт Воқифнинг маслаҳати билан Маммадҳасан ўлдирилмади, Абдулқодир хонни рози қилиш учун Маммадҳасан хоннинг кўйлаги қонга ботирилиб унга юборилганди. Энди Воқиф вақти келиб омон қолишига сабаб бўлган Маммадҳасан хондан фойдаланишни истар эди.

Маслаҳатлашув шомдан бир-икки соат ўтгунча давом этди. Воқиф билан Мирза Алимаммад хон хузуридан чиқди. Хон ўтоқ ёнида ёлғиз қолиб, яна оташкурак билан ўчокни ковлаштира бошлади. Хизматчи аёл астагина одим босиб унга яқинлашиб:

– Хон омон бўлсин, қайси хонада дастурхон ёзай? – деб кута бошлади.

Сарой одатига кўра хон қайси хотинининг ёнида шомни кутса, кечани ҳам ўша ерда ўтказарди. Шу туфайли хизматчи аёл ҳар оқшом хоннинг раъйини билиши керак эди. Хон оқсочга бир неча сония жавоб бермади, кейин титроқ овоз билан:

– Тамаддини шу ерда қиласман, – деди, – ғуломга айт, ўтоқقا ўтин қаласин! Оқсоч таъзим қилиб:

– Хўп бўлади, – деб чиқиб кетди. Шомдан кейин хон яна чарсилаб ёнаётган ўтоқ ёнига ўтириди. Аввал овқатнинг таъсири бўлса керак, бироз хотиржам тортиди, сўнгра аста-секин яна асабийлашди. Воқифнинг Тифлисдан келтирган хабарини қайта-қайта эслаб, ғазаблана бошлади: “Мен неча марта ёрдам бериб, танглиқдан кутқарганим Ираклийга тож келсин, совғалар келсин... Менга эса шартсиз-сабабсиз тобеълик таклиф қилинса?! Мен шу кунга қолдимми? Мен – Паноҳ хоннинг ўғли Арғун хон авлоди?!“

Барча Озарбайжон хонлари менинг маслаҳатим-ла иш кўришсину мен кофирга бўйсунайми, қул бўлайми? Фатали қанжик, бунақанги душманчик! Сендан менинг нимам кам?! Абдулқодир хўтиқ ҳам оёқ кўтараяпти. Булар ҳаммаси ўша сўзидан қайтган Ираклийнинг иши. Единг Ереван ва Ганжадан келган туманларни!..

Бу ўтин мунча яхши ёнаяпти... Дамироғочнинг яхши чўғи бўлади. Мана бу дўлана ҳам фақат тутун чиқаради, на иссиги бор, на олови... Эҳ, нима қиласай, қўлимда имкон бўлса, Кубанинг кулини кўкка совураман, Шакининг ўрнига арпа эктираман.

Соатлаб давом этган ўйлар Иброҳим хонни банд этди; асабийлашди, уйқуси бутунлай қочди. Ниҳоят, унинг оғирлашган бошига бир енгиллик келди, гўё боши берк кўчада бир ёруғ кўриниб, уни қийинчиликдан кутқарди. Хон Воқифнинг тадбирларини эсига олиб жим қолди. Бирдан асабий бир кулиш унинг ваҳимали чехрасига ҳалимлик сочди. Бу соатлаб чеккан азоби унга ўринсиз ва кулгили кўринди. Хон оёққа туриб, эснади, яйраб керишди. Антика бир титраш бутун вужудини қоплаб, жимирилатиб ўтди. Шамдонга қаради, шамнинг сўнгги шуъласи оловланиб жизиллай бошлаганди. Бошқа бир шамдондан шам олиб ёндириди ва жизиллаётган шамнинг устига босди. Бутунлай хотиржам бўлди. Шамдонни олиб, хонадан чиқди. У ёқ-бу ёкка қаради, девор тагида тик турган хос хизматчига юз бурди:

– Шамларни ўчир, бориб ёт! – деб ҳарам доирасига ўтди. Маммадҳасаннинг онаси хуррак отарди. Хон юришда давом этди. Қоратоғли Шоҳниса хоним юзини деворга ўтириб ухлаб ётарди. Кейинги хона малик Шоҳназарнинг қизи Хурзодники эди. Ўндан сўнгисида Шоҳберди хоннинг қизи Хуршид байим ётарди... Хон бу катта ёшли хотинлари ёнида қолмасди. Ҳозир ҳам эътибор бермай ўтди. Унгутлик Оллоҳёр бек қизининг кўрпаси тушиб кетганди, хон уни тўғрилаб қўйиб, ўтиб кетди. Борган сари шам эриб, бармоқларида қотарди. Ганжалик Жавад хоннинг синглиси Тўтўбайим оппок билакларини боши остига қўйиб, жимгина ухларди. Хон юришдан тўхтаб, уни эҳтирос билан кўздан кечирди. Ёруғ Тўтўбайимнинг юзига тушганда, у кўзини очди. Шуурсиз бир қарааш билан хон томонга бурилди, керишиб кулимсиради.

– Вой, хон, шу пайтгача ҳам ухламадингизми? – дея бошини кўтарди.

Йирик соч ўрими илон каби ёстиқ узра тўлғонди. – Кела қолинг, совқотганга ўхшайсиз.

Хон Тўтубайимнинг ёнига ўтириди. Тўтубайим хоннинг қўлидан шамдонни олди, гиламнинг устига қўйди ва хоннинг совуқ қўлларини бўлиқ тўшига босди. Хон ёқимли бир харорат сезиб завқланди.

Тўтубайим эркаловчи ширин овоз-ла:

– Нега ётмадингиз? – дея хоннинг яраларини янгилади. Яна Тифлис, Куба, Шаки бир-бирига аралашиб бутун оғирлиги билан унинг елкасидан босгандай бўлди. Хон жавоб бермасдан қўлларини хотинининг иссик сийналаридан олиб, дик этиб ўрнидан турди. Яна шамни қўлларида тутиб ҳарам доирасини айлана бошлади... Авар хони Умарнинг синглиси Бика кўрпа ўртасида ғужанак бўлиб ётарди... Кейин нахичеванлик Рўғашин, тоғлик Сўнанинг, Дизоқ малигининг қизи Хотойнинг, баҳманлик Ҳадичанинг, сарижалик Муруssa хонимнинг ва бошқаларининг хоналаридан ўтиб, охирги ётоқقا етди. Ҳамма жойи гилам, шолча, олача ва ипак матолар билан безанганду хона Шуша савдогари Ҳожи Каримнинг қизи Онахонимга ажратилганди. Онахоним Иброҳим хоннинг энг янги хотини эди. Ўн олти-ўн етти ёшларида, тўлагина бир қиз эди. Хон ётоқقا кирганда гулоб ҳиди уни маст қилди: кўрпасининг бир томони сурилиб, гиламнинг устига тушганди, қизнинг қора киприклари қайрилиб, хафиф соя согланди, лўптигина ёноқлар тонг шафағидай порларди...

Хон қўлини қизнинг белига олиб бориб титроқ бармоқлари билан қуршоғини¹ еча бошлади.

* * *

Воқифнинг йўл чарчоғи ҳали тарқамаганди. У ўтиб келган тоғларнинг совуғидан тумов бўлғанди. Шунинг учун ҳали хонасида ётиб, Фузулий мутолааси билан машғул эди. Фузулийни кайта-қайта ўқиганди, шунга қарамай дам олиш пайтлари уни қўлидан қўймас эди. Кекса лала оёғи учida ичкари кириб:

– Оға, сизни кўришни истайдилар, – деди.

– Ким экан?

Лала ҳуррак бир товушда жавоб берди:

– Оға, афтидан, хоннинг ғазаби яна ошганга ўхшайди...

Воқиф масалани, дарҳол тушунди, тез кийинаркан:

– Чакир, залга киришсин, ташқари совуқ! – дея лалага буюрди.

Лала секин товушда:

– Оға, залга сиғишимайди. Жамоат кўп йиғилиб келишди, – дея чеккага чиқди.

Воқиф айвонга қараса, ҳовли, зинапоя, айвон – ҳамма жой одамга тўлиб кетибди. Кучогида боласи бор бир аёл ўзидан кетиб, юз тубан чўзилиб ётарди. Воқиф бундай манзараларга қўнинкан бўлса-да, юраги санҷди. Лекин зоҳирий совуққонлигини сақлаб, илтижо билан келганлардан бир-иккитасини ичкари чакирди. Дардларини тинглади: яқин одамлари зинданга ташланганди. Воқиф оҳиста:

– Гап бундай, – деди, – ўттиз-кирктача одам оқ кафан кийиб қўлда занжир билан сарой ҳовлига келасизлар, мен сизларга бир-иккита зикр ёзиб бераман, уни ўқиб бошингизни дудама билан уриб ёрасизлар. Кейини билан ишингиз бўлмасин, мен хозир саройга жўнайман.

¹ Қуршоқ – камар, белбоғ.

Воқиф шундай кўрсатма бергач, ичкаридаги кўрпача устига ўтириб, қоғозга ёза бошлади. Кейин қоғозни бувлаб, саройга борадиганларга топшириди:

– Менга қаранглар, бошларингизни ёраётганда буни ўқийсизлар. Энди боринглар, айтганларимни тез қилинглар, мен ҳам бораман.

Воқиф девонхона олдидан ўтиб, саройга бораркан, бечора Хонмаммадни дор ёғочида осиғлиқ кўрди. Қор аралаш шамол унинг майитини ҳавода тебратарди. Атрофга кўп оломон тўпланганди, жаллодлар ўчоқقا ўтин қалаб, одамларни сихга тортишга тайёрлашаётганини томоша қиласарди.

Воқиф саройга борганида Иброҳим хон ҳали ғазабдан тушмаганди: дорўға, мизондор хон хузурига чакирилиб, жазолаш учун одам талаб қилинарди. Шоҳмаммад Иброҳим хоннинг буйруқлари остида шошиб қолган, қалби тош бўлса ҳам укаси Хонмаммаднинг осилиши уни гангитиб қўйганди.

Воқиф салом бериб ичкари кирди ва тўрга ўтди. Саломга жавоб оларкан хоннинг лаблари қимиirlади, холос, овози эшитилмади. Воқиф бирор калима сўз айтмай, мажлисдаги масҳарабозларнинг енгил, бемаъни қилиқларини аччиқ бир истеҳзо билан томоша қиласарди...

Хонга хабар келди.

Туриб айвонга чиқдилар, оқ кафанли одамлар зикр тушиб бошларини дудама уриб ёрадилар. Конга беланган кафанларга караганда кишини даҳшат қопларди...

Қон томаётган лаблардан учган бу жўшқин зикр хонни илигигача гангитди, титроқ товуш-ла Воқифга ўгирилди:

– Охунд, сен ўқиган одамсан, бу нимаси? – деди.

Воқиф рўмолнасини кўзига босиб, йиғламсираган товушда:

– Хон омон бўлсин, – деди, – Карбалода шаҳид бўлган Ҳусайннинг йўлида... – Воқиф бошқа гапиролмади. Хон ҳавфсираб сўради:

– Нима хоҳлашаяпти?

– Хон, бугунги маҳбусларнинг гуноҳларидан кечишингни сўрашаяпти...

Хон, имом Ҳусайн ишқидан кечиб бўлмайди!..

Диндор хоннинг кўз ёшлари соқолидан оқарди:

– Охунд, – деди, – билганингни қил, мен гуноҳга ботишни истамайман!

Воқиф бошини айвондан пастга қаратиб, севинчли бир товушда:

– Ҳой, жамоа, – деди, – хон бугунги маҳбусларнинг гуноҳини имом Ҳусайнга бағишлиайди. Боринглар, хон умрига дуо қилинглар!

– Соғ бўлсин, хонимизнинг умри узоқ бўлсин! – деган овозлар ҳовлини тўлдирди.

10

...Осмон яна қарсилаб кетди, унинг орқасидан гумбур-гумбур овоз тўлқинланиб узоқлашди. Булутлар сийраклашиб, ёйилиб кетди, қуёшнинг ёқимли табассуми яна оламга зар соча бошлади. Телли билан Гулноз шолча тўқишини ташлаб ҳовлига чиқишиди. Илма-тешик бўлган барглар ва феруза ранг тоғолчалар ерга тўшалган. Қизлар энгашиб, тоғолчани йиғаркан, дарвоза очилиб Сафар ичкари кирди. Юзида ҳаяжон акс этарди.

– Телли, – деди, – мен кетаяпман. Мана қалит, уйни беркитиб юр, эҳтиёт бўл!

Телли унинг кутилмаган сафарларига ўрганган бўлса-да, яна қайғуга тушиб, қўрқиб кетди. Фақат:

– Нега? Қаёққа? – дея олди ва бурилиб дарвоза томон кетаётган Сафарнинг орқасидан чиқди.

Сафар ҳовлидан чиқиб, дарвозага боғланган отига сакраб минди-да, айтган гапи шу бўлди:

– Куба хони билан Шаки хони катта қўшин билан Курани кесиб ўтишибди...

Сафарнинг оти лой сачратиб чопиб кетди. Телли ҳам кўз ёшларини кафтининг орқаси билан артиб ичкарига қайтди. Козим ишдан хабар олиб қайтиб келди. Бутун оила Теллининг бошига йифилди. Телли юзини тўқилаётган шолча томон буриб, отасидан уялиб, овоз чиқармай йиғларди, Гулноз унга тасалли берарди. Теллининг онаси қўлларини қўксига қўйиб, шолчага суюниб турди, юзида қаттиқ дард ифодаси бор эди. Козим киши айвоннинг четида ўтириб, оёқларини осилтириб лойни эзаркан:

– Тангрининг сабрига жоним садақа, – дея ғазаб билан осмонга қаради.

– Бу хонларнинг талашилари тугамайдики, биз ҳам кўзимизни очайлик, дунё ёруғини қўрайлик. Демак, бу йил ҳам буғдор бўлмайди, арпа нонига ҳам ҳасратда қоламиз. Ҳар куни бир келишади, тарокимани¹ талашади, экиндан, ўримдан овора қилишади. Эҳ! Тангрининг осон бир ўлими ҳам йўққи, ўлиб қутулсак.

Гулнознинг ҳам онаси келиб қолди. Оқ чодрасининг учи билан иягини тўсшиб:

– Ҳой, Козим киши, – деди, – бизнинг кишимиздан ҳеч қандай хабар йўқ-ку!

Козим шартта жаҳл билан:

– Ҳой, раҳматликнинг қизи, – деди, – бизнинг дардимиз шундайки, Сафар бормаса бўлмайди. Хоннинг буйргидан чиқолмаслигини яхши биласан.

Бошига бирор ташвиш тушса, Худо кўрсатмасин, Телли бадбаҳт бўлади...

– Теллининг елкалари оша чинқириги эшитилди. Козим сал ўзига келиб сўзида давом этди: – Сенинг дардинг эса ўткинчи дарддир. Эринг ўтирган ерда ўзини ишга солди, деди: “Тифлисга бориб, мол олиб келаман, бойлик ортираман”. Гапимга қулоқ солмади. Ҳой, Паризод, кўнглингга келмасин-у, сенинг эринг жуда очқўз одам. Армани деганлари ҳам жуда ўжар келади-да.

Кўп йиллардан бери ёнма-ён яшаган, бир одат ва бир қоидали бу икки оила бир-бирининг дардига йиғларди. Икки оила ҳам, энг аввало, Кура дарёсини кечиб ўтган қўшиннинг қандай фалокатлар келтиришини олдиндан билар ва даҳшатли натижасини бир хил даражада тушунар эдилар.

Шу пайтда Иброҳим хон аъёнлари билан бирга Аскаранг юборган қўшинини кўздан кечириш учун қалъя дарвозасидан чиқиб келаётганди. Унга ҳамроҳлик қилаётган дарға Оғаси бек отини хон билан ёнма-ён ҳайдаб, унинг топшириқларига жавобан:

– Кўнглингиз тўқ бўлсин, хон! Ташвишланманг, хон! – дерди.

Қабристоннинг кираверишида Оғаси бек қўлини қўксига қўйиб хонга ва аъёнларига таъзим қилиб, орқага қайтди.

Хон аъёнлари билан кетиб борар, ҳамма сукут ичиди эди. Вокиф ёмғирдан сўнг, тозаланиб, яшнаган майсаларга, гулларга қараб завқланарди. Лекин атрофда туманлашган ҳодисалар унинг завкини қора бағрига босиб бўғарди.

Кета-кетгунча қочоқларнинг аҳволи кўзга ташлана бошлади: эллар, улуслар экин-тикинни ташлаб, жонларини қутқариш учун тоқقا қараб қочарди. Қўй-қўзининг маъраши, отларнинг кишинаши, болаларнинг йиғлаши бирбирига аралашиб кетганди.

Эл бош олиб кетарди. Вокиф бу манзарага қараб ўйга толганди, ўчмас

¹ Тарокима – туркман.

оғриқлар ҳис этарди. Иброҳим хоннинг тунд боқишида интиком олови ёнарди.

– Бу одам ишнинг олди-кетини ўйламайдими? – деда Воқифга мурожаат қилди.

Ишора Фатали хонга эди. Воқиф жирканиш билан:

– Хон, – деди, – бу одам ўрис ясовулидир. Уларнинг айтганини қиласиди. Ўрисдан қопчиқ-қопчиқ ашрафий¹ олади. Бир хунар кўрсатишни истайди, шундай эмасми?! Буларнинг ҳаммаси бизни юмшатиб, ювошгина қилиб бўйнимизга бўйинтуруқ уриш учун қилинаяпти.

Хон газабнок овозда:

– Дунё парча-парча бўлиб кетса ҳам мен ўша бўйинтуруқни қабул қилолмайман. Армани маликлари менга оғалик – хўжайнлик қила олмайдилар. Волийга қилинган хурматдан менга ҳам қилинса розиман...

Руслар диёрига хат олиб бориб қайтган Муса Султон ҳам шу ерда эди. Бутун вужуди билан отга суюнганича сухбатга қулоқ соларди. Узун мўйловини тузатиб деди:

– Ҳеч айтганларидан қайтадиларми?! Мен ўрисларни тушунадиган одам деб билардим. Аммо ушлаган еридан узишни истайдилар. Сиз бизга ишонинг, подшонинг марҳамати кенг, дейишади...

Хон газаб билан унинг гапини бўлди:

– Худо уларни ҳам урсин, марҳаматларини ҳам! Уларнинг марҳамати бундан ошиқ бўлмайди-ку, – деда хон тепаликка қараб ўрмалаётган қочоқларни кўрсатди. – Фатали қанжиқни ваъдалар билан шишириб менинг устимга юбормоқда. Ўлсам ҳам бўйсунмайман, мени Иброҳим Ҳалил хон дейдилар!

Маммад бекнинг гуруҳи орқадан келаётганди. У хоннинг отни секин ҳайдайтганидан норози эди. Маммад бекнинг оти сувлигини кемирар, жиловини бўш қўйиш керак эди, аммо хондан олдинга ўтолмаётганди. Нихоят, тезлашиб, хонга ёндашди:

– Амаки, изн беринг, биз олдинга ўтайлик, – деди, хонга тик қараб.

– Бор!.. Бир қараб кўр-чи, ўша қанжиқнинг атрофида қанча одам бор? Тоғлардан одам юбор, орқасидан кириб, қириб ташлашсин.

Маммад бек:

– Ҳўп бўлади! – деда ишора қилди. Ўттиз-қирқ навкари ҳам от қўйди.

Иброҳим хон қўшиннинг катта бир қисмини Аскаранда жойлаштирганди.

Фатали хоннинг қувватларини билмай туриб қўшинни Орон текислигига чиқариш маъқул кўрилмаганди. Фақат хабар олиш учун алоҳида-алоҳида гурухлар олдинга юборилганди. Маммад бек Аскаранни кечиб, тезликни камайтиришга мажбур бўлди. Чунки ўллар орқадан оқиб келаётган эллар – одамлар билан тўла эди. Қораоғочга етганда бир кекса киши уни тўхтатиб отининг оёғига йиқилди.

– Кутқаринг, оға! Қиз! Икки қизимни олиб кетишиди!

Маммад бек:

– Қаердан... Қаерда улар? – деди шошиб.

– Барда. Бардага ўт қўйишиди.

Маммад бек яна от қўйди. Фикри Қаҳризлига етиб олиб, хотинлари Ойиша ва Ҳурини тоққа юбориши эди. Ағдамда уларга дуч келди: юзбоши бутун Қаҳризли халқини йиғиб келаётган эди. Маммад бек уларни Қораоғочга қадар кузатиб қўйиб, орқага қайтди.

Энди суворийлар Бардага қараб от суришиди. Қишлоқлар, огуллар, яйлов ва қишловлар бўм бўш эди: ҳеч қаерда одамга дуч келмадилар.

¹ Ашрафий – тилла пул.

Қарвандга яқин бир жойда Фатали хоннинг илғорларига дуч келишиди. Элликтача суворий аста-секин келарди. Орқадаги бир туда замбарак ҳам бор эди. Маммад бекнинг гурухи дарага кириб, отдан тушди. Буталар орасида яшириндилар. Душман илғори яқинлашганда, гаплари ҳам аниқ эшитила бошлади. Келиб, ёнларидан ўтаётганда буталар орасидан ўт очилди. Биринчи ўт замбаракчини ағдарди. Отлиқлар орасига ваҳима тушиб ҳар бири ҳар томон қоча бошлади.

Маммад бек милтигини елкасига ошириб ўз отлиқларига:

– Отланнинглар! – дея сакраб отига минди. Қиличларини яланғочлаб душманга ташландилар. Маммад бек тепада биттасига етиб олиб, орқасидан қилич солди. Кон вишиллаб отнинг эгар-жабдуғига сачради. Суворийни от устидан тушираётганда чап оёғи узангига илиниб қолди, от эса хуркиб уни судраб кетди. Пиёда қолган душманларни Маммад бекнинг навкарлари қувиб етиб қиличдан ўтказарди. Олисдан чанг кўтарилаётганди. Маммад бек тепага чиқиб, қўлини пешонасига қўйиб дикқат билан қузатди.

– Йигитлар! Жуда кўп қўшин келаяпти, кўраяпсизларми? Қара, олдиндаги Фатали хоннинг ўзи бўлса керак. Ҳозир кутиб туриш пайтимас. Тоғ этакларига ўтайлик, одам йиғиб, орқасидан ораларига кириб олайлик, кўрайлик-чи, нима бўларкан...

Иброҳим хон аъёнлари билан Аскарангэ етиб тўхтади. Даракчилар келтирган хабарга қараганда Фатали хон билан Ҳожи Абдулқодир хоннинг қўшини ўн мингга яқин эди. Тўртта мис тўплари ҳам бор эди. Иброҳим хон чодирида кенгаш ўтказди. Олдинги тадбирдан кечмасликка қарор қилинди. Бутун оронни Фатали хонга қолдириб, кучни Доғистон томонга ташлашга келишилди. У ерга юборилган Шаки хонининг ўғли Маммадҳасан хонга катта умид боғланганди. Маммадҳасан хон Умар хон воситаси билан куч йиғиб, Фатали хоннинг жанубга юришидан фойдаланмоқчи эди.

Ағдам томондан чиқаётган тутун Фатали хоннинг етмаганини кўрсатарди.

Иброҳим хон отга миниб, қўшинни ва хандакларни кўздан кечирар, Фатали хоннинг келишини кутарди. Аммо кунлар ўтиб борар, душманнинг қораси кўринмасди. Кечаси Ағдамга чопар юборилди. Қелтирилган хабардан маълум бўлдики, Фатали хон қишлоқ-овулларни талаб, ўт қўйиб Аразга қараб кетаётибида.

Учинчи қисм

4

Иккинчи Туркия-Русия уруши¹ давом этарди. Кавказ четда қолиб, ўз ҳолига ташлаб қўйилганди. Эронга даҳлдор можаролар ҳам неча йиллардан бери бирор натижга бермаганди. Демакки, Иброҳим хоннинг қўли бўшаб, ўз мулкида даври-даврон сурарди. Энди Озарбайжонда унга таҳдид соладиган бирон-бир хукмдор қолмаганди: нуфузи яна Ширвондан Табризга қадар амал қиласарди. Энди у машғул бўладиган нарса фақат пойга, зиёфат ва шикор каби кўнгилоchar томошалар эди.

Кузнинг ажойиб кунларидан бири эди. Орон боғлари эндиғина сарик ва қизил рангга кира бошлаганди. Иброҳим хон ва аъёнлари юз отлиқ хизматчилари билан овлоқ тўқайга овга чиқишганди. Вокиф ҳам шу ерда эди, собиқ Шаки хонининг совғаси – тилла нақшли милтиқни эгарнинг қошига илганича яхши кайфият билан отини ҳайдарди. Қушчиларнинг баҳлали² қўлларида

¹ Туркия ва Русия ўртасидаги 1787–1791 йиллардаги уруш назарда тутилаётir.

² Баҳла – күш кўнадиган маҳсус чарм қўлқоп.

йигирматача шунқор бор эди. Този итлар йўқ эди, чунки күш овига този олиб боришмасди, унинг вазифасини қарол навкарлар бажаарди.

Қирғовул ва каклик учрай бошлади. Мугуз чалинди, ҳамма отдан тушди. Ўқ-ёйли қароллар ўнгга ва чапга ёйилиб, кенг майдонни ўрай бошлашди. Доирани тўғри ташкил қилиш учун Сафар отланиб, қаролларга бош имлай-имлай айланиб орқага қайтди.

— Тайёр бўлди, хон омон бўлсин, — дея бошини ҳам қилди.

Буйруқ берилди, муғуз чалинди, олислардан мугузларга жавоб келгандан сўнг хон аъёнлари билан доиранинг ўртасига қараб юрди. Қароллар ҳам олға юришиб, шовқин солиб, ўқ отиб паррандаларни учирар, доира кичрая борган сари кушлар ўргага интиларди.

Энди шунқорлар хон ва аъёнларнинг қўлларида эди. Ора-сира учган каклик, тустувукни кўрганда шунқорлар оёқбандидан кутулиб учишга интилар, оёқларидаги қўнғироқчаларни жиринглатардилар. Вокиф кексалигиға қарамай дадил қадамлар ташлаб юради, ариқ ва чуқурлардан сакраб ўтарди, ов қилишни сабрсизлик билан кутарди. Бир маҳал олдидан иккичунта қирғовул “пирр” этиб учди. Вокиф фурсатни бой бермай шунқорнинг жилғисидан¹ тортиб, қўйиб юборди. Хоннинг ва бошқа овчиларнинг шунқорлари ҳам учирилди. Шунқорлар ўқдай учиб, қирғовулларга ҳавода чанг солиб, ерга олиб тушишди. Қароллар югурни бориб, бирпаста шунқорлар билан қирғовулларни олиб келишди. Борган сари ов қушлари кўпаяр, баъзан гала бўлиб кўкка қўтарилади.

Тўсатдан Вокиф:

— Жайрон! — деб юборди. Лекин тўсатдан чиқиб қолган бу кийикни ҳеч ким ота олмади.

Хон кулганича Вокифга қараб юрди:

— Шоир, — деди, — сен гўзалларни ўхшаттанинг жайрон, кўрдингми, қандай қочиб кетди.

Вокиф ҳайрон бўлмасдан:

— Хон, — деди, — у ҳам қариллик туфайли: қайси жайрон бизга имкон берарди!

— Оғзингни бекор оғримтма!

— Йўқ, хон, ҳукм ҳар нарсага ўтади, қалбга ўтмайди! Бу борада менинг тажрибам сиздан кўра кўпроқ.

— Қанақасига? — дея амрона оҳангда сўради хон.

Вокиф ярим ҳазил, ярим жиддий товушда:

— Шунқор қирғовулга ҳасрат билан ёнмоқда. Кўрайлик-чи, қирғовулда ҳам шундай ҳасрат бормикан?

Хоннинг қошлиари чимирилди, ёнидаги хос хизматчига қараб, кескин товушда:

— Куруқ гапдан ҳеч нарса чиқмайди, — деди, — ўчоқ қурдир, ўт қала, бир қирғовул гўштидан кабобхўрлик қилайлик!

— Бургулар гувлади, ов тугади. Сўлим бир гўшада ипак шолчалар тўшала бошлади.

Оғамаммад хон Табризга юборган Сулаймон хон Ереван ва Нахичевон хонларини Эрон ҳимоясига чақирса-да, бундан бирор иш чиқара олмаётганди. Буни кўрган Оғамаммад билвосита элчилар юбориб Кавказ хонларидан гаров учун одам юборишни талаб қилди. Ереван, Қорабоғ,

¹ Жилғи – шунқор бўйинбоғи.

Толиш, Аваристон ва Гуржистон элчилари га рад жавобини бердилар. Шаки, Ширвон, Дарбанд, Боку эса Ахта хоннинг элчиларини ҳурмат-ла қабул қилиб, Эрон ҳимоясига бўйин эгдилар. Ганжа тарааддуд ичида эди. Жавад хон билан Ираклийнинг ораси очилгани учун Ираклий Жавад хонни ағдариб, ўрнига Раҳим хонни қўйиши истарди. Жавад хон ҳам шундай бир вазиятда истар-истамас Эронга тобе бўлиш ниятида эди.

Қорабоғ саройида катта бир талаш бораради: икки-уч йилдан бери давом этган осойишталик бузилган, қайғу ва андиша ҳаммани ташвишга чулғаганди. Русларнинг Тифлисга келиши туфайли бузилган Гуржистон-Қорабоғ дўстлиги янгидан тикланиб, бошқа хонликлар билан иттифоқ бўлишар, Шуша дарғаси Оғаси бекка қопчиқ-қопчиқ тилла берилиб, қалъанинг мудофааси мукаммаллаштирилди.

Икки-уч кундан бери Воқиф уйдан ташқари чиқмай, расмий мактублар ёзмоқда эди. У ёзар, Мирза Жамол эса тоза қоғозларга кўчирарди. Шундай машғул эдиларки, Мирза Алимаммад оғанинг ичкарига кирганини ҳам кўрмадилар.

– Ассалому алайкум!

Воқиф Мирза Алимаммад саломига алик олиб, ўрнидан турмоқчи бўлди.

Мирза Алимаммад жадал келиб, қўлини Воқиф елкасига қўйди.

– Безовта бўлманг! – деди. – Хайрлашгани келдим!

Воқиф ҳайрон бўлиб:

– Шунақа тезми? – дея қўзойнагини ерга қўйди. – Ахир эртага кетмоқчийдинг-ку?

– Йўқ, – дея Мирза Алимаммад жавоб берди, – бугун жўнайдиган бўлдик. Вақт кутиб турмайди.

– Майли, – деди Воқиф, – ўзинг биласан.

У Мирза Жамолга мурожаат қилди:

– Мирза Жамол, Рум¹ сultonига ёзилган муҳаббатномани бер-чи, кўрай!

Жамол ўралган сарғиши номани қоғозлар орасидан олиб Воқифга берди. Воқиф хатни очиб, бошланишига қарагандан кейин:

– Марҳамат, Мирза Алимаммад! – деди ва бироз ўйланиб, илова қилди:

– Ўзинг гап нимадалигини биласан. Аввало, ҳаракат қил, Истанбулга тезроқ етиб бор. Бу борада Сулаймон пошо² керакли ёрдамни сендан аямайди. Хусусан Султон ҳазратларига масалани атрофлича тушунтирасан, арз қиласанки, бизни икки ўт орасидан кутқарадиган ягона чора Усмонли ҳимоясидир. Тезлиқда аскар юбормасалар, Ахта хон бизни ҳалок қиласади ва уммати қон дарёсига ғарқ бўлгусидир.

Воқиф жим қолди, лекин катта хаяжон ичида экани аҳволидан кўриниб турарди; изтиробдан қамиш қалам қўлида титрарди.

Мирза Алимаммад мактубни белбоғига қистириб, деди:

– Охунд, хотиржам бўл, қўли бўш қайтмайман.

Ёқимли бир табассум Воқифнинг чехрасини ёритди:

– Шоҳ келди, шоҳ келди, дедилар, охирда, гўё “сомон” тушиб “замон” олов оладигандай! – Воқиф қаҳ-қаҳ уриб кулди, кейин қатъий бир овозда: – Азизим, – деди, – давлат иши мана шунақа – гоҳ пастига, гоҳ тепага; бироз сафо, икки кўп сафо. Нима ҳам қилардик, бўшашиш ярамайди; шоир айтганидай:

¹ Рум – Туркия.

² Ахисха ҳокими назарда тутилаяпти.

*“Сабр айла, оқибат май бўлур қон деганлари,
Субҳ висол бўлур шаби хижрон деганлари!”*

Мирза Алимаммад оға бу шеърданми ёки Воқиф каби дўстидан айри-лишигами қайғуриб йиғламсиради. Воқиф билан қучоқлашиб хайрлашиди. Воқиф уни айвон зинапоясигача кузатиб:

— Лала, ҳой, лала! – дея чақирди.

Лала ҳозир бўлди.

— Лала, сенинг қўлинг енгил, оғанинг орқасидан сув сеп, олис сафарга кетаяпти!

Мирза Алимаммад оға отга миниб, ўрнидан қўзғалганда лала орқасидан септи.

— Тангри оқ йўл берсин, ишинг ўнгидан келсин!

Отлар ҳовли дарвозасидан чиқиб кетди. Воқиф қўзларини арта-арта орқага қайтди. Мирза Жамол қоғозни тizzаси устига қўйиб ёзарди.

Воқиф унга ўгирилиб:

— Ўғлим, — деди — сарбоз бош билан ўйнагани каби биз ҳам мамлакат тақдирни билан ўйнаймиз. Қиморга ўхшайди: ё чикка, ё пукка! Ҳар ҳолда биз вазифамизни бажаришимиз керак. Балки хонликнинг рохи нажотга эришувига бир сабаби хайр бўлармиз.

20

Иброҳим хоннинг Екатерина ва Зубов ҳузурига юборган ҳайъатлари қайтиб келганди. Ҳайъатлар яхши қабул қилинган, Иброҳим хонга ёрдам ва ҳимоя ваъда берилганди. Талай ҳадялар келтирилганди. Екатерина шахсан Воқифга сирти қимматбаҳо тошлар билан безалган бир тилла асо юборганди.

Бу воқеа саройда катта умид ва севинч уйғотганди. Лекин давом этаётган очлик саройни ҳам гангитиб, севинч татимаётганди. Хоннинг қўшини очликка бардош бермай қочиб, тарқалиб кетганди. Қалъа кундан-кунга мудофаа қувватини йўқотмоқда эди. Екатеринанинг ваъдалари билан иш битмаётганди. Бироздан кейин Зубовнинг ўз қўшини билан Ширвондан Русияга қайтиши ваъдалар туфайли туғилган умидни ҳам пучга чиқарди. Екатерина ўлиб, ўрнига тахтга ўтирган Павел Кавказга қилинаётган ҳарбий юришларни кераксиз деб топгани маълум бўлди. Вазият ўта оғир эди. Энди Оғамаммад шохга қаршилик кўрсатиш мумкин эмасди. Сулҳ бўлиши ҳам қийин эди. Чунки адovат жуда чукурлашиб кетганди.

Воқиф шимолдан умидини узмасди, масалани яна ойдинлаштироқчи бўлди.

— Ираклий хон ўрисга биздан кўра яқин, — деди. — Ҳар ҳолда бориб унинг фикрини билиш керак.

Хон бу фикрга рози бўлди.

Тифлисга боришини Воқиф билан муғонлик Жамилга топширди.

— Боринглар-чи, кўрайлик, вазият қай аҳволда, агар вақтида мадад бўлмайдиган эрса, биз ҳам бошимизни омон сақлаш чорасини қилайлик.

Кенгашдагилар “чора” сўзини эшитиб, бир-бирига қаради.

Ораларидан биттаси:

— Қандай чора, хон? – деб сўради.

Хон жаҳл билан:

— Қандай чора бўларди! – деди. – Ахта шоҳ Муғонда ўтириб, қалъани

пойляяпти, эрта-индин устимизга бостириб келади... Кейин озиқ-овқат бўйлмаса нима ҳам қила олардим! Ахли аёлни олиб, вақтида Авар хонининг ёнига чекинишдан бошқа қандай чора бор?

Мажлисга чукур жимлик чўқди. Кенгашдагилар ҳеч қачон Иброҳим хонни бундай ожиз кўришмаганди. Ҳатто унинг овози ҳам аввалги хукмдорфармолик оҳангини йўқотганди.

Кенгаш тарқалди. Ҳар ким ўз тақдирини ўйлаб қайтди. Эртаси куни Воқиф билан Жамил оғани Тифлисга кузатишди.

Бир куни эрталаб Иброҳим хоннинг оиласи билан бирга Жарга кўчгани шаҳарга ёйилди. Очлик аҳолининг руҳини бутунлай чўқтириб юборганди. Баъзилар бу масалага аҳамият бермади. Ҳар ҳолда бирор ўзгариш бўлар деган умид йўқ эмасди. Яна шоҳ масаласи ўртага чиқди. “Фалон кетди, писмадон келади”, деган турли миш-мишлар кунда оч уйларни, бўм-бўш бозорларни айланарди.

Ниҳоят, бу миш-мишлар тўғри чиқа бошлади. Оғамаммад шоҳ Иброҳим хоннинг қочганини эшиштар-эшиштас, ўнг минг отлиқ аскар олиб, Шушага қараб шошилди. Илк чопар шаҳарга кириб, шоҳнинг йўлда эканини билдирганда, аҳолини чукур бир кўркув босди.

Мустабид босқинчини нон-туз билан қаршилаш керак эди. Ҳар маҳалладан оқсоқол сайлаб, бир ҳайъат тузилди. Козим билан Оллоҳқули ҳам бу ҳайъатга қўшилганди.

Бўғчадан янги кийимини чиқариб қўйишиди, нон-туз олиб, йўлга чиқишиди. Козим кулганича, кўркувдан довдираётган дўстига тасалли берарди:

– Э-э, кўрқма! Ким эшак бўлса, биз унга тўқим бўламиз. Нима бўларди... Энди кўрасан, шоҳга қандай маъкул бўлишимизни!

Оллоҳқули жон қайғусида:

– Эҳ, биродар, у подшо бўлса, бирдан чап ёни билан туриб қолса, бoshимишни уздиради.

– Оббо, ҳазилнинг ҳам жуда вақтини топдинг-да!

Шаҳарнинг Ереван дарвозасидан чиққанда ҳайъат бир неча юз одамдан иборат эди. Ёзниг иссиқ бир куни эди. Ҳаммани тер босганди. Кўркув ҳам бир томондан халқни эзарди. Шуша қишлоғи томон тушишиди. Пастдаги қоялар орасидан чанг кўтарилиларди. Шоҳ яқинлашаётганди. Юз қадамча масофа қолганда халқ тиз чўкиб патнисдаги усти ёпилган нон-тузни олдинга узатишиди. Кўрққанидан ҳеч ким бош кўтара олмасди. Лекин Козим қошлирининг остидан илгарини кузатарди. Чанг орасидан яқинлашаётган отликлар кўринарди. Олдинда ўн беш яшар болани эслатувчи бир одам келарди. Вужуди кўримсиз, кўсанамо юзли, ёвуз боқишили бир кимса эди. Атрофи тиришган кўзлари намиқар, болаларникидай кичкина қўллари билан тез-тез кўзларини артиб кўярди. Қимтилган юпқа лаблари негадир Козимни сескантириб юборди.

У бошини қуи солиб, бирордан кейин яна оҳиста кўтарди. Гўдак баширали одамнинг шоҳ эканини бошидаги тождан, кийимининг бўйнига ва кўксига тизилган қимматбаҳо тошлардан англади. Улар қуёш нури тушиб, ялт-юлт қиларди. Козим энди жим эди, унга бу кичкина подшодан одамга ҳеч қандай ёмонлик келмайдигандай туюларди.

Шоҳ отини тўхтатиб, қаршисида тиз чўкиб турган оломонни ғуурла томоша қила бошлади. Киртайган кўзларида элас-элас табассум пайдо бўлди. Шу аснода шоҳнинг қўшинидан бир гуруҳ ажралиб, отдан тушди ва жар сола-сола оломонга яқинлашиди:

– Биз келдик ва олиб келдик бир аждарҳо, – дея одамларни кузата бошлаши.

Козим бу аҳволни кўргач, Оллоҳқулиниң қўлидан тортиб турғизди ва шоҳнинг одамларига қаратага жавоб тариқасида куйлади:

– Қува-қува йўқотдик биз бир тулкини!

Козимга қараб оломондан ҳам бир гурух ажралиб, одамларга қаратага куйлай бошлади.

Бу ўйин кулги ва қўшиқлар шоҳга ёқа бошлаганга ўхшарди. У кулар ва кулган сари қўзларидан ёш оқарди.

Шу тариқа оломон шоҳни ғазабидан туширди, уни “Оллоҳ, Оллоҳ!” дея олқишилар билан шаҳарга олиб келишди.

21

Оғамаммад шоҳни Маммадҳасан оғанинг саройига жойлаштириши. Саройнинг рўпарасидаги майдонда чодирлар тиклаши. Гўё ҳамма масала ҳал этилгандай эди. Шоҳ Эрон тарафдорларига совғалар, тўнлар юборди, айни пайтда душманларни ҳам унутмади. Иброҳим хоннинг одамлари биттамабитта ушланиб, зиндонга ташланди. Лекин бир ҳафта қон тўкилмади, жаллодлар ишсизликдан зерика бошладилар. Аҳоли бу сукунатнинг қўрқинчли бир ҳодиса билан якупланишига ишониб, вахима ичида типирчиларди. Ҳеч ким эртанги кунидан хотиржам эмасди. Кунлар ўтди. Қорабоғ тарихида унутилмас саҳифа эгаллаган жума оқшоми етиб келди. Уша кун зиёрат куни эди. Давлат арబблари ҳовлига йиғилиб, шоҳнинг деразасидан парда орқасидан қўринишини кутардилар. Лекин шоҳ қўринмасди.

Шоҳнинг ғазабланиши ҳақида хабар оғиздан-оғизга ўтиб, ҳаммани қўрқувга соларди. Махсус хизмат оғаси Сафарали бек атрофга кўз ютуртириб, зинапоядан жадал тушиб, сўрай бошлади:

– Содик хон қани? Қиблай олам сўраяпти.

Шу аснода саркарда Содик хон дарвазадан ичкари кирди. Сафарали бек унинг ёнига югуриб бориб, қулоғига ниманидир шивирлади. Содик хоннинг ранги оқарди. У зинапояга қараб югарди. Шоҳ саройнинг орқа томонидаги мўъжазгина бир хонага жойлашганди. Тош тўшаманинг устига қимматбаҳо гилам ёйилганди. Деворнинг тагига шоҳнинг сафар таҳти ўрнатилганди. Устига атрофи марварид ва тошлар билан безатилган баҳмал сўзана ёпилганди. Содик хон ичкарига кирганда шоҳни ана шу таҳт устида кўрди. У озғин сонларини кучоқлаб ўтирганди. Шоҳнинг йиғлоқи қўзларидан адоват ёғарди. Юзининг ажинлари янада чуқурлашган, истеҳзоли лаблари қўрқинчли эди.

Содик хон узоқ муддат шоҳ билан сафар йўлдоши бўлган, унинг ҳар бир харакатини ипидан игнасигача билиб олганди, лекин юзидағи бугунги ифода ўта аччик ва қўрқинчли эди.

Шоҳ ғазаб билан деди:

– Содик хон, бу нима деган гап? Сен бир ҳафтадан бери Жавоншир Маммад бекнинг уйида ўтирибсан. Нега Маммад бек қиблай оламнинг хузурига келмаяпти?

Содик хон тиз чўқди, итоаткор бир овозда:

– Тасаддуғинг бўлай, шоҳ, – деди. – Маммад бек қалъада йўқ, изляяпман...

Шоҳ оёқларини таҳтдан осилтириб, қўлларини силтаб, ингичка товуш билан чинкирди:

– Малъун кўпрак, эртага шундай бир сиёsat ишлатайки, нақ

туғилганингга пушаймон бўласан! Каллалардан бир минора қурдирман, энг тепасида сенинг бошинг бўлади!

Шоҳнинг ёш оқаётган кўзлари косасидан чикқанди. Чийилдоқ товуши газабдан бўғилиб деди:

– Маммад бекнинг сингилларига айт, кечгача акалари хузуримга келмаса, уларни сарбозларга расво қилишга бераман!

Содиқ хон қалт-қалт титраб ўрнидан турди, довдираганича хонадан чиқиб, ғойиб бўлди.

Бир дақиқада шаҳарнинг бу бошидан-у бошигача жарчилар саф тортиди: “Маммад бек, ҳей! Кечгача қиблай олам хузурига келмасант, сингилларинг сарбозлар ихтиёрига топширилгусидир!” – дея овозлар шаҳарнинг ҳар томонига ёйилди.

Сарой ҳовлисида кутиш онлари давом этарди. Аъёнлар ва саркардалар орасида олти нафар қўли боғлиқ маҳбус ҳам бор эди. Мирза Алимаммад ҳам шулар орасида эди. Унинг ҳамишаги хотиржам ғуруридан асар ҳам қолмаганди, ранги оқарган, қимирилашга ҳам ҳоли йўқ эди. Кўзларини ерга қадаганча жим туради. Шоҳнинг вазири Мирза Шафи асабий бир тусда кўзини рангдор шишили деразадан узмасди. Бирдан дераза пардаси тебранди. Мирза Шафи ўша заҳоти ерга тиз чўқди. Саройнинг барча аъёнлари ҳам тиз чўқди. Дарпарда кўтарилди. Шоҳнинг товуши эшитилди. Мирза Шафи камарбасталик изҳор этиб, маҳбусларнинг кимлигини маълум қилди, шоҳ истеҳзоли табассум билан:

– Бештаси қозикка ўтқазилсин! – деди. – Мирза Алимаммад саййидлардан бўлгани учун танафлансин¹!

Жаллодлар шу заҳоти ишга киришиб кетди. Маҳбусларнинг шимлари ечилиб, қозик ўтқазилди. Мирза Алимаммаднинг бўйнига совунланган танаф солинди. Чинқириқ, айюҳаннос, сўқиниш, куфр бутун ҳовлини тутиб кетди.

Мирза Алимаммад сўнгги нафасини оларди, бўғилган сари ранги қораяр, кўзлари косасидан чиқарди.

– Эҳ, золим, Оллоҳ бу зулмни ерда кўймайди, ўз бошингга солади ҳали! – дея жон берди. Азобда қолганларнинг оҳу зорлари юракларни ларзага соларди. Улар жаллодларга ялиниб, тезроқ ўлдиришларини илтижо қиласдилар, лекин ҳеч ким кулоқ солмасди.

Бу манзарани Эрон шоҳи ғоят зўр шавқ-завқ билан томоша қилиб, истеҳзоли тиржаярди.

Шу аснода дарвоза очилиб, шаҳло кўз, калта сариқ соқолли, кенг кўкракли, содда кийинган бир одам ичкари кирди. У дадил одимлар билан дераза олдига келиб, шоҳга бош эгди. Унинг ерга тиз чўкмагани ҳамманинг дикқатини жалб қилди. Содиқ хон тиз чўкиб:

– Қиблай олам, Маммад бек Жавоншир мана шу! – дея хонга арз қилди.

– Балли... Зўр қассоб! Менинг қўшинимда бундай машхур одам йўқ, – шоҳ Мирза Шафига юзланди, – кўзлари жуда чиройли, шундай эмасми? – дея қўшиб қўйди.

Мирза Шафи шоҳнинг ишорасини тушунди, у Маммад бекнинг кўзларини ўйдиришни истаётганини сезиб, деди:

– Тўғри амр қилаяпсиз, тасаддуқ!

Маммад бек кулимсираб:

– Яхши йигитнинг номини эшит, юзини кўрма! – деди.

Шоҳ жиддий ифода билан:

¹ Танаф – арқон (бўғиши жихози).

– Оғамнинг аҳволи ҳаққи, – деди, – рост айтаяпсан. Сен каби машхур жасорат соҳиби бўлган битта одамни кўрганман, у ҳам Занд Лутфали хон эди. – Шоҳнинг бирдан афт-ангари ўзгарди, даҳшатли истеҳзо лабларига ёйилди ва қўшимча қилди: – Эртага гаплашамиз, Содик хон, Маммад бекни сенга топшираман, маҳкам асра!

Дарпарда туширилди, шоҳ қўздан ғойиб бўлди.

Қийноққа солинган одамлардан баъзиларининг юраги тўхтаб ерга ийқилган, бирорлари ҳали инграр эди. Қуёш гарбга ёнбошлаганди. Кундузги иссиқдан кейин намозгар салқини кўркув ва очлик ичида эзилган оммага тасаллидай бўлди. У ер-бу ерда қўлга олинган хон тарафдорлари яна саройга олиб келинди. Буларнинг ичида қўллари боғлиқ бир кекса киши ҳам бор эди. Сарбозлар саройга етганида тутқунларни дарвоза олдидা тўхтатиб, ичкарига хабар беришди. Ташқарига шоҳнинг саркардаларидан Маммадхусайн хон Қожор чиқди. Қалин мўйловларини қўлининг орқаси билан силаб сўради:

– Бу чол ким?

– Бу ўша Мулла Паноҳ Воқиф бўлади, у ҳақда эшитгансиз, – деб жавоб беришди.

Маммадхусайн хон “Воқиф” номини эшитиб, афтини буриштириб, сўка бошлади:

– Ҳой, падар лаънати! Қари кўпрак!

Воқиф ўзига хос мулойимлик билан хоннинг ҳақоратли сўзини бўлди:

– Ҳой, хон! Сиз буюк давлат шахсисиз, дастгар ва гирифторларга ёмон сўзлар айтиш сизнинг унвонингизга муносиб эмас...

Маммадхусайн хон Воқифнинг назокатига парво қилмай, ҳақорат ёғдиришда давом этди. Буни кўрган Воқиф ўзини тутолмади:

– Эй, хони нонасиб, ман агар дўстағ¹ бўлсан, шоҳ дўстағиман, сен кимсан! Балки шоҳ мени эртага озод қиласар ва ё фалаки кажрафтор ва тақдири парвардигор балки бошқа бир йўл кўрсатгай. “Шоҳ абистанас та жи занят баруз²”.

Маммадхусайн хон Воқифнинг сўзларига аҳамият бермай, сарбозлар томон юрди:

– Қиблай оламнинг буйруғига биноан бу малъунни зиндонга ташланг, эртага ажрига етади.

Сарбозлар Воқифни олиб кетишиди.

22

Аста-секин кеч кирди, ҳаммаёқни оғир жимлик қоплади. Фақат мино-ралардан ниначи овози келар, яна учуримнинг тагида оқаётган Дашолти дарёсининг шовуллаши эшитиларди. Тоғлар ва даралардан уфураётган ёқимли ифор, салқин ҳаво билан бирга шоҳнинг очиқ деразасидан ичкарига кириб уни хаёлга толдиради. Лекин шоҳнинг хаёли ҳам хира бир шам каби жонни ўртарди.

У намозини тугатиб, энди тасбех ўғирганча дуо ўқирди. Лекин дуо унга тасалли бера оларми? Унинг яхши ҳаёти болалигиданоқ сўндирилганди, шу боисдан ҳам унга ҳокимлик туйғуси ва шу туйғу билан бирга дунёга ва бутун маҳлукотга қарши адоват тугдирди.

Унинг уруш майдонларида, салтанат атрофида бўлган муваффакиятлари оргтгани сари гина-қудурати ҳам ортиб ва чуқурлашиб борарди. У салтанатга

¹ Дўстағ – тутқин, маҳбус.

² “Гун ҳомиладор, ким билади, эртага нима туғади”.

эришиш учун оға-иниларидан бирининг кўзларини ўйдирган, бошқасини ўлдиртирганди.

Шу тариқа қанча қонлар тўкилди! Шоҳ тасбехни ўгирганча, унинг доналари одам каллалари каби бармоқларига тегиб, уни жўшдирав, яна қон тўкишни, дунё лаззатларидан маҳрум бўлганининг ўчини олишни истарди.

Шойи парда аччиқ хаёллар ва хотиралар ичида айланарди. Бутун борликқа нисбатан асраб юрган адовати лабларининг истеҳзоли ифодасида акс этарди.

– Нима гап? – деб бақирди у.

– Тасаддуғинг кетай, Сафарали бек қиблайи олам чақирайпти, деб айтди.

– Сафарали! – чақирди шоҳ.

Хос хизматчи етиб келди.

– Содик хонни чакир деб, сенга ким айтди?

– Жоним тасаддуқ, ярим соат бурун ўзингиз айтдингиз.

Шоҳ ёнидаги якка оғиз милтиқни олиб, Сафаралининг кўксига тиради:

– Ёлғон айтаяпсан, кўпрак!

Сафарали қалтиради, аммо ўрнидан кўзгалмади.

– Балки қулоғимга шундай эшитилгандир... – деди у.

– Кулоғинг ёмон эшиتاётган бўлса, бор, кестириб ташла!

Содик хон билан Сафарали хонадан чиқиб кетишиди. Шоҳ яна ёлғиз қолиб, кўзларини кумуш мойчироққа тикканча аччиқ ўйларга толди. Ҳаво янада салқинлашганди. Жимлик хукм сурарди. Фақат қўшни хонадан ҳазин бир йиғи товуши келарди. Шоҳ кўрпани тиззалари устига тортиб, қулоқ солди. Йиғи Сафаралининг инграши эди. Шоҳнинг ингичка ва ғазабли товуши ҳавони титратди.

Сафарали бек билан хос хизматчи Аббос бек ичкари киришди. Сафаралининг бир қулоғи қўлрўмол билан боғланганди.

Шоҳ қичқирди:

– Сен аёл эмассан-ку, нега чийиллайсан! Иккала қулоғинг кесилмаганига хурсанд бўлсанг-чи! Ҳалиям ўлдирмадим! Аббос бек, сен нега қаттиқ гапириб, уйқумни ҳаром қиласан? Эҳ, бебошлар! Эртага шундай бир сиёsat қиласай, тарихларга битилсин! Бир минора қурдирмоқчиман, сизларнинг ҳам бошларингиз, отамнинг арвоҳи ҳаққи, энг юқорисидан осилади! Бориб темирчиларга айтинглар, минора учун мих тайёрласинлар!

Тун ярмидан ошганди. Лекин Содик хон билан Маммад бекнинг кўзларига уйқу қўнмасди, юзма-юз ўтириб, эртанинг ғамини ер эдилар.

Шу пайт хизматкор ичкари кириб, шоҳ хузуридан одам келганини айтди. Қўрқувдан сесканиб кетишиди. Туннинг шу пайтида шоҳнинг одам юбориши нимани билдиради?

– Келсин!

Сафарали бек ичкари кирди. Содик хон шошиб сўради:

– Нима гап?

Сафарали гуноҳкорона ҳикоя қила бошлади. Шоҳнинг ғазабини, эртага сиёsat ишлатишини, Содик хонни, Маммад бекни ва бошқаларни ўлдирмоқчи, каллалардан минора ясамоқчи эканини бирма-бир гапириб берди.

Содик хон шубҳа билан тинглар, бирор нарса айтишни истамасди. Унинг гумонича шоҳ Сафарали воситасида уларнинг содикми-йўқми эканини синамоқчи, шекилли. Лекин Маммад бек бошқача ўйларди, у Сафарали бекнинг самимий гапираётганига ишонар ва эртанги кундан қутулишга чора излаётганини тушунарди.

— Сафарали, — деди, — булар ҳаммаси рост, лекин чорамиз нима? Очиғини айт, қўрқма!

— Чора йўлини Аббос бек билан ўйлагандик. Лекин сизлар бизни ҳимоя қиламиз, деб ваъда беринглар! Бизни ушлаб бермайсизларми?

Содик хон ҳали ҳам шубха ичида эди. Маммад бек қатъий қилиб деди:

— Содик хон, ўйлаб ўтиришнинг ўрни эмас. Бошларимиз жаллод қўлида. Чора кўриш керак, сиз журъат қилмасангиз, мен ўзим бораман. Дунё бу золимнинг дастидан қутусин!

Содик хон ниҳоят тилга кирди:

— Йўқ, Маммад бек, сен борсанг, жанжал чиқади. Буларнинг боргани маъкул.

— Кўй, ишларини бажаришсин!

Маммад бек энди дадил бир овозда:

— Сафарали бек, — деди, — қўрқма, ўзим балогардонман. Хизматкорларни йиғиб, нима керак бўлса қиламан!

Сафарали шошганича саройга етиб борди. Аббос бек шоҳнинг эшиги орқасида туриб тингларди.

— Улар рози, тез бўл, вақт ўтаяпти, — деди Сафарали бек.

Сафарали бек билан Аббос бек ханжарларини олиб, эшикни астагина очишиди. Шоҳ ғазабкор товушда тўнғиллади. Сафарали бек қўрқиб орқага тисарилди. Орқадан Аббос бек шивирлади:

— Қўрқма, ухляяпти! Билмайсанми, у ғазабланганда уйкуда ҳам алаҳсираб дўй-пўписа қилаверади?!

Бироз тинглаб тургач, оёқлари учида юриб, ичкари кирдилар. Мойчироқ хонани хира ёритиб турарди. Шоҳ ярадор ҳайвон каби инграрди. Бу инграш одамни даҳшатга соларди. Сафарали ханжарни шоҳнинг гарданига санчди. Шоҳ сакраб, қўлини чўқморга чўзди.

— Хонахароб, Эронни вайрон қилдинглар! — дея олди. Тўлғаниб гиламнинг устига қулади. Унинг бошини кесиб олдилар. Кейин қўлларидағи “Тожмоҳ” ва “Дарёйи нур” номли қимматбаҳо билакузукларни чиқариб, Содик хоннинг ҳузурига олиб келишди.

* * *

Шу аснода Воқиф зинданда ўтириб рамл отарди¹: у ғам-қадар сирлари ни ўрганишни истарди. Шаҳарнинг бошқа бир маҳалласида темирчилар тер тўқиб мих тайёрлашарди, вақтида етказиб бера олишмаса, уларнинг бошлари ҳам жаллодлар қўлига топширилмоқчиди. Содик хон жарчи кўйиб, Шаккокий қўшинини йиғди ва шоҳнинг буйруғига кўра Техронга боришлари кераклигини айтиб, Шушани тарк этди. Маммад бек ўз аскарлари билан қолган шоҳ тарафдорларини қуршаб олди, баъзиларини қириб ташлади, бошқаларини қўлга олдилар.

Тонг оқарганда шоҳнинг ўлгани ҳақидаги хабар шаҳарга ёйилди. Темирчиларга энди мих керак эмас, шоҳнинг жанозаси учун бир неча дона бўлса етарди.

Бу хабарни эшитган бош темирчи пешона терини артаркан:

— Эй, темирни михга айлантирган қодир Оллоҳ! — дея юзини кўкка қаратди.

Хабар ҳали зинданга етиб келмаганди. Воқиф рамлдан яхши хабар олишини сезиб тез-тез зинданбондан: “Бирор янги хабар йўқми?” — деб

¹ Рамл отмоқ – ром (фол) очмоқ.

сўрарди. Нихоят, зиндан эшиги очилди. Воқиф суюна-суюна чиқди-ю, Мадинага дуч келди. У кечқурундан бери шу ерда кутиб ўтирган экан.

23

Оғамаммад шоҳнинг ўлдирилиши оқибатида Қорабоғ ҳокимияти Маммад бекнинг кўлига ўтди. У “Ботмон қилич” лақаби билан ўлкани идора қила бошлади. Лекин Эрондаги воқеалар Маммад бекни қаттиқ ташвишга соларди. Содиқ хон Техрон тахтини эгаллай олмабди. Оғамаммад шоҳ укасининг ўғли Бобо хон томонидан маҳв этилганди. Бобо хон “Фатали шоҳ” номи билан Эрон салтанатига эга бўлганди.

Энди Фатали шоҳ Оғамаммад шоҳнинг жанозасини ва уни ўлдирганларни талаб қилаётганди. Қўшимча тарзда Қорабоғнинг Эронга итоат қилишини таъминлаш учун Оғабайим беканинг ўз ҳарамига ва Иброҳим хоннинг ўғилларидан бирининг ҳам гаров тариқасида Техронга юборилишини истарди. Бу масалалар Маммад бекка бир тараффуд туғдирганди. У бир томондан ҳокимиятга нисбатан хасислик кўрсатар, осиб-кесарди, бошқа томондан ҳокимиятнинг боқий бўлиб, ўзининг кўлида қолишига ишонмасди.

Воқиф яна саройда эди, лекин унинг майли Иброҳим хон томонида эди. У Қорабоғдаги вазиятни яширин равишда ёзиб, Жарга юборар ва Иброҳим хоннинг қайтишини истарди. Бусиз ҳам Иброҳим хоннинг ахволи Доғистонда яхши эмасди. Жавад хоннинг фитналари туфайли Иброҳим хоннинг ўғли Толибхон бек у ерда ўлдирилган ва ўзини ҳам ўлдиририш учун тадбирлар кўрилаётганди. Бу борада Жавад хон Маммад бек билан музокаралар олиб борарди.

Воқиф масалани янги хатда атрофлича баён қилиб, Сафарга берди ва шошилинч Жарга етказишни илтимос қилди. Сафар хатни чоригининг ичига қўйиб, уйига қайтаркан, уни Маммад бек олисдан кўрди. Сафарнинг ҳадеб чоригига қараб-қараб қўйишидан шубҳаланди. Ўша заҳоти буйрук бериб, Сафарни ушлаттириди. Хат чорикдан олинди ва Воқифнинг Маммад бекка нисбатан баён қилган фикрлари аён бўлди. Сафар зинданга ташланди. Воқиф ва ўғли Қосим ушланиб, Ҳазна қоясидан улоқтиришга ҳукм қилинди.

Ҳаво иссиқ бир кун эди. Воқиф билан Қосим оғани Жидир майдонига олиб кетишиди.

Кекса шоир қияликка кўтарилиган сари ҳарсилларди. Унинг лаблари ва томоғи бутунлай куриб қолганди. У бироз тўхтаб, нафас олди, кейин заиф бир овозда:

– Озгина сув бўлслайди? – деб жаллодлар юзига қаради.

Жаллодлардан бири истехзо билан:

– Нима фарқи бор, – деди, – қорнингда гўрга боради. Бироздан кейин сени қоядан шундай ирғитаманки, ҳатто руҳинг ҳам ранжий олмайди.

Жаллоднинг истехзоси Воқифга қилча ҳам таъсир қўрсатмади. У бошқа бир аламда эди. Гўё дунёга янгидан келгандай эди, ҳамма нарса унга янги ва жозибали кўринарди. Коялар устида битган какўти¹ иси шундай ёқимли келдики, гўё бутун умрида ҳеч уларни кўрмаган ва ҳидламагандай.

Олисдан Мадинанинг уйи кўринарди. Оҳ, у бир қарол, номсиз-нишонсиз бир хизматкор бўлслайди, бутун умр Мадинанинг эшигида хизмат қилсайди. Оддий бир қарол...

Воқиф яна тўхтади, йўтал уни бўғарди. Ранги қочган ўғлининг юзига қараб:

¹ Какўти – жамбил.

– Қосим оға, бизни қаёққа олиб кетаяпти? – деди.

Ўғли бефарқ бир оҳангда:

– Ота, – деди, – анчагина одамни сиз шу йўл билан юборгандингиз. Энди эса бизни юборишаяпти!

Воқифнинг юзида чуқур бир азоб акс этди. У ўзини зўрлаб, тез юра бошлади. Қўй, битсин, тугасин ҳеч кимга керак бўлмаган бу ҳаёт! Бироқ Қосим оғанинг гуноҳи не эди? Ўғил нима учун отанинг оловига куйиши керак?.. У ҳали ёш, ҳали яшаши керак!

Воқиф Жидир майдони – отчопарга чикувчи бир қиялиқда йиқилиб тушди. Юришга ортиқ мажоли қолмаганди. Жаллод бир-икки бор қўлидан тортса ҳам ўрнидан қўтарила олмади. Воқиф заиф, лекин ғурурли бир товушда деди:

– Нима қилсанглар, шу ерда қилинглар, ҳеч қаерга бормайман!

Жаллодлар бир-бирининг юзига қараб, ниманидир гаплашишди. Биттаси ханжарини чиқариб, Қосим оғага яқинлашди. Қосим оғанинг соясигина қолганди, у ҳар қандай туйғудан маҳрум бўлганди. Воқиф ўғлининг қурбонлик қўйи каби ерга ётқизилганини кўриб қичқириди:

– Раҳм қилинглар! Аввал мени, кейин уни! Менга фарзанд доғини кўрсатманглар!

Жаллод қулоқ солмади. Воқиф ўғлининг хириллашини эшитиб, ўзини йўқотди. Ўзининг ўлдирилишини сезмади ҳам – уйқу сингари келдию кетди.

* * *

Козим ҳамюртининг ўлдирилганини эшитар-эшитмас ўғли билан бирга белкурак олиб, Жидир отчопарига келди. У ерда Мадинани учратди. Мадина мулла олиб келиб, чодир курдирганди, мархумларни ювдиртириди. Козим Мадина билан маслаҳатлашиб қабр жойларини тайин қилди. Ёнма-ён икки мозор қаздириб, Воқиф билан ўғлини тупроққа топширишди.

Ҳамма фотиха ўқиб қайтди. Лекин Мадина ўша ерда қолди. У қабрни қучоқлаб аччик-аччиқ марсиялар куйларди.


Қир чечаги – жамбил ҳамон атрофга хушбўй ҳид таратарди.

Боку,
1936–1937 ийллар



USTOZ
TARJIMONLAR BISOTIDAN

Jahon
ADABIYOTI



ШАВКАТ РАҲМОН
(1950–1996)

ШАВКАТ РАҲМОН – ТАРЖИМОН

Истеъдодли шоир Шавкат Раҳмон моҳир таржимон эди. Шоирнинг ўзи тартиб берган “Сайланма”сида (1997) “Испан шеъриятидан таржималар” деган маҳсус бўлим бор. Ундан Хуан Рамон Хименес, Рафаэл Алберти, Федерико Гарсия Лорка каби испан шоирларининг шеърлари ўрин олган. Тўғриси, испан шеърияти, айниқса, Лорка ижоди ва унинг бадиий дунёси Шавкат Раҳмонгача ўзбек китобхони учун сирли, номаълумлигича қолиб келди. Ўзбек ўқувчиси Лоркани Шавкат Раҳмон қалами ёрдамида таниди. Шунинг учун таржимонлар, таржимонлик, таржима санъати, айниқса, аслиятдан таржима хусусида гап очилганда, Шавкат Раҳмон ва Лорка номларини асло четлаб ўтиб бўлмайди.

Ш.Раҳмон айнан Лорка ижодини аслиятдан ўгириш истагида испан тили билан маҳсус шуғулланади, испаншунос олимлар билан ҳамсафар бўлиб Лорканинг юргига боради; лоркашунослар билан маслаҳатлашади; шу билан бирга ўша миллат шеъриятига хос поэтик образ ва шаклларни, ўша ҳалқнинг миллый урф-одатларини синчилаб ўрганади.

Лорканинг “Энг қайгули шодлик” (1989) китобига кирган шеърлар таржимоннинг юксак поэтик маҳоратидан дарак беради. Таассуфки, биз испан тили ва адабиёти бўйича мутахассис эмасмиз. Лорканинг ўзбек ти-лида жаранглаб турган шеърларини аслият билан қиёслашга имконимиз йўқ. Бироқ “Энг қайгули шодлик”ни ўқиш жараёнида Шавкат Раҳмоннинг накадар мashaққатли бир юмушни қойилмақом адо этганини тасаввур қилиш қийин эмас. Нима демоқчимиз? Фикримизча, Лорка шеърларини таржима қилиш учун испан тилини билиш ва шоир бўлишнинг ўзигина етарли эмасга ўхшаб кўринади. Менинг тасаввуримда испан шоирларининг Гётеси сифатида намоён бўлган Лорка шеърларини таржима қилаётган инсон айни дамда Испания тарихи ва географиясини, тарихий шахслари ва ҳалқ оғзаки ижодини, испан шеъриятига хос индивидуал назарияларни, миллый жанрларни, энг муҳими, миллат руҳини билиши лозим. Бундай фикрга келишимга сабаб, “Энг қайгули шодлик” шеърлар китобига ёзилган изоҳлар, тушунтиришлардир. Ўша сочилган изоҳларнинг ўзи муайян бир тизим асосида жамланса, Шавкат Раҳмоннинг лоркашунос сифатидаги маҳсус тадқиқоти пайдо бўлади. Дарвоҷе, Лорка шеърларида кўп бора такрор келадиган “норанж” (апельсин), “трунж” (лимон) каби мева номининг испан шеъриятига хос маҳсус рамз, сўз-образлар экани, яъни улардан биринчиси “саодатли севги”ни, кейингиси “саодатсиз, алданган севги”ни англатиши изоҳлар ёрдамида аёналашади.

Лорка шеърларида образлар, туйғулар, дарду аламлар жуда миллый, жонли ва тифиз ифодаси билан ажralиб туради:

*“Сузар қайиқ-фикрлар
Қорайган қорачугинг
Қора босган сувида*

Чайқалади чорасиз” – чўнг маъноли, аммо кам сўзли ифодадан ҳайрон бўлиб, шеърни қайта ўқийсиз. Шоир қўллаган образлар қаринасидан тасаввур ёришади.

*“Тоғ пойида ўлтирап
шамол хўрлиги келиб... ”*

Бу қисқа метафорада тоғ ва шамол “одам”лашади. Лорка шеъриятидаги бундай “эъжоз мақоми”, шоирона фасоҳат, қисқа бадиий ифода, сўзлар тежами Шавкат Раҳмоннинг эстетик дидига, шоирона таъбига маъқул келгани аниқ.

Лорка шеърлари таржимаси жараёнида Шавкат Раҳмон адабий нутқни янги сўзлар билан бойитади (мишиқи, тупка, пўла, тиртиқ, долон, камолгул, буқавоз), баъзи ўринларда оғзаки нутққа хос унсурлар билан мисраларни жонлантиради (“сочвораман” – сочиб юбораман, “куйлаворгин” – куйлаб юборгин, “чайвол” – чайиб ол, “кайволган” – кийиб олган ва ҳ.к.), гоҳо зарурат юзасидан “кўр бақа”га “мундақа”ни қофия қилади.

Маълумотларга кўра, ўз вақтида Лорка араб шеърияти билан ҳам ошно тутинган. Шу боис бир шеърий китобини “Тамарит девони” деб номлайди. Бироқ бу Шарқ мумтоз шеъриятига хос девон эмас. Гарчанд унда “қасида” ва “ғазал”лар номи бўлса ҳам, улар жанр эътибори билан Шарқ мумтоз шеърияти мезонларига мос келмайди. Лорка бундай тажрибаларга, ўз халқининг поэтик тафаккурини янгилашга жуда қизиқкан бир ижодкор эди. Бу ҳол “Энг қайғули шодлик”дан ўрин олган бошқа шеърларнинг шаклий жиҳатларида ҳам кўринади. Матнни “пиллапоялар”га бўлиш, бош ҳарфлар ёки тиниш белгиларини кўлламаслик, шунингдек, шеър матнида баъзан қавс ичидаги ҳам мисралар бериш ҳоллари кузатилади. Ш.Раҳмон улардан бирига аҳамият бериб: “Лорка шеърларида қавснинг аҳамияти жуда катта. Кўпинча шоир қавс ёрдамида биринчи сатрга тамомила қарама-қарши сатрни айриб кўрсатади”, деб тушуниради:

“Ҳадсиз
кечаларнинг
тошли макони
сокин макони.
(Зайтунзорда шамол,
дала-даштда шамол)”.

Ростданам бунда “шамол”нинг “сокин макон”га зид турганини англаш қийин эмас.

Лорка шеърларини Шавкат Раҳмон таржимасида ўқир экансиз, испан юртининг мозаикаси – Ғарнота, Қуртоба, Андалус каби тарихий шаҳарлари, турли қадимий қишлоқлари, гаройиб ўсимликларига, тошқин дарё ва сойлари, ўзига хос маъно ташийдиган осмон, юлдуз ва ойларига мафтун бўласиз; лўли, мавр, сувори, жандармларга дуч келасиз. Унинг шеърларида анкабут тўр тўқиёди, сойлар шовуллаб шеър ўқиёди, шом маҳали “муаззин қурбақа” пайдо бўлади, ўлим элчилари тимсоли саналган дабдабали суворилар отига қамчи уради; чигирткаларнинг тинимсиз чириллашлари қулоққа ҷалинади; бир қарасангиз, “боғ шомида олти лўлиқиз” ўйин тушади. “Дағн маросими”да “сариқ минорада қўнғироқ дарангি” эштилиади. Тонг ёришаётган паллани тасаввур қилинг, бунда сахар “норанжзор оралаб келади”. Айни дамда “зайтунзордан сахарлаб зайтун терар хушрўй қиз”. Гоҳида “калтакесак инграйди, заифаси йиғлайди”. Изоҳларда: “Лорка ижодида ой ўлимнинг ўзи ёки ўлим яқинлашганидан дарак берадиган бир аломатдир”, деб таъкидланади. “Ой ўликдир, ўлик, аммо унга ҳаёт берар баҳор”. Баҳорий қайфият, ёшлиқ, шоирнинг орзуларга тўла “шойи юраги”, “баҳорий ёмғир”, “баҳорий қўллар” ўлимни енгади... Табиийки, Лорка шеърлари измида бундай шоирона ва равон фикрлашнинг бош сабабчиси Шавкат Раҳмоннинг таржимонлик маҳоратидир.

Тўғриси, Шавкат Раҳмон деганда одамнинг юрагида покиза, тоза туйғулар жўш уради, кўзи олдида чин шоир ва виждонли шахснинг сиймоси гавдаланади. Шавкат Раҳмон ижоди, айниқса, унинг таржимонлик фаолияти хусусида шунчаки, йўл-йўлакай ёзиш қийин. Шавкат Раҳмон қалбидаги завқни англаш учун, энг камида шоирнинг испан тили ва адабиётига бўлган меҳр-муҳаббатини, холис ниятини юрак-юрақдан ҳис қилмоқ лозим.

Мен бир адабиёт муаллими сифатида ўзбек тилига дунё шеъриятидан таржималар тарихида Шавкат Раҳмон билан ёнма-ён Федерико Гарсиа Лорка ҳам бамисоли бирга туғишган оға-инидек жуда узок умр кўради, деб ўйлайман.

Баҳодир НУРМУҲАММАД

Федерико Гарсиа ЛОРКА шеърларидан

“ЭНГ ҚАЙГУЛИ ШОДЛИК” (1989)

БУЗИЛГАН ТОМОША

*Уйқусираб, тумтайиб
Ой жисм сузуб келади.
Ўйпарат тун оромин
Босиб, бузиб келади.*

*Муаззин қурвақалар
Қайга гойиб бўлдилар?
Қамишзорни кийволган
Ирмоқ бўгиқ гўлдирап.*

*Майхонада машиоқ жисм,
Эшиитилмас бирор сас.
Юлдуз яшил сайҳонда
Жавлон уриб тушар рақс.*

*Тоғ пойида ўлтирап
Шамол хўрлиги келиб
Пифагор – кекса терак
Кўтарди улкан қўлин,
Адабсиз ой юзига
Тарсаки урмоқ бўлиб.*

ОГОЧЛАР

*Оғочлар!
Новаклар
Кўкдан узилган.
Сизни қайси алплар заминга отган?
Балки отган юлдузлар?*

*Мусиқангиз келар қўшилар дилидан,
тангри кўзларидан,
баркамол ғамдан.
Оғочлар!
Чайир илдизларингиз
Юрагимни танирмикин заминда*

ГИТАРА

*Бошлар
Гитара ноласин.
Синар
Тонг тиёласи.
Бошлар
Гитара ноласин.
Сўрма энди
Жимликни.
Бир маромда ииғлайди,
Гўё сувлар ииғлайди,
Гўё қорлар устида*

*Ёлғиз шамол ииғлайди.
Сўрма энди
Жимликни.
Йиллар куйган саҳролар
Камолгул васлин ўйлаб.
Ииғлар тонгсиз кечалар,
Бесамар учган ўқлар,
Чирқираб баланд шоҳда
Жон беради бир мургак.
Ў, гитара!
Беши ханжар
Конга бўяган юрак.*

ҚИШЛОҚ

*Тоғ ўрагида
Танҳо жом минор.
Шан сувлари,
Асрый
Зайтунлари бор.
Ёмғирпўшли каслар
Жимликни бузар,
Пирпирак айланар,
Айланар
Хар чоқ.
Шўрлик Андалусда
йўқолган
қишлоқ.*

ЙЎЛ

*Қора кийган юз сувори
қаён борар
норанжзорга соя согинган
самоларда?*

*Бормаслар Севиллага
Қурдобага,
денгизларни согинган
Ғарнотага.*

*Жилови бўши мудроқ отлар,
отлар борар,
қўшиқларни зир титратган
зуннорзорда.*

*Юзта фарёд парчинланган,
қаён борар
андалуслик юз сувори
норанжзорда?*

СОАТ

*Нафасни ростлай деб
ўтиридим вақт даврасида.
Қандай тинч макон!
Оқ доирада*

*оқ ором,
Учар юлдузлар ҳам.
Сузар атрофимда
ўн икки қора рақам.*

СҮНГГИ ИЛТИЖО

*Қоп-қора осмонда
Сариқ илонлар.*

*Кўзлар ила келувдим,
сўқир кетгум дунёдан.
Ўлуғ дардолар сенёри!
Мана, ерда –
рўйжса,
шам.*

*Бўлай дедим умрбод
яҳшиларнинг ёнида.
Охир келдим, худойим!..
Мана, ерда –
рўйжса,
шам.*

*Сариқ норанж,
норанжзор,
норанж отинг шамолга.
Биласиз-ку ундан сўнг...
Мана, ерда –
рўйжса,
шам.*

*Қоп-ора осмонда
сариқ илонлар.*

ЧИГАНОҚ

Денгиз чиганогин бершиди менга.

*Харитадаги
денгизларнинг гулдирашини
эшишиб қолдим.
Зулмату нуқрадан яралган
суву балиқлар
юрагимга тўлди лиммо-лим.*

Денгиз чиганогин бершиди менга.

СУВОРИ ҚЎШИҒИ

*Қурдоба.
Олисда ёлғиз.*

*Қорача от, баҳайбат ой,
зайтуналарга хуржун тўла.
Йўлни яхши билсан ҳамки
етолмасман Курдобага.*

*Водий бўйлаб, шамол бўйлаб,
Қорача от, ой ҳам олдири.
Қурдобанинг миноридан
ўлим менга назар солди.*

*Ай, мунчаям чўзилди йўл!
Ай, довюрак отим, учқур!
Ай, ўлимга келарман дуч
Курдобани кўрмай туриб.*

*Қурдоба.
Олисда ёлғиз.*

ГҮНГЛАР КҮЧАСИДА

Ёниң дарчалардан тикилиб қараб,
қизлар табассумин ўйнатор яйраб.

Сочларин силкита, күзларин қиса,
йигитларга висол тайинлар қизлар.

(Бўм-бўши роял торларида
моҳир анкабутлар ўйнар.)

(Елпайсалар, рўмолнчалар
чечан қўллар дунёси сўйлар.)

Кора чакманларин ўйнаб силкитиб,
қанотли жавоблар берар йигитлар.

БОШҚАЧА ОҲАНГДА

Водий кечасига қутурган буғу
Шохидан битта тож кийдирап гулхан.
Дузлар ухлар. Фақат бедордил шамол
гижинглатиб ўзича айланиб юарар.

Мушук кўзларидаи гамгин, саргайган,
тутун туриб қолган шишиадай ҳаво.
Дарёга эргашдим шохлар оралаб,
изимдан дарёга чўзилди шохлар.

Кўшиқлар қўшиги каби жонланар
бузилмаган дарё – ёввойи, тиник.
Найистон ва зулмат оралигига
Туриб Федерико аталмоқ қизиқ.

ЮЗ ЙИЛЛИК ИШҚ ҲАҚИДА ҒАЗАЛ

Тўртта пўрим ўспирин
чиқиб борар кўчадан.

Икки пўрим ўспирин
белин сириб боғлади.

Ай, ай, ай, ай.

Ай, ай.

Учта пўрим ўспирин
тушиб борар кўчадан.

Бир ўспирин ва шамол
ўгирилиб қарар жсим.

Ай, ай, ай.

Ай.

Кўтирган бу миртазорни
Айланмас энди ҳеч ким.

АТИРГУЛГА ҚАСИДА

Атиргул
излаган йўқ саҳарни,
мангудайин шохида,
излар бошқа нарсани.

Атиргул,
вужсуд, хаёл сарҳади,
зиё на риё излар,
излар бошқа нарсани.

Атиргул,
атиргулга қарамас,
қимириламас осмонда,
излар бошқа нарсани.

ТИРИК ОСМОН

*Зорланмасман
гарчи тополмадим излаганимни.
Энди кўролмасман қакраган тошлар,
қовжираған ниначилар орасида
куёши ва мавжудотнинг олишиувини.*

*Қадим дунё сари кетурман,
кетурман чақалоқни титратган
тўйқнашувлар, тўлқинлар, суронлар
иштияларга тўла бир дунёга кетурман.
Теранликка етурман,
шиқ ва қумда эриб осмонларга сингиганимда
излаган нарсамда
ишодликнинг оқ бўёгин кўурман.*

*Сўқир кўзларни босган қирор ўтмас у ёққа,
гилдираклар эзворган оғочлар ноласи ҳам.
Ундан фақат шакллар шу қадар чатишганки,
ваҳимали бир шиддат бордир ҳар бир шаклда.*

*Гулларнинг даврасидан чиқиб бўлмас умрбод,
қанд каби эриб кетар тишиларинг ҳам шамолда,
кафтинг тегиши билан қирққулоқнинг бағрига
жсон-жонингга етажак филсуюгин совуги.*

*Томирларнинг тагида, шамолнинг ўзагида
йўлдан озмиши кимсанинг кўзлари-да очилмиши,
кўрмиши енгил тўлқинни қўриган сир пўқакни,
кўрмиши аёл оёқли сигирлар подасини.*

*Зорланмасман
гарчи тополмадим излаганимни,
юрак зарби ва сувлар дунёсига кетурман,
кўурман шиқ ва қумда эриб битган чогимда
излаганим рангининг оқлигини кўурман.*

*Кетурман, абадий ёши қолурман, қолур паствда
гала-гала еллар-да, қумга ботган кемалар.
Етурман мангулик ва шиқнинг тонгсиз дашибига,
ийқилурман зарб ила,
й, шиқ, ҳақиқий шиқ, шиқ!*

*Истайманки, кучли шамол чиқсин зулмат қаъридан,
сен ухлаган тоқ тагидан гулу ҳарфларни юлсин,
бошоқларнинг ҳокимияти ўрнатилиди деб,
хабар қилсин
тилло каби товланган негр болага.*

Лилион РОСС

ХЕМИНГУЭЙ ПОРТРЕТИ¹

*Рус тилидан
Ортиқбай АБДУЛЛАЕВ
таржимаси*

Эрта тонгда мени телефон қўнғироғи уйғотди. Хемингуэй зудлик билан меҳмонхонага етиб келишимни сўради. Овозида қандайдир хаяжонланиш сезиларди. Тезда бир финжон қаҳва ичиб, хонасига етиб келганимда эшик очиқ экан. Ичкари кирдим. Хемингуэй телефонда гаплашиб турарди.

Эгнида тор келиб қолган сарғимтил катак халат. Бир қўлида шампан куйилган қадаҳ. Соқоли кечагига қараганда анча ўсиб қолган эди.

– Ўғлим Патрик Гарварддан келяпти, мен хонани унга қолдиришингизни сўрайман, – деди у телефонда. – Патрик, биринчи ҳарфи П. – У жим қолди ва қадаҳдан хўплади. – Катта раҳмат. У Гарварддан келади.

Хемингуэй телефонни кўйди, халат чўнтағидан шишача олиб, кафтига дори тушириди ва уларни шампанга қўшиб ичди. Эрталаб соат олтида тургани, хотини ҳамон ухлаётгани, тонгда яхши ишлагани ва ҳозир сухбатга жуда мойил эканини айтди. Гаплашиб ўтириб дам оларди. У киприклари калта бўлганидан ҳар доим эрта туриб кетар, ёруғликка ўта таъсирчан эди.

– Умрим бўйи куёш чиқишини кузатиб келаман, – деди у. Бугунги тонгда кўллэзмасини синчилаб кўздан кечирибди.

– Тонгда уйғондим, миямда турли жумлалар ғужғон ўйнай бошлади, улардан халос бўлишим – кимгадир сўзлашим ёки ёзишим керак, – деди. – Карам Сизга маъкул келдими?

– Жуда ёқди, – деб жавоб бердим.

– Мен Карамни яхши кўраман, Ингрид² ҳам менга ёқади. Агар мисс Мэрига уйланмаганимда, мисс Мэрини севмаганимда, иккаласига ёпишиб олардим. Бирида йўқ нарса иккинчисида бор. Шунинг учун иккаласини бирдек ёқтираман. – Бир лаҳза ўзи айтган сўзлардан лол қолди, сўнг тез гапириб кетди: – Асло актисага уйланмаган бўлардим, улар мартабага эришишлари керак, бунинг устига ноқулай пайтларда ишлашади.

Мен ўзингизга плаш сотиб оласизми, деб сўрадим. Албатта, деб жавоб берди у. Сотиб оламан, аммо оломон орасида юришга тоқатим йўқ, бунинг устига кўча жуда совук.

Курси ёнидаги кичкина столга қўйилган музли чеълакчаларда шампан шишалари кўриниб турарди. Қадаҳни ушлаб, шишалардан бирини суғурди, у бўш эди. Иккинчи шишани олиб қадаҳни тўлдирав экан: “Менга ўқ беринг, менга ўқ беринг, учинчи дивизиядан ҳайдаб юборманг асло. Дунёда тенги йўқ

¹ Давоми. Бошланиши ўтган сонда.

² Киноактриса Ингрид Бергман.

аскарсан ўзинг”, деб хиргойи қилиб турди. Бир оз тин олгач, тушунтириди:

– Бу учинчи пиёда дивизиясининг қўшиғи – у менга ёқади, мусика эшитгим келса, доим шуни хиргойи қиласман. Ҳар қандай мусиқани, ҳатто операни ҳам яхши кўраман. Афсуски, овозим йўқ, ашула айта олмайман. Биронта асбоб, ҳатто роял чалишни билмасам ҳам қулоғим жуда ўткир. Онам виолончел чалишни ўргатмоқчи бўлди. Шуни деб мактабдан ҳам чиқариб олди. Мен футбол ўйнашга иштиёқманд эдим. У эса уйимизда камер мусиқаси янграб туришини хоҳларди.

Ёзув столи устидаги очиқ портфел ичида хафсаласизлик билан жойланган қўлёзмалар кўриниб турарди. Хемингуэй қўлёзмаларни қисқартирганини айтди.

– Муаллиф қанча қисқартирганига қараб китобни баҳолаш мумкин, – деб давом этди у. – Ёзётган пайтимда, жин урсин, арслондек мағрур бўлиб кетаман! Қадими инглиз сўзларини ишлатаман. Одамлар мени оддий сўзларни ҳам билмайдиган тентак ва саводсиз деб ўйлашади. Мен шуни яхши биламанки, улардан кўра кучлироқ кўҳна сўзлар бор, ўрнини топиб қўллай олсанг, ёдда узоқ сақланиб қолади. Ёдинга тут, кимки олифталиқ билан ўзини билимдон қилиб кўрсатмоқчи бўлса, ҳеч нарсага эриша олмайди. Яна шуни ҳам унутмагинки, қизалоғим, мен тўрт ёшимдан бошлаб духоба айикчам билан ухламайдиган бўлганман. Ҳозир эса етмиш саккиз ёшдаги кампирлар ҳам урушда ҳалок бўлган жангчиларнинг оналарига бериладиган имтиёзли билим олиш ҳақидаги қонунларни излашади. Мен ўзимга нафака тайинлаб, Гарвард университетига борсаммикан деб ўйлаб юраман, сабаби, холам Арабелла Хемингуэйларнинг сўнгти авлоди бўлатуриб, ҳатто коллежда ўқимаганимдан қайғуриб юради. Аммо менда бунга сира имкон бўлган эмас. Ўрта мактабни битирганимдан кейин икки йил тезкор ҳарбий билим юртида ўқидим, француз тили билан шуғуланишга вақтим йўқ эди. Мен француз тилида чиқадиган “Ассошиэйтед пресс” хабарлари орқали француз тилини ўрганганман, аввал уларни Америка газеталаридан ўқиб олар эдим. Бора-бора ўзим иштирок этган воқеалар ҳақидаги хабарларни ўқиб тушунадиган бўлдим, сўнг les evenements¹ ва les crimes²ни ўқий бошладим. Бундай амалиётдан кейин жаноб Мопассанни қийналмай англайдиган бўлдим, чунки у менга таниш ва тушунарли нарсалар ҳақида ёзарди. Дюма, Додэ, Стендални ўқиганимда ўзим ҳам шундай ёзгим келаётганини сезар эдим. Жаноб Флобер тўпни ҳар гал аниқ тарзда кучли ва баланд оширап эди. Жаноб Бодлердан жуда қийин тўпларни узатишни ўргандим, ундан кейин умрида бирон марта чиройли тўп тепа олмаган жаноб Рембога навбат келди. Жаноб Андре Жид ва жаноб Валеридан ҳеч нарсани ўргана олмадим. Жаноб Валери мен учун ўта жимжимадор эканлигини биламан. Худди Жек Бриттон ва Бенни Леонард сингари.

– Жек Бритон, – қўшимича қилди Хемингуэй – боксчи эди, мен уни ардоқлардим. Жек Бритон ҳар доим ҳушёр турарди. Рингда тинимсиз ҳаракат қилиб, кучли зарбага йўл қўймасди. Мен ҳам ҳушёрликда қолишмасдим ва ҳар қандай кучли зарбанинг олдини олардим. Рақибингта зарба беролмасанг, ўзингни ўта-чўққа уришдан фойда борми? Боксчини бурчакка тақаб кўй... Хемингуэй боксчилар ҳолатига кирди ва ўнг қўлини шампан тўла қадаҳ билан кўкрагига босди. Чап қўли билан кўзга кўринмас рақибига бир неча зарба бергандек бўлди.

¹ Спорт янгиликлари (фр.).

² Жиноят хабарлари (фр.).

– Ёдингда тут. Свингдан қоч. Хукни даф эт. Кучинг етганча тўғри зарбаларни қайтар.

У қаддини ростлаб қадаҳга ўйчан тикилиб қолди. Сўнг гапга кирди:

– Бир куни Жек билан Бенни Леонард ўртасидаги кураш ҳақида гаплашиб ўтирганимизда: “Жек, қандай килиб Беннини жуда тез мағлубиятга учратдинг?” – деб сўрадим. “Бенни жуда тажрибали боксчи. У жанг чоғида ҳам ўйлашдан тўхтамайди. У ўйлай бошлаган пайтда мен зарба бердим”. – Хемингуэй бу гапни биринчи марта эшитаётгандек хириллаб кулди. – Жек рингда геометрик аниқлик билан бир миллиметр ҳам четга чиқмай аник ҳаракат қилади. Унга ҳеч ким кучли зарба беролган эмас. Хоҳлаган пайтда ракибини мағлуб эта оларди. – Яна яйраб кулди. – “У ўйлай бошлаганда мен зарба бердим”.

Хемингуэй бу лавҳани “Эллик минг” ҳикоясига киритганини, аммо Скотт Фитцжеральднинг маслаҳатига кўра олиб ташлаганини ҳам айтиб берди. – Скотт бу воеа ҳаммага маълум деб ўйлар экан. Ҳолбуки, уни мен билан Жек Бриттонгина билар эдик. Скотт ана шу парчани олиб ташлашга мени кўндириди. Мен буни хоҳламасдим. Аммо Скотт машхур ёзувчи эди. Уни ҳурмат қилардим. Шунинг учун маслаҳатига кўнди.

Хемингуэй курсига ўтириди ва диккатимни тортиш учун имо-ишора қилди.

– Ёшинг улгайган сари қаҳрамон топиш қийин бўла боради. Аммо топиш керак, – деди у. – Менинг Буаз деган мушугим бор. У одам бўлишни жуда хоҳлайди. – Оҳиста давом этди. Овозини шивирлаш даражасигача пасайтириб, деди: – Буаз одамлар ейдиган ҳамма нарсани еяверади, у сабур¹дек аччик дармондорини ҳам бемалол чайнайди. Мен қон босимини пасайтирадиган бу дорини ҳам, уйқудан олдин ичиладиган хандорини ҳам унга бермайман, албатта, у мени хасис деб ўйлайди. – У гулдурак овозда кулиб юборди. – Мен тентак қарияман. Хўш, бунга нима дейсизлар, жентельменлар?

– Эллик ёш... – Хемингуэй бироз жим тургач давом этди. – Эллик ёш қарилек белгиси эмас. Эллик ёшда ҳам эришган мартабаларингни сақлаб қолиш учун имконият бор. Мен уларни 20-йилларда кўлга киритганман, 30–40-йилларда химоя қилганман. 50-йилларда ҳам химоя қилишга тайёрман.

Хонага миссис Хемингуэй кирди. У кулранг шим ва оқ калта кўйлак кийган эди. Ўзини ниҳоятда яхши ҳис этаётгани ва олти ойдан бери бугун биринчи марта иссиқ ванна қабул қилганини айтди. Зарур ишлар билан кўчага чиқмоқчи экан; Хемингуэйга ҳам ишларини битириш кераклигини эслатди. У тушлик яқинлашиб қолгани, агар шаҳарга чиқиб кетилса, ҳар қайсиси алоҳида овқатланиш учун қаергадир кириши лозимлигини таъкидлаб, вақтни тежаш учун тушликка буюртма берган маъкул деди. Миссис Хемингуэй эри кийиниб чиққунча тушликка буюртма бермоқчи бўлди. Адид кўлидаги қадаҳини кўтарган ҳолда хоҳламайгина ўриндиқдан турди, шампан виносини охиригача ичди ва ётоқхонага кириб кетди. У айнан кечагидек кийинган ҳолда, факат кўйлаги кўк, тугмачали ёқаси силлиқ эди. Чиқиб келганда официант дастурхон ёзib улгурганди. Хемингуэй “Тавеля” виноси бўлмаса тушлик қилолмаймиз, деди. Биз официант вино олиб келгунча кутиб ўтирдик. Хемингуэй денгиз устрицасидан бошлади. Ҳар бирини зўр ҳафсала билан чайнар экан:

– Яхши чайнасант, яхши ўтади, – деб кўярди.

– Дада, марҳамат қилиб кўзойнагингни тузатиб ол, – деб гап қўшди миссис Хемингуэй. У бош силкиб маъкуллади. Сўнг менга қараб бошини бир неча марта лиқиллатиб қўйди.

– Қариганимда ҳаммани бездирадиган чол эмас, донишманд оқсоқол

¹ Сабур – алоэ ўсимлиги.

бўлишни хоҳлайман, – у официант ҳар хил ош-кўклар ва резаворлар қўйиб, “Тавеля” шаробини қадаҳига қўймагунча жим ўтириди. Хемингуэй шаробни ҳўплади ва официантга бош иргаб қўйди. – Ҳозирги барча янги боксчиларни, учқур арғумоқларни, балетларни, велосипед мусобақаларини, ториадорларни, рассомларни, самолётларни кўргим келади; барча қаҳвахоналарнинг доимий мижозига айланган қарғиш теккан ўсмиirlар, ҳалқаро фоҳишалар билан сухбатлашишини, ресторанларда ўтиришни, эски шаробларни синовдан ўтказишини, газета хабарларини ўқишни ва булар ҳақида ҳеч қачон бирон сатр ёзмасликни хоҳлайман. Мен дўстларимга кўплаб ҳатлар ёзишни ва жавоб олишни истайман. Айнан Клемансога ўхшаб 85 ёшгача дадил бўлиб қолишни хоҳлайман. Берни Барухга ўхшаб қолишни ёқтирумайман. Мен парклардаги ўриндиқларда мудраб ўтиришни эмас, кезиб юришни, вакти-вақти билан капитарларни боқишини орзу қиласман. Узун соқол қўйган Бернард Шоуга ўхшамаган ёлғиз қария бу дунёда сандирақлаб юришини тасаввур қилолмайман. – У гапиришдан тўхтаб кафтининг орқаси билан соқолини силади ва хонага хаёлчан кўз югуртириди. – Умримда ҳеч қачон мистер Шоу билан учрашмаганман, – давом этди у. – Ниагара шалоласини ҳам кўрмаганман. Аммо жон деб чопиш мусобақаларида қатнашган бўлардим. Ёшинг 78 га борган чоғдагини чопиш нималигини англай бошлайсан. Шундан кейин фақат ёшлардан иборат бўлган “Бейсбол” командасини излаб топардим.Faқат мен ўйин ўйналишини ўзгартириш учун аввалдан дастурлаштирилган нишондан фойдаланмас эдим. Мен белгиларни ишлатишни ўрганмаганман. Буларнинг ҳаммаси тамом бўлгандан кейин мендан чиройли мурда чиқади, бунақасини ёқимтой Флоид замонасидан бери ҳеч ким кўрмаган. Faқат чурвақаларгина ўзини аяб яшайди. Қўлингга кирган мэрраларни бой бера бошлаганингта аклинг етгандан кейин, жин урсин, ўзингни авайлаганингдан фойда борми? Ўлиш қийин эмас. – У оғзини очиб дастлаб овоз чиқармасдан, сўнг баралла кулди. – Ҳали қиладиган ишлари кўп.

Қўлини чўзиб, узун сарсабил боғламини тортди. Унга маъносиз тикилганича:

– Faқat жуда кучли одамлар ўлаётгандан ҳам тиник фикрлай олади, – деди хаёлчанлик билан. Миссис Хемингуэй таомни тез еб, шаробни ичиб тутатди. Хемингуэй қадаҳдаги майни шошилмай ҳўплади. Соатга қарадим. Учга яқинлашиб қолганди. Официант столни йиғиширишга тушди, биз кўзғалдик. Хемингуэй ўрнидан турап экан, шишада қолган шаробга дилсиёҳлик билан қараб қўйди. Миссис Хемингуэй пальтосини кийди, мен ҳам кийиндим.

– Ичилмай қолган шампан шароби инсоният душманидир, – деди Хемингуэй. Биз қайта ўтиридик. – Қўлимга пул тушса, шампан шароби сотиб олишдан бошқа нарсани билмайман, – деди у қадаҳларга шароб қуятуриб.

Шароб ичиб бўлгач, номердан ташқарига чиқдик. Миссис Хемингуэй кўзойнак тузатишни яна бир бор эслатиб, кўздан ғойиб бўлди. Ҳаво одатдагидек совуқ эди.

– Ёқимсиз ҳаво, кўчада юргинг ҳам келмайди, – деди у маъюсланиб ва чамаси томоғим оғрияпти, деб қўшиб қўйди.

Мен докторга кўрина қолинг, деб таклиф килдим. У хоҳламайман, деб рад қилди.

– Пул оладиган докторларга ҳеч қачон ишонмаганман, – деди у Бешинчи авенъюонинг нариги тарафига ўтганимизда. Бир гала капитарлар учиб

үтди. У тўхтаб, юқорига тикилди, хаёлий милтиқ билан нишонга олиб, тепкини босди. Ҳафсаласи пир бўлгандек бизга қаради.

– Нишонга уриб бўлмади, – деди у ва яна милтиқни тўғрилагандек ҳаракат қилди. – Мана буниси жуда осон. Ана, кўринглар!

У йўлкадаги доғни кўрсатди. Ўзини енгил хис қилгандек бўлди.

– Энг олдин кўзойнак дўконига кирмайсизми? – деб сўрадим ундан. У йўқ, деди. Миссис Хемингуэй плашни “Аберкромби ва Фитч” дўконидан изланглар, деган эди. Шуни айтдим. У яна елкасини қисди-да, оҳиста қадам ташлаб таксига қараб юрди. Биз машиналар оқимига қўшилиб, Бешинчи авеню бўйлаб кетдик. 54-кўчада полициячи хуштак чалиб машинани тўхтатди.

– Аччиғи чиқкан ирланд полициячини кўришни ёқтираман, – деди Хемингуэй завқ билан. – Бирга саккиз тикиб баҳолашишга тайёрман, у уруш пайтида ҳарбий полицияда хизмат қилган. Жуда эпчил ходим. Қурол ишлатишга моҳир. Ҳақиқий полициячилар Халлинжер фильмларидағига ўхшамайди. Айримлари бундан мустасно.

Биз олға юрдик, у бир куни Бешинчи авеньюда Скотт Фитцжеральд билан учрашиб колган жойни кўрсатди.

– Шундан кейин Скотт Пристонга бошқа келмади, аммо фақат футбол ҳақида баҳслашган эди, – лоқайд гапирди Хемингуэй. – У ҳаётини футбол сиз тасаввур қила олмасди. “Нега футболни ташламайсан?” – деб сўрадим ундан. “Эсингни еб қўйибсан, йигитча”, – деди у. Бор гап шу. Агар кўчани кесиб ўтолмассанг, футболда мудофаани қандай ёриб ўтасан? Сирасини айтганда, мен Томас Манн эмасман, – сўнг қўшиб қўйди: – Мен бошқача фикрдаман...

“Аберкромби” дўконга етиб боргунча Хемингуэй яна тумшайиб олди. Таксидан истар-истамас тушди, дўконга калтак еган одамга ўхшаб кириб борди. Мен ундан энг олдин плаш кўришни хоҳлайсизми ёки бошқа нарсаними, деб сўрадим.

– Плаш, – деди у тушкун овозда.

Лифтда Хемингуэй ниҳоятда бошқача – вазмин бўлиб қолди, фақат юзи қийноққа солинаётган одамнинг афтини эслатар эди. Ёнида турган ўрта ёшлардаги аёл унга хушламасдан хавотирланиб қаради, айниқса, тараалмаган оппоқ соқолига қаттиқ тикилди.

– Ё Худойим-ей! – кутилмаганда хитоб қилди Хемингуэй лифтда хукм суроётган жимликни бузиб. Аёл ўз туфлисига назар ташлади. Лифт бизга керакли қаватда тўхтади, ундан тушиб плашлар бўлимига бордик. Олифтанамо кийинган баланд бўйли сотувчи истиқболимизга чиқди, қўлларини шими чўнтагига тиқиб олган Хемингуэй унинг олдига борди.

– Бу дўкондан қарзга мол олишга умид қилсам бўладими? – сўради у сотувчидан.

– Бўлади, сэр, – деди сотувчи йўталиб.

– Плаш олмоқчиман, – деди Хемингуэй таҳдид билан.

– Марҳамат, сэр, – деди сотувчи. – Кайси плашни кўришни хоҳлайсиз, сэр?

– Ҳов анавини.

У илгичга осилган – сув ўтказмайдиган, белбоғсиз, қопга ўхшаган плашни кўрсатди. Сотувчи плашни узатди ва тавозе билан уни катта ойна олдига бошлаб борди.

– Кафанга ўхшайди, – деди Хемингуэй плашни эгнидан ечар экан. – Гавдамга тўғри келмайди. Сизларда бошқа плашлар йўқми? – сўради у йўқ деган жавоб эшитиш умидида. Ва шошилмасдан лифт томонга юрди.

– Мана бунисини кўринг, сэр, қадама астарли, – таклиф қилди сотувчи. Бу плашнинг камари бор эди. Хемингуэй уни кийиб кўрди, ўзини ойнага солди ва худди милтиқ отмоқчилик кўлини кўтарди.

– Уни кийиб овга бормоқчимисиз? – сўради сотувчи. Хемингуэй хи-хилаб қўйди ва плашни оламан деди. У сотувчига исмини айтди, у эса бармоқларини ғалати қисирлатди.

– Тушунарли! – хитоб қилди у. – Ҳеч кутмагандим!..

Хемингуэй хафа бўлгандек кўринарди. Плашни “Шерли Недерлэнд” меҳмонхонасига элтишни буюрди ва камар кўрсатишни илтимос қилди.

– Қандай камарни хоҳлайсиз, мистер Хемингуэй? – сўради сотувчи.

– Кўнғирини, албагта.

– Камарлар сотиладиган пештахта олдига бордик, қаршимизда бошқа сотувчи пайдо бўлди.

– Марҳамат қилиб, мистер Хемингуэйга камар кўрсатинг, – деди биринчи сотувчи ва бир қадам чекиниб, уни дикқат билан кузатиб турди.

Иккинчи сотувчи чўнтагидан ўлчагич олди ва Хемингуэйга қирқ олтинчи ёки қирқ тўртинчи ўлчамда камар керак, деди.

– Гаров ўйнайсизми? – сўради Хемингуэй ва сотувчининг кўлини ушлаб, ўз корнига урди.

– Қойил-э! Худди пўлатдек! – деди сотувчи ва Хемингуэйнинг белини ўлчай бошлади.

– Ўттиз саккиз! – эълон қилди у. – Гавдангизга нисбатан белингиз ингичка. Спорт билан кўп шуғуллансангиз керак?

Хемингуэй яна хижолат тортди, кўлини силкитди, кулиб юборди, меҳмонхонадан чиққанимиздан буён у биринчи марта қувноқ кайфиятда кўринди. Кўлини мушт қилиб, қорнига қаттиқ урди.

– Қаерга кетяпсиз? Тағин Испаниягами? – сўради сотувчи.

– Италияга, – деди Хемингуэй мушти билан яна қорнига уриб.

Биз оёқ кийимлари бўлимидан ҳам анча туриб қолдик. Хемингуэй хонаки юмшоқ туфлиларни кўрмокчи бўлди.

– Вагонда кийишгами? – сўради сотувчи.

– Ўлчами неchanчи?

– Ўн биринчи¹, – деди Хемингуэй хижолатомуз. Туфлини кўргач, сотувчига уни оламан, деди.

– Чўнтағимга солиб кетаман, – тушунтириди у. – Фақат чек беринг, мени ўғрига чиқаришмасин тағин.

– Бизда ўғрилик кўп бўлиб туради, сиз буни тасаввур ҳам қилолмайсиз, – изоҳ берди кекса пакана сотувчи. – Куни кечагина биринчи қаватдан катта филдиракни ўғирлаб кетишиди. Шундай кўтаришгану...

Хемингуэй эътибор бермади. Қўққисдан бизга орқа ўгириб турган бақувват эркакка кўзи тушиб:

– Вульфи! – деб ҳайқирди.

Номаълум одам ўгирилиб қаради.

У қип қизил юzlари япалоқ, чиройли киши эди. Хемингуэйни кўриб, ниҳоятда хурсанд бўлиб кетди.

– Отагинам! – қичқирди у. Иккаласи бир-бирининг елкасига уриб, кучоклашганча анча туриб қолишиди. Бу киши Уинстон Гэст² экан. Юқориги қаватдан милтиқ сотиб олишини айтиб, бирга борайлик деб таклиф қилди. Хемингуэй қанақа милтиқ олиши билан кизиқди, “Ўнинчи калибрли винчестери”, деб жавоб берди Гэст.

¹ Биздаги 43-44-ўлчамга тўғри келади.

² Хемингуэйнинг овга бирга борадиган дўстларидан бири.

Хемингуэй сотувчидан хонаки туфлини олиб, чўнтакларига солар экан, бебаҳо милтиқ деб маъқуллаб кўйди. Лифтда кўтарилар экан, икки дўст қанча озганликларини суриштиришди. Гэст вазни бир юз ўн килога тушгани, бунинг учун узоқ вақт от миниб, майдонда узлуксиз машқ қилгани ҳакида сўзлади. Хемингуэй эса Кубада ўрдак овлаб, китоб устида қаттиқ ишлагандан кейин оғирлиги тўқсон етти кило бўлганини айтди.

– Отагинам, қанақа китоб ёздинг? – деб сўради Гэст лифтдан чиққанимиздан кейин.

Хемингуэй кулиб, муштлари билан оғзини тўсади ва унвонимни ҳимоя қилиш учун ҳали кўп жангга тушаман, деди.

– Вульфи, мен бармоқларимни тишлаб ўти rmsдан, қотириб ёзиш мумкинлигини бирдан англаб қолдим, – деди у оҳиста. – Ҳаммаси ми-ямда пишиб бир қолипга тушгунича маълум бир муддат ўтади, шекилли. Шундай экан, ёзувчининг бош чанофини очиб кўриш ёки етти марталаб миясини титкилашга, синдиришга ёки калласини автомобиль ойнасининг тозалагичи билан ишқалашга, бу ҳам етмагандек қўрошин билан баданини илма-тешик қилишга ҳожат йўқ деб ўйлайман. Очифини айтганда, Вульфи, хуштак чалсанг бу чўчқа болалари думини қисиб ин-инига кириб кетади, – у яйраб кулди. Гэст ҳам улкан қоматини силкитиб хохолар эди.

– Э худойим-ей, – деди у. – Ов милтиғинг оролдаги кулбамда ҳалигача осиғлиқ турибди. Яна қачон овга борамиз?

Хемингуэй яйраб кулганича унинг елкасига туртиб кўйди.

– Вульфи, нега бунчалик бесўнақай бўлиб кетдинг?

Гэст сотувчига милтиқни қаерга олиб боришни тайинлади, биз яна лифтга кирдик. Улар ўтган йили ярим тонна келадиган қора марлин тутган овчи ҳақида гаплашиб кетишиди.

Биринчи қаватга тушганимизда, Гэст деворга қоқилган фил калласини кўрсатди:

– Бу фил эмас, пакана одам-ку!

– Шуям фил бўлптими? – маъқуллади Хемингуэй. Улар бир-бирини қучоқлаганча кўчага чиқишиди. Мен қайтишим кераклигини айтдим. Хемингуэй эрталаб вақтли етиб келинг, Патрик билан биргаликда Метрополитен музейига борамиз деб тайинлади. Кетар эканман Гэстнинг:

– Худога шукур! Ҳаётимга доғ туширадиган бирон иш қилганим йўқ, – деганини эшиздим.

Ўғирилиб қарадим. Улар бир-бирининг қорнига уриб, овози борича хохолашарди.

Эртаси куни эшикни Патрик очди. У ўрта бўйли, кўзлари катта-катта ўсмир бўлиб, юзида асабийлик сезиларди. Ёнгил матодан тикилган кулранг шим, ёқаси очиқ кўйлақ, жун пайпоқ ва юмшоқ ағдарма туфли кийган эди. Миссис Хемингуэй хат ёзиб ўтиради.

Мени кўриб бошини кўтарди:

– Дадамиз кийини бўлгандан кейин суратларни кўришга борамиз, – деди ва ёзиша давом этди.

Патрик менга кун бўйи суратларни томоша қилишга тайёр эканини, ўзи ҳам оз-моз чизиб туришини айтди.

– Дадам тушликка қайтиб келиши шарт, у мистер Скрибнерни¹ таклиф қилган, – деди Патрик ва эрталаб отасини кузатиш учун шаҳарга чиқишини кўшиб кўйди.

Телефон жиринглади, у дастани кўтариб, ётоқхонанинг очиқ эшигига қараб, қичқирди:

¹ Хемингуэйнинг ношири.

– Дада, Жижи бўлса керак!

Хемингуэй ички кийимда чиқиб, телефонга қараб юрди.

– Аҳволларинг қандай, кичкинто? – деди у ва Жижини таътил пайтида Финкдаги фермасига келишга даъват қилди.

– Сен у ерда ҳар доим азиз меҳмонимиз бўласан, – деди у. – Суюкли мушугингни эслайсанми? Антика деб исм қўйган эдинг-ку! Биз номини ўзгартирдик, ҳозир Экстаз деб чақирамиз. Ҳамма мушукларимиз исмини яхши билишади. У трубкани қўяр экан: – Жижи – моҳир мерган, ўн бир ёшга тўлганда Кубадаги ўқотиш мусобақаларида иккинчи ўринни эгалланган, – деди менга.

– Сичқонча, “Ведка” аниқми? – сўради у.

– Шундай, дада, – жавоб берди Патрик.

Мен “ведка”нинг маъносини сўрадим. Бу инглизча жаргон, деб тушунтириди Хемингуэй, у маълумот маъносини англатади, “ведка” “разведка” сўзидан келиб чиқсан. У уч тоифага бўлинади: оддий “ведка”, “аниқ ведка” шубҳа туғдирмайдиган маълумотларни билдиради, “мутлақо аниқ ведка” бўлса, бемалол ҳаракатга киришиш мумкин.

У яшил орхидеяга тикилиб қолди.

– Онам менга ҳеч қачон гул келтиргмаган, – деди маъюс оҳангда. Хемингуэйнинг онаси саксон ёшлар атрофида эканини ва у Иллинойс штатидаги Ривер Форест манзилида яшашини билиб олдим. Анча олдин вафот этган отаси шифокор бўлган, Эрнестнинг болалик пайтида ўзини отиб қўйган экан.

– Агар суратларни кўрадиган бўлсак, ҳозир жўнашимиз керак, – деди Хемингуэй. – Чарли Скрибнерни соат бирга шу ерга чакирганман. Кечирасиз, ювиниб олай. Катта шаҳарларда, ҳеч бўлмаганда, бўйинни ювиб юриш керак.

У ётоқхонага кириб кетди. Миссис Хемингуэй эри йўклигида, Эрнест оиласидаги олти боланинг иккинчиси эканини айтди: энг каттаси Марселина, кейин Эрнест, Урсула, Мадлена, Карола ва энг кичиги, якка ёлғиз укаси Лестер. Барча сингилларига мукаддас исмлар қўйилган. Ҳаммаси оиласи. Лестер Боготода – Колумбияда яшайди, Америка элчихонасида ишлайди.

Бироздан кейин янги плаш кийган Хемингуэй чиқди. Миссис Хемингуэй билан Патрик пальто кийишганди, биз пастга тушдик. Ёмғир ёғар эди, такси тутишга ошиқдик. Музейга боргунча Хемингуэй жуда кам гапирди. Ниманидир хиргойи қилиб, кўчага қараб борди. Миссис Хемингуэй қулоғимга у таксида юришни ва ҳайдовчи ёнида ўтириб йўлни кузатиб боришни яхши кўради, деб шипшитиб қўйди.

Хемингуэй ойнадан қараб осмондаги қушлар галасини кўрсатди.

– Бу ерда қушлар учади, аммо шаҳарга лоқайд қарашади, – деди у. – Нью-Йоркка қушлар кўнишни хоҳламайди.

Музей ёнида тўхтадик. Бир гуруҳ ўқувчилар секин юриб боришаётган экан. Хемингуэй бизни уларнинг ёнидан тез олиб ўтди. Даҳлизда тўхтаб, пальтоси чўнтағидан кумушранг сувдон олди, қопқоғини бураб, бир култум хўплади. Сувдонни жойига қўйгач, миссис Хемингуэйдан олдин Гойяни кўрасанми ёки Брейгелними, деб сўради. У Брейгелни кўрамиз, деди.

– Мен Париждаги Люксембург музейида расм чизишни ўрганганман, – деди Хемингуэй. – Институтни битира олмадим. Қорнинг бўм-бўш бўлса, музейга текин киритилса, албатта, музейга кирасан-да. – У Тициан билан Жоржонега тегишли деб ҳисобланадиган “Эркак портрети” суратига эътиборимизни қаратди. – Бу суратлар ҳам кўхна Венециядан келтирилган.

– Менга мана бу сурат кўпроқ ёқади! – деб хитоб қилди у. Шу пайт Патрик

ва Хемингуэй Франческо Франчианинг “Федерико Гонзаго портрети” (1500-1540) сурати ёнига борди. Полотнода плаш кийган, узун сочли ёш боланинг табиат қўйинидаги тасвири нихоятда жонли акс эттирилган эди.

– Сичқонча, биз ёзаётган пайтимизда айнан мана шуларни кўрсатишга ҳаракат қиласиз, – деди Хемингуэй суратнинг орқа томонидаги дараҳтларни кўрсатиб. – Ёзаётгандা уларсиз иш чиқмайди.

Миссис Хемингуэй бизни чақирди. У Ван Дейкнинг “Рассом портрети” асари қаршисида турарди. Хемингуэй унга қараб, “маъқул” маъносида бош силкиб қўйди.

– Испанияда Уитти Дал деган учувчимиз бор эди. Бир куни ана шу Уитти олдимга келиб: “Мистер Хемингуэй, Ван Дейк яхши рассомми?” – деб сўради. Мен: “Яхши рассом”, – деб жавоб бердим. “– Кўнглимдагини айтдингиз. Мен турган хонада у чизган сурат бор экан, менга жуда ёқди, шунисига жуда хурсандман, у жуда яхши рассом. У менга ёққани учун жуда хурсандман”, – деди қувониб. Эртаси куни Уитти ҳалок бўлди...

Биз Рубенснинг “Исо Масихнинг гуноҳ ва ўлим устидан ғалабаси” сурати олдига келдик. Унда Исо Масих илонлар ва фаришталар орасида тасвирланганди. Миссис Хемингуэй билан Патрик бу сурат Рубенс чизган бошқа расмларга ўхшамайди, дейишиди.

– Нима десанглар деяверинглар, аммо бу расмни Рубенс чизган! – деди комил ишонч билан Хемингуэй. – Овчи ит ўлжани ҳидидан сезгандек, асл нусхани ҳам адашмай билиш мумкин. Ҳатто қашшоқ, аммо жуда яхши расомлар кўлида таҳсил олганлар ҳам буни яхши билишади.

Шу билан баҳс нихоясига етди ва биз Брейгель расмлари кўйилган хонага қараб юрдик. Эшик ёпиқ, унда “Таъмир учун ёпилган” деган эълон осиғлиқ эди.

– Ҳечқиси йўқ, уларни кечирамиз, – деди Хемингуэй ва яна сувдонни қўлига олди.

Хонадан узоқлашар эканмиз, у:

– Барибир менга бу ерда яхши Брегель етишмаётгандек туюлади, – деди. – У қишлоқ манзараларини чизувчи рассомларнинг энг улуғи, у чизган ғалла ўрими суратида бошқолар шу қадар геометрик аниқликда чизилганки, мен ҳар гал кўрганимда дил-дилдан ҳайратга тушаман.

Биз Эль Греконинг яшил бўёкларда чизилган “Толедо кўринишлари” сурати ёнига келиб, завқланиб узоқ томоша қилдик.

– Бу ерда нодир асрлар жуда кўп, аммо, менимча, музейдаги энг яхши асар мана шу, – деди Хемингуэй. Унга ёқмаган баъзи суратлар Патрикни ҳаяжонга солаётгани сезилиб қолди. Ҳар гал шу аҳвол тақрорланганда Хемингуэй ўғли билан астойдил баҳсга тушиб кетарди. Шунда Патрик бош силкитиб кулар ва отасининг фикрини ҳурмат қилишини тинимсиз таъкидлар эди. У баҳсдан ўзини олиб қочаётганди.

– Қандай ярамаслик! – бехосдан қаттиқ гапирди Хемингуэй. – Мен санъат танқидчиси бўлгим келмайди. Ҳамма қатори суратни томоша қилишини, ундан завқ олишни ва ундан ўрганишни хоҳлайман. Мана бу сурат, назаримда, нихоятда яхши. – У орқага тисарилди ва кўзини қисиб Рейнольдснинг “Полковник Георг Куссмакер” асарига тикилди. Суратда саркарда от миниб, жиловни тортиб, дараҳтга суюниб турарди. – Кўринадики, полковник учига чиққан ярамас одам. У ўз суратини чизган рассомга қанча бўлса – шунча пул беришга тайёр абллаҳлар тоифасидан, – дер экан, Хемингуэй кулиб юборди. – Нақадар димоғдорлик билан ўтирганига қаранг, отининг мушаклари ўйнаб турганини, туёклари билан депсинаётганини кўряпизми? Полковник шун-

чалик ўзига бино қўйганки, ҳатто эгарда ўтирганига қарамай, дарахтга ҳам суюниб олган.

Биз бир муддат залга тарқалиб, суратларни ёлғиз томоша қила бошладик. Сўнг Хемингуэй ҳаммамизни ёнига чорлаб, тагига катта ҳарфларда “Катари-на Лориллард Вульф”, майда ҳарфларда эса “рассом Кабанель” деб ёзилган суратни кўрсатди:

— Бундай суратларни болалик пайтларимда Чикагода кўп кўрганман, — деди у. — Узоқ йилларгача Бунте ва Райерсонларни энг яхши кўрган рассомларим деб юрганман. Бу икки киши Чикагодаги энг бадавлат оиласарнинг фарзандлари эди. Мен у пайтларда рассомлар сурат остига ўз фамилияларини катта ҳарфларда ёзишади деб ўйлар эдим.

Биз Сезанна, Дега ва бошка импрессионистларнинг суратларини ҳам томоша қилдик. Хемингуэйнинг завку ҳаяжони ортиб борди. У ҳар бир рассом санъат оламига нима бергани-ю бошқалардан нималар олгани ҳақида чуқур мулоҳазалар юрита бошлади. Патрик унинг фикрларини хурмат билан тинглаб, чамаси, энди рассомлар маҳорати хусусида баҳслашишга журъат этмаётгандек кўринар эди. Хемингуэй бир неча дақиқа Сезаннинг “Фоктенбло ўрмонидаги қоя тошлар” суратига тикилиб қолди.

— Биз ҳам ёзаётганимизда шундай мукаммалликка интиламиз. Мана дарахтлар, мана тошлар — уларни айнан кўрсатишими зарур, — тўлқинланиб гапиди у. — Мумтоз санъаткорлардан кейин энг ёқтирадиганим Сезанн. Ажойиб! Жуда ажойиб санъаткор! Дега — янада мўъжизакор рассом. Мен Деганинг биронта ҳам ёмон суратини кўрганим йўқ. Ёмон асарларини нима қилганини биласизларми? Ёқиб юборган.

Хемингуэй сувдондан яна бир хўплаб қўйди. Биз Манэ ингичка қаламда чизган мадемузель Вальтес де ля Бинь портрети олдига келдик. Бу сочи жуда баланд турмакланган ёш, оппоқ қизнинг портрети эди. Хемингуэй бир неча сония жим қараб турди, сўнг ўғирилиб таассуротларини билдириди:

— Манэ ёш қизча қалбида гулдек очилаётган туйғулар гўзаллигини нозик илғай олган.

Бир муддат залда иккимиз айланиб юрдик. Хемингуэй:

— Мен Поль Сезанн суратларига ўхшатиб манзара чиза оламан. Люксембург музейида оч қорин билан минг мароталаб кезиб юрганимда ундан манзара чизиш сирларини ўрганганман. Ишончим комилки, агар жаноб Поль тирик бўлиб, мен чизган манзараларни кўрганида ундан таълим олганим учун ўзида йўқ хурсанд бўларди, — деб дилини очди менга.

Яна Хемингуэй Иоганн Себастьян Баҳдан ҳам кўп нарсалар ўрганганини кўшиб қўйди.

— Баҳ туташ нуқталарни таъкидлаш мақсадида бир хил нотани ҳадеб та-корлагани каби мен ҳам “Алвидо, курол”нинг биринчи жумлаларида онгли равишда “ва” боғловчисини кўп марта ишлатганман. Баъзи-баъзида мен жаноб Иоаннга айнан ўхшатиб ёки ҳеч бўлмагандан унга ёқадиган қилиб ёза оламан. Улардан ўрганиш лозимлигини яхши билганим учун бундай одамлар билан тил топишишим осон кечади.

— Дада, қаранг, — деб чақириб қолди Патрик. У Карпачонинг “Хочга тортилиш азоби” суратини томоша қилмоқда эди. — Диний руҳдаги асар учун томошабоп ҳайвонлар тўлиб ётибди.

— Ўхў, — деб қўйди Хемингуэй. — Бу рассомлар хар доим мұқаддас сюжетларни Италиядаги ўзига ёққан жойларга ёки ўзлари ё бўлмаса маъшуқалари туғилган ерларга кўчирадилар. Ўз маъшуқаларини мадонналарга айлантирадилар. Айтайлик, улар Фаластинни чизишга жазм қиладилар, Фаластин

жуда узоқда. Рассомлар суратдаги манзарага қизил түтини, охуни, қоплонни тиқишириадилар. Алхол, шу аснода Узок Шарқни эслаб қоладилар ва дархол венецияликларнинг азалий душмани маврлар қиёфасини суратга зўрлаб киритадилар.

У гапини тўхтатди ва рассом суратни яна нималар билан тўлдирган экан деб синчикалб тикила бошлади.

– Шу пайтда рассомнинг қорни очиб қолди ва қуёнларни ҳам расмга жойлаштириди, – деди у. – Буни қаранглар, Сичқонча, биз жуда кўп яхши суратларни томоша қилдик. Сичқонча, икки соат сурат кўрдик, буни кам деб ўйлайсанми?

Ҳаммамиз қайтадиган вақт бўлди деб маъқулладик. Хемингуэй бугун Гойяни кўрмаймиз, хотиним билан Европадан қайтганимиздан кейин музейга яна биргаликда келамиз деб шарт кўйди.

Биз музейдан чиқдик. Ёмғир ҳамон ёғмоқда эди.

– Жин урсин! – норозилигини билдириди Хемингуэй. – Ёмғир ёғаётганда кўчага чиқишини ёқтиримайман. Ивиб юришга тоқатим йўқ.

Чарльз Скрибнер меҳмонхона даҳлизида кутиб турган экан.

– Эрнест, – деди у Хемингуэй кўл узатар экан. У дона-дона гапирадиган, салобатли, келишган киши эди.

Ҳамма лифтта киргандан кейин Хемингуэй дўстига мурожаат қилди:

– Чарли, биз сурат кўргани бордик. У ерда жуда гўзал расмлар бор, Чарли.

Скрибнер маъқуллади ва дудукланиб;

– Ўҳӯ, ўҳӯ, – деб кўйди.

– Менга ўҳшаган чеккадаги киши учун ниҳоятда ажойиб сайд бўлди.

– Ўҳӯ, ўҳӯ...

Хонага кириб пальтоларимизни ечдик, Хемингуэй тушликни шу ернинг ўзида қиласиз, деди. У ресторанга кўнғироқ қилди, миссис Хемингуэй эса хатни ёзиб тугатиш учун ёзув столига ўтириди. Хемингуэй жаноб Скрибнер билан диванга жойлашди ва дарров дўстига китобни ёзиш давомида олти кунлик велосипед пойгасига чиқкан спортчига ўхшаб тоза тер тўкишга тўғри келгани ҳақида шикоят қила бошлади. Патрик бурчакда отасига қараб жим ўтириди.

Официант таомнома олиб келди. Скрибнер Хемингуэй тўлайдиган бўлса, мен ҳозир энг қиммат таомларга буюртма бераман, деб ҳаммани кулдирди. Патрик ҳам мирикиб кулди. Официант таомларни олиб келишга кетди, Скрибнер билан Хемингуэй зарур ишлар хусусида гаплашиб ўтиришди. Скрибнер жўнатган хатларимни олдингми, ҳозир улар ёнингдами?, деб сўради.

– Роберт Брауннинг шеърлари билан бирга уларни ҳар доим ёнимда олиб юраман, – жавоб берди Хемингуэй.

Скрибнер бош тебратди ва пиджагининг ички чўнтағидан қандайдир қофозларни ўзининг айтишича, янги китоб учун тузилган шартнома нусхаларини олди. Шартномада йигирма беш минг доллар бўнак бериш кўзда тутилган экан.

Хемингуэй шартномага кўл кўйди ва дивандан қўзғалиб, шундай деди:

– Ўзимни ҳеч қачон даҳо ҳисобламаганман, аммо ўз шарафимни барча истеъодли ёш ёзувчилар олдида химоя қила оламан. – У бошини елкасига тортиди, чап оёғини олдинга ташлади ва бир неча марта гоҳ ўнг, гоҳ чап томонга зарба бераётгандек чакқон ҳаракатлар қилди. – Ҳеч қачон кучли зарба тегишига йўл кўйма! – деб хитоб қилди.

Скрибнер уни Европанинг қайси бурчагидан топиш мумкинлигини сўради. Хемингуэй “Гаранти траст” компаниясининг Париждаги бўлими орқали топишдан қулай жой йўқ деб тушунтириди.

– Бир пайтлар – Парижни забт этган пайтимизда мен бу банкни босиб олишга уриниб кўрган эдим, аммо қаттиқ зарбага учраганман. Ўғил бола гапни айтсан, шахсий банк очганимда зўр бўлар эди-я! – деди ва ўзини ноқулай сезиб, жилмайиб кўйди.

– Ўхў, ўхў... – пўнфиллади Скрибнер. – Италияда нима иш қилмоқчисиз, Эрнест?

Куннинг биринчи ярмида ишламоқчиман, иккинчи ярмида италиялик дўстлар билан учрашмоқчиман, тонгги пайтларда ўрдак овламоқчиман, – деб жавоб берди Хемингуэй.

– Бир куни тонгда олти киши бўлиб уч юз ўттиз битта ўрдак отганмиз. Мэри ҳам яхши отган.

Миссис Хемингуэй бошини кўтарди.

– Дадамиз билан турмуш қурмоқчи бўлган ҳар бир аёл милтиқ отишни яхши билиши керак, – деди у ва яна хат ёзишга тутинди.

– Мен бир марта овга чиққанман – бу Суффолкда, Англияда бўлган эди, – хаёлчан гапирди Скрибнер. Ҳаммамиз давомини эҳтиром сақлаб жим кутиб турдик.

– Суффолкда эрталабки нонуштада ғоз тухуми беришганини яхши эслайман. Кейин биз овга чиқдик. Мен ҳатто тепки босишниям уddaрай олмадим.

– Ов – яхши хаётнинг бир бўлаги. Вест-порт ёки Бронсквилда сандироқлагандан кўра яхшиrok, – деди Хемингуэй.

– Тепки босишни ўрганганимдан кейин ҳам биронта нишонни уролганим йўқ.

– Мен эса Монте-Карлодаги катта мусобақада ва Сан-Ромодаги жаҳон биринчилигига жон деб қатнашган бўлардим, – деди Хемингуэй. – Яхши тайёргарлик кўрганман, хоҳлаган мусобақада қатнашишим мумкин. Бир марта катта мусобақада ҳатто Вульфни енгиги чиққанман. Моҳир мерган у. Уни енгиш – ўргатилмаган отни минишдек оғир машаққат.

– Нихоят, мен ҳам бир марта нишонга урганман, – гапини тамомлади Скрибнер.

– Кимни отгансан? – сабрсизланиб сўради Хемингуэй.

– Қуённи, – жавоб берди Скрибнер. – Қуённи отганман.

– Монте-Карлода 1939 йилдан бери катта мусобақа ўтказилгани йўқ. – афсусланди Хемингуэй. – Етмиш тўрт йил ичидаги факат иккитагина американлик ғолиб бўлди. Ўқ узиш менга яхши кайфият бағишлиайди. Ҳамма гап шундаки, бундай мусобақаларда атрофингда сени тушунадиган, сенга хайриҳоҳ одамлар бўлади, бошқа жойда эса сенга ҳасад қиласидиган, ёмонлик соғинадиганлар куршовида қоласан. Бу тезкор ўйин, бейсболдан кўра тез тамом бўлади, биринчи хатодаёқ ўйиндан чиқиб кетасан.

Телефон жиринглади. Хемингуэй дастани кўтариб тинглаб турди ва нималардир деб жавоб қайтарди, сўнг бизга ўтрилиб, “Эндорсментс инкорпорейтед” номли тарғибот идораси қандайдир ичимликларга унинг номини қўйиш учун тўрт минг доллар таклиф килаётганини айтди.

– Мен уларга текинга тўрт минг доллар берганларингда ҳам бундай аталани ичмайман деб жавоб қилдим, – деди у. – Уларга шампан шаробига муҳлисман дедим. Мен ҳар доим юмшоқ кўнгилли одам бўлишга ҳаракат қиласман, аммо бу жуда оғир иш. Бостонда ютсанг, Чикагода ютқазасан.

Иброҳим ҲАҚҚУЛ

РУХОНИЯТ ВА НАФСОНИЯТ ТАЗОДИ

Шарқ тасаввуф адабиёти, энг аввало, рух ва руҳоният адабиёти. Чунки рух яратиқларнинг энг соғи ва энг порлоғи. У фақат хайр, фақат гўзаллик учун харакат қиласи. Англаниши қийин, ҳатто имконсиз кўринган нарсаларни ҳам рух англашга кодир. Файб дунёсига рух йўл очади, ҳақиқат ахлиниңг қашфи рух биландир. Мутасавифлардан бири: “Рух, Жаноби Ҳақнинг “Кун!” (“Бўй!”) амри жалили билан пайдо бўлгани йўқ. Агар шундай бўлгандан эди, унда зиллат (пастлик, тубанлик) аломатлари бўларди”, – дебди. Шунда унга: “Бундай бўлса, рух қаердан ва қандай яралган”, – дея савол берилганда у: “Жаноби Ҳақнинг жалоли ва жамоли орасидан зуҳур этмишdir. Шу учун ҳам рух “Кун!” амри ила майдонга келган ашёдаги зиллат ва ноқисликлардан фориғdir”, – деган экан.

Баъзи қалом олимлари бир турли модда – нозик ва шаффоғ жисм (жисми латиф) деб қарашган. Имом Ғаззолийга кўра, рух маънавий бир жавҳар бўлиб, Куръони каримда ҳаёт бергувчи қувват, ваҳий, амр, Оллоҳнинг қаломи, раҳмат ва Жаброил каби маъноларда қўлланилган. Мумтоз шеъриятда рух ҳакида, руҳнинг ҳусусият ёки фазилатлари борасида ёзмаган шоирни топиш қийин. Чунки руҳни билиш, руҳоний ҳаёт учун ғамхўрлик қила олишга қадим-қадимдан инсон ўзлигини англаш ва танишнинг туб асоси деб қаралган. Улуғ мутасавиф Юсуф Ҳамадоний таъкидлаганидек, “Рух аслларнинг аслидир. Одам вужуди ва аъзолари рух билан тирик. Рух борлиғи паноҳида бадан кўради, билади, эшитади, ушлайди, юради. Руҳнинг ҳусусият – фазилатлари туфайли доноликда қатъият, назарда фаросат ва ибрат, эшитишда ҳикматни англаш, эргашишда итоат, юришда хизмат юзага келади”.

Рух моҳиятини англаш ва чуқур идрок қилиш кишини охир-оқибатда само одами ҳолатига етказади. Буни Машраб биргина байтда акс эттирган:

*Руҳи жоним ариша етти мен ўзум осмониман,
Тутти оламни шарорим, мен ўзим осмониман...*

Дарвоқе, рух толиби бора-бора ўзини руҳоний гўзаллик посбони қиёфасида ҳис қиласидиган бўлади. Захириддин Муҳаммад Бобур рубоийларидан бирида шу ҳақда ёзган:

*Руҳим яратиб эдинг латофат бирла,
Қилдинг анга танни ҳамроҳ оғат бирла.
Руҳимни чу тан эвига келтурдунг пок,
Мундин бори элитма касофат бирла.*

* Иброҳим Ҳаққул – филология фанлари доктори.

Рұхнинг бош сифатларидан бири латофат, яъни латифлик. Латифнинг оғат ила йўлдошлиги – руҳга нағснинг яқин келтирилиши. Вужуд уйига жойлашган руҳ покизалигини бузувчи касофат эса яна нағсдир.

Бизнинг назаримизда, Шарқ тасаввүф адабиёти ва мумтоз фалсафани билиш, уларда ёритилган энг мураккаб ва жумбокли мавзуларни ҳам тўғри талқин қилиш учун тазодий иккита тушунча маъно-моҳиятини чуқур тушунмоқ зарур. Улардан бири – руҳ ва нағс, иккинчиси – фано ва бақо. Қадим даврларда айрим тариқатларда булар нағс илми, руҳ илми, фано ва бақо илми тарзида ўргатилган.

Адабиётни ўқиб-ўзлаштириш бош мақсад эмас, балки ҳамиша восита деб англанган. Чунки адабиётнинг дунёга келиши инсонни билиш, унинг ташки ва ички ҳаёти тўғрисидаги фикр-қарашларни жозибали шаклларда акс эттириш эҳтиёжини ифодалаган. Бу йўлда эришилган натижаларнинг баъзилари саёз, ниҳоятда тахминий тасаввурларга асосланган бўлса, айримлари инсонни таниш, инсонни инсон “ойна”сида кўришга рағбатлантирган. Буюк Насимий бир ғазалида:

*Нағсини ҳар кимса ким таниди, ул Ҳақни билур,
Орифи Раб ўлди ул ким, таниди топди сабот, –*

дейди. Ушбу байт “Нағсини билган, Раббини билур” ҳадиси шариф асосида яратилган. Чиндан ҳам нағсни таниш ва билиш, Ҳаққа етгунга қадар нимани англаш зарур бўлса, комиллик йўлидаги шахс шуларнинг ҳаммасини имкон даражасида мушоҳададан ўтказа олади. Бу ҳадис икки шаклда шарҳланган. Биринчиси, маърифатуллоҳ орқали нағснинг моҳиятидаги зиддиятларни билиш. Зеро, нағснинг муҳтожлигини англаган Оллоҳнинг ғанимлигини тушунади. Нағсини залил, ҳақир кўрган Оллоҳнинг улуғ ва азизлигига асло шак келтирмайди. Хуллас, нағсида убудият (қуллик)нинг маънисини мушоҳада этган Оллоҳда рубибият (раблик, яратувчанлик)ни идрок қиласи.

Ҳадиснинг иккинчи шарҳи эса мана бундай: Оллоҳ инсонни ўз сувратида яратиб, уни ер юзида халифа қилган. Суратни таниган сурат соҳибини ҳам танийди. Инсондаги барча ёмонликларнинг икки манбаи бор: бири – шаҳват, иккинчиси – ҳою ҳавас. Шаҳват вужуднинг барча аъзоларида ҳаракатланадиган ва тўхтовсиз равишда мақсадга етишни истайдиган бир завқ қуввати. Шу йўлда туйғулар унга ёрдам беради. Меъданинг шаҳвати – еб-ичиш, кўз шаҳвати – кўриш, қулоқники эшитиш, бурунники ҳидлаш, тил шаҳвати – сўзлаш, ақлники эса росту ёлғон фикрлашдир. Мана шуларнинг барини билиш ва ҳақиқатига етиш, наинки нағс, балки охир-оқибатда Раббини танишга хизмат қиласи.

Тасаввүфий мушоҳада эса, аввало, нағсийдир. У олдин нағсни, кейин вужудни тозалашни ўргатади. Агар инсон тўла маънода нағсни танимаса, унинг ҳийла ва тузоқларидан воқиф бўлмаса, руҳ ҳамда руҳоний ҳаёт ҳақида ҳам тўғри тасаввурга соҳиб бўлолмайди.

Тасаввүфга доир айрим асарларда қайд қилинишича, руҳ вужуддан, яъни ҳазрати Одам а.с.дан 4000 йил мукаддам яратилган экан. Бу сананинг тахминлиги ўз-ўзидан кўриниб турибди. Сўфий ва мутасаввиғлар руҳнинг ҳақиқати ҳамда хусусияти тўғрисида ҳам ҳар турли фикр-мулоҳазаларни илгари суришган. Абу Наср Сарроғи Тусийнинг маълумоти бўйича улардан бир гурух “Руҳ Оллоҳнинг нуридан бир нурдир”, – дея руҳни зоти илохиянинг нури хисоблаб адашишган, бошқа бировлар эса “Руҳ ҳаёти

илоҳиядан бир ҳаёт эрур”, – деб хато қилишган. Шунингдек, авомнинг руҳи маҳлук (яратилиш), хавосники маҳлук эмас”, “Руҳлар қадимдир: ўлмас, азоб чекмас ва қаримас”, “Руҳ руҳонийдир, малакутдан яратилиши, соғлиқка эришгач, яна тақрор малакутга қайтади”, – дегувчилар ҳам бўлганки, буларнинг ҳар бири адашиб, хатога йўл қўйишган. Лекин кимки Куръони каримдаги мана бу сўзларга таянган бўлса, ўзини ғалат фикр ва нотўғри тасаввурдан муҳофаза этган: “Эй Муҳаммад, сендан руҳнинг ҳақиқати ва қайфияти ҳақида сўрайдилар. Сен уларга жавоб бергилки, “Руҳ Парвардигорнинг маҳлуклари (яратиклари)дан бир маҳлук (яратик) дир. Унинг ҳақиқатини Худодан бошқа зот билмайди”. (Йсро: 85-оят). Ана шу илоҳий ҳукмга кўра бу мавзудаги тўғри тушунча шундай: Руҳларнинг ҳаммаси ҳам маҳлук (яратилиш)дир. Амри илоҳийдан бир амр эрур. Оллоҳ билан руҳ орасида, руҳнинг Унинг мулкидан, Унинг амри ва каровида бўлишдан бошқа сабаб ила ёки нисбатда алоқаси йўқдир. Руҳ таносих этмайди, бир жасаддан чиқиб бошқасига кирмайди, вужуд ўлим азобини тортгани каби руҳ ҳам азоб чекади. Хуллас, Одам а.с.нинг аносирни арбаб – тўрт унсурдан бино этилган жасадига Оллоҳ малакутдан яралган руҳни киритган: “Эй Муҳаммад (с.а.в), Парвардигорнинг малакларига: “Мен Одамни қора балчиқдан ҳалқ қилгувчиман. Вақтики, мен Одамни ҳалқ қилисан, унинг жасадига руҳни доҳил этсан, ҳаммаларингиз унга сажда қилиш учун йиқилинглар”, – деган вақтни фикр қил” (Хижр: 29-оят).

Нафсни сўғифилар вужуддаги латиф бир мавжудлик тарзида қабул қилганда, тасаввурларида нафснинг моддий томони устунлик қилган. Буни очиқ-ойдин эътироф этишмаган бўлишса ҳам, нафс деганда жисмоний бир нарсани хаёлга келтиришганини сезиш қийин эмас. Лекин руҳнинг гайримоддий, вужуддан мустақил ва айри, вужуд йўқолса ҳамки, латиф бир борлиқ ўлароқ унинг йўқолмаслиги хусусида ахли тасаввуф ўртасида ихтилоф бўлмаган. Бу эса тасаввуфа руҳ мавзууда жуда кенг ва изчил баҳс юритишга яқиндан ёрдам берган.

Тасаввуф таълимотининг ибтидоси руҳ ва нафс хусусиятларини аниклаш, ўртадаги алоқа, зиддият, ихтилофларни ойдинлаштириб, уларни кўпроқ рамзий-мажозий тарзда шарҳлашдан бошланган. Ахлоқий-маъруфий бу ҳаракат эса одам ўзлигини англаш нуқтаи назаридан ҳам, унинг фикрий ва ҳиссий оламининг адабиётдаги тасвиirlарини қалб нигоҳидан ўтказиш учун ҳам алоҳида аҳамият касб этган. Ўзбек мумтоз адабиётида биринчилардан бўлиб руҳ ва нафс мунозарасини ёритган Сулаймон Бокирғоний бундай дейди:

*Нафсим айтур, садр ёнида ўлтурибон,
Турлук-турлук неъматларни келтуруубон,
Ейиб-ичиб, туну кун қорин тўлдуруубон,
Ёстуқ узра тақя қилиб ётойин дер.*

*Руҳим айтур, туни куни қатланубон,
Ҳақ мавлом ризосини тилаюубон.
Қул Сулаймон ишиқ отига отланубон,
Ўзоқ-кечмиши эранларга етойин дер.*

Бундек қаралганда, ҳаяжон ва ҳиссиёт, туйғу ва эҳтирос Шарқ шеъриятида азим дарёдай мавжланиб окади. Бироқ бу шеърият деярли барча давр ва замонларда юксак маданият, теран илм ва маърифат заминида ил-

гарилаб борган. Чунки илм нури, маърифат завқи сингмаган шеър – авом ўқийдиган, энг ёмони омийликни муҳофаза қиласиган шеър. Бунақа шеърларда ҳам жанр, вазн, қоғия ва радиф – бадиий унсурлар бўлади. Бироқ уларнинг муаллифида мустакил маънавий-руҳий қиёфа бўлмаганидек, сўзларида бир ҳарорат таъсири сезилмайди. Авомлик, жўнлик түғёни ўқувчилар манфаатига заарарлигини ҳисобга олиб, Абдураҳмон Жомий мана нима деган:

*Шеър к-афтоҳ қабули хотири ом,
Хос донаҳди суст бошад хом.*

Мазмуни: авом бандаларга мақбул тушадиган шеърнинг бўш ва хом бўлишини баланд, табиати хассос, яъни хос кишилар, албатта, билмоғи жоиз.

Байтда таъкидланган гап айни пайтда икки тоифа – онг ва идроки паст, завқ ва мушоҳадаси юксак ўқувчи тўғрисида ўйлашга ҳам даъват этади. Зеро, адабиёт тараққиётини талантли, талабчан ўқувчисиз хаёлга келтириш ҳавоийлиқдан ўзга ҳеч нима эмас. Тўғри, оқилми ё жоҳил, дономи ёки нодон, бундан қатъий назар, ҳар бир кимсанинг шеър ўқиш, шеърни ўзича англаш ва баҳолашга ҳаққи бор. Бироқ ўз ахволи, фикр йўлини фаҳмлашдан йироқ зотлар шеърга кўл чўзиб, шеърдан баҳс юритишганда, ҳаттоки, улкан ижодкор ҳам оломон даражасига тортилади. Ўртамиёначилик, эстетик дид ва мезонларнинг бузилиши ана шу зайлда бадиий ижодда говлаб кетади. Гўё тасаввуфий ранг ва бўёқлар билан зийнатланган, аслида мутасаввифлик ишқи ва рух изтиробларидан маҳрум шеърлар шу фикрнинг иштибоҳсиз далилларидандир. Тасаввуфий шеър матнлари тадқики мавзуи бизда маҳсус ўрганилмаганлигидан шарҳ ва талқинчилиқда йўл кўйилган хатою чалғишлиар ҳам назардан четда қолиб кетмоқда.

Шайх Суҳравардийга кўра, “Тасаввуфнинг бошланғичи илм, ўртаси амал, охири мавҳиба. Мавҳиба Ҳақ ҳадяси бўлиб, Оллоҳ суюкли қулига баҳшида қиласиган қалб очиқлиги ва бойлигидир”.

Алишер Навоийнинг “Фавойид ул-кибар” девонидаги ғазаллардан бири:

*Гар фано расмин қилмоқ тилар эрсанг мазбут,
Нафс ила рухни зинҳорки қилма маҳлут, –*

матласи билан бошланади. Байтнинг асосий мазмуни бундай: фано расмравишини агар эгаллайман десанг, нафс билан рухни ҳеч қачон бир-бирига қўшма, яъни аралаштирма.

Нафс, рух, фано, бақо калималарининг маъно-мазмуни бизга гўё ёд бўлиб кетгандай. Уларнинг луғавий маъноси шундай дейишига асос ҳам бериши мумкин. Аммо истилоҳий, ирфоний мазмун ушбу калималарнинг ҳар бири устида алоҳида тўхталиш, муаллиф мақсадига яқинлаштирувчи тушунча, маълумот ва шарҳлардан хабардорликни талаб қиласи.

Рух ҳақиқий гўзаллик, нағислик, самовий завқ ва эркинлик тимсоли. “Рухнинг моҳиятини изоҳлаш, – дейди Имом Ғаззолий, унинг ўзига хос хусусиятларини англаш ғоят ҳайратланарли ва кўп гаройиб ишлардан баҳс юритиш демак. Рухнинг асосий сифатлари завқ, софлик, басират, ғафлатда қолмаслик, сироят қуввати, ашёдан туғиладиган ғам-аламни қабул қилмаслик”.

Маълумки, инсон ҳам илоҳий, ҳам башарий, ҳам мутлақ, ҳам муваққат бир мавжудлик. Унинг тўрт унсур – тупрок, сув, хаво ва оловдан яратилганлиги ҳисобга олинмагандა ҳам у ўзаро қарама-қарши икки кучдан таркиб топгандир. Шунинг учун башарий ҳис, майл, эҳтиёжлар гирдобига тушиб, рух ва руҳий ҳаёт билан чуқур қизиқилмаса, нафс ғалаёни ва исёнидан вужуддаги мусаффо фазилатлар ё мажрухланади ёки бутунлай барҳам топади. Сувратдан сийратга бориш, сийратга суюниб сувратни тасвирлаш бу – маърифат белгиси, яъни басират очиқлиги. Мана шундагина қуидаги сингари “маълумот”лар кўнгилга акс-садо уйғотади:

*Руҳ ул нурдурки, Ҳақ анга бермиши авж,
Нафс зулматга қолиб, қилмиши анга поя ҳубут.*

Бундан олдинги байтда Навоий нафсни – нафс, руҳни эса руҳ деб билгил, деган бир кўрсатма берганди. Уша кўрсатмага қайтиб, нафс ила руҳни ажратувчи хусусиятлар яна ҳам аниқлаштирилмаса, ўқиган байтимиз калитсиз қулғфа ўхшаб тураверади.

Нафс турли луғатларда руҳ, жон, жасад, қон; бирор бир нарсанинг асли, жавҳари, ўзлиги каби маъноларда шарҳланган. Бу сўз ёлғиз Шарқдамас, Фарбда ҳам алоҳида қизиқиши пайдо этган. Тасаввуф психологиясини тадқиқ қилган профессор Роберт Фрагер ёзади: “Тасаввуф психологиясидағи энг фаол қўлланилган терминлардан бири нафс, яъни менликдир. Бу термин баъзан “эго” ёки “руҳ” деб ҳам таржима қилинган. Нафснинг бошқа маънолари орасида “уз” ва “нафас” ҳам ўрин олган. Сўфий ижодкорларнинг қўпчилик қисми нафс сўзидан ёмон хулқлар ва тубанликларни ифодалашда фойдаланишган...”.

Назаримизда, ғарблик тадқиқотчининг қуидаги мулоҳазаси янада қизиқарли: “Нафснинг илдизи ҳам баданда, ҳам руҳда ўрнашганлиги туфайли у моддий ва маънавий хусусиятларга соҳибдир. Бошланғичда унда моддиёт ҳокимлик қиласа... Оллоҳга яқинлашиб, табиат ўзгаргач, унинг дунёга боғланиши бутунлай сусайиб кетади”. Бу янги гап эмас, балки эски сўфий ва мутасаввиф алломалар айтган ҳақиқатнинг бир ифодаси. Ғарб олимлари аллақачон анча теран ўзлаштирган ишқ ва ирфон сирларидан бехабарлика кўникишимиз афсусланарли, албатта.

Нафснинг зулматга чулғаниши нимани билдиради? Буни фақат нафсини таниган, нафсга қарши курашиш “тажриба”сидан хабардор, маломат ҳолига соҳиб кишиларгина билади. Лекин тилда нафсни айлаш ва таҳқирлаш билан ҳеч қандай ёмонлик ёки нуқсон барҳам топмайди.

“Нафсни севиш энг муҳташам бутдир. Ўзга бутлар унинг воситасида пайдо бўлади ва қолган барчасини угина яксон айлай олади”, – дейди Азизиддин Насафий. Демак, донишманд шоир Мухаммад Ризо Оғаҳий:

*Руҳимни ҳамишина нафсга ғолиб эт,
Нафсимни ҳамишина айла мағлуб менга,*

деганида маънавий бутунликнинг ўзак нуқтасига дикқатни қаратган. Навоийнинг “Руҳ ул нурдурки, Ҳақ анга бермиши авж”, дейиши руҳнинг нурдан яралганига ишорадир. Бандаси шу нурга ошуфталик ва ғамхўрликни қанча оширса, Ҳақ унга ўшанча куч ва илҳом беради. Нафсда эса ҳаммаси нисбатан бошқача: у буқаламунлик сифатига эга. Ҳар он, ҳар лаҳзада ўзга тусга кириши, исталган бир пайтда ишни бу-

зид, соҳибини хаёлга келмас шумликларга йўллаши ҳеч гапмас. Чунки тасаввуфшуносликда таъкидланганидек, “Нафснинг барча хулқ ва сифатлари икки нарсадан туғилади: биринчиси, ҳафиғлик, яъни енгиллик, иккинчиси, очқўзлик ва эҳтирос. Енгиллик унинг жаҳолатидан, очқўзлик ҳирсидан юзага чиқади”. Хуллас, нафснинг зулматпарастлиги, бекўним ва қаноатсизлиги уни шайтонга айлантирган:

*Рӯҳ раҳмони эрур, нафс эрур шайтони,
Иkkисин бир-бирига қўшмоқ эмастур машрут.*

Шайтонийлик тарихи ҳам жуда узоқ бир тарих. Навоий шу тарихни эслатиб ёзди: “Одам билан шайтон мухолифотин унутма. Отангни биҳиштдек матьманидан (тинч, хотиржам жойидан) жало қилди (ажратди). Ва отанг авлодидин баъзи анга интиком туздилар ва хору забун қилиб жафолар кўргуздилар. Нафсни чун тақво риёзати била зеридаст қилдилар – Шайтонни залиллик (хорлаш) била ерга паст қилдилар”.

Модомики, нафсни зеридаст қилиш шайтонни енгish экан, инсонга унинг таъсир ўтказиши қандай аниқланади? Бир неча олимларнинг фикри бўйича, ўша таъсир нафс ва рухнинг ҳаракатидан ҳосил бўлади. Чунончи: нафс ҳаракат бошлиши ҳамон, унинг жавҳаридан бир қоронғилик қалқиб чиқади ва қалбдан ёмонликка бошловчи бир йўл ахтаради. Худди ана шу пайтда шайтон қалбни мўлжалга олиб фаолиятга киришади. Рӯҳ ҳаракатидан эса унинг сифатига мувофиқ бир нур таралиб, ундан олий маъно, ноёб хислатлар туғилар экан. Рухнинг раҳмонийлигига сабаб шу.

Ростини айтганда, инсондаги барча адашиш, катта-кичик фожеаларнинг тамали рӯҳ билан нафсни бир-биридан ажратишни билмаслика. Акс холда, Бобур Мирзо нафсни ич-ичдан танишга ташвиқ айловчи мана бу сўзларни битиб қолдирмасди:

*Нафснинг касби дур ҳавоу ҳавас,
Рӯҳ олидадур булар ярамас.*

*Нафс душман дурур яқин билгил,
Дўстум, бу сўзумни чин билгил.*

*Душманедур агарчи ўтру эмас,
Лек бир лаҳза сендин айру эмас.*

*Гарчи зоҳирда тўғридиндур нафс,
Жамъинг ўйида ўғридиндур нафс...*

Бадан ҳисни, нафс ҳавову ҳавасни нечоғлик севса, рӯҳ ақл ва ирфонни улардан ҳам ортикроқ яхши кўради. Руҳдаги тўғрилик нафсда йўқ. У ваҳдат – бирликка эмас, касрат – кўплиқка толиб. Унинг ўғрига ўхшashi, зоҳирда тўғриликни ёқлаб, амалда эгрилик ва нифокқа куч сарфлаши мана шундан. Бобур нафснинг душманлигига ҳеч шубҳаланма, “Дўстум, бу сўзумни чин билгил”, – дейди. Ҳақиқатда шундайми? Нафсни ҳамишағаним деб билиш, уни тўхтовсиз маломат қилиш керакми?

“Нафс ва рӯҳ орасида, – деб ёзди Шайх Суҳравардий, – азалдан бир севги бўлган. Бунинг сабаби нафснинг аёллиги (унусат), рухнинг эркакли-

ги (зукурат)дир. Модда оламида Момо Ҳаво Одам Атодан яратилганидек, қудрат оламида нафс ҳам руҳдан яралган эди. Нафс ва рух ўртасидаги унсият ва улфатлашувнинг асоси мана шудир. Чунончи: нафс ҳайвоний бир руҳдирки, руҳоний руҳга яқинлашув шарофати туфайли унинг жинсиятини эгаллаган”. Бундай унсият ва эврилиш камдан-кам одамга насиб айлаган. Навоий айтган мана бу фикр ҳам буни тасдиқлади:

*Руҳга шева Калимулло ишин қўлмоқ фоши,
Нафс фиръавилик асбобини айлаб марбут.*

Бу мулоҳазалар нафсни янада чуқурроқ билиш, нафсга тегишли маълумот ва хукмларни яна ҳам теран ўзлаштириш истагини кучайтиради. Тасаввуф руҳшунослигида белгиланишича, инсонда етти турли рух (нафс мартабалари ҳам еттита) мавжуд. Булар: 1. Маданий рух. 2. Наботий рух. 3. Ҳайвоний рух. 4. Нафсоний рух. 5. Инсоний рух. 6. Сирли рух. 7. Энг сирли рух.

Ушбу руҳларнинг бош хусусияти, сифати, вужудга таъсири, асосий фаолияти кабилар борасида маълум бир тасаввур ҳосил қилмай одамнинг илоҳий ишқ мақомига қандай ноил бўлишидан сўзлаб бўлмайди. Ўзича рух илми билан қизиққан киши эса онг, ақл, кўнгул ва руҳни пайғамбар севгиси қандай мунаvvар айлашини осон тушунади:

*Руҳга дааъб Ҳабибулло иши ойини,
Нафс Бужаҳиллик асбобин айлаб мабсуд.*

Махобатли, кўркам бино қуриш учун, албатта, кенг ва катта майдон керак. Ўзини англаган бутун шахсни камол топтириш учун ҳам кенглик зарур. Бу кенглик, энг аввало, рух ва руҳдадир. Шунинг учун мумтоз шоирлар комиллик тушунчасини ёритища руҳга, руҳнинг нафс билан муносабати ва зиддиятларига кенг ўрин ажратишган. Ўтмишда яшаб, ижод этган улкан санъаткорларнинг шеърияти, таъбир жоиз бўлса, рух ва руҳоният заминидан ўсиб чиқкан шеърият. Очиги, бундай шеъриятнинг гўзаллик сир-асори ва туб моҳиятини биз кам биламиз. Чунки рух нафасини ҳис қилиш, рух оҳангি, ранги, шавқи ва мусаффолиги билан яшашдан анча йироклашганимиз. Навоий “Лисон ут-тайр” достонида Ҳудҳуд тилидан кимки эр, яъни мард ва матонатли бўлса, нафсониятни енгид ўз зоти – моҳиятида руҳониятни ғолиб айлайдики, шунда у чинакам поклик шарафига етишади дейди:

*Улдор эрким салб этиб нафсоният,
Ғолиб этгай зотига руҳоният.
Ҳар кишида бу шараф бizzот эрур,
Ул киши поку шариф авқот эрур.*

Руҳониятнинг нафсоният устидан ғалаба қилиши комиллик йўлининг ниҳоясидир. Бунга эришмоқ учун икки куч – рух ва нафс орасидаги муросасиз курашнинг сабаб ва эҳтиёжларини мушоҳада қилиш зарур. Руҳнинг камоли ва шахсиятнинг бутунлашувига шундан сўнг бир умид билан қураш мумкин бўлади. Мумтоз шеъриятимиз меҳваридаги масала ҳам мана шу эди.

Улугбек ДОЛИМОВ

ЖАҲОНГАШТА ИЖОДКОР

Исҳоқхон тўра Ибрат фаолият доираси кенг шоир ва олим, ношир ва педагог, сайёҳ ва миллӣ уйғониш даврининг машҳур ислоҳотчиси сифатида бутун умрини Ватан ва миллат манфаатига бағишилади. Шу боис унинг бой маданий мероси наинки мамлакатимизда, ҳатто яқин ва узоқ хорижда ҳам ўрганилмоқда. “Мезон уз-замон” маърифий асарининг япон ва ўзбек профессорлари Хисао Коматцу ва Бахтиёр Бобоҷоновлар томонидан ҳамкорликда Тошкент ва Токиода нашр этилиши¹, ушбу фикрни тасдиқлайди. Шоирнинг асли исми Исҳоқхон бўлиб, Ибрат унинг адабий таҳаллусидир. Исҳоқхон 1862 йили Намангандаги Тўракўргон қишлоғида туғилди. Унинг отаси Жунайдуллоҳўжа Суннатуллоҳўжа ўғли машҳур мутасаввиф Аҳмад Яссавий авлодидан бўлиб, анча билимли соҳибкор боғбонлардан эди. Унинг беш танобча ери бўлиб, дехкончилик, боғдорчилик билан оила тебратган. Ибрат Аҳмад Яссавий (султонул орифин) авлодига мансублигини ёзиб ҳам қолдирган:

*Ибрат таҳаллусимдур, аҳфоди Ҳазрати Султон,
Шуҳратда – Ҳожи тўра, маъвоси – Тўракўргон².*

Онаси Ҳурибиби ўз даврининг ўқимишли, оқила аёлларидан бўлган, у уйида қишлоқ қизларини ўқитарди, шу билан бирга, адабиёт ва санъатга муҳабbat кўйган, шеърият билан ҳам шуғулланган. Оиладаги бундай ҳаёт тарзи ёш Исҳоқхонда адабиёт ва санъатга муҳабbatнинг анча эрта пайдо бўлиши учун асосий омил бўлди. 1870 йилда отаси Жунайдуллоҳўжа вафот этади. Исҳоқхон дастлаб маҳалла мактабида таҳсил кўради, аммо беш йил давомида ҳам саводини чиқара олмагач, ўз уйида онасининг қўлида ўқиди. Шунинг учун ҳам Исҳоқхон асарларида онасини устози сифатида хурмат билан тилга олади. Адабиёт ва санъатга зўр муҳабbat кўйган Исҳоқхонни ўқиши давом эттириш учун 1878 йилда Кўқонга юборадилар ва у Муҳаммад Сиддиқ Тунқатор мадрасасига ўқишига киради. Унинг Кўқонда таҳсил кўрган йиллари ўзбек адабиётида, маданий ҳаётида, айниқса, маорифида туб сифат ўзгаришлар содир бўла бошлаган даврга тўғри келди. У Кўқон адабий муҳитининг Муҳий, Муқимий, Фурқат, Завқий, Нодим, Ғурбат каби йирик намояндалари билан яқин алоқада бўлган, мушоира ва мунозараларда иштирок этган. Исҳоқхон Ибрат мадраса берадиган илмлар билангина чекланиб қолмади, ўқиш давомида буюк Шарқ олимлари асарларини мустақил қунт билан мутолаа қилди, араб, форс ва рус тилларини чуқур ўрганди.

Исҳоқхон Ибрат 1886 йилда Кўқон мадрасасини тутатиб, ўз қишлоғи Тўракўргонга қайтади ва фаолиятини илғор маорифчи сифатида қишлоқда

¹ Улугбек Долимов – педагогика фанлари доктори.

² Исҳоқхон тўра ибн Жунайдуллоҳ хўжас. Мезон уз-замон. – Тошкент – Токио, 2001.

² Исҳоқхон Ибрат. Илми Ибрат. – Тўракўргон, 1909 й., 4-бет.

маърифат тарқатиш билан бошлайди: ўша йили мактаб очади. Унинг мактаби ҳижо методига асосланган “усули қадим” мактабларидан анча фарқ қилар эди. Исҳоқхон Қўқонда ўқиб юрган вақтларидаёқ ўлкада рус ва маҳаллий миллат болалари учун очила бошлаган рус-тузем мактабларидаги ўқитиш усулларининг маҳаллий мактабларда хукм суроётган ҳижо ҳамда қуруқ ёдлаш усулидан афзалигини сезган эди. Исҳоқхон ўз мактабига нисбатан илғор бўлган, саводга ўргатишда анча енгиллик вужудга келтирувчи товуш (савтия) усулини татбиқ қилди ва “усули савтия тадрижия”ни “усули қадимия” тарафдорларидан ҳимоя қилди. Бироқ бу мактабида узоқ вақт ишлай олмади. Баъзи бир жоҳил мутаассиблар унинг мактабини “коғирлар мактаби” деб эълон қилдилар, ҳалқ болаларини бу мактабдан қайтаришга ҳаракат қилдилар ва генерал-губернаторлик амалдорлари ёрдамида ёттиридилар. Бу ёш маорифчи Исҳоқхон Йибратнинг мутаассиблар ва мустамлакачи маъмурлар билан биринчи тўқнашуви эди.

Исҳоқхон Йибрат ўзининг “Луғати сittat ал-сина” (“Олти тилли луғат”), “Тарихи Фарғона” асрларида ёзишича, 1887 йилда онасини ҳажга олиб боради. У 1887–1888 йилларда онаси билан бирга Истанбул шахрида истиқомат қиласди.

Исҳоқхон Йибрат онасини Жидда шахрида дағн этиб, ҳаж амалларини бажаргач, Шарқ мамлакатлари бўйлаб саёҳатини давом эттириди, шу билан бирга, у Истанбул, София, Афина, Рим, Париж каби Европанинг марказий шаҳарларида бўлди. Анча вақт Арабистоннинг Жидда шахрида истиқомат қиласди. Макка шахридан Қизил ва Арабистон денгизлари орқали Хинди斯顿га келди. 1892–1896 йилларда Хинди斯顿нинг энг катта порт шаҳарлари Бомбей ва кейинроқ Калькуттада яшади. Бу ерда у ҳалқлар ўртасида кўп ишлатиладиган тўрт тилини: араб, форс, ҳинд-урду ва инглиз тилларини мукаммал ўрганди, шарқ мамлакатларидағи европаликлар орқали кириб келган Европа маданияти, тили ва санъати билан яқиндан танишди, ўрганди, илмий асрлари учун қимматли маълумотлар тўплади. Йибрат Арабистонда француз тилини, Хинди斯顿да инглиз тилини, шу билан бирга, энг қадими финикия, яхудий, сурия, юнон ёзувларини ўрганди. Йибратнинг Шарқ ва Ғарб ҳалқлари тилларини анча мукаммал билганилигини эътироф этиб, Иброҳим Даврон шундай ёзади: “...Фозили инсониядин маода қози тўра (Исҳоқхон – У.Д.) жаноблари туркча, форсча, ҳиндча, русча лисон билиб, яна русча, французча, арманича ва бошқа хатлар ёзмоққа моҳирдурлар”¹.

Исҳоқхон Йибрат чет элларда олим ва фозил кишилар билан, улар қайси дин ёки миллатга мансуб бўлишидан қатъи назар, яқин алоқада бўлди. “Ҳар бир лисон сафар аҳлина юз олтун баробаринда” ишлатилганлигини тушунган ва кўрган маърифатпарвар чет тилларини ўрганишга катта эътибор берди. Исҳоқхон тўра Йибрат 1896 йилда Хинди斯顿дан Бирма орқали Хитойга, сўнгра Кошғарга ўтди ва ундан ўз ватанига қайтиб келди.

Тил – дил қалити

Қарийб ўн йил давом этган саёҳат унинг янгича таълим-тарбия тизимиға бўлган муносабатини мустаҳкамлади, янги куч-гайрат ва эътиқод билан маърифатпарварлик фаолиятини йўлга кўйди. Саёҳат давомида йиққан катта материаллари асосида олти – арабча, форсча, ҳиндча, туркча, ўзбекча, русча тилларни ўз ичига олган “Луғати сittat ал-сина” (“Олти

¹ “Туркистон вилоятининг газети”, 1908 й., 56-сон.

тилли луғат”¹) асарини яратди. XIX аср охирлариға келиб, маҳаллий мутаассиблар ва губернаторлик маъмурларининг қаршилигига қарамай, рус тилини ўрганишга қизиқувчилар сезиларли даражада ортиб борди. Аммо ўқувчилар ва рус тилини мустақил ўрганувчилар учун дарслик ва қўлланмалар йўқ даражада эди. Бу ҳақда “Туркестанские ведомости” газетасида Тошкент китоб дўкони хўжайнларидан бири қуидагиларни маълум қиласди: “Шу кунларда шаҳарликлар ўргасида рус тилига қизиқувчилар сони ортиб бормоқда. Тошкент китоб дўкони хўжайнларидан бири “сартлар тинчлик бермаяпти, русча ўрганиш учун сарт тилида ёзилган бирор дарслик борми?” деб сўраб келишавериб жонга тегди. Шуни алоҳида таъкидлаш керакки, ерли ўтрок ахолининг тил ўрганишга қобилияти кучли”².

Рус тили билан бир қаторда ўнга яқин Шарқ ва Farb тилларини анча муқаммал билган Исҳоқхон бу масалада ўз халқига ёрдам қўлини чўзди. Мутафаккир мазкур асарни яратар экан, биринчи галда, рус тилига қизиқувчи ўзбекларни кўзда тутди. Бу ҳол китобнинг биринчи бетиданоқ кўзга ташланади. Муаллиф кирилл ёзувини билмайдиган ўзбекларга қулай бўлиши учун рус сўзларини ҳам араб ёзуви билан беради. Маълумки, рус ва Европа сўзларини араб ёзувида ифодалаш анча мураккаб иш, лекин Ибрат бу ишни муваффақиятли ҳал қилди. Олимнинг ушбу асари XIX аср 90-йилларининг ўрталарида, унинг чет эл сафаридан қайтиб келиши биланоқ ёзib тугатилган бўлса-да, губернаторлик маъмурлар томонидан маҳаллий муаллифлар асарларига қарши ўрнатилган қаттиқ назорат, таъкиб туфайли асар анча кечикиб, 1901 йилда босмадан чиқди. Буни ўша даврда чор Русиясининг мустамлака Туркистондаги матбуот нозири (цензори) вазифасини бажарувчи Николай Остроумов шахсий архивида сақланувчи хужжатлар ҳам тасдиклайди. Архивда Исҳоқхоннинг Н.Остроумов номига ёзилган иккита мактуби сақланади. Биринчи мактуб 1898 йилнинг бошида ёзилган бўлиб, унда Ибрат Остроумовга луғатни босмадан чиқаришга ёрдам беришини илтимос қилиб мурожаат этади ва унинг таклифига мувофиқ китобнинг икки жузъини юборади. Лекин узоқ вақт асарни нашр қилиш ёки қилмаслик ҳакида ҳеч қандай жавоб ололмайди. Ибрат 1900 йилнинг 26 февралида иккинчи марта рус ва ўзбек тилларида мурожаат қилишга мажбур бўлади. Мазкур асарни нашр қилишда катта ахамиятга эга бўлган мактуб ушбутир: “1900-инчи йил 26 февралда хурматлу Остроумов тўра ҳузурларига саволнома... Сиз улуғ мартабадан ўтунуб сўрайманки, 1898 йилда сиздан илтимос қилиб эдим, ўз таснифларимдан олти тил узра “Ситта ал-сина” деган словар китобни босма қилмоқ учун. Марҳамат қилиб икки жузъ юборинг, кўрмоқ учун деган экансиз. Дарров амрларига мувофиқ юбориб эдим. Мазкурни(нг) ҳеч хабари бўлмаган жиҳатидан боз илтимос қилиб турубманки, агар нозирлар назоратидан ўтган бўлса, мен қолган ўн жузъини ҳам юборсан ва ёки қабул бўлмаган бўлса, ўшал нусхани марҳамат илан Намангон маҳкамасига, менинг исмимга адрес этуб юборсалар, боз бўлак маслаҳат қилсан деб, илтимос қилувчи Исҳоқхон тўрадурман”².

Исҳоқхон Ибратнинг мазкур “Луғати сittta ал-сина” асари бир неча йиллик саргузаштлардан сўнг 1901 йил охирида Тошкентдаги В.И.Ильин босмахонасида нашрдан чиқди. Маълумки, Исҳоқхонга қадар ўзбекча-русча, русча-ўзбекча луғатлар яратилган. Масалан, эр хотин Владимир Наливкин ва Мария Наливкиналарнинг “Русско-сартовский словарь”,

¹ “Туркестанские ведомости”, 1900, № 98.

² Ўзбекистон Республикаси Давлат архиви. 1009-фонд, 15-дело.

“Сартовско-русский словарь” луғатлари шулар жумласидандир. Бироқ бу китоблар кирилл графикасида яратилган бўлиб, ўзбек тилини ўрганувчи руслар учун мўлжаллангани туфайли ўзбеклар эҳтиёжини қондира олмади. Исҳоқхоннинг мазкур луғатни араб алифбосида яратишига ҳам худди шу масала туртки бўлди ва мана шу муҳим, ниҳоятда мураккаб масалага ўзбек маърифатпарварлари, педагоглари орасида биринчи бўлиб қўл урди ва замондошларининг талабини қондирисига муваффақ бўлди.

Исҳоқхон Ибрат мазкур луғатни яратиш учун анча вақт илмий фаолият олиб борди, чет элларда катта материал тўплади. Икки мингга яқин фаол сўзларни ўз ичига олган ушбу луғат ўз даврида катта аҳамият касб этган. “Луғати сittat ал-сина” асари рус тили асосий ўқув предметларидан бири сифатида ўқитишига рухсат олинган жадид мактабларида ҳам фойдаланилган. Шунинг учун ҳам китобга маҳсус тақриз ёзган замондошларидан бирининг “...Бизнинг Туркистон вилоятида сартиялардан шунча тил билиб, бул тариқа китоб ва луғат тасниф қилган одам йўқ эди”, – деган сўзлари заминида катта ҳақиқат ётар эди.

Исҳоқхон Ибрат тилшунослик соҳасида ҳам анча мукаммал “Жомеъул хутут” (“Ёзувлар мажмуаси”) номли асар яратди. Муаллиф ўзининг мазкур илмий асарида жаҳон ёзувларининг энг ибтидоийси – пиктографик (лотинча *pictus* – расм ва грекча *grapho* – ёзаман) ёзувлардан, то шу кунги энг мукаммал ёзувларгача босиб ўтган тараққиёт тарихини ёритиб беришга ҳаракат қиласди. Исҳоқхоннинг мазкур “Жомеъул хутут” асари 132 бетдан иборат бўлиб, 1330 хижрий–1912 милодий йилида ўзининг “Матбааи Исҳоқия” бомсаҳонасида чоп этилган. Исҳоқхон Ибратнинг тилшунослик фани соҳасида чуқур билимга эга эканлиги мазкур асарида намоён бўди. Асарда пиктографик ёзувлардан кейин вужудга келган финикия, яхудий, суря, араб, юон, форс, хитой, славян, санскрит, ҳинд, арман, лотин, грузин, уйғур ва бошқа қирқдан ортиқ жаҳон ёзувлари, уларнинг келиб чиқиши, тараққиёти ҳақида маълумот берилади, бу ёзувлардан, алфавитлардан намуналар кетирилган.

У Фарғона водийсидаги эски ёзув намуналарини, масжид ва мадрасалар пештоқларига, қабр тошларига, қадимги тангаларга, эски китобларга, тоғ-тошларга ўйиб битилган ёзувлардан намуналар тўплади. Араб мамлакатларида энг қадимий ҳалқ – финикия ҳалқи ёзув маданиятини ўрганди, бу битикларни тўғри ўқишига ҳаракат қиласди. Исҳоқхон эрамиздан 2000 йил илгари финикия ҳалқлари томонидан вужудга келтирилган ёзув ёдгорликларини Кипр оролидаги ғорлардан топди ва улардан ўз асарида намуналар келтириди. Исҳоқхон ёзувлар тарихини ўрганар экан, товуш-ҳарф ёзув тизими биринчи марта финикия ҳалқлари томонидан яратилган ва бошқа қўшни ҳалқлар: яхудий, суря, араб ёзувлари финикия ёзувлари асосида вужудга келган, деган тўғри илмий хulosага келади: “Иброний (Яхудий) эски хат экан. Зикримизга далилимиз – финикия хатидан олинган экан. Финикилар эски тараққий ҳалқ бўлиб, ҳамма хат илми тараққийни финикия ҳалқидан олган.”

Исҳоқхон Ибратнинг ёзувлар келиб чиқиши ҳақидаги мазкур илмий хulosаларини ёзувлар тарихи соҳасида маҳсус илмий иш олиб борган В.А.Истриннинг “Биринчи ҳарф-тovуш ёзув тизимининг вужудга келиши финикиялклар зиммасига тушди. Улар томонидан яратилган ҳарф-тovуш ёзувининг ўқиши, ўқитиши ва фойдаланишига анча содда бўлгани туфайли дастлаб финикиялкларнинг қўшниларига тарқалди, кейинроқ эса ҳамма

¹ “Туркистон вилоятининг газети”, 1901 й., 4 август.

ҳарф-товуш ёзув тизимларининг вужудга келишига асос бўлди”¹ деган фикрлари билан солишириар эканмиз, ундан 50–60 йил аввал илгари сурган Ибратнинг фикрлари нақадар тўғри эканлигига, у ўз замонаси илми тараққиёти даражасидан анча юқорида турганлигига яна бир бор ишонч ҳосил қиласиз.

Исҳоқхон Ибрат маориф ва маданиятимиз тараққиёти тарихида ҳусниҳатни мукаммал эгаллаган хаттот сифатида ҳам катта шуҳрат қозонди. Бу ҳол унинг “Санъати Ибрат, қалами Мирражаб Бандий”, “Жомеъул ҳуҷут” асарларида яққол кўзга ташланади. Иброҳим Даврон хабар беришича, Исҳоқхон зўр хаттот, ҳусниҳатни мукаммал эгаллаган каллиграфдир. У бу соҳада яратган “Шоёни бир санъати (асари) учун 1907 нчи йилда катта мукофотга сазовор бўлган. У (Исҳоқхон Ибрат) ҳам хаттоти аъзамдур. Чунки мусулмонча хат ёзмоқдин ўн етти навъ ёзув бирла қалам юргузурлар. Бу осори қаламия ва ақлиясидин намунаи зоти, демакки, шоён бир санъати ўтган йили – 1907 нчи йилда Туркистон генерол-губирнатотрига тақдим қилиниб, шоисталиғига иккинчи даражали почётной халат (фаҳрли чопон) олган эдилар”².

Ўрга Осиёда ҳусниҳат ва хаттотлик тарихи масалалари билан маҳсус шуғулланган олим Абдуқодир Муродов Исҳоқхоннинг мазкур “Жомеъул ҳуҷут” асарини дунё ёзувлари тарихини ўрганишда нодир манба сифатида баҳолайди. Дарҳақиқат, Исҳоқхон Ибрат асарни яратиш жараёнида араб ёзувининг буюк назариётчиси Мир Али Табризий, XV аср Ҳирот ҳусниҳат мактабининг асосчиси, “хаттотлар султони” Султон Али Машҳадий асарларини чуқур ўрганди.

Исҳоқхон тўра тарихшунос сифатида “Тарихи Фарғона”, “Тарихи маданият”, “Мезон уз-замон” сингари илмий асарлар яратди. Олим бу асарларни яратишда рус ва Европа шарқшуносларининг асарларидан баҳраманд бўлди, баъзилари билан ҳамкорлик қилди. Фарб тилларини ҳам анча мукаммал билган олим “Тарихи Фарғона” асарини яратишда атоқли шарқшунос олимлар В.В.Радлов, В.В.Бартольд, В.П.Наливкин, туркшунос, этнограф, сайёҳ Херман Вамбери асарларидан фойдаланди, уларга ўз муносабатини билдириди. Айниқса, Владимир Наливкиннинг “Краткая история Кокандского ханства” (Қозон, 1886) асаридаги фактик хато ва камчиликларни кўрсатиб ўтди. Дарҳақиқат, унинг ниҳоятда бой кутубхонасида уларнинг ўнлаб асарлари, ҳатто “Ислом энциклопедияси”нинг кўпгина жилдлари, дунё олимлари эътиборини қозонган Вамберининг “Путешествия по Средний Азии” каби асарлари бўлган. XX аср биринчи чораги ўзбек публицисти ва шоири Лутфулла Олимий маълумотларига қараганда, “Қутадғу билиг”нинг дунёга маълум уч нусхасидан бири – Наманганд нусхаси ҳам Исҳоқхон Ибрат кутубхонасига мансуб бўлган.

Исҳоқхон Ибрат ўз ҳалқининг порлоқ келажагига, озод ва фаровон истиқболига зўр умид ва ишонч билан қаради. У Ватанининг, келажакда илм-фан, маданияти ривожланган шаҳарларининг қиёфасини романтик бўёқларда ишонч билан тасвирлайди: “Маданий шаҳарлар шундай бўлурки, анда дорилмуаллимин мадрасалар ва анвойи фунун мактаблар (олий ўқув юртлари – У.Д.), ҳар хил илм ва ҳунарлар, катта дўхтирлар, табиблар ва мазлумни золимдан ҳимоя қиласурган ҳокимлар ўз шаҳарларида бўлур... Ҳар куни юруб турадиган фойизлар, чироқ, шамол сандал (вентилятор ёки холодильник – У.Д.) бўлса, катта мактаблар бўлса, теле-

¹ Истрин В.А. Возникновение и развитие письма. Стр. 274.

² “Туркистон вилоятининг газети”, 1908 й., 56-сон.

фонограмлар бўлса, шаҳарлар озода, чангдан, бўйи баддан тоза бўлса, қайси илмни хоҳласа, ани таълим берадурган муаллимлар бўлса, аҳли илмларнинг қадри яхши бўлса, нодонларни ўз ҳолига қўймаса, фикр ва илм ва ҳунар ўргатса...”¹.

Эътибор беринг, Исҳоқхон Ибрат таълим-тарбиянинг умумий комплекси хақида гапиряпти: ибтидоий мактаблар ҳам, касб-хунар мактаблари ҳам, ҳатто олий ўкув юртлари ҳам муаллиф дикқат марказида. XX аср бошлари жадид зиёлиларининг, шу жумладан, Исҳоқхон Ибратнинг буюк орзузи миллат фарзандлари учун университет очиш эди.

Исҳоқхон тўра Ибрат 1898 йилдан эътиборан Тўракўргон туман ҳалқ қозиси лавозимида ишлаб келган. Бу анча масъулиятли лавозим унинг илғор фикрларни ҳалқ ўртасида кенгроқ ёйишида анча ёрдам берган, ҳамма вақт ҳам мутаассиблар унинг маърифатпарварлик, маорифпарварлик фаолиятига қарши очиқ чиқишига журъат қила олган эмаслар. Шунинг учун ҳам 1906 йилдаёқ “Мактаби Исҳоқия”га рус тилини ўкув предмети сифатида киритган, рус ва немис тилларини мукаммал билувчи татар маорифчиси Ҳусайн Макаевни рус ва немис тиллари ўқитувчиси этиб тайинлаган. Исҳоқхон Ибрат бошқа усули жадид мактабларида ҳам шундай йўл тутишга даъват этган, у ўз мактабида ҳафталик дарс жадвалини ишлаб чиқкан: ҳар 40 дақиқада қўнғироқ чалинган ва 10 дақиқалик танаффус жорий қилган. Туркистон ўлкасидаги бошқа усули жадид мактабларидан фарқли равишда дарс жадвалига ўқитиладиган китоб-дарслерлар номи эмас, ўкув предметларининг номлари кўрсатилган, ҳатто дарс жадвалига бадантарбия предмети ҳам киритилган. Бу дарс кўп ҳоларда “Исҳоқия боғи”да маҳсус ҳаракатли ўйинлар тарзида ўтказилган. 1912 йилдан эътиборан худди шу мактабда алоҳида қизлар гуруҳини ташкил қилган ва бу гурухга Ҳусайн Макаевнинг рафиқаси Фотиха Макаевани ўқитувчи этиб тайинлаган. Педагог Исҳоқхон Ибрат фикрича, мактаб-мадрасаларни ислоҳ қилиш билан баробар миллатни, унинг онгини, тафаккурини ислоҳ қилиш керак. Унинг “Ойна” журналида босилган бир мақоласи “Миллатни ким ислоҳ этар?” деб номланади. Унда муаллиф шариат-дин пешволари масжидларда амру маъруф ўтказиб, миллатни шариатга хилоф бидъатлардан воқиф қилсалар, “вазифалари таълиму ҳидояти ҳалқуллоҳ” бўлган уламолар Оллоҳ олдидағи вазифаларини адо этган бўйлур эдилар, деган фикрни баён қиласиди. Бу эса мактаблар ислоҳига, усули жадид мактабларига кенг йўл очар эди. Бу “ислом дини барча фанларнинг сарчашмасидир” ақидасига мос келар эди.

Исҳоқхон Ибрат 1908 йилда Москва, Петербург шаҳарларида бўлади, дикқатга сазовор жойлари билан танишади. Эрмитажда сақланаётган, Кауфман томонидан 1868 йилда Самарқанддан олиб кетилган “Мусҳафи Усмон”ни кўзига суртди, Русия олий ва ўрта ўкув юртлари тизими билан яқиндан танишди. Қайтишда Оренбург, Үфа шаҳарларида бўлади, туркий ҳалқларнинг улуғ мутафаккирлари, “Шўро” журналининг муҳаррири Ризоиддин Фахриддин, “Вақт” газетасининг муҳаррири Фотих Каримийлар билан “усули жадида” хусусида узоқ сұхбатлашди. У ердаги Гауфман деган матбаачидан пулини ўн йил мобайнида тўлаш шарти билан кредитга литографик машина сотиб олади ва уни жуда катта машаққатлар билан – Оренбургдан Кўқонга поездда, Кўқондан Тўракўргонга туяларда олиб келди. 1908 йилнинг декабрь ойида бўш ётган ҳаммом биносида босмахона ташкил қилди ва “Матбааи Исҳоқия” номи билан ишга туширди.

¹ Юкоридаги асар. 113–114-бет.

Матбаа ишларидан анча хабардор бўлган Ҳусайн Макаев ва Абдурауф Шаҳидий Исҳоқхон билан ёнма-ён туриб ишлади. Туркистон ўлкасининг чекка бир қишлоғида матбаанинг вужудга келиши ўзбек халқининг таълим-тарбия, маърифат соҳасидаги улкан ютуғи эди. Матбаанинг ташкил қилиниши, уни вужудга келтиришдаги мақсади тўғрисида Исҳоқхон Ибрат “Тарихи чопхона” номли шеър битди, унда шундай мисралар бор:

*Минг уч юзу йигирма олтида чопмахона
Очмоққа бўлди рухсат ва сўз бериб замона.
Мақсад бу ишдан эрди оламга илм қасри,
Ҳам қўймоққа асарлар ёдовари жаҳона...*

Туркистоннинг ilk матбаачиларидан бири Исҳоқхон бу амалий фаолияти билан ўлка маърифатпарварлари, маорифчилари фаолиятини яна бир поғона юқорига кўтарди. Бу матбаада савод чиқаришга оид рисолалар, дарсликлар, плакатлар, мажмуалар мунтазам нашр этиб турилди. Ибрат ”Мақсад бу ишдан эрди оламга илм қасри“ деб таъкидлаганидек, бу матбаа ўз фаолиятини илм-маърифат тарқатишдан бошлади. Унда биринчи марта 1908 йилда савод чиқаришга бағишланган “Санъати Ибрат, қалами Мирражаб Бандий” асарини нашр қилди. Ушбу асар савод чиқаришда, хусният намуналарини ўргатишда жадид ва қадим мактабларида “Муфрадот” дарслиги сифатида кўлланган. “Матбааи Исҳоқия”нинг илм-маърифат тарқатиш мақсадида ташкил қилинганини яна шундан ҳам билишимиз мумкинки, Исҳоқхон матбаа пештоқига нур таратаётган қуёш тасвирини ишлаб, унинг ичига “илм” сўзини ёздирган. Бу билан маърифатпарвар илмни нур таратаётган қуёшга ўхшатади. Бу рамзий тасвир – эмблема мазкур матбаада чоп этилган китобларнинг кўпидаги мавжуд. Исҳоқхон матбаанинг очилган йили ёки уни кенгайтириш, ўлкада энг кўзга кўринган босмахоналардан бирига айлантириш учун ҳаракат қилди, керакли анжомлар тайёрлади. Халқ ўртасида китоб ва турли рисолаларга талабнинг ортиши натижасида матбаа 1910 йилда Намангандаги ҳозирги Исҳоқхон Ибрат номидаги матбаа-босмахона “Матбааи Исҳоқия” асосида ташкил топган. Исҳоқхоннинг хусниятатга, хат-савод чиқаришга бағишланган “Санъати Ибрат, қалами Мирражаб Бандий” (1908) ўкув рисоласи, “Илми Ибрат” (1909) номли шеърлар тўплами, ёзувлар тарихига бағишланган “Жомеъ ул-хутут” (“Ёзувлар мажмуаси”) каби асарлари ўз матбаасида нашр этилди.

Беҳбудий, Мунавваркори, Авлоний, Убайдулла Ҳўжаев, Обиджон Маҳмудовлар нашр этган газета ва журнallарда ўз мақола ва шеърлари билан фаол иштирок этган Исҳоқхон Ибрат ўзи ҳам 1913 йилда “Матбааи Исҳоқия” қошида “Ал-тижорал ал-Намангон” номида газета чиқариш учун хукуматдан рухсат сўраб ариза берганлиги ҳақида “Таржимон” газетасининг 1913 йил 128-сонида хабар берилган. Бу ҳақда Оренбургда чиқадиган, “Вақт” газетаси катта мамнуният билан қуидагиларни ёзади: “Намангон. Мўътабариндин Исҳоқ қози ҳазратлари “Ал-тижор ал-Намангон” исминда бир газета чиқарарға сўраб ариза берди. Бу зот 1908 нчи йилда Намангонда бир матбаа очган эди. Бу йил “Қутубхонаи Исҳоқия” исминда кутубхона очиб, турк, татар, ўзбек, рус тилларинда бўлғон адабиёт китоблари олдирди. Ҳозир газета чиқармоқ хаддиндадур. Чин кўнгулдан муваффақият тилаймиз”¹.

¹ “Вақт” газетаси, 1913 йил, 1324-сон.

Ҳар қанча ҳаракат қиласа-да, Исҳоқхон газета чиқаришга муваффақ бўла олмади, лекин ўз уйида анча бой кутубхона ташкил қилди ва уни “Кутубхонаи Исҳоқия” деб атади. Ибрат архивидаги китоблар рўйхати шуни тасдиқлайдики, кутубхонада таълим-тарбия ва ўқитишга оид ўзбек, рус, татар, турк, араб, форс-тожик тилларида кўплаб китоблар бўлган, улардан нафақат ўзи, қишлоқ аҳолиси унумли фойдаланган. Исҳоқхон Ибрат ўз мактаби ўқувчиларини кутубхонада сақланувчи китоблар, дарслклар билан таъминлаган. Кутубхонанинг мактаб ўқувчилариға бағишиланган қисмида кўплаб пешқадам педагогларнинг эллиқдан ортиқ дарслер ва ўқув қўлланмалари бир неча нусхада, таълим-тарбияга оид юзлаб китоблар бўлган. Афсуски, бир неча минг китоб, қўлёзмалар, газета ва журналлар бойламларини ўз ичига олган ушбу ноёб кутубхона 1917 – 1920 йиллар инқилоб деб аталмиш ур-ийқитларида, 1937 йилнинг машъум қатағонида бутунлай ўйқ қилинди.

Исҳоқхон Ибрат жаҳон илми ва маданиятининг ҳар қандай янгиликларидан халқини баҳраманд қилишга ҳаракат қилди. У тараққий этган Шарқ ва Гарб давлатлари шаҳарларида, хусусан, Туркия пойтахти Истанбулнинг фараҳбахш “Миллат боғи”да онаси Ҳурибиби билан дам олган пайтларда ўз Ватанида ҳам ҳамқишлоқлари учун шундай гўзал боғ яратиш ҳақида ўйлаган бўлса, ажаб эмас. У отасидан қолган беш таноб ерда халқ учун истироҳат боғи яратди, фавворалар қурдирди, 150–200 туп арчадан хиёбон барпо этди, рус ва Европа манзарали дараҳтларини ўтқазди, Европа усулида иморат қурдириб, аркига “Хуш келибсиз Исҳоқия боғига!” деб ёзib қўйди. Бу боғни қишлоқ аҳолиси ҳозир ҳам “Исҳоқия боғи”, “Гулбоғ” деб атайди.

Исҳоқхон Ибратнинг илм-фан, маданият ва маориф янгиликларини ўз халқига тарғиб қилиши, тараққиётга тўғаноқ бўлаётган ярамас урф одатларга қарши кураш олиб бориши, албатта, мутаассибларга ёқмади, уларнинг ғазабини оширди, мутафаккирга нисбатан турли-туман бўхтон тошларини ёғдирдилар, уни “Исҳоқ коғир” деб эълон қилдилар. Исҳоқхон ўзининг илфор ғояларидан бир қадам ҳам чекинмади, ҳар қандай оғир шароитда ҳам маърифатпарварлик фаолиятини давом эттириди. Замондоши Иброҳим Даврон гувоҳлик беришича, “Дунёнинг сонсиз меҳнату андуҳларидин ва гурӯҳи қажрафтор таъналаридин бир зарра қадар бўлсада, малулият ҳосил этмади”¹.

1937 йилнинг март ойида даҳшатли қатағон машинаси Ватанимизнинг фозил кишилари қаторида Исҳоқхон Ибратни ҳам аждаҳодай ўз комига тортди. 75 ёшни қоралаган кекса мутафаккир шоир, педагог ва бир қора машина тўла китоб Андижон турмасига олиб кетилди. У шўролар турмасида икки ой ётиб, ҳаёт билан видолашди.

Истиқлол, Мустақиллик туфайлигина Исҳоқхон Ибрат ҳақида бор ҳақиқатни айтиш, унинг асарларини тўлалигича халқнинг маънавий мулкига айлантириш имконияти вужудга келди. 1994 йилда “Шарқ” нашриёти шоир ҳақида “Истиқлол фидойилари” рукни остида алоҳида рисола, 2005 йилда “Маънавият” нашриёти “Истиқлол қаҳрамонлари” рукни остида Исҳоқхон тўра Ибратнинг “Танланган асарлар”ини босмадан чиқарди.

¹ “Туркистон вилоятининг газети”, 1908 йил, 56-сон.

Қозоқбай Йўлдош

ПОСТМОДЕРНИЗМ: МОҲИЯТ, ИЛДИЗЛАР ВА БЕЛГИЛАР

Кейинги йилларда, умуман, ўзбек миллий тафаккури, хусусан, адабиёт ҳамда санъатида кўп тўхталинаётган, қатор баҳсу мунозараларга сабаб бўлаётган постмодернизм ҳодисаси ўз-ўзидан пайдо бўлиб қолган бир таркиб ва бир босқичли ҳодиса бўлмай, тараққиётнинг анчагина мураккаб ва ўзига хос босқичларидан ўтган илмий, ижтимоий, фалсафий ва эстетик йўналишдир. Тегишли илмий манбаларни ўрганиш кўрсатадики, “постмодернизм” атамаси илк бор Биринчи жаҳон уруши бораётган 1917 йилда Р.Ранвицнинг “Европа маданияти таназзули” китобида фалсафа ва санъатда модернизмдан кейин юзага келган янгиликларни, яъни “янги”дан кейинги янгиликларни англатувчи атама тарзида ишлатилган. 1934 йилда адабиётшунос Ф.де Ониснинг “Испан ва Лотин Америкаси поэзияси антологияси” асарида бу истилоҳ модернизмга зид бўлган тушунча тарзида қўлланди. Машҳур жамиятшунос олим А. Тойнби ўзининг 1947 йилда битилган “Тарихни ўрганиш” китобида постмодернизмга культурологик ва ижтимоий маъно ҳам юклаб, уни маданият ва санъат ҳодисаларини изоҳлаш борасида Кунботишнинг якка ҳукмронлиги тугагани, оламдаги ўзгача тафаккур тарзи ҳам муайян салмоқ касб эта бошлаганини англатадиган тушунча сифатида ишлатди. XX асрнинг 70-йилларида америкалик теолог X. Кокс Лотин Америкасида дин муаммоларига бағищланган илмий ишларида “постмодерн теология” атамасини қўллаб, унга диний маъно ҳам юклиди. “Постмодернизм” атамаси Ч.Женкснинг “Постмодерн меъморчилик тили” китобидан кейин жуда кенг ёйилди. Муаллиф асарида анчадан буён турли маъноларда қўлланиб келинаётган бу атамага тамомила ўзгача мазмун юклиди. У постмодернизм меъморчилик тарихида янги давр бошланганидан далолат эканини, эндилиқда архитектура соҳасида олдинги усуллардан фойдаланиш, ўрни келса, аввалгилардан нусха кўчириш, илгаридан мавжуд биноларга жузъий ўзгаришлар билан янгича қиёфа бериш ҳам ижодкорлик тарзида кабул этилаверишини қайд этади. Муаллиф бундай ёндашув нафақат меъморчилик, балки замонавий санъатнинг бошқа турларига ҳам хос эканини таъкидлайди. Шу тариқа, ўтган асрнинг 70-йилларидан эътиборан “постмодернизм” атамаси меъморчилик, санъат ва адабиётдаги янги тамойилларни англатиш учун қўлланиладиган бўлди. Лиотарнинг “Постмодерн ҳолат: билим ҳақида маъруза” китоби босилиб чиқкан 1979 йилдан бу атама фалсафий маънода ҳам ишлатила бошланди.

Бадиий ҳодиса сифатида АҚШда олдин меъморчилик, ҳайкалтарошлик, тасвирий санъат сингари визуал санъат турлари ҳамда амалиёт билан санъат қоришиб кетган дизайн, видеоклип каби санъат турларида бўй

* Қозоқбай Йўлдошев – педагогика фанлари доктори.

кўрсатган постмодернизм тез орада адабиёт, мусика ва фалсафага ҳам ўтиб, қитъалараро кўламдаги глобал эстетик ҳодисага айланди. Постмодернизм очун миқёсида қадриятлар тизими тубдан ўзгаргани, жаҳон кўламида мөдернизмда бўлган **европацентрик** қарашлар ўрнига глобал **полицентрик** ёндашув майдонга чиққани, дунё мавжудлигининг **постмустамлакачилик** ва **постимпериализм** босқичи бошлангани, инсоният олдида илк бор ўз-ўзини тўлиқ қириб битириш имконияти пайдо бўлганини англатувчи тушунча ўларок қарор топди¹. Бошқача айтганда, инсоният юзма-юз турган фожиаларни бутун кўлами билан чукур англаган ва деярли “қиёмат арафасида яшаётган” ижодкорларнинг бу фожиалар ҳамда уларнинг яратувчиларига муносабатини, кўнглидаги чексиз ҳадик-хавотирли кечинмаларини тўла ва хоҳлагандай ифодалаш йўсинлари жамини англатувчи фалсафий-эстетик йўналишдир. Постмодернизм бугунги ижодкор дарди ва изтиробларининг кўнгил, тафаккур, қоғоз, бино, кино ва саҳнада глобаллашган цивилизацияга уйғун ҳолдаги ифодасидир.

Барча йўналишларда ҳам постмодернизм алоҳида бир инсон ва унинг хукуқларини давлат ҳамда миллат манфаатларидан юқори қўяди, фан, техника, саноат ва демократияга интилишни устувор билади. У пайдо бўлганидан буён инсоният катта қисмининг нафақат бадий-эстетик, балки ахлоқига ҳам сезиларли таъсир кўрсатди. Агар авваллари одамдаги тиришқоқлик, интизом, жиддийлик, аниқлик, ишчанлик сингари инсон ҳаётини таъминлаш, эҳтиёжини қондириш ва ижтимоий мавқеини кўтаришда кўл келадиган сифатлар улуғланган бўлса, эндиликда ундаги тасаввур кучи, ижодкорлик, хиссиётчанлик, мослашувчанлик каби хислатлар маъқул кўрилмоқда. Яъниким, санъат, адабиёт мавжуд воқеликка қарши исён қиласор ҳолдаги таъсир ўтказмоқда.

Постмодерн санъат ўзидан олдинги бошқа йўналишлардан бадиий яратиқдан кўра унинг яратилиш кечимиға; муаллифга қараганда ўқирманлар оммасига; вербал (офзаки)ликка нисбатан визуалликка кўпроқ эътибор қаратиши билан ажralиб туради. Постмодерн санъат асарлари дунёнинг бетартиб (хаос)лиги, бошбошдоклиги, ўткинчи ва англамсизлигидан иборат постмодерн манзарасини бериш учун кўпроқ тасаввур, туш, онгиззлик сингари холатларни ўз тасвир обьекти ва воситасига айлантиради.

Постмодернизм бир вақтнинг ўзида ҳам модернизмнинг мантиқий давоми, ҳам унинг тугатувчиси бўлган амбивалент (икки вазифали) ҳодисадир. Агар модернизм учун мавжуд эстетик қолипларга бўйсунмаслик, санъаткорнинг ўз-ўзини ифодалаш эрки ва ижодий бетакрорлик идеал саналган бўлса, постмодернизм дунёни эгаллаб олган техник аурада тартиб ва бетакрорлик йўқлигидан келиб чиқиб, индивидуал ижодий эркинлик ўрнига ўзгаларнинг бадиий яратиқларини жузъий ўзгартишлар, ўйин ва эстетик найранг воситасида бадиий ўзлаштиришни муҳим ҳисоблади. Постмодернизмда санъат билан борлиқ, шунингдек, санъатнинг ички турлари ўртасидаги одатий фарқлар ювилиб, чегарасизлик ва қоришиқлик универсал тус олади. Унда эстетик интерпретация бадиий инновацияни сиқиб чиқариб, ўтмишда машҳур бўлган асарларга тақлид, уларни муайян ўзгаришлар билан янгича тақдим ва талқин этиш кучаяди. Модерн санъатдаги адоксиз исён ўрнини постмодерн мослашувчанлик ва келишувчанлик – конформизм эгаллайди. Агар модернизмда бевосита ҳаётнинг ўзига таяниб, мавжуд адабий анъаналар инкор қилинган бўлса,

¹ Кюнг Г. Религия на переломе эпох // Иностранная литература. 1990. №11.

постмодернизмда ҳаётнинг ўзи бўлакларга ажратилиб қайта қурилиши, яъни деконструкция қилиниши керак бўлган матн, белги ва қўчирмалар йиғиндиси тарзида қабул қилинади.

Постмодерн эстетикада юксак санъат билан оммавий маданият ўртасидаги муносабатга ҳам тамомила ўзгача ёндашилади. Чинакам юксак санъатнинг аҳамияти ва қиммати тан олингани ҳолда унинг оммавий маданиятлиги муҳимроқ саналади. Тўғри, постмодернизмда ҳам оммавий маданиятнинг кўпинча юксак бадиият талабларига жавоб беролмайдиган, жўн ва жозибасиз ҳодиса экани кўзда тутилади. Аммо ӯ камров ва кўламни бадиий теранлик ва бетакрорликдан муҳим ҳисоблайди. Шу ўринда ўзбек илми ва мафкурасида жуда кенг ёйилган оммавий маданият ҳодисасига кимлардир томонидан бизнинг маънавиятимизга зарба бериш учун атай яратилган ва зўрлаб тиқиширилаётган ҳодиса тарзида талқин қилиш ҳақиқатга мувофиқ эмас. Маданиятга доир ҳодисаларга алоҳида истеъдодли кишилар томонидан яратиладиган фавқулодда камёб нарса эмас, балки ёппасига ишлаб чиқариш, сотиш, сотиб олиш ва истеъмол қилиш мумкин бўладиган оддий товар тарзида қарашни ёйиш орқали уни оммага яқинлаштириш нияти оммавий маданият тушунчаси моҳиятини ташкил қиласиди. Постмодерн эстетика маданиятга омма ва ҳамманинг дахлдор бўлишини истайди. Бу истак маданият ва санъатни қадрсизлантириш эмас, балки уни оммага яқинлаштиришни кўзда тутади.

Кишида беихтиёр совет мафкураси ҳам адабиёт ва санъатнинг оммавий бўлишига катта эътибор каратарди, бу жиҳатдан у постмодернизмга менгзар экан-да, деганга ўхшаш фикр пайдо бўлади. Бу ўринда шуни айтиш керакки, шўроча ёндашувдан фарқли ўлароқ, постмодернизм оммани маданиятнинг истеъмолчисигина эмас, балки унинг яратувчиси, ижодкори мақомида ҳам кўришни хоҳлайди. Бундай ёндашувга кўра маданиятнинг оммавийлашгани янглиғ омманинг ҳам маданийлашиб, яратувчи мақомига эришуви кўзда тутилади.

Айтиш керакки, постмодерн қарашда алоҳида мақомга эга бўлган инсоннинг ахлоқдан ташқаридалиги, ҳар қандай истакни жиловламаслик, бир жинсдагилар орасидаги никоҳ, яланғоч эротизм сингари миллий маънавий қадриятларимизга тамомила зид бўлган тутумлар ҳам азбаройи бизнинг ахлоқимизга зарба бериб, маънавиятимизни оёқости қилиш учун эмас, балки айрим одамларга қулай, уларнинг истагу хоҳишлирага мувофиқ бўлгани сабаб қўллаб-қувватланаётганини ҳисобга олиш тўғри бўлади. Буни кўзда тутиш ахлоқсизликни ахлоқ даражасига кўтарадиган оммавий маданиятни мутлақо заарсиз ҳисобламаса-да, унинг кимнидир йўлдан оздириш учун маҳсус ўйлаб топилган ёвуз ҳодиса эмаслигини таъкидлашга хизмат қиласиди. Постмодернизм анъанавий эстетик қадриятларнинг қадрсизланиши ўрнини аслида беқадр бўлган “маданий ҳодиса”ларга қадр бериш билан қоплашга уринади. Постмодерн эстетика модернизмда санъатга алоқасиз ва номуҳим саналган оммавий маданият, экология, феминистик сингари соҳаларни ҳам қамраб олгани сабабли тинимсиз энига кенгайиб боради.

Юксак санъат билан бир марталик истеъмолга мўлжалланган оммавий маданиятнинг ўзаро яқинлашуви, жамият аъзоларида санъатни, биринчи навбатда, кишига завқ бериб, ҳордиқ чиқаришга хизмат қилиши керак бўлган гедонистик (лаззат берувчи) восита тарзида тушунишнинг ёйилиши

билан одамларда турли даражадаги бадий дид бўлиши мумкинлиги ва бунинг илдизи кишининг интеллекти ва туйғулари ҳамда у яшайдиган ижтимоий-маиший шароитга бориб тақалиши жўнидаги олдинги қарашлар ўз қимматини йўқота боради. Постиндустриал жамиятда эстетик дид рамзий маъно касб этиб, истеъмол эркинлиги шароитида нарса эмас, балки ахборот ва белги алмашиш орқали завқланиш ва лаззат олиш муҳим саналади. Асил санъат ҳодисалари ўрнини симулякр (сохта эстетик яратиқ)ларнинг эгаллаши мумкинлиги дидларни бирхиллаштириб, ўргадаги айрималарни йўққа чиқара боради. Тўғри, ҳар қандай шароитда ҳам санъат ҳодисаларига турлича қарашлар сакланиб қолади, лекин истеъмол санъатининг оммавийлашуви дидларнинг ўтмаслашувига олиб келади. Негаки, истеъмол – тўхтов билмайдиган, ҳар куни, ҳар дақиқада ишлаб чиқарилиши, сотилиши ва истеъмол қилиниши керак бўлган узлуксиз кечим. Бу жараёнда саноатлик устуворлик қилади. Асил санъат асарини эса саноат усулида яратиб бўлмайди. Бир-бирига ўхшаш саноат маҳсулотлари истеъмолига мослашган дид ҳам ўхшаш бўлади.

Постмодерн эстетика телевидениенинг вазифасига ҳам жиддий ўзгартишлар киритади, натижада қўрсатувлар – реал ҳаёт, ҳаёт эса, телевидениенинг инъикоси тарзида кабул этиладиган бўлади. Постмодерн қўрсатувларнинг асосан кўнгилочар шоулик, томошабоплик ва узлуксиз давомийлик хусусиятларига эгалиги томошачилар аудиториясининг руҳиятини ҳам ўзгартириб юборади. Дунёнинг глобаллашувига олиб келган техник ҳамда ахборот воситаларининг қарқин (шиддат)ли ривожи инсон руҳияти ва дидининг ҳам глобаллашувига олиб келди.

Чин илмий ва бадий кашфиётлар хос кишилар томонидан яратилиб, уларгагина таъсир қилиши ва тушунарли бўлиши керак, деб қарайдиган модернистик ёндашувга қарама-қарши тарзда постмодернизм фалсафа, санъат ва адабиётнинг оммавийлигига интилади. Постмодерн эстетик назария ҳар қандай санъат асари кўпчилик томонидан англанадиган бўлибгина қолмай, балки истаган одам томонидан яратилиши ҳам мумкин ва керак деган қарашга таянади. Постмодернизм ўтмиш, тарих, маданият, фольклор, адабиёт ва санъатга доир меросга эҳтиромли муносабат зарурлигини рад этиб, унга эркин, ножиддий, ўйнаброқ кинояли ёндашиш мумкин ва лозим деб билади. Шу сабаб постмодернизмда бадий-эстетик анъаналарга амал қилинмайгина қолмай, уларга киноя билан ўйнаб муносабатда бўлинади. Тарихни бадий ўзлаштириш борасида классик адабиётда бўлган ўтмишга эҳтиромли ёндашиш постмодернизмда ундаги кулгига лойиқ кирраларга кўпроқ урғу бериш билан ўрин алмашади.

Агар модернизмда олам ҳодисаларининг хаос (тартибсизлик) эканидан келиб чиқиб, ижодда ҳаётий хаосдан эстетик космос (санъат) яратилади деган қараш устуворлик қилган бўлса, постмодернизмда ана шу хаосни ўйин шаклида бадий тадқиқ этиш эстетик мақсаддга айланади. Яъни постмодернизм ҳар қандай бадий яратиқнинг бирламчи вазифаси истеъмолчига маъқул келишдан иборат бўлиши кераклигини кўзда тутади. Адоқсиз сўз ўйинларидан фойдаланиш, тақлид, мантиқсизлик ёхуд тескари мантиқ келтириб чиқариш йўли билан кулги пайдо қилиш; тасвирда бадийнинг алоқаси йўқ кўча сўзларини бемалол ишлатиш орқали эътибор тортиш постмодерн адабиётнинг хос белгилари саналади. Постмодерн асарлар кўпинча ўнг келиб қолган сўз ўйинидан фойдаланиш, фақат айни вазият учун бир мартағина қўл келадиган бадий ҳолат пайдо қилишга, яъни **бирмарталик** матн яратишга қаратилади. Худди бирмарталик стакан,

сочиқ, шприц янглиғ санъат асари ҳам бир марта фойдаланишга яроқли бўлиши етарли саналади. Олдингидай матннинг асрлар оша яшайдиган бўлишига эришиш мақсад қилиб қўйилмайди. Маиший турмушда жуда кўп нарсаларни бир марта ишлатишга кўниккан одам санъат асарини ҳам шундай истеъмол қилишга кўнича боради. Шу тариқа жамиятда мавжуд бўлган маънавий-ахлоқий талаблар салмоғи шахс ҳаёти ва қулайлиги олдида жуда аҳамиятсиз, ножиддий ва қулгига лойик эканига, худди шу тўсиқ-тазиқлардан озодликкина одамнинг тириклигига мазмун бағишлишига одатланилади.

Постмодерн адабий ижод кўпроқ бадий нутқдаги сўз ўйинлари тизимида намоён бўлади. Мумтоз адабиёт намуналаридан олинниб, ўзининг асили маъносига тамомила терс мазмунда қўлланиладиган узинди (цитата)лар постмодерн битикларнинг асосий хомашёси саналади. Ё оҳанг, ё сюжет ёки қандайдир бир лавҳа ёхуд қайсиdir фикр кўчирилиши ва олдингисига тамомила ёхуд қисман терс маъноларда қўлланилиши орқали кулги туғдирилиши, бу қулгининг манбаси истеъмолчилар томонидан тўла англашиладиган бўлиши постмодерн битик учун бош мақсад саналади.

Мавжуд адабий тизимларнинг атай бузилиши, бадийнинг борасида олдиндан шаклланган тушунчавий аппарат, норма ва ўлчамларнинг онгли равишида инкор этилиши, бошқача айтганда, ҳеч қандай турғун белгининг йўқлиги постмодерн йўналишдаги эстетик яратиқларнинг энг турғун белгиси ҳисобланади. Бу ўринда парадоксал мантиққа амал қилинади: ҳеч қандай доимий белгига эга эмаслик постмодерн ижоднинг доимий белгиси саналади. Постмодернизм азал-азалдан бадийнинг ўлчови ҳисобланиб келган яхлитлик, уйғунлик, тугаллик, гўзаллик сингари тасавурларни барбод этиб, аристотелча-гегелча-кантча мумтоз эстетик ёндашувнинг барча асосий қоидаларини инкор қиласди.

Бу ҳол кимларнингдир истаги туфайли эмас, балки очундаги геосиёсий вазиятнинг омонатлиги, ижтимоий тузум ва тизимлардаги тинимсиз ўзгаришлар, уларга ёндашув ва изоҳларда бир хиллик йўқлиги, маънавий улгуларнинг тўхтовсиз алмашавериши, нафақат буғун ва келажак, балки ўтмишни изоҳлаш борасида ҳам адоксиз турфалик борлиги, ижтимоий ҳаётда таваккал (авантюра)га асосланган тийиксиз ва башорат қилиб бўлмайдиган стихияли жараён ҳукмронлиги янглиғ ҳолатлар воқеликка постмодерн муносабатни, у эса ўз навбатида, постмодерн санъат ва адабиётни юзага келтиради.

Хозирги кунда кўпчилик одамлар орасида кенг ёйилган воқеликдан норозилик кайфияти техник прагматизм билан қўшилиш натижасида оммада ҳамма нарсага ишончсизлик, киноя, мазахомуз қараш, аламангиз қувноқликни юзага келтирган. Аввалбошдан эрмак ва овунчоқ сифатида яратилгани, алоҳида хозирликсиз, акл ва туйғуларни зўрламай туриб ҳам бемалол томоша қилиш мумкинлиги постмодерн асарларнинг оммалашувига олиб келади. Ҳеч қандай бадий ва ахлоқий чекловни тан олмаслик оқибатида инсоният томонидан ўтмишда яратилган бутун маданиятга бирваракайига постмодерн эстетиканинг обьекти ва материали тарзида қарала бошланди. Яъни санъат соҳасида ўтмиш маданиятига алоҳида қимматга эга дахлсиз эстетик қадрият эмас, балки пародия қилиш учун хомашё, исталганча қайта бадий ишлов берилиши мумкин бўлган бирламчи материал сифатида қараш қарор топди. Бадий яратиқлардан муқаддаслик тамғасининг олиб ташланиши постмодерн ёндашувга популистик хусусият баҳш этади.

Олдин яратылған матнларға дахл қилиш йүли билан янгилик яратыш постмодерн эстетикада үтмиш адабиётни инкор этиш ёхуд ундан узилиш эмас, балки унинг занжирига янги бир ҳалқа құшиш тарзидан изохланади. Яратылаёттан постмодерн битиклар ва мұмтоз асарларнинг янгича талқинлари уларнинг трансмадани универсал бадий-эстетик қимматга әгалигига күра баҳоланади. Янгича бадий эффект беришга мүлжалланган қоришиқлик, классик талаблар ва модернистик ёндашувларнинг постмодерн қарашлар билан үйғунлаштириб юборилиши постмодерн поэтика-нинг асосий белгисидир. Классик үйғунлик (гармония) билан модернистик ноуфунлик (дисгармония) құшилуви постмодернга хос **ноуфун үйғунлик** ёки **келишимсиз гүзәллик** тушунчасини юзага келтиради. Бу тушунча үтмиш адабиётларда бир қадар ёйилған шакли, күриниши хунук бўлса-да, мөхијити гўзал бўлган образлар эмас. Қадриятлар синкремтизми постмодернизмга санъат яратыларидан яхшилик билан ёмонлик, ҳалоллик билан нопоклик, адолат билан адолатсизлик ўртасидаги қарама-каршиликни пайқалмайдиган ҳолатда тасвирлаш имконини беради. Чунончи, ўзи ёқтиргмаган одамни ўлдириган, банкни усталик билан ўмарган, ракибини маҳорат биланчув туширган тимсоллар истеъмолчида ёқимли таассурот қолдирадиган йўсинда тасвирланадики, буни “келишимсиз гүзәллик”дан бошқа йўсинда номлаш қийин. Постмодернизмда эзгулик билан ёвузлик қарама-карши қўйилмай, улар ўзаро ажралмас үйғунлик саналади, универсал кўпўлчамилик, яъни ҳар қандай нарса-ходисага турли ракурслардан туриб турлича баҳо бериш мумкинлиги ҳаётнинг тўқималаригача сингиб кетган табиий ҳолат ҳисобланади.

Постмодернизм объектив борлиқни ҳаққоний акс эттиришдан кўра видеоклип, компьютер ўйини, аттракцион сингари иккиласмчи, сунъий реалликлардан фойдаланган ҳолда уни эстетик моделлаштиришга кўпроқ диккат қаратади. “Иккиласмчи реаллик” билан ишлаш тамойили санъатнинг адабиёт, мусиқа, балет, театр сингари ўта жиддий тармоқларини ҳам ўз домига тортади. Иккиласмчи реалликнинг чексиз техник имкониятларига таянган постмодерн эстетика яратувчиликни одамнинг субъект сифатида мавжудлигининг асосий белгиси деб ҳисоблади. Шу ўринда бу жихат санъатдаги шартлийликка ўхшаш ҳодиса эмасми деган иштибоҳ пайдо бўлиши мумкин. Шартлийлик шундай экани санъаткор, ўқирман ҳамда томошачи томонидан шартли равишда қабул қилинган ҳолатни англатади. Иккиласмчи реаллик эса техник воситалар ёрдамида йўқ нарсани бордай қилиб кўрсата олишни билдирадиган тушунчадир. Иккиласмчи реалликни асиł реалликдан устун қўйганидан постмодерн тафаккур агар Худо олам ва одамни яратган бўлса, одам Худони ҳам қўшган ҳолда бутун оламни а) эртак йўсинида **аудиал** ҳамда б) кино ва телениндустря маҳсулотлари шаклида кўзга кўринадиган қилиб **визуал** шаклда бирваракайига икки даражада ярата олади тарзидаги шаккокларча даъво қилишгача боради. Постмодерн эстетикага кўра олдиндан белгилаб қўйилған йўсинда ҳаракат қилиб, аввалдан мүлжалланган натижага эришиш эмас, балки йўл-йўлакай мутлақо кутилмаган ва хаёлда ҳам бўлмаган нарсани дунёга келтириб қўйиш чинакам бадий ижодкорлик саналади.

Кўринадики, постмодерн санъат ҳодисаларини яратища кўпроқ визуалликка таяниллади ва эстетик яратылар орасида адоксиз синкремтизм, қоришиқлик бўлиши кераклигига ургу берилади. Бунга кўра адабиёт билан фалсафа ва тарих ўртасидаги ҳамда адабиёт билан кино, театр, мусиқа сингари санъат турлари орасидаги қоришиқлик **метасанъат**; адабиётнинг

ўз ички тур ва жанрларидаги аńанавий чегараларнинг юилиб кетиши **метаадабиёт** деб аталмиш ҳодисани юзага келтиради. Кенг қамровли “метаадабиёт” атамаси сүз үйинларининг саноқсиз кўринишдаги куроқ комбинацияларидан иборат бўлиши мумкинлигини кўзда тутади. Интеллектуал теранликнинг қизикарли сюжет билан уйғунлашуви постмодерн матнинг ўқишли, осон тушуниладиган ва истеъмолчига завқ берадиган бўлишига имкон яратиб, оддий китобхонлар оммаси билан бирга баъзан нафис адабиётнинг дидли ихлосмандлари эҳтиёжини ҳам қондиради.

Постмодерн эстетика ёзувчилик ишига ҳар бир одам ўзига эрмак учунгина қиласидаги инстинктив, интуитив, мақсадсиз, ҳаётнинг ўзи янглиғ нотугал ижодий-рухий ҳолатнинг воқе бўлиши деб қарайди. Услубий плюрализм, эклектизм ва артефакт (тасодифан пайдо бўлиб қолган эстетик яратиқ)лардаги бир вақтнинг ўзида истаганча талқин этиш мумкин бўлган ола-қуроқлик постмодерн яратиқнинг етакчи бадиий хусусияти саналади. Постмодерн эстетикага кўра битикларда хаос, сирлилик, англаб бўлмаслик ва уйдирманинг қоришиқ келиши табиий, санъатга инсоннинг эмас, балки инсонга санъатнинг маҳсули деб қараш мантикий ҳисобланади. Бунда ҳар бир матнга ўқирман билан ижодий мулоқотнинг алоҳида бетакрор кўриниши бўлган бирмарталик маҳсус адабий жанр деб қаралади. Постмодернизмдаги жанрлар ва услубларнинг калейдоскоп сингари турланиши ўтмишнинг эстетик пойdevорига таянган ҳолда шаклланган маданий тўсикларни бузиш, ижодкорлик ва ташаббускорлик қопқаларини очишга уриниш тарзida қабул этилади.

Юксак ва қадри баланд бадиий яратиқлар билан тубан ҳамда бекадр нарсалар ўртасидаги фарқни тан олмайдиган постмодернизмнинг юзага келиши ва ёйилишида Кунботиш ахлининг табиатига хос менчилик, лаззатга ўчлик, истакларни жиловлашга уринмаслик каби майлар устуворлигининг ҳам ўзига яраша ўрни бор. Кунботишликларнинг байрами ҳам, ғалабаси ҳам, қувончи ҳам кўпинча увол ва гуноҳ орқали нишонланади. Бир-бирларига отиб, шалтоғига бир-бирини белаб байрам қилиш учун юзлаб тонна помидор атай олиб келинади, ўтиришу базмларда бир-бирларининг башарасига торт билан уриб қувонч изҳор қилинади, бирор ғалабага эришилса, шампань ёки винони ҳавога сочиб нишонланади. Антик даврда кунботишликлар дам олиши учун гладиаторлар бир-бирини ўлдиришган бўлсалар, кейинроқ жанговар буқалар билан тореадорлар олишувидан роҳатланилди, эндиликда шаҳар кўчалари бўйлаб кутурган буқалар подаси билан бирга оломон пойга қилиб лаззатланилади.

Танасидаги тўқималаргача Дионис шарафига қилинган байрамлардаги тийиксизлик сингиб кетган Кунботиш кишиси учун жисмоний истакларни жиловлашдан кўра оғирроқ жазо йўқ ҳисобланади. Фрейднинг машҳур либидо назарияси ҳам жиловсиз истакни тийишга қаратилган ахлоқ ва дин ахкомларига исён ўлароқ пайдо бўлган. Унингча, одамдаги ҳар қандай рухий хасталик жинсий майлни тийишга мажбур бўлганликдан келиб чиқади. Постмодерн санъат ва адабиёт истеъмол билан тийиксизликни тириклигининг мақсадига айлантирган қавмлар руҳоний ҳамда маданий эҳтиёжи натижаси сифатида дунёга келган дейиш мумкин. Бундай кишилар сони эса Кунботишдан бўлак юртларда ҳам тобора кўпайиб бормокда. Чунки одамга бирор мажбурият юкламайдиган бундай турмуш тарзининг кўпчиликка ёқимли туюлиши табиийдир.

Кунботиш кишисининг ҳатто Яратганни таниши, тан олиши ва у билан ҳисоблашиши борасида ҳам ғалати бир ҳолат кузатилади. Ботиш одами

гўё Яратган билан келишиб, муайян шартнома тузиш, баъзан ҳатто Уни чалғитиши ҳам мумкин деганга ўхшаш шаккок хаёл қиласди. Уларнинг қиёмат борасидаги тасаввурларининг нақадар жўн ва одми экани ҳам диний эътиқодларининг даражасидан далолатdir. Ақлли-хушли, туппатузук одамларнинг 2013 йил 21 декабрида қиёмат қўпишига ишонгандиклари ҳамда ўша кунда катакомбалар, бункерлар, еости иншоотлари ва форларда жон сақлаб қолиш умидида бир дунё озиқ ва ичкиликлар жамғарип қўйганликларининг ўзида Яратганнинг кудрати ва иродасига нописанд муносабат ётади.

Модернизм, қайсиdir даражада, тафаккур маърифатидан эзгулик тополмай, кўнгил маърифатига интилиш кераклигини савқитабийиси билан хис этган, аммо бунинг йўлини билмаган истеъдод эгаларининг уринишлари ифодаси бўлганди. Унинг замирида онгсиз йўсинда бўлса-да, Яратганни излаш, унга интилиш бор эди. Лекин тақдирга бўйин бергиси келмайдиган, фақат инсоннинг ақли билан изоҳлаш мумкин бўладиган ҳолатларнингина тан олиб, борлиқнинг саноқсиз ҳолатлари шу ақл билан изоҳланиши шарт деб ҳисоблайдиган Кунботиш одами учун модернизм фалсафа, сиёsat, санъат ва адабиёт бобидаги ўзига хос исён ифодасига айланганди. Постмодерн эса, аввал-бошдан инсоннинг руҳоний ва фикрий имконият ҳамда уринишларига қилинган пародия ўлароқ юзага келади. Матн дахлизлиги, муқаддаслиги барҳам топиши постмодерн адабиётга интерфаол хусусият бахш этади. Истаган ўқирман истаган бадиий матн билан танишиш асносига унга муайян ўзгартиришлар киритиб “ижод” қилишга ўзини ҳақдор санай олади.

Классик анъаналарни тамомила эркин тушуниш ва талқин этиш ҳамда бадиий меросни ультразамонавий техника билан уйғунлаштирган ҳолда янги бадиий яратиққа айлантиришни кўзда тутадиган постмодерн санъат эстетикаси олдин яратилган санъат намуналарига фақат истеъмол қилинадиган товар сифатида қарашни илгари суради. Постмодернизмнинг моҳияти унинг анъанавий эстетик қадриятларни ноанъанавий идрок этиш орқали янги бадиий уфқларни эгаллашга имкон берадиган бекарор ва ўткинчи табиатида намоён бўлади. Постмодернизм бир вактнинг ўзида ўтмишга қайтиш билан келажакка юришни уйғунлаштирувчи ҳодиса ўлароқ эски ҳодисалардан фойдаланган ҳолда янги бадиий анъаналарни юзага келтиришни кўзда тутади. Постмодернизм тажриба ўтказиш берадиган адреналин орқали очун цивилизациясининг узоқ ва яқин деб аталувчи икки босқичли ўтмишини бугунга қайтариб фаоллаштиради. Яъни ўтмиш санъат асарларига bemalol дахл қилиш йўли билан уларни бугунга хизмат қилдиради.

Постмодерн санъат одам ва инсонпарварлик, технотрон цивилизацияда шахснинг ўрни сингари муаммоларга диккат қаратиб, инсонга эътибор беради. Лекин унда инсон идеаллаштирилмай, унинг комиллик имконияти ғоят чекланган деб қаралади. Шу сабаб инсонга Уйғониш давридагидек марказдан эмас, четроқдан жой беради. Бу ҳолат постмодерн санъатда персонажларнинг кўпинча мўрт, омонат, серҳадик ва тайнисиз кимсалар сифатида тасвирланишига олиб келди. Постмодерн адабиётдаги персонажлар майда, тайнисиз, ножинс, тийиқсиз экани билан классик ва модерн адабиётдаги салафларидан тубдан фарқ қиласди. Модерн адабий персонажлардаги рационал, барқарор “Мен”нинг парчаланиши постмодерн адабиётда кўптаркибли (гетероген) образлар дунёга келишига имкон берди. Постмодерн асарларда тайнисизлик, вампиризм, умидизликтининг

туганмас лабиринти ва доимий хаос, күпчиликка ўхшаб яшамайдыган ким-саларнинг тийиқсиз саргузаштлари тасвири устуворлик қиласади. Оммага мүлжалланган бундай қизиқарли сюжетларнинг изчил тасвири классика, авангард, оммавий маданият, интеллектуаллик ва гедонизмни қориштириб, санъат ва кундалик турмушнинг ўзига хос “умумий эстетика”сини юзага келтиради. Қоришиқ адабий симулякр баъзан кутилмагандан чукур тагма – но касб этиб, асидай кўринадыган кич (сохта, ясама) ёрдамида санъатни нозик идрок этадыган билимдон ўқирманлар дидига ҳам мос келадиган бадиий бетакрор яратиқлар юзага келишига сабаб бўлади.

Бутун эътибор фақат одамга қаратилиб, унга коинот гултожи сифатида қараладиган **антропоцентрик гуманизмдан** нафақат инсон, балки коинотдаги жонли-ю жонсиз барча яратиқларга аёвли қараш кераклиги кўзда тутиладиган **универсал гуманизмга** ўтиш тамойили юзага келиши ҳам постмодерн тафаккурга хос хусусиятдир.

Постмодерн санъатнинг салкам бир асрлик тараққиёт тарихини шартли равишда қўйидаги босқичларга бўлиш мумкин:

1. XX аср бошларидан 60-йилларгача бўлган **шаклланиш** даври. Бу босқичда постмодернизм асосан АҚШда меъморчилик, телевидение ва дизайнга тегишли бирмунча тор доирадаги ҳодиса сифатида мавжуд эди.

2. 60–70-йилларни ўз ичига олувчи **оёққа туриш** босқичи. Ўтган юзийилликнинг 60–70-йилларида Америкадан Оврўпога ўтиши билан постмодерн санъат ривожининг иккинчи даври юзага келди. Бу босқичдаги постмодерн яратиқларга хос етакчи жиҳат плюрализм ва эклектизм эди. Бу давр постмодернизмининг асосий белгиси ўтмишга киноявий назар, эски матнга янги маъно берадиган метатилдан фойдаланиш бўлиб, назарий асосчиси итальян ёзувчиси ва олими Умберто Эко эди.

3. Постмодерн санъат тараққиётининг **хозирги**, учинчи босқичи 80-йиллардан бошланади. Назарий пойdevори Жак Деррида қарашлари асосида шаклланган бу босқичнинг яққол кўзга ташланадиган белгилари сифатида постмодерн яратиқларнинг эротикалашиб бориши, уларда аёллар шаҳвонияти, одамнинг физиологик жинси билан психологик жинси ўртасидаги номувофиқликда намоён бўладиган транссексуализм, бир жинслилар ўртасидаги муносабат тасвирига кўп ўрин берилиши каби жиҳатларни кўрсатиш мумкин.

Минглаб йиллар давомида ижодкорлардан ёзилиши керак бўлгандай ёзиш талаб қилиб келинган бўлса, модернизмда ёзилганидай ёзишга ўтилди. Модернизмдан сўнг келган “**кейинги**” маъносидаги “пост”, “**кейингидан кейинги**” маъносидаги “постпост” ва “**орқали, ёрдамида**” маъносидаги “транс” олдкўшымчалари билан қўлланиладиган “постмодернизм”, “постпостмодернизм”, “трансавангардизм” янглиг йўналишларда битилган яратиқларни шартли равишда ёзилиши керак бўлмаганидай ёзиш маҳсули дейиш мумкин. Ўшбу фикрни агар реализм “ҳақиқат тўғрисидаги ҳақиқат” бўлса, модернизм “ҳақиқат тўғрисидаги ёлғон”, постмодернизм эса “ёлғон тўғрисидаги ҳақиқат”dir тарзида ҳам ифодалаш мумкин. Постмодернизм санъат асари алоҳида истеъдод эгалари томонидан яратиладиган эмас, истаган киши ясаши мумкин бўлган маданий товардир, демакки, ҳар қандай одам санъаткор бўлиши мумкин йўсинидаги қарашлар тизимини ифодалайдиган ёндашув тарзидир.

Хозирда очуннинг турли пучмоқларига кенг ёйилган ушбу фалсафий-естетик йўналишга хос хусусиятлар постмодернизм ҳодисасини юзага келтирган унсурларни англатувчи бир қатор ўзига хос атамаларда ёрқинроқ

намоён бўлади. Постмодерн эстетикада мавжуд бутунни бузиш орқали янги бадиий бутунлик яратиш маъносидаги “**деконструкция**”, очундаги ҳамма нарсада мажоз борлигига ишора қилувчи “**рамзийлик**”, ҳаётдан ва ўзгалардан сўроқсиз ўзлаштириш йўли билан товламачилик орқали санъат яратиш маъносидаги “**симулякр**”, осон йўл билан ясалган сохта ва арzon санъат намунаси маъносидаги “**кич**”, ўзгаларга тақлид, бошқа битиклардан нусха кўчириш йўли билан улардан кулиш кўзда тутиладиган “**киноя**”, йўқ жойдан кутилмаганда пайдо бўладиган адабий товар маъносидаги “**артефакт**”, бадиий асарни яратишда санъаткор ва ўқирман шериклиги маъносидаги “**интерактивлик**”, қоришиқлик ва оммаболлик маъносидаги “**универсализм**” ва бошқа бир қатор хос атамалар тизими мавжуд. Ўша тушунчалар маъноси англаб етилсагина постмодернизмнинг табиатини илғаш ҳамда бу ўналишда яратилган асарларни таҳлил қилиш мумкин бўладики, куйида ана шу атамаларнинг моҳиятини тушунтиришга ҳаракат қилинади.

Деконструкция. Бутунни қисмларга ажратиш, бўлакларга бўлиш маъносидаги юонча “analysis” (анализ) сўзининг лотинча маънодоши бўлган “деконструкция” атамаси постмодерн яратиқларни тушуниш ва тадқиқ қилишда муҳим очқич тушунча саналади. Илмий манбаларда қайд этилишича, дастлаб мъеморчиликда қўлланган ушбу атама илмга 1964 йилда машҳур файласуф М. Хайдеггерга таянган ҳолда Жорж Лакан томонидан киритилган ва кейинчалик Жак Деррида уни назарий жиҳатдан асослаган. Мъеморчиликда қачонлардир қурилган бинолар қисман бузилиб, муайян қайта қуришлардан сўнг тамомила янги иншоотга айлантирилиши деконструкция саналган. Таъкидлаш керакки, мавжуд биноларни деконструкция қилиш фақат постмодернизмга тегишли ҳолат эмас. Одамзод пайдо бўлтики, олдин яратилган биноларни баъзан бугуннинг диidi ва талабларига мослаб қайта қуришга уриниб келади. Ўзбекистонда ҳам бир қатор иншоотлар деконструкция қилинган. Жумладан, “Ватан” кинотеатри бир қадар ўзгартирилиб, Ҳамза номидаги академик театр биносига, у жиддий қайта қурилиб, Миллий академик катта театрга айлантирилди. Алишер Навоий номидаги Тил ва адабиёт институти биноси деконструкция ёрдамида таниб бўлмайдиган тусга кирди ва Кореяning INHA университети сифатида қайта фаолият кўрсата бошлади. Бунга ўхшаш мисолларни кўплаб келтириш мумкин.

Постмодерн адабий асарни тадқиқ этишнинг методологик таянчи саналадиган деконструкция тушунчасининг моҳияти ҳар қандай матннаги ички имкониятларни аниқлаб, ундаги нафақат оддий ўқирман, балки шу асарни ёзган муаллифнинг ҳам хаёлида бўлмаган, аммо сўзларнинг ўзида табиий равишда ҳамиша бор бўлиб, муайян ўзгариш натижасида қалқиб чиқадиган янги маъноларни топишдан иборатдир. Деконструкцияга кўра матнда тилнинг ички табиатидан келиб чиқадиган ва инсон томонидан йўқотиб бўлмайдиган объектив мантиқ мавжуд. Яъни муайян матн орқали муаллиф бир фикрни айтмоқчи бўлади, амалда эса, унда қўлланилган сўзларни салгина ўзгартириш билан тамомила бошқа фикр келиб чиқади. Маъноли қисмлардан иборат матнни деконструкция қилиш, яъни бўлакларга бўлиб, айрим ўзгаришлар билан қайта тиклаш орқали янги маъно чиқариш деконструкциянинг вазифасидир.

Деконструктив ёндашув ҳар қандай бадиий матн ўз табиатига кўра ҳамиша муаллиф кўзда тутганидан жиддий фарқ қиладиган мазмунни ташибиди, деб ҳисоблайди. Бундай мантиқка биноан муайян мақсадларда

атай ташкил этилган ва шу боис тез-тез ўзгариб турадиган иқтисодий, сиёсий, диний, тарбиявий ва бошқа тузилмаларга нисбатан турғун ҳодиса бўлган тил орқали ҳар қандай бадиий матнга деконструкция материали сифатида ёндашиш имкони бўлади. Матндаги сиртдан кўзга ташланиб турадиган мафкуравий мантиқни эмас, балки сўзлар ҳужайрасига кодлаб қўйилган иррационал мазмунни кашф этиш деконструкциянинг вазифаси саналади. Бундай ёндашувнинг матн замиридаги ҳар қандай мазмунни аниқлашга қаратилган ҳерменевтик ёндашувдан фарқ қиласидиган жиҳати, биринчидан, деконструкцияда матндан иррационал мазмун қидирилади, иккинчидан, матндан табиий равишда келиб чиқадиган мазмун эмас, балки излаётган кимса истаган мазмун қидирилади.

Бадиий мантиқни ҳаётий мантиққа тўла кўчириш мумкин эмаслиги деярли ҳамиша айни бир бадиий матннинг турли одамлар томонидан турлича қабул қилинишига сабаб бўлади. Деконструкцияда муайян матннинг рационал мағзини тушунишдан кўра, ундан иррационал маъно чиқаришга имкон борлиги билан кўпроқ қизиқилади. Яъни текширилаётган битикнинг тушунилиши эмас, балки матндан инсон тушуниб етмайдиган кирраларнинг намоён бўлиши кўпроқ эътиборлидир. Деконструктивистлар учун бадиий яратиқни ҳар қандай тушуниш азалий ва мангу хатодир, шу сабаб янгича талқинга ҳамиша эҳтиёж мавжуддир. Деконструкция ўз таҳлилининг-да шундай қисматга маҳкум эканини ҳам кўзда тутади.

Деконструкция матн таркибини шунчаки демонтаж қилиш эмас, балки бўлакланган бутунга янгича маъно юклаб, қайта тиклашдир. Бу кечимда муайян бадиий матндан кўра, у ҳақда шакланган қарашнинг демонтаж қилинишига кўпроқ эътибор қаратилади. Чунки ҳар қандай бадиий матн тўғрисидаги ҳар қандай одамнинг ҳар қандай фикри ҳар қачон қайта кўриб чиқилишга лойиқдир. Деконструктив синчилликда бирор бадиий матн изохи юзасидан сўнгги фикр айтилди, якунланган тугал талкин қилинди дейиш мумкин эмас. Унга кўра, ҳатто матн муаллифи ҳам ушбу асаддан шундай маъно чиқади дейишшга ҳақли эмас. Чунки адабий сўзнинг ҳар қандай қўлловчи, жумладан, муаллифга ҳам боғлиқ бўлмаган ўз яширин маънолари борки, бу ҳол ҳамиша деконструкцияга, яъни олдинги қарашни бузадиган янгича ёндашувга эҳтиёж ва имкон пайдо қиласиди. Деконструкцияда муайян матн битилиб, эълон этилгач, ҳар қандай муаллиф айни матнга таъсир кўрсатолмайди ва унинг учун йўқ ҳисобланади тарзидағи тўхтамни англатувчи “муаллиф ўлеми” деган қарашга таянилади.

Деконструкция назариясига кўра, адабий синчилар матндан жамият аъзоларига маъқул келадиган хulosалар чиқаришга уринмасликлари, балки матнга бир ўйин майдони сифатида ёндашиб, ундан янги-янги маънолар топишлари керак. Матнга бундай ёндашув синчига битикдан кутилмаган маънолар чиқаришнинг саноқсиз имкониятларини беради. Шу йўсинда матннинг ўзгармас ҳақиқати ҳам, олдиндан белгилаб қўйилган мақсади ҳам кўзда тутилмайдиган, ўйнаб қилинадиган ва ҳеч қачон тугамайдиган эркин талқин юзага келади. Деконструкцияда матнга талқинчи ёки муаллиф томонидан фикрий чегара белгилашга йўл қўйилмайди, сўнгги ва нуқсонсиз таҳлил бўлиши мумкинлиги инкор қилинади ҳамда ҳар қандай матндан иккиламчи маъно, яширин мазмун, ички зиддият топишга уринилади.

Деконструктивистлар бадиий тафаккурнинг ҳар қандай тизимида

объектив рационале ўқирман шуурига йўналтирилган мафкуравий стратегия мавжуд ҳамда у ҳамиша бадиий яратиқ тўғрисида ягона ва сўнгги ҳақиқатни айтишни даъво қиласи деб ҳисоблайди. Деконструкция учун матнда тасвирланган ҳаётий воқелик, яъни тилдан ташқаридағи борлиқ муҳим саналмайди. Чунки тилдан ташқаридағи реаллик ўз табиатига кўра ўткинчи ва омонатдир. Бунга кўра тафаккурнинг мафкуравий табиати ҳар қандай адабий матнда бир-бирига қарама-қарши бўлган учта куч: а) **муаллиф нияти;** б) **ўқирман англами ва в) матннинг маъноси тўқнашадиган майдонда намоён бўлади.**

Бирор битик муаллифи маълум тарихий даврда яшаётган одам сифатида муайян тилнинг табиатида олдиндан мавжуд бўлган тушунча ва тасаввурларни ўзича қайта идрок этиши билан тилнинг мавжуд тизимини бирламчи “деконструкция” қиласи. Аммо муаллифда ўз қарашларини тилда азалдан амал қилиб келинган шаклдан ўзгача тарзда ифодалаш имкони бўлмайди. Тил шахсиятлардан юқори турадиган куч сифатида муаллифнинг бирламчи нияти ифодаланишига ҳал қилувчи таъсир кўрсатади. У муаллиф ниятига таъсир кўрсатибгина қолмай, матнга бошқача мазмун юклаши, яъни муаллифнинг мафкуравий асосларини объектив йўсинда “деконструкция” қилиши ҳам мумкин. Постмодернизмда матнни таҳлил этишда ҳамиша кўл келадиган муайян миқдордаги қоида ёки ёндашувлар бўлмаслиги таҳлил ва тадқиқ йўсинларининг тинимсиз рационале ўзгариб туришини тақозо қиласи.

Деконструкция бадиий матннинг таҳлили ҳам, танқиди ҳам эмас. Унинг таҳлил эмаслиги шундаки, матн таркибини бузиш ва қайта қуриш олдинги ҳолатнинг ўзига шунчаки қайтиш ёки уни изоҳлашдан иборат бўлмай, балки унга янгича кўриниш ва оригинал мазмун бағишлиди. Деконструкциянинг танқид эмаслиги шундаки, бузиб қайта тикланган олдинги матн яроқсизга ҳам чиқарилмайди, инкор ҳам этилмайди, баҳоланмайди ҳам.

Деконструктив қарашга кўра борлиқдаги ҳар қандай мавжудлик озгина уриниш билан постмодерн санъат намунаси бўлиши мумкин, айни вақтда постмодерн санъат намунаси алоҳида мустақил мавжудлик эмас. Негаки, ҳамма нарсада бор нарса, айни бир нарса ҳолида йиғилмагани учун йўқ нарса ҳамдир. Деконструкциянинг мөхияти кўпинча таваккалига қилинадиган силжиш ва ўрин алмаштиришларда юзага чиқиб қолади. Аниқ ва қатъий белгилаб қўйилган ечимнинг йўқлиги; арзимас, майда, иккинчи даражали нарсаларга эътибор қаратиш ва ўйин қилиш орқали постмодерн санъатни юзага келтириш деконструкциянинг асосий белгиси ҳисобланади. Таниқли шоир Мухаммад Юсуфнинг эл орасида анча машҳур “Оқ тулпор” шеъри қизиқчи томонидан муайян ўзгартиришлар билан тамомила ўзгача ва арзимас мазмун ташийдиган битика айлантирилганки, буни бадиий матннинг постмодерн деконструкциясига яққол мисол дейиш мумкин. Ўша қизиқчи ҳазил эффект учун шеър матнига киригтан ўзгартиришлар натижасида постмодерн деконструкция юзага келганини хаёлига ҳам келтирмагандир, балки. Аммо объектив рационале олдиндан мавжуд матнга киритилган ўзгартириш орқали тамомила кутилмаган, олдингисига нисбатан тамомила бошқача маъно ташийдиган матн юзага келганки, бу деконструкция натижасида пайдо бўлган артефакт намунаси ўлароқ муайян киммат касб этади. Мавжуд матннинг қандай деконструкция қилиниши тўғрисида тўлиқ тасаввур бўлиши учун олдин шеърнинг асил матнини келтирамиз:

*Оқ тулпорим бор эди,
Беклар унга зор эди.
Оғайнилар, от менга
Хам дүсту ҳам ёр эди.*

*Ёлин үпсам тиз чүкиб,
Кафтимдан сув ичарди.
Чүх, десам ер чангитиб,
Осмонларга учарди.*

*Үйимизга бир оқшом,
Қариндошлар тұлишиди.
Түй баҳона отимдан
Айирмоқчи бўлишиди.*

*Отам: “Йигитсан, ўғлим,
Уйланмасанг, ор, – деди.
– Қиз ярашар құчоққа,
Отга нима бор”, – деди...*

*От олдидан бошланди
Чимилидикқа йўлакча.
Кечир, ёрим, на қиласай,
Отга меҳрим бўлакча...*

*Қолдим икки ўт аро,
Гўшангада – дилдорим.
Келин келган кечадан
Аразлади тулпорим.*

*Борми биздек ошиқлар,
Баҳоримда куз ииғлар.
Қизни үпсам, от ииғлар,
Отни үпсам, қиз ииғлар.*

*Бир бор үпсам хотинни,
Уч бор ўпдим отимни.
Жонни қийнаб яшадим,
Кимга айтай додимни.*

*Ёрдан кечдим отни деб,
Элга бўлдим эрмаклар.
Қайдан билсин от қадрин,
От минмаган эркаклар?!?*

“Оқ тулпор” шеърининг қизиқчи томонидан деконструкция қилиниб, янги маъно билдирадиган матни эса тубандагича:

*Бир булбулим бор эди,
Беклар унга зор эди.
Булбул эмас у менга
Хам дүсту ҳам ёр эди.*

*Үйимизга бир оқшом,
Қариндошлар тұлишиди.
Түй баҳона **булбулимдан**
Айирмоқчи бўлишиди.*

*Отам: “Йигитсан, ўғлим,
Уйланмасанг, ор, – деди.
– Қиз ярашар құчоққа,
Булбула не бор?” – деди...*

*Булбул билан бошланди
Чимилидикқа йўлакча.
Кечир, ёрим, на қиласай,
Булбула меҳрим бўлакча...*

*Қолдим икки ўт аро,
Гўшангада – дилдорим.
Келин келган кечадан
Аразлади **булбулим**.*

*Бир бор үпсам хотинни,
Уч бор ўпдим **булбулни**.
Жонни қийнаб яшадим,
Кимга айтай додимни.*

*Ёрдан кечдим **булбул** деб,
Элга бўлдим эрмаклар.
Қайдан билсин булбул қадрин,
Булбули йўқ эркаклар?!?*

Кўринадики, олдин яратилган, гарчи, бир қадар сунъий бўлса-да, дардчил ва хузунли шеър муайян қайта қуриш орқали тамомила ўзгача ва ҳазиломуз ножиддий матнга айланган. Бир вақтнинг ўзида ҳамма нарса ва ҳеч нарса бўлган деконструкцияда изчилик тақозо қилинмайди. Чунки у

үзини ҳар қандай тартибу қоидадан ташқарида ҳисоблайды. Шу боис оригиналдаги айрим бандлар тушириб қолдирилгани сингари, бир қанча сатрлар қўшиб ҳам юборилаверади. Янгиликларнинг осон йўллар билан юзага келишини истаган деконструкция кашфиётларнинг шу вақтга қадар мавжуд бўлган анъанавий босқичлари, концептуал ва институционал тартибларини тан олмайди. Анъанавий қадриятларни ўзгартириш оркали деконструкция кутилмаганда тилнинг моясида яширин тарзда мавжуд бўлган артефактнинг юзага чиқиб қолишига умид қиласди.

Деконструкция мумкин бўлмаган ишнинг бажарилишида намоён бўлади. У олдин ишланган бир қадар тугал бадиий яратикдан янги эстетик ҳодиса юзага келишини кўзда тутади. Ҳеч қандай мажбурий тизимнинг йўқлиги, нотугаллик, кўпвариантлилик, қоришиклик, мажоздан мажоз, хикоядан ҳикоя, таржимадан таржима юзага келтириш мумкинлиги сингари жиҳатлар деконструкциянинг эстетик тизими сифатида кўринади.

Тилдаги сўзларнинг ягона мазмундан мустақил бўлишини истаган деконструкция бу мустақилликни кўпчиликнинг телефон жиринглашига жавобан “мен фалончиман”, ё “фалончи эшитади” ёки “эшитаман” дейиши ўрнига “ҳа” ёхуд “алло” дегани каби асил мантиқдан узоқлашиб, ҳар сафарги сўзлашилаётган пайтнинг ўзигагина тегишли бир марталик функционал маънога эга бўлишда деб тушунади. Қизиги шундаки, ўша маъносиз сўзнинг “ҳа-ҳа” тарзида кераксиз такрори унга янги маъно бахш этиб, астойдил эшитаётганликни билдиради. Агар бу маънисизлик “ҳа, ҳа, ҳа” кўринишини олса, норозилик ва иddaони ифодалаши ҳам мумкин. Постмодернда сўзлар ўзи ташийдиган асил луғавий маънодан кўра муайян матнда биргина шу сафар ифодалаши мумкин бўлган маънода қўлланиши билан оригинал матнни юзага келтиришига дикқат қаратилади.

Фалсафий, тарихий ва бадиий матнларнинг қоришиқ ишлатилиши, илмий далил ва тўқиманинг ёнма-ён келавериши, жумлалар, сўзлар ва белгилар ўртасида уйғунлик йўқлиги, мулоқотнинг графика, тасвирий санъат, компьютер алоқалари каби нолингвистик шаклларини аралаш қўллаш натижасида сунъий тафаккур, компьютердаги маълумотлар банки ёхуд матн яратадиган машинада тўпланган маълумотлар жамғармасига ўхшаб кетадиган **гиперматн** юзага келтирилади. Гиперматн ичida илмий, фалсафий ва бадиий тил унсурларининг бир-бирига бемалол ўтиб кетавериши натижасида деконструкциянинг **метатили** юзага келади. Метатилда анъанавий тарзда мавжуд бўлган тил ва нутқ, нутқ ва ёзув, ифодаланувчи ва ифодаловчи, матн ва маъно, диахрон ва синхрон каби кўплаб қўшоқ (бинар) тушунчалар орасидаги қарама-каршиликни англатувчи фарқ йўққа чиқиб, улар аралаш қўлланилаверади. Сўзда олдиндан белгилаб қўйилган тушунилиши зарур маънонинг йўқлиги, мантиқ ва грамматиканинг қолипларига бўйсуниш мажбурий эмаслиги постмодерн ижодкорга матн стихиясига теранрок шўнғиши имконини беради.

Деконструкцияда сўздан маъно қидиришдан кўра унга белги сифатида ёндашиб, ҳар сафар унга истеъмолчи (рецепиент-ўқирман)нинг ўзи маъно юклashi маъқул кўрилади. Шунда сўз бир маъно теграсида қотиб қолмай, ҳар сафар қайсиdir бир янги жиҳати билан жилваланавериши қайд этилади. Бундай қарашга кўра сўз нарса бўлолмагани ва унинг ўрнини босолмагани холда ундан олдин юради ва юқори туради. Сўз эркин бўлиб, ҳар ишлатилганда нега шундай қўлланилгани асосланиши шарт бўлмай, қаерда қандай ишлатилса ҳам ўз ўрнига тушган саналаверади. Айтилаётган сўзнинг англатаётган нарсаси бўлиши мутлақо шарт эмас. Шу тариқа сўзнинг идеал

дунёси нарсаларнинг моддий олами билан боғланмайди. Бунинг натижасида белги, яъни сўзнинг функцияси торайиб, ўзининг илк асоси бўлмиш нарсадан узоқлашади ва айни вақтнинг ўзида янги сифатга эга бўлиб, иккинчи оригиналликни юзага келтиради. Яъни сўз ўзининг бирламчи маъносидан шу қадар йироклашади, у ифодалайдиган янги маъно ўз ҳолича аҳамият каасб эта бошлади.

Деконструктив назарияда ёзув марказий ўрин эгаллайди, мантиқан иккиламчи ҳодиса бўлмиш ёзув деконструкцияда бирламчи воқеликка айланади. Сўз нарсани, ёзув эса сўзни англатади, товушлар воситасидаги фонетик англатувчи бўлмиш сўзнинг график ифодаси, яъни белгининг белгиси ўлароқ икки бор иккиламчи бўлган ёзув янги тизим сифатида тилнинг асосий функциясини ўз зиммасига олади. Нутққа қарагандা ёзув белгиларининг алоқа имкониятлари кенгроқ экани туфайли деконструктив ёндашувда у тафаккурнинг рамзий модели сифатида нутқдан муҳимроқ саналади.

Матнни сўнгсиз тарзда таҳрир ва талқин қиласвериш мумкинлиги натижасида ёзувчи ҳам ўз битикларининг ўқирманига айланаб, бадий ишлаб чиқариш билан эстетик истеъмол ўртасидаги фарқ йўққа чиқади. Ёзувчи тинимсиз ўзгаришларга маҳкум маҳсулотнинг яратувчисигина эмас, истеъмолчисига ҳам айланади. Муаллиф билан ўқирман ўртасидаги чегаранинг омонатлиги, уларнинг ўзаро ўрин алмашишлари мумкинлиги ёзув деконструкциясини тақозо қиласди. Мавжудлик мөхиятдан олдин бўлгани учун инсон ҳаётининг маъноси ўтмишга қаратилиб, бугун четроққа суриласди. Бу ҳолни олдин ёзилган китобни бугун ўқиган киши учун тил диахронлиги билан нутқ синхронлиги ўртасидаги фарқнинг йўқолишига ўхшатиш мумкин. Ёзилган нарса билан унинг ўқилиши ўртасида ҳамиша қандайдир вақт оралиғи бўлиши замоний деконструкцияни келтириб чиқаради. Яъни аслида мавжуд бўлган матн уни ўқиган одам учун бор, ўқимаган киши учун эса йўқ. Шу тариқа бор нарса билан йўқ нарса бир нарсага айланаб, ўртадаги фарқ йўқолиб боради. Деконструкция борни йўқликка, йўқни борликка айлантириш орқали янги борлик яратишни кўзда тутади.

Ёзиш билан ўқиш, сўзлаш билан тинглаш ўртасидаги доимий оралиқ ва фарқнинг мавжудлиги бадий тилнинг исталган унсуруни, қисмини ўзга бир тарихий, сиёсий, ижтимоий, маданий, эстетик маконга кўчириш ёхуд хеч қандай макону замонсиз кўллаш имконини беради. Бу сўзни кўлловчи киши аслан кўптаркибли ҳодиса бўлмиш матннинг металингвистик очқичини топиб, ундан айни вазиятга керакли янги маъно чиқаришнинг чексиз имконига эга бўлади.

Аён бўладики, деконструкция бадий матнга муносабатда адабий амалиётни танқидий амалиётдан фарқламаслик; адабий битикни ёзиш ва ўқиши вақтидагина намоён бўладиган субъект ҳисоблаш; матнга муносабатда “муаллиф ўлеми” концепциясига суюниш; адабиётнинг реал борликни акс эттиришини инкор қилиш кабиларни кўзда тутадиган эстетик ёндашув тарзидир. Бу ўзига хос бадий-эстетик ўйинга кўра синчи текширилаётган матндан келиб чиқадиган объектив маънодан йироқ тургани ҳолда бу матнга бирор-бир маъно юклашга уринмаслиги ҳам керак. Синчининг вазифаси матнга текшириладиган объект эмас, балки ҳар лаҳзада ўзгариши мумкин бўлган субъект сифатида қараб, тил воситаларидан фойдаланган ҳолда уни қайта яратиш ва янги “жон” ато этишдан иборатдир.

Рамзийлик. Постмодерн эстетикада рамзийлик тушунчаси ҳам ғоят муҳим ўрин тутади. Ҳатто, айтиш мумкинки, постмодерн адабиёт учун сўзнинг ўз маъносидан кўра рамзий маъноси муҳимроқ саналади.

Матннинг ўз ва күчма маънолари ўртасидаги айирма баъзан замоний оралиқ борлигидан келиб чиқади, яъни ифода этилган маъно кўзда тутилганидан олдин келади. Гоҳида фарқлар **лингвистик** асосга эга бўлади, яъни асил маъно сўзга таянади, рамзий маъно эса оҳанг, бирор жумла ёки бутун асарнинг ўзи орқали ифодаланади. Айрим ҳолларда сўзнинг ўз ва рамзий маъносидаги фарқ **матнни идрок этиши йўсинидан** келиб чиқади, яъни ифодаланган маъно грамматик қоидаларга мувофиқ қабул этилади, кўзда тутиладиган маъно эса ўқирман томонидан контекстдан келтириб чиқарилади. Ушбу айрималар туфайли матнни тўғри тушуниш билан уни рамзий идрок этиши ўртасидаги фарқ пайдо бўлади.

Постмодерн эстетика сўзнинг ўз маъносини ҳисобига кўчма маъносини инкор этишини ҳам, ёки аксинча, кўчма маъно ҳисобига ўз маъносини тан олмасликни ҳам нотўғри ҳисоблайди. Биринчи ёндашув эмпиризмни, иккинчиси эса дорматизмни пайдо қиласиди деб қарайди. Тилнинг рамзийлиги ана шу икки маъно ўртасидаги фарқдан келтириб чиқарилади. Масалан, “Бу ер совуқ экан” деган ифода ўз маъносида ҳаво даражасининг пастлигини англатса, кўчма маънода эшикни ёпиш кераклигини билдириши мумкин. “Кун ёниб кетяпти” дейиш күёшга ўт кетганини эмас, балки куннинг ўта исиб кетганини англатади. Рамзийлик фақат тил орқалигина юзага чиқмайди. Бу транслингвистик ҳодиса сўздан ташкари, имо-ишора ва вазият орқали ҳам пайдо қилиниши мумкин. Шунинг учун ҳам структурал адабиётшунослик назариётчиси Ролан Барт рамзнинг образга тенг ҳодиса эмас, балки фикру карашлар хилма-хиллигини англатувчи тушунча эканини алоҳида таъкидлайди.

Профессор Ҳ. Болтабоев рамз ва рамзийликка хос белгилар тўғрисида ёзди: *“Рамз ... фақат шартли равишида ва шу матн доирасида кўчма маъно касб этувчи сўз ёки сўз бирикмаси; образлилк тури. Рамз мөхияттан аллегорияга яқин, ундан фарқи шуки, рамз контекст доирасида ҳам ўз маъносида, ҳам кўчма маънода кўлланади. Рамзнинг маъносини контекст доирасида ва шартдан хабардорлик бўлганда реаллашади. Чўлпон шеъриятидаги “юлдуз”, “булут”, “баҳор”, “қиши” образлари рамзнинг ёрқин мисоли бўла олади. Жўмладан, машҳур “Қаландар ишқи” шеърини ишқий мавзудаги шеър сифатида тушунаверии мумкин. Бироқ ундаги рамзлар қатида бошқа маъно ҳам мустақил ҳолда мавжуд бўлиб, уни ўз вақтида шоирга руҳан яқин кишилар яхши тушунишган. Сабаби улар рамзларнинг маъносини англашиладиган контекстдан – шоирнинг ҳаёт йўли, орзу-интилишлари, шеър ёзилган пайтдаги руҳий ҳолати ва ҳоказо омиллардан хабардор бўлганлар”*. Рамзийликда сўз, ишора ва ҳолатни турли маъноларда кўллашнинг чексиз имкониятлари мавжуд бўлади. Рамзийликда сўзни тушуниш билан биргаликда ишорани кўзда тутиш тақозо қилинади.

Рамзни кўллаш ва тушуниш бир ҳодисанинг икки томонидир. Бирор матн ёки ифода уни англаш ҳамда талқин қилиш орқали кўчма маъносини аниқлангандағина рамзийлик касб этади. Темур ҳақидаги ривоятлардан бирида Дамашқ шаҳрини забт этолмаётган жаҳонгир Бибихонимдан кўмак истаб, хат жўнатади. Хоним хожасига жавоб мактубида: “Эски оғочларни кесиб, ўрнига янги кўчатлар ўтқазиши керак” лигини ёзиб юборади. Ишорани англаган соҳибқирон улуг ёшдаги лашкарбошиларни ғайратли ёшлар билан алмаштиради ва шаҳар тезда забт этилади. Юқорида деконструкция қилинган ҳолати берилган “Оқ тулпор” шеъридаги “булбул” сўзининг

¹ Болтабоев Ҳ. Адабиёт энциклопедияси. – Т.: “Mumtoz so’z”, 2014. 290-бет.

қизиқчи кўзда тутган рамзий маъносини билмаслик янги матн мазмуни ни йўқка чиқаради. Рамз тушунилганда гина ва тушунган киши учунгина қиммат касб этади. Англанмаган рамзийлик фойдаланилмаган имконият кабидир. Кўринадики, рамзийлик постмодернизм гагина боғлиқ ҳодиса бўлмай, унинг тарихий илдизи жуда қадим замонларга бориб тақалади. Лекин постмодерн дагина бадиий матн тўлигича уни ташкил этган сўзлар замидаги рамзга асосланадиган бўлди.

Рамзийликнинг асосий хусусияти ундан жўяли маъно чиқариш мумкинлиги ҳисобланади. Мисол учун, Ўкта Ботирдан банқда ишлаётган Ўринбойнинг ахволи қандайligini сўрайди. “Хозирча қамалгани йўқ”, – деб жавоб беради Ботир. Бир қарашда бундай жавоб – тамомила ўринсиз. Агар айтилган гапдаги ишорадан маъно чиқара билинса гина, у салмоқли мазмун касб этади. Ботирнинг ўйича, Ўринбой – қаллоб ва таъмагир одам. Бинобарин, у – қачондир ўша иллатлари учун жазосини олиши керак. Кўринадики, рамзий нутқ ҳамиша ўзига хос жўяли асосга эга бўлади. Рамз билан кимдир макталса, у кимгadir намуна қилинган бўлади, агар гаплашиб ўтирганлардан соат неча бўлгани сўралса, сухбат чўзилиб кетгани, тарқалиш кераклиги англашилади ва ҳоказо. Постмодерн асарларда рамзинг шу жиҳатларига алоҳида эътибор қаратилгани айни бир матннинг ҳар бир ўқирман томонидан тамомила ўзгача тушунилиши мумкинлигига йўл очади.

Иирик шоир Абдували Қутбиддиннинг кўйидаги мисраларида ҳам поэтик образлар рамзийлик асосга қурилгани яққол кўзга ташланади:

*Субҳлар ҳўплайди патли ҳавони,
Бир кун ёлғончилик қиласди апрель,
Мен сенинг келишинг ҳеч истамайман,
Бироқ кел.*

Бу сатрлардан маъно чиқариш учун апрелнинг бир куни, тўғрироғи, 1 апрель ҳазил ва юмор куни эканини билиш керак бўлади. Ўша куни сўйланган ёлғонлар ҳазил ўрнида қабул қилинади. Шу боис шоир суюклисига: “...сенинг келишинг ҳеч истамайман”, – дейди. Кейинги қатордаги “**Бироқ кел**” гапи эса икрор билан ифода ўртасидаги ноуйғунликдан чиқарилган образли тасвир. Шу шеърдаги “**Жарангдор сочинг ҳам бўлар пўпакли**” ифодаси ҳам ундаги рамзлар англаб етилганда гина маъно ва қиммат касб этади. Сочнинг жарангдорлиги – унинг қўнғироқ, яъни жингалаклигига ишора. Маълумки, қўнғироқнинг вазифаси – жаранглаш. Хуллас, постмодерн матн деярли ҳамиша шу сингари рамзларга асослангани билан ажralиб туради.

Постмодерн матнга рамзий маъно юклашда айтилган ва айтuvчи, киноя, интертекстуаллик, экстратекстуаллик ва интратекстуаллик сингари тушунчалар муҳим ўрин тутади. **Айтилган** тушунчаси нутқнинг мазмуни ва объектини англатса, **айтуvчи** унинг субъектини билдиради. Айтилган билан айтuvчи ўртасидаги боғлиқлик онгли ёки онгсиз, эркин ёки мажбурий бўлиши мумкин. Ёзувчи Нуруллоҳ Муҳаммад Рауфхоннинг “Этақдаги кулба” ҳикояси қаҳрамони бўлмиш Девонанинг: “**Уйи қуйган ким бор?.. Моли қуйган ким бор?.. Бағри қуйган ким бор?..**” тарзидаги сўзларининг Жимжиткишлөк аҳлини таҳлика га солишида ана шу хил рамзийлик акс этган. Фақат айтuvчининг сўзлари орқали қишлоқ аҳлининг ҳам уй, ҳам бойлик ва ҳам кўнгилдан маҳрум, ўзини танимайдиган, шахслик киёфаси-ю инсоний орзу-истаклари йўқ фаолиятсиз тўда экани ифодаланади.

Постмодерн эстетикада тилнинг одамга хос кўринмайдиган ва эшитилмайдиган фикру туйғуларни вербаллаштириш ва визуаллаштириш, яъни сўз ҳамда ёзувга айлантириш орқали эҳтирослар тўлқинини бир қадар юмшатиб, ижтимоий муносабатларни уйғунлаштириш қудратига эга бўлган жиҳатига алоҳида эътибор қаратилади. Чиндан ҳам одамга тегишли бўлган ҳар қандай муаммо сўз билан ҳал этилиши мумкин. Мусулмон учун “Оллоҳдан бошқа илоҳ бўлма” ганидек, постмодерн эстетика учун “сўздан бошқа сўз йўқ” дир. Чунки постмодерн эстетика бадиий матнда ўтмишни ҳам, ҳозирни ҳам, келажакни ҳам, “мен”ни ҳам, “сен”ни ҳам, “у”ни ҳам кўриш мумкин деб хисоблайди.

Интертекстуаллик асосида муайян битикдаги тасвир ва ғоянинг тамомида ўзга матнлардаги шунга ўхшаш тасвир ва ғоялар билан уйғунлашиб кетиши туради. Бундай уйғунлашув адаби Т. Рустамовнинг бир қадар постмодерн хусусиятларга эга “Капалаклар ўйини” романида “Бақаҳовуз ҳақиқати” газетасини тилга олиш орқали шу типдаги барча зерикарли расмий газеталар кўзда тутилиши ёки шоир Турсунбой Адашбоев томонидан бадиий жиҳатдан бўшроқ шеърларга тақлидан битилган пародиялар кўринишида бўлиши мумкин. Интертекстуал матнлар ҳам ўз ҳолиша оригинал матн, ҳам ўзида ишора қилинаётган матнга хос хусусиятларни ташийдиган матнлик хусусиятига эга битиклардир.

Экстратекстуаллик эса Фарҳод комилликнинг, Лайли ва Мажнун севгининг тимсоли бўлгани каби бадиий матндаги бирор тасвир ёхуд персонажнинг ҳеч қандай изоҳларсиз универсаллик мақомига кўтарилиганини англатиш хусусиятига эгалигини билдиради.

Интратекстуаллик бадиий матндаги барча воқеалар тугуни матнда тасвирланаётган персонажлар табиатининг ўзига яшириб қўйилган бўлишини англатади. Бу ҳолат таниқли адаби Хуршид Дўстмуҳаммаднинг “Куза” қиссасидаги ҳам ўзини, ҳам яқинларини, ҳам бошқаларни кузатишга, бир вақтнинг ўзида ҳам ўзи, ҳам яқинлари ва ҳам бошқалар томонидан кузатилишга маҳкум Умид тимсоли тасвирида бир қадар намоён бўлади. Ёш ёзувчи Носир Жўраевнинг “Ноябрь куйи” қиссасидаги бош қаҳрамон тимсоли ҳам шу йўсинда яратилган.

Постмодернизм учун тил, нутқ ва санъатда намоён бўладиган рамзийлик реал воқеелик ва у пайдо қиласидаги тасаввурга нисбатан бирламчи ҳодиса саналади. Рамзийлик одам турмуши ва тафаккурининг ибтидоси ўлароқ унинг ҳаётида улкан ўрин тутади. Одам унга от қўйилганидан, яъни сўз орқали универсум – атроф-олам билан мангу алоқага киришиши белгилаб қўйилганидан кейингина одам саналади. Тилнинг энг асил, рамзий вазифаси ҳам одамнинг турли даража ва ҳолатлари мавжудлигини ифодалашдан иборатдир.

Киноя. Постмодерн эстетикада алоҳида қиммат касб этадиган киноя сўздан ўз ҳолиша келиб чиқиши керак бўлган маънонинг тескариси билан алмаштириб қўйилишидан юзага келадиган ҳодисадир. Қор бўралаб уриб турган совук кунда: “Бугун ҳаво қандай ажойиб!” – дейилса, об-ҳавонинг ҳолатига киноя қилинган бўлади. Кўпинча постмодерн адабий киноя асосида кимнингдир айтилмаган фикридан ёлғон узинди (кўчирма) келтириш ётади. Италиялик улкан ёзувчи Умберто Эко машхур “Атиргул исми” номли постмодерн романида айтилмаган гаплардан шундай сохта узинди келтириш усулидан ўринли фойдаланган. Аслида-ку киноя – бадиий адабиётнинг ҳамишалик йўлдоши. Халқ оғзаки ижоди асарларидан тортиб, мумтоз адабиёт намуналаригача, ундан янги ўзбек адабиётининг Ғафур Ғулом,

Абдулла Қаҳхор, Мурод Муҳаммад Дўст, Эркин Аъзам сингари вакиллари томонидан яратилган кўплаб битикларда киноя усули етакчилик қилгани яққол кўринади.

Постмодерн кинояда олдин эшитилган эртакни тескари талқинда қайта эшитишдай қабул этилиши кўзда тутилади. Шу тариқа постмодернизм юксак санъат билан кўнгил очиш ўртасида мавжуд бўлган деворни йиқиб, реализм-нинг ирреализм билан, “шаклбозлиқ”нинг “мазмунбозлиқ” билан доимий олишувидан баландроқ туришга уринади. Айтилганидек, постмодернизм санъатни косибчилиқдан, ноёб ва бетакрор матнни оммавий битикдан ажратмаслик орқали санъатни оммага яқинлаштиришни кўзда тутади. Бу ҳол санъат асарларида фабула, сюжет, инжа ифодалар бўлиши ва уларнинг одамларга эстетик завқ бериши каби азалий жиҳатларни инкор этмайди.

Постмодерн киноя кўпинча мавжуд вазиятдаги этишмовчиликларни ўз юксаклигидан туриб, қайта идрок этишни кўзда тутади. Буни билимли йигитнинг ўта ўқимишли суюклисига ўз туйғуларини ифодалаш ҳолатига менгзаш мумкин. Йигит қизга сариқ матбуотда узлуксиз босилаётган ишқий ҳикоя ва қисса қаҳрамонларига хос сийқа ва сохта йўсинда: “Сизни жондан ортиқ севаман”, – деб айтгиси келмайди. Қиз ҳам йигитнинг юкоридаги тарзда изҳори дил қиломаслигини ичдан билиб туради. Мавжуд вазиятдан чиқиб кетиш учун йигит: “Газеталарда чиқаётган ишқий қисса ва ҳикоя қаҳрамонлари айтганларидек: “Мен сизни жондан ортиқ севаман”, – дейиши мумкин. Шу аснода у ҳам суйган қизига кўнглидаги истакни билдиришнинг, ҳам дил изҳорини қолипга соглан ҳолда айтмасликнинг, ҳам ўқимишли ва билгич қизга туйғулар ифодаси қолипга туширилган даврда яшаётганини сездиришнинг, ҳам ўзига бу ҳолат ёқмаслигини англатишнинг эпини қилган бўлади. Агар қиз ҳам йигит бошлаган ўйинни давом эттирса, ўз-ўзидан севги изҳори ва унга берилган жавоб юзага чиқади. Бу ўринда сариқ матбуот нашрларига жиҳдий киноя ҳам амалга ошади. Севишган кишилар бир-бирларига умрида бир марта ва фақат ҳозир айтишлари керак бўлган самимий гап матбуот воситалари қаҳрамонлари тилида ҳар куни ишлатида вериб, сийқаси чиққан ва бу ҳолатнинг зуғумидан қутулиш имконсиз. Шу боис биз мисол қилиб келтирган ёшлар бир-бирларига ўз кўнгилларидағини киноя йўли билан англатишга мажбур бўладилар.

Симулякру. Бу атама постмодерн адабиётта хос хусусиятлар муносабати билан кейинги вақтда тез-тез тилга олинаётган бўлса-да, аслида жуда узоқ тарихга эга эски ҳодиса. Мимесис назариясига боғлиқ бўлган бу атама қадимда машҳур тимсолларга ўҳшаган, аммо катта бадиий таъсири кучига эга бўлмаган образни англатган. Классицизм, маърифатчилик, романтизм оқимлари даврида симулякру тушунчасига борлиқнинг муқобили, ўйин тарзидаги маънолар юкланиши натижасида у бора-бора имитация, сохталик, муғомбирлик маъноларида кўлланиладиган бўлди. Ушбу тушунчанинг янги, замонавий умри бир қатор азалий бадиий-эстетик тушунча ва атамаларга ҳам ноклассик маънолар берилган XX асрнинг 80-йилларидан бошланди.

Тимсол, ўхшашлик маъносини билдирувчи лотинча “simulacrum” сўзидан келиб чиқиб, ўлармонлик, жонсўхталиқ, муғомбирлик, қалбакилик маъноларини англатувчи “simulantis” (симулянт) сўзидан олинган “симулякру” атамаси постмодерн эстетикада борлиқнинг муляжи, нусхаси; ҳақиқатга жуда ўхшаш сохталик, эстетикадан бадиий образни сикиб чиқариб, ўрнини эгаллаб олган куруқ шаклдан иборат ҳодисани англатади. Ушбу тушунчанинг постмодерн эстетикада тутган ўрни шунчалик салмоқлики, баъзан бу ҳодиса бутунисича симулякру эстетикаси дейилади ҳам. Симулякру постмодерн ар-

тефактларнинг ўйноқи табиатидаги иккиланганликни, “соянинг нусхаси” маъносини акс эттириши билан ажralиб туради. Француз адабиётшуноси Жан Бодрийяр ўтган асрнинг 80-ийларидан эътиборан қадимий симулякр тушунчасини постмодерн эстетикада ҳозирги маънода қўллай бошлаган.

Бодрийяр истеъмолчилар жамиятининг эстетикасини текшираН экан, инсоннинг кундалик хаётида тутган ўрни ва фойдаланилиш даражасидан келиб чиқиб, нарсаларни: 1) **функционал** (истеъмол қилинадиган) нарсалар; 2) **нофункционал** (антиквариат, бадиий коллекциялар) нарсалар; 3) **метафункционал** (ўйинчоқ, безак сингари кераксиз, лекин чиройли) нарсалар тарзида уч турга ажратади.

Постмодерн эстетикада симулякр табиий ва асл нарсанинг техник ишлов бериш орқали ўзгарган шаклда мимесисга қайтарилганини, сунъий нусхаси билан алмаштирилганини билдиради. Истеъмол ишлаб чиқаришдан ўзб кетади, нақд пулнинг ўрнини кредит деб аталувчи кўринмас ақча – хусусий мулкнинг симулякри эгаллайди. Борган сари тушуниб бўлмас алламбало кўринишларда нозик, бежирим ва омонат тайёрланаётган нарсалар авлоди одам авлодига қараганда жуда тез алмашади. Нарсалар олдингидай ўсимлик (флора) ёки жоноворлар (фауна) каби кўзга кўринадиган ва тирик яратикларга эмас, балки ҳаво, булат ва сув сингари шаклсиз ва жисмизиз нарсаларга ўхшатиб яратиляпти. Улар борлиқдаги реал нарсаларга эмас, балки тобора тушда кўрилган ёки хаёлда гавдалантирилган ҳаётда йўқ нарсаларга ўхшаб бормоқда.

Маиший турмушдаги бу ҳолат маданий ҳаётга ҳам кўчиб ўтмоқда. Истеъмолнинг чеку чегараси йўқолган ҳозирги шароитда маданият ва санъат уларнинг симулякри бўлмиш маданият ва санъат ғояси билан ўрин алмашяпти. Постмодернизмда бугундан кўра ўтмишга, тарихга эътибор катталигини маълум даражада шу ҳолат билан ҳам изоҳлаш мумкин. Негаки, ўтмиш ва эски нарсалар асилилк, яъни аутентлик намуналаридир. Шу сабаб постмодерн адабиётда олдин яратилган асил матнларга қайта-қайта мурожаат қилинади. Реаллик моделга айланиб бораётган постмодерн шароитда борлик билан унинг белгилари ўртасидаги ихтилоф симулякр ёрдамидагина бартараф этилиб, санъатгина асллик мақомини ушлаб тура олади деб қаралмоқда.

Симулякр тобора “йўқолиб бораётган” реаллик ўрнини постреаллик воситасида босмоқчи бўлаётган, реаллик ва тасаввур ўртасидаги фарқни ювиб юборишга, йўқликни борлик тарзида қабул этдиришга хизмат қиласидиган ясамаликдир. Анъанавий бадиий тизимларда образга мансуб бўлган ўринни постмодерн эстетикада симулякр эгаллайди. Агар образлилик тасаввурни ўйғотадиган реаллик билан боғлиқ бўлса, симулякр иккинчи босқичдаги янги реалликни туғдиради. Симулякрни юзнинг табиий чизгилари ўрнини сунъий эстетик код, моделга алмаштирувчи маҳорат билан ясалган театр ниқобига ўхшатиш мумкин. Анъанавий эстетик кодларни рекламага хос тамойиллар асосида жойлаштириб, объектларни мифологик тамойиллар асосида қуришга уринадиган симулякр қандайдир табиий муҳит, маданий вазият яратиш мақсадида санъатнинг иккиламчи вазифаларини биринчига айлантириб, уни дизайнлаштиришга хизмат қиласиди.

Матннинг объектив маъносини инкор этиб, уни идрок этиш, истеъмол қилишнинг чегарасиз тарзда индивидуал ва бетакрор бўлиши мумкинлигини илгари сурадиган симулякрга хос жиҳатларни қуидаги йўсинда умумлаштириш мумкин:

– матнни идрок этишнинг нотўғри йўналтирилиши; бадиий объектнинг моҳиятини англишга жиддий киришиш ўрнига унга ўз “мен”ига хос

жиҳатларни тиқиширишга уриниш ва уни ўз эхтиёжларига бўйсундириш майлидан келиб чиқиб, майший-прагматик ёндашув етакчилиги;

– истеъмолчи субъектда адабий объектни уни ташкил этган унсурлар бирлиги ва яхлитлигидан кўра олиш қобилияти йўқлиги натижасида объектнинг бетакрорлиги, бутунлиги, қиммати борасида тўғри тасаввурга эга эмаслик;

– бадиий объект таркибидаги ўзига хосликнинг эстетик қимматини тушунмаслик ва тўғри баҳолай олмаслик.

Субъект томонидан объектни акс эттиришда классик эстетикада таяниладиган “эзгулик тамойили” постмодерн эстетикада “ёлғон тўғрисидаги ҳақиқат” сифатида кўпроқ “ёвузлик тамойили”га ёвуқ келади ҳамда санъатнинг гедонистик ва ўйинга хос жиҳатларига устуворлик беради. Юксак эстетик туйғу, хиссиёт, тасаввур, дид сингари тушунчалар орқага сурилиб, истеъмолчилик талабларини қондириш олдинга чиқарилади. Воқелик ва санъат ҳодисаларига классик ёндашувнинг бекор бўлиши, гўзаллик ва хуруклик ўртасидаги қарама-қаршиликнинг йўқолиши натижасида асил билан ясаманинг фарқига борилмайдиган симулякр постмодерн бадиий-естетик тизимидағи ягона реалликка айланади. Санъат ва адабиётда артефактнинг симулякрашиши натижасида шаклнинг ўзи ягона мазмун саналади. Ўзбек адабиётида симулякр ҳодисаси деярли юз кўрсатмагани учун унга мисол келтириш қийинdir. Мухаммад Юсуфнинг “Оқ тулпор” шеъридаги от образи ўрнига кўлланилган булбул тимсолини симулякр тушунчасига мисол дейиш мумкин.

Артефакт. Постмодерн эстетикада мухим ўрин тутувчи ушбу тушунча лотинча “artefactum” қўшма сўзидан олинган бўлиб, arte – сунъий, factus – ясалган маъноларини англатиб, табиий шароитда юзага келиши, ё мутлақо мумкин бўлмаган ёки даргумон бўлган ҳодиса, кечим, нарсани англатади. Оддий англамда артефакт – одам фаолиятининг натижасида кутилмагандан юзага келиб қолган оралиқ яратиқ. Замонавий эстетика ва санъатшуносликда бу атама бугунги арт-амалиётчи ёхуд арт-лойиҳачилар фаолиятининг маҳсулни бўлиб, тур ва жанрлар ҳақидаги анъанавий қарашларга сифмайдиган тасодифий эстетик яратиқларни англатади.

Артефакт замонавий инсон фаолиятининг турли соҳаларида ўзаро бирбиридан фарқли маъноларда кўлланилади. Жумладан, маданиятшуносликда сунъий тарзда яратилган қандайдир ижтимоий-маданий ахборот, ҳаётий-маънавий қадрият, мулоқот воситаси; маданиятнинг моддий, маънавий, одамлараро муносабат сингари уч асосий тармоғидан бирига тегишли бўлган нарсани англатади. Адабиёт ва санъат соҳасида эса кутилмагандан юзага келиб қолган ва муайян жисмоний хусусиятлардан ташқари, рамзлик, белгилик мазмунига эга ҳар қандай объектни билдиради. Бизни артефактнинг айни шу жиҳати қизиқтиради. Рус адабиаси Т.Саломатина “Менинг одессача тилим” асарида **“Эндиликда бел кўтарган ақлии эркакни кўриш артефактдир”**, – дейди¹. Буни ўзбекчада: “Эндиликда бел кўтарган ғайратли эркакни кўриш мумкин бўлмайдиган ишдир” тарзида ифодалаш мумкин. Демак, санъат ва адабиётда артефакт кутилмагандан юзага келиб қоладиган ноёб ҳодисани англатади. Постмодернизмда бадиий матндан ўқирманинг мутлақо кутилмаган, муаллифнинг хаёлига ҳам келиши мумкин бўлмаган маъно чиқаришга, яни артефакт юзага келтиришга эътибор қаратилади.

Адабиётнинг бирор жанрида яратилган асарнинг адабиёт ёки санъатнинг бошқа жанр ва турида қайта яратилиши ҳам артефактга мисол бўла олади. “Илҳом” театри томонидан Навоий қаламига мансуб “Сабъаи сайёр” аса-

¹ Соломатина Т.Ю. Мой одесский язык. – Москва: “Художественная литература”, 2011. С. 25.

рининг “Етти мөх” номи билан, А.Қодирий хикояларининг “Оппоқ, оппоқ, қора лайлак” тарзида, Навоий, Гёте ва Темур Зулфиқоров асарларининг айрим жиҳатларидан фойдаланган ҳолда “Трактирдаги тун” номида яратилган спектакллар артефактга яққол мисол бўлади. Тўғри, бу хил асарларда тасодифийликдан кўра мақсадлилик етакчилик қиласади.

Постмодерн эстетикада артефакт санъатга ноклассик муносабатларга ўтиш давридаги санъат ва адабиётда қилинаётган тажрибалар маҳсулни тарзида тушунилди. Бадиият тўғрисидаги анъанавий тушунчалар ёрдамида артефактнинг қимматини баҳолаб бўлмайди. Чунки унинг ўзи камдан-кам ҳоллардагина бундай қимматга эга бўлади.

Спектакль давомида бирор актёр томонидан пьеса матнида бўлмаган сўзнинг тасодифан ишлатилиши ёки режиссёр кўзда тутмаган имо-ишора, хатти-харакат қилиниши ҳам артефакт саналади. Постмодерн назария ва амалиётда ҳар қандай адабий матн ёки санъат ҳодисасига дахл қилиш орқали ундан муаллиф кўзда тутмаган артефакт маъно чиқариш алоҳида рағбатлантирилади. Шу сабабли “Илҳом” театри спектаклларида Навоий, Қодирий, Гёте сингари муаллифларнинг хаёлига ҳам келмаган, бизнинг назаримизча, ўринсиз ва мутлақо нотўғри ҳолатлар бўй кўрсатаверади.

Артефакт марказида асил субъект, яъни яратувчи эмас, балки объект, яъни нарса турди, бетакрорлик ва ноёблик эмас, балки қайтариқ ва иккиламчилик етакчи бўлади. Постмодерн артефакт бу талқин генератори, ўтмиш маданиятини интертекстуал идрок этиш омилидир. Артефактни ўтмиш ва бугунги маданият ўргасида тўхтовсиз юриб турган ўзига хос соат капгирига ўхшатиш ҳам мумкин.

Кич. Постмодерн эстетикада фаол қўлланиладиган бу атама олмонча kitsch – палапартиш, қўл учида қилинган ва арzon сотиладиган маҳсулот маъносини беради. У – кўпчилик учун шоша-пиша тайёрланган, аммо дикқатни тортадиган сирти ялтироқ товар. Кич илк бор Олмонияда XIX асрнинг иккинчи ярмида амалий санъатга доир бетакрор асарларни саноат асосида ишлаб чиқаришга киришиш туфайли юзага келган. Ушбу мамлакатда 1860 йилдан эътиборан америкаликлар учун Оврўпонинг юксак санъат асарларига ўхшайдиган маданий товарларни оммавий равишда тайёрлаш ва кўргазмалар орқали сотиш йўлга кўйилди. Кейинчалик “кич” атамаси ва ҳодисаси адабиёт, мусика, театр, архитектура, кинематограф, телевидение сингари санъат тармоқларига ҳам ёйилди.

XX асрнинг 60–80-йилларидан эътиборан кич оммавий маданиятда кенг тарқалган ҳодисага айланди. У, айниқса, сариқ матбуот воситалари, кино ва видео сингари техник санъат турларини омма дидига мослаб жиҳозлашда кенг қўлланилди. Кич нафақат ҳаваскорлик ва профессионал санъат соҳаси, балки ҳалқ санъати тармоқларига ҳам чукур кириб бориб, фольклор кўринишидаги соҳта санъат намуналари юзага келишига сабаб бўлмоқда. Кичнинг ҳар бир мамлакатда ўз миллий хусусиятига эга бўлаётгани бу ҳодисанинг янада кенг ёйилишига сабаб бўляпти. Қизифи шундаки, кўпинча кич маҳсулот тайёрлаган кишилар унинг кич эканини хаёлларига ҳам келтирмасликлари мумкин. Жумладан, юртимизда терма ва достон айтишнинг кич кўриниши анча кенг ёйилган. Кўпчилик айтимчилар оғзаки ижоднинг асл дурданаларини тўлиқ ўзлаштириб олиш, унга ижодий ёндашиш ўрнига ўзлари чала-чулпа ўрганиб олган, аммо ташки жиҳатлари билан достон ёхуд термаларга ўхшаб кетадиган, амалда айни аудиториянинг айни дамдаги та-лабларига мос келадиган “бозорбон” маҳсулот тақдим этадиларки, уларни кичнинг ўзбекча кўринишларидир дейиш мумкин.

Мутахассислар томонидан кичнинг оммавий истеъмол маданияти дунёсида анча кенг тарқалган қўйидаги турлари борлиги қайд этилади: 1. **Ретро**
кич – ўтмишда расм бўлган нарсаларни йиғиш ва ўшаларга ўхшатиб тайёрланган товарлардан иборат кич. Ҳозир қўпчилик ўтмишга тегишли қутилар, ҳайкалчалар, гиламчаларни коллекция қилишга қизиқади. Шу ҳолат хисобга олиниб, ишлаб чиқариладиган маданий товарларга ретрокич дейилади. 2. **Бозор** **кичи** – қайбер жиҳатлари билан халқ амалий санъати намуналарига ўхшаб кетадиган танга йифиладиган мушук, майда пуллар ташлаб қўйилишига мўлжалланган кийик, бургут, йўлбарс ҳайкалчалари ва шунга ўхшаш ўз йўналишини тез-тез ўзгартириб туришга мойил товарлар шаклидаги кичлар. 3. **Неокич** – чироқли авторучка, термометрли кистиргич, тўппончасимон ўт олдиргич, очқичли тарок сингари кутилмаган кўшимча функцияси билан ақлни шоширадиган турли совғабоп маданий товарлар.

Кичга деярли ҳамиша муайян қолипдан чиқмаган ҳолда сохта оригиналлик, ҳашамдорлик хос. Асил санъат асарларидан фарқли ўлароқ кич ҳеч қаҷон савол түғдирмайди, балки олдиндан тайёрлаб қўйилган қолипдаги жавобларни тақдим этади, холос. У руҳий изланишларга ундамайди, балки кишини хотиржамлик ва бемалолликка чакиради. Кич олдин яратилган юксак бадиий образларнинг жўнлаштирилган ва сийқаси чиқсан нусхасини юзага келтиради. Юксак санъат намуналаридан фойдаланиш хисобига кун кўрадиган кич баъзан сирли, қизиқарли бўлишни ҳам даъво қиласди. Аммо тақлидга асослангани учун катта қимматга эга бўлолмайди. Шу боис кич бадиий жиҳатдан ғариб ва маънавий томондан шубҳали, бозорбоплик учун эстетик жиҳатни қурбон қиласиган ҳодиса саналади. Агар классик санъат учун борлиқ билан бадиий образнинг ўзаро мувофиқлиги идеал саналган бўлса, оммавий постмодерн маданият ясама нарсалардан кич ўстириб чиқариб, харидоргирликни бирламчи кўрсаткичга айлантиради.

Универсализм. Постмодерн эстетикада ғоят кенг тарқалган бу тушунча бир қатор маъно қатламларига эгадир. Универсализмнинг энг қадимий **бирламчи** маъноси бутун инсониятни ҳалокатдан қутқаришни англатиб, жаҳоний динларнинг асосини ташкил этган ғояни билдиради. Яъни ислом, христианлик, мусовийлик сингари динлар инсон ва инсониятни гуноҳлар, демакки, муқаррар ҳалокатдан қутқариш мумкин деб ҳисоблайди ҳамда шунга интилади. Атаманинг **иккинчи** маъноси бир санъаткорнинг бир неча жанрда ижод қилишини англатади. Тушунчанинг **учинчи** ва бевосита постмодерн адабиётга тегишли маъноси борлиқни кўриш, уни тушуниш ва тасвирлаш борасида мавжуд бўлган барча қарашлардан танлаб ўтирай, аралашига фойдаланавериш кераклигини англатади. Шунга таянган ҳолда **постмодерн адабий универсализм битта муаллиф ижодида турли жанр, ҳар хил бадиий тизим ҳамда турфа қарашларнинг эркин уйғунлашувини англатувчи тушунчадир** дейиш мумкин. Постмодерн санъат ва адабиётда тур ва жанрлар тўғрисидаги азалий қарашлар бузилгани, санъатнинг барча кўринишларида қоришиқлик, яъни синкетизм кучайгани универсализмнинг кенг ёйилишига олиб келди. Эндиликда бирор адабий жанр ёки шаклни тоза ҳолида кўрмаслик оддий ҳолатга айланниб бормоқда. Бу постмодерн адабий универсализмнинг намоён бўлишини билдиради.

Шундай қилиб адабий постмодернизм борасидаги барча кузатишларни умумлаштирган ҳолда қўйидагича тўхтамга келиш мумкин. Ҳар қандай эстетик яратиқни деконструкциялаш имкони борлиги; турли бадиий услубларга тақлид қилиш мумкинлиги; интертекстуаллик, сўз ўйинларидан фойдаланиш, бор ёки йўқлигидан қатъи назар, исталган матндан истагандай узинди

олиши, хоҳлаганча ва хоҳлагандай күчирмалар келтиришнинг ижод сана-лиши; мавжуд асарларга бемалол дахл қилиш мумкинлиги; узук-юлуқлик ва куроқ тамойилининг амал қилиши; эстетик яратықларда адоқсиз киноя ва доимий пародик ёндашув мавжудлиги; анъанавий эстетик қадриятларга эътиборсизлик; бадий асарни баҳолашдаги чексиз плюрализм; эстетика соҳасидан фожиавийликни сиқиб чиқарадиган дараҗадаги лаззатбозлик (гедонизм) ёйилиши; хунуклик билан гўзалликни фарқламаслик; эстетик жанрлар ҳамда юксак ва тубан, олий ва оммавий маданиятларнинг қоришиқлиги; барча санъат турларининг театрлашуви ва шоулашуви; эстетик ҳодисларга истеъмолчилик талаби билан ёндашиш ва техник воситалар кўмагида бадий яратықларни узлуксиз ишлаб чиқариш ҳамда намойиш этиш мумкинлиги сингари жиҳатлар постмодерн санъатнинг белгилари ҳисобланади.

Хозирга келиб, борликни кўриш, уни англаш ва бадий акс эттиришга доир илгари амалда бўлган барча илмий қарааш, ижодий метод, йўналиш ва оқимлар ўзларининг бор имкониятларидан деярли фойдаланиб бўлди. Шунинг учун ҳам кейинги даврда пайдо бўлган “трансреализм”, “постмодернизм”, “постпостмодернизм”, “трансавантгард”, “постструктурализм” каби турли мураккаб атамалар эндиликда санъат ва адабиётда мавжуд метод, оқим ёки йўналишларнинг бирортаси ҳам якка хукмон бўлолмаслигини, барча оқим, ёндашув ва йўналишларнинг ўзаро чиқишидиган жиҳатларидан фойдаланавериш лозимлигини англатади. Бундан бўён фалсафий қарааш ва бадий ижодда бирорта ҳам метод ёки йўналиш устувор бўлолмайди. Инсоният тафаккури ва бадий диди ўз тараққиётининг шундай босқичига келдики, эндиликда ижодий метод ва фалсафий тизимлардан қайсиdir биттасини тўғри ҳисоблаб, кўпчиликнинг шунга кўшилишига эришиш мумкин эмас. Чunksи тобора шахслашиб бораётган башариятнинг фикру қарашлари, диду туйгулари эндиликда якранг бўлолмайди. Шахслик ўзига хослик, ўзига хослик эса адоқсиз хилма-хиллик ва чексиз плюралликдир. Қандайдир табақа учун маъқул келадиган универсализм хукмонлигининг йўқлиги бугунги инсониятнинг универсал ҳолатидир.

Ижтимоий тафаккурдаги қоришиқликнинг универсал ҳолатга айланishi, умуман, бадий ижод, хусусан, адабиётда ҳам универсализмни юзага келтиради. Шунинг учун ҳам кечагина кўпчилик одатланган анъанавий йўсинда ижод қилиб юрган адибу шоирлар, ҳеч кутилмаганда, тамомила ноанъанавий йўлда ёза бошлиши ҳеч кимни ажаблантиrmайди. Бу ҳолатни ижодкорга қандайдир бадий-эстетик оқимнинг таъсири ёки унинг қайсиdir бир санъаткорга тақлиди деб эмас, балки муаллифнинг индивидуаллик, тасвир оригиналлиги ва туйгулар ифодаси тўлиқлигига эришишга бўлган табий интилиши натижаси сифатида изоҳлаш ҳақиқатга яқин бўлади.

Санъат ва адабиёт неча минг йиллар давомида объектив борлиқнинг табиат, жамият, шахсият каби қатламларини ўзлаштириш оқибатида ғоят серқирра ва чегарасиз кўламдаги башарий маданиятни юзага келтирди. Бугунги постмодерн санъат ва адабиёт бадий тафаккурдаги доимий эврилишлар туфайли борлиқнинг ўзидан-да серқатлам бўлиб кетган маданият деб аталмиш ўша ҳодисанинг ўзини эстетик ўзлаштиришга киришди. Башарият ўз тараққиётининг шундай босқичига етдики, бугунги одам қанчалик истамасин, энди ёввойи табиатнинг ёввойи фарзанди бўла олмайди. Инсон яшаш тарзи, борлиғи, ҳатто генетик тўқималаригача маданийлашиб кетди. Бу кечим инсон рухияти ва маънавий-ахлоқий қадриятларига қадар кўчиб, одамнинг нафақат эзгулиги, балки ёвузлиги ҳам маданий кўриниш касб этди. Замонавий адабиётнинг инсоният яратган маданий қатламларни тек-

ширишга ўтгани, биринчи навбатда, ижодкорлар тилдаги сўзларни ўз асил маъноларида кўллашдан кўра уларга ўзлари истаган маънони юклашга интилаётганида, шунингдек, бир замонлар яратилган бадиий матнлар та- момила ўзгача талқин этилаётганида кўринмоқда.

Постмодернизмдаги энг муҳим жиҳат шундаки, у санъат асарларини алоҳида истеъодлар томонидангина яратиладиган бетакор феномен эмас, балки эплироқ ҳар қандай одам қилиши мумкин бўлган оддий юмуш деб билади.

Ўзбек театр ва тасвирий санъати ҳамда қўшиқчилигида бир қадар намоён бўлган эса-да, миллий адабиётимизда ҳали том маънода постмодернизм намунаси ҳисоблаш мумкин бўлган асар яратилгани йўқ. Лекин замонавий адиблар ижодида интуитив тарзда дунёга келган анчагина постмодерн образлар, ифодалар, лавҳалар, чизгилар мавжуддир. Бу ҳолни миллат тафаккур ва руҳоният йўсинида мавжуд анъаналарга риоя этиш кучли экани билан изоҳлаш мумкин. Бизда қачондир постмодернизмни тафаккур тарзи, оламни англаш ва изоҳлаш йўсини ўлароқ қабул қилиш мумкинлиги эҳтимолдан йироқдир. Ўзбек адабиётидаги постмодерн изланишлар асосан шакл ва ифода йўсини хилма-хиллигига эришиш йўлидаги уринишлар тарзида на- моён бўлмоқда.

Постмодернизмнинг моҳиятига кириб борган сари глобаллашган дунёда фоят кенг ёйилаётган ушбу ҳодисага муносабат йўсинини белгилаб олиш ҳар қандай миллат учун ҳаёт-мамот масаласи экани яққолроқ англашилади. Анчагина мусбат хусусиятларга эга ушбу фалсафий-эстетик, ижтимоий-маънавий феномен замирида инсониятнинг ахлоқий ақидалари, хусусан, биз ўзбекларнинг маънавий дунёмизга дахл қиласидиган биркәнча хатарли жиҳатлар ҳам мавжудлиги кўзга ташланади. Йўқ, постмодернизм айнан қайсиdir миллатнинг ахлоқий-маънавий тутумларига дахл килиб, уни ўзгартиришга уринмайди, лекин у моҳиятан ўзгача қарашу ақидаларни маҳв этиш хусусиятига эга. Чунки у инсонга ўз қулиялиги ва манфаати йўлида ҳар қандай чекловларни бузишга изн беради. Постмодернизм бирон-бир ҳудудга бостириб киришни ўйламагани ҳолда ўз-ўзидан ҳудди кексалик, йил фасллари, грипп эпидемияси каби тўсиқ билмай, ёйлиш хусусиятига эга. Ҳазрат Навоий айтмоқчи: “Хазон сипоҳига, эй боғбон, эмас мониъ, Бу боғ томида гар игнадин тикан қилғил”. Демак, унинг йўлига ташки тўсиқ қўйиб, куч билан тўхтатиб бўлмайди. Шу сабабли ҳар бир миллат аҳлида ўз маънавий қиёфаси, ахлоқий ақидалари ва бадиий диди сингари ноёб бойликларини дахлсиз сақлаб қолишга қурби етадиган мустаҳкам ички маънавий қўргонни тикламоқ керак бўлади. Бу қўргон қандай унсурлардан ташкил топади-ю, у қай йўсин тикланиши керак. Бу тўғрида миллат ойдинлари қандай ўйлади? Келинг, биргаликда фикрлашайлик...

Дунёни англамоқ учун унда нималар кечётганини билмоқ керак бўлади. Шундагина дунёдаги ҳодисалар тўғрисидаги кузатиш ва тўхтамлар мантикий салмоқ касб этади. Постмодерн санъат ва адабиёт ҳақидаги ушбу кузатишлар очун адабий жараёнларидағи ана шу жиҳатларни билишга бўлган уриниши маҳсулларидирки, уларнинг ўзбек ўқирманларига фойдаси тегишига умид қиласиз.

ТАҲРИРИЯТДАН: Журналинизминг кейинги сонларида ушбу мавзуяна давом эттирилади. Бинобарин, профессор Қ. Йўлдошевнинг мақоласида кўтарилиган ва бундан кейин бериладиган мақолаларда ўртага ташланадиган масалалар юзасидан барчани баҳсга чорлаймиз.



ИККИ АВЛОД ОВОЗИ

Бугунги адабий воқеликка бир назар

Сұхбат

Бугун дүнё мафкура майдонида жуда кучли, зиддиятли муаммолар рүй бермоқда. Инсон шахсига ёндашувнинг ўзгарганлиги, минг йиллик маънавий қадрияларнинг таназзулга учраётганлиги мамлакатлар тақдирини боши берк кўчага олиб кирмоқда. Бу жараён бевосита инсон қалби ва руҳининг асосий мураббийи ҳисобланган адабиёт ва санъат дунёсида ҳам бўй кўрсатмоқдаки, бу ҳодисага бефарқ қараб бўлмайди. Биз журнал таҳририяти жамоаси дунё адабий майдони, қолаверса, ўзбек маданий тафаккуридаги ўзгаришлар, янгиланиши ва турфа тамойиллар ҳақида муштарийларимиз билан сұхбатлашиши мақсадида жамиятимизнинг икки авлодига мансуб бўлган адабиёт, тафаккуртандувчиларга мурожсаат қилдик. Агар жаҳонда бугун кечаткан ижтимоий, сиёсий, адабий, мафкуравий воқеликка нисбатан мулоҳазаларингиз бўлса, биз билан ўртоқлашиминг.

–XX асрда адабиётимизда неча авлод алмашди, қанча мафкуравий-руҳий эврилишлар содир бўлди, адабий қараишлар, инсон шахсига муносабат шакллари ўзгарди. Мана шу алмашинув умумий онг, бадиий тафаккуримизда янгиланишлар ясади, деб ўйлайсизми? Ёки ўтган асрда яшаб, ижод этган, чуқур билим ҳамда ўткир салоҳиятга эга бўлган гигант ёзувчиларимиз китоб жавонларида қолдирган бадиий бисом ёнига худди шундай нодир, умри асрларга чўзиладиган етук асарлар кўша олдими? Сиз бугунги авлоднинг ижодий изланишлари, ярататкан асарларидан қониқасизми?

Баҳодир Каримов: Одамни дард бирлаштиради. Унга биргалашиб даво топадилар. Ҳамдард бўлмас – ёмон. Мазкур саволларни ўқиб мумтоз бир мисра хаёлимга келди: “Манинг дардим санинг дардингдин ортиқ...”. Университетда талабаларга адабиёт назарияси, адабиётшунослик методларидан маъруза ўқийман. Аудиторияга кириб берадиган илк саволим айнан бадиий асарнинг яшовчанлиги, умрбоқийлиги билан боғлиқ. “Минглаб ҳикоялар, шеърий тўпламлар босилган; қиссаларнинг сони ҳам мингдан кўп. Узбек адабиётида ҳозиргача юзлаб романлар яратилган. Келинг, ўқиб завқланадиган, бошқаларга ўқиш учун тавсия қиладиган романларни санайлик”. Бармоқ букиб талабалар билан бирга санашга тушамиз. Ўнта бармоқ, тўғриси, тўрт марта базўр тўлади. Қолган икки юздан ортиқ роман қаерга кетди? Нега муаллифдан аввалроқ “вафот этди?” Қиссалар-чи, деган тарзда айнан шу оғрикли савол ўртага қўйилади. Жавоб излана бошланади: ўша даврнинг сиёсий тузуми, устувор ғоявийлик, мафкуравий тазийик, эрксизлик, чегараланган мавзулар – бир дунё ташки омиллар. Сўнгра ичкарига ўтилади: асар

тилининг nocturne, образли тафаккурнинг оқсагани, психологик тасвир қашшоқлиги, муаллиф истеъоди, маҳорати, умуман, шу каби ўнлаб назарий унсурлар санаб чиқилади. Ва барча фикрда ўша асарлар “вафот”ининг қайсиdir қирраси яширган бўлади.

Бугун-чи? Ижод эркинлиги мавжуд, мавзу танлаш адилар ихтиёрида, истаган мавзуда ёзишлари, ўз устида ишлашлари имкони бор. Аммо... Аммо гўзал ва муҳташам санъат кўшкининг бунёд бўлиши ошқовоқ экиладиган дехқон томорқасидан фарқ қиласди. Зотан, ҳаммага маълум гап: “Осон эмас бу майдон ичра турмок...” Ҳар вакт масалага нисбий ва кўнгилчанлик билан қараймиз. Фалондан фалон тузукроқ, ҳа майли, у ҳам рўйхатдан тушмасин, кўнгли ўксимасин, деб ўрни келса-келмаса, адабий мақолаларга номи илдирилади. Баъзан хорижда асари босилган асарлар сарлавҳаси ёки шоирлар номи рўйхатга илова қилинади. Аслида ўша ном ҳам, асар ҳам гоҳида ўзимизда икки пулга қиммат бўлиб чиқади. Бундай вазиятларда субъективизм устуворлик қиласди. Кўзлар Масковдан имо кутган яқин ўтган замонларда ҳам бундай тажрибалар, “сендан угина, мендан бугина” тамойиллари мавжуд бўлганини хотирлаб қоламиз... Ҳолбуки, бундай нисбий қарашлар ҳам, хориждаги нашрлар ҳам, ёлланма адабиётшуносларнинг тарғиб-ташвиқи ҳам, ҳатто улкан халқаро мукофотлар олиниши ҳам бадиий асарнинг ўқувчи юрагида узок йиллар, асрлар бўйи яшаб қолишига васиқа бўла олмайди. Сиз савонни қайтариб, нега шундай дейишингиз мумкин. Мен айтаман: санъат дунёсида бундай жумбоқлар ҳеч қачон арифметик прогрессия ёки Бернуллининг физик қонунлари билан ечилмайди. Ижоднинг жозибаси ҳам, завқ-шавқи ҳам, санъат асари руҳига сингиб кетган сирда, бу эстетик ҳодисани баъзида тушунтириш имконсизdir. Баъзан уни ҳис этиш, англаш лозим. Вазиятдан бу йўл билан ҳам қутулиб чиқилади. Ҳис этишнинг даражаси эса дидга, қалб покизалигига, ниятнинг холислиги ва бошқа ном берилмаган, ҳалигача сирли, адабий атамасиз юрган ўнлаб омилларга тегишлидир. Ўрни келса, адабий nocturlik юзига яна бир қават қалин парда тутиб, қутулиш кўшиғига яна бир байт кўшимча қилинади. Тўғриси, ҳис қилинган ҳамма нарсани сўзда ифода қилиб бўлмайди; ахли дониш ҳақиқат сулдарида (ҳақиқатга ўхшаб) кўринган ҳодисаларнинг ҳаммасини ҳам айтиши мумкин эмас.

Замин посангиси, Ерга қозик қилиб қоқилган баҳайбат тоғнинг ҳамма жойи чўққидан иборат эмас; қай бир ерида текис супалари бор. Фарқли чўққилари бир нечта. Уларнинг орасида ўйдим-чуқур жойлар, митти чўкки ёки тепаликлар, даралар, ҳатто тубсиз жарликлар мавжуд. Аслида маҳобатли чўққи ёнбағирдаги тиргаклар, атрофдаги тепаликларга нисбатан улуғвор кўринади. Ижодкорларнинг ҳаммасида ҳам баландлик даъвоси бўлавермайди. Ўз даражасини англаган, кўнгли тоза, ижоддан ҳаловат топадиган одамлар кўп. Ўзимга яраша, бир нави ижод қилиб юрибман, дейдиган камтарлар ҳам бор. Дарҳақиқат, ўзининг юксак рутбасини сезадиган ва бу мақом намойишидан истиҳола қиладиган иймонли ижодкорлар келажакда яшаб қоладиган асарларнинг эгалари бўлса керак, деб ўйлайман.

Биз кўп ҳолларда чегараларни белгилаб, атрофни қўрғонлаб, темир сандиққа беркиниб олишни хуш кўрамиз. Ўша буюк бир инсон, асари асрлардан асрларга ўтиб яшаб кетадиган истеъодод эгаси балки ёнимизда юргандир. Бизга даврдош ва даврадошdir. Шахсан мен шундай улкан истеъодлар билан замондош бўлишни орзу қиламан; қозоқларнинг бир нақли бор: “Тепасида юрган тоғнинг буюклиги пайқалмайди”.

Умид Ёқубов: XX аср санъати – инсоният онгида тарақкий ва таназзул бир чизиқда кесишган мураккаб давр: тафаккур чегараларининг емирилиши, тасаввур шитобининг йилдиримлашиши, табу пардасининг кўтарилиши, космосни вакуумга жойлашга уринишлар...

Тасаввурнинг чексиз ўйинлари ҳосил этган бу сферада, албатта, ўзбек адиллари ҳам ўз ўрнини излаши табиий. Чунки XX аср ўзбек адабиёти ўз-ўзича ривожлангани йўқ. Демакки, жаҳон адабиётида кузатилган илгор фикр интилишлари – майллари билан у ё бу даражада ўхашашлик (мутаносиблик) адабиётимизда кўзга ташланишини табиий қабул қилиш ўринли.

XX аср ўзбек адабиёти икки катта – мустақилликка қадар ва истиқлолдан кейинги даврда бир неча босқичларни яшаб ўтди. Биринчисини таҳлил қилмай, иккинчисига ўтиб ҳам, баҳо бериб ҳам бўлмайди. Бу, айтайлик, бадиий йўл танлаш ё Инсон манзилини ёвуқлаштириш нуқтаи назаридан ҳам жуда зарур.

Мустақилликка қадар ўзбек адабиёти – хўл-қуруқ баробар ёнган катта давр, кенг жараён: тўдалар чангি, нағс пишқириқлари, ошқозон қулдурашларининг нариги қутбидаги завқ билан самода силкинган қанотлар овози, гуллар шивири, япроқлар навоси, “ит базми қизиган ойсиз шомлар”¹ да “иғводан, бўхтондан осилган тиллар”дан жирканган Дарёдил қалб ҳайқириқлари; чирмовуқ билан атиргулни йиқитиш ёки қичқириқ билан фунчаларни сунъий чанглатиш “санъати”га қарамай бўй чўзиш ва мева туғишига улгуриш нафас олишлари; фасод-сўлак аралаш қораланган шиорнамо ёзилдиқлар ва қоғозга томчилаган кўнгил...

Бу жараёнда адабиётда нимагаки эришилган бўлса, бу аввало кучли шахсларнинг меҳнати, авлод сифатида шаклланиш мевасидир. Айтайлик, гурух бўлиб кўпкарида улоқни курдан олиб чиқиши ё бокқа олма тергани кираётган кимдир шеригига эрганакни очиб туриши мумкин, бироқ адабиётнинг дарвозасидан, Тоғай Мурод айтгандай, “битта-битта кирадилар”. Қайсиdir маънода, тенгқур ижодкорларда ўхашаш фикрлар-мақсадлар бўлиши табиий. Бироқ бу мақсад кимўзарга қараб кетиб қолса, бор салоҳият ҳам бой берилади. Яъни, адабиётда “тўда бўлиб югурсак – кўпроқ чангимиз, балки донғимиз ҳам чиқар”, деганлар адашади. Авлод шаклланиши учун яқдил фикр, муштарак мақсад, маънавий-бадиий концепция кераклиги тарихдан маълум. Бу борада Шарқ, француз, немис уйғониш даврлари вакилларининг ижоди-фаолияти яхши мисол бўла олади.

Яна бир гап: авлод сифатида шаклланиш фақат бир даврга хос эмасдай. Инчунун, Алишер Навоийга хос тафаккур тарзи Мирзо Бобур, Оғаҳий бадиий тасаввур оламига уйғун, узвий. Бундай маънавий боғлиқлик баъзан миллат ҳам танламайди: айтайлик, Достоевский, Беккет, Камю дунёси. Ёхуд кучли адабий муҳит ҳосиласи: Вольтер, Руссо, Ламетрий ва Дибр; “китоб-инсон” (ўн тўрт тилда мутолаа қила олган) Рафаэль Кансинос-Ансесс ва Борхес, уларнинг атрофида эса Хулио Кортасар, Габриэл Гарсия Маркес, Карлос Фуэнтес, Адольфо Биой Касарес, Эрнесто Сабато...

Энди ўзимизга қайтсак. XX аср ўзбек адабиёти жанрлар таснифида таҳлил қилинса, айтадиган гап кўп. Айникса, шеърията жиддий тажрибалар бўлди. Кимдир тан олса-олмаса, истаса-истамаса, ўзбек шеърияти жаҳон адабиёти денгизининг энг ҳаётбахш, суви доим

¹ Шавкат Рахмон ибораси.

янгиланиб турадиган дарёларидан. Бугун ҳам шундай. Бироқ саволни кўпроқ насрға таалуқли, деб тушундим.

ХХ аср ўзбек насли хулқланишни ҳаётий мақсад, аҳдни эътиқод, вафони ҳаё, ўзига садоқатни бурч, деб билишдан бошланганди. Бу инсон ғалабасини, Эшқобил Шукур таъбири билан айтганда, “инсонни инсондай кўрмок орзуси” эди. Бугун эса шу бошланмага қайтишнинг ўзи катта гап бўлиб қолди. Чунки йиллар тўғонида бу қарашлар эврилди, ўзгармоқда (бу ҳам мобиъ телефон ривожига ўхшайди-да: у дастлаб фақат гаплашиш воситаси бўлган бўлса, ҳозир унинг дастурлари битта одамнинг вақтини бемалол олишга етади, ҳамма гап шу вақтнинг қандай тақсимланиши, истифода қилинишида).

Ўзбек насли даставвал миллий фольклор ва анъанавий қиссаҳонликлар асосида шакллангани маълум (Қодирий, Чўлпон, Faafur Гулом насли). Кейинроқ араб, турк, рус, француз, Лотин Америкаси, япон насли адибларимизга кучли таъсир кўрсатди. Таъсирлашиш – табиий ҳол. Таъсир эмас, тақлид айб.

Ўзбек наслида шаклан (сўзни сиқиқлаштириш, баёнбозликнинг камайиши, ички кўповозлилиқ, қаҳрамон ракурсларининг ўзгариши, рангинлиги, сўз қуриш қоидаларини янгилашга уриниш, янги сўз ясашлар), услуган (ровий ва қаҳрамоннинг бирлашиши, ички монологнинг асосий ўринга чиқиши, бир қаҳрамон (масалан, Fайбаров)нинг турли асарлардаги, бир неча авлоднинг бир асардаги (айтайлик, Жамолиддин, Акраб, Дехқонқул ёки Бобур, Хумоюн, Акбар, Салим) ҳаёти, қаҳрамонлар исмига бадиий юқ берилиши (Ҳасанали, Яҳшибоев, Дехқонқул) ёхуд исмнинг тўлиқ рамзлашиши (Қоравой, Паризод, Устоз), бадиий контра тарозисининг мувозанатга келиши (ижобий-салбий қаҳрамонлардан воз кечиш)га, юмор-терапия (ўзидан кулиб ўзиш)га, тимсолни англаш ва англатиш (баъзан рамзнинг ортидан қувиш)га, ғояни мақсаддан воситага айлантиришга уринишлар), моҳиятнан (Инсон манзарасини маълум қолиплардан холи равишда, қандай бўлса шундайлигича тасвирлаш) янгиланишлар бўлди, давом этмоқда. Буларнинг бари сиз айтган авлодлар алмашинувининг ҳосиласи бўлибгина қолмай, балки тузум ўзгариши, ғоялар янгиланиши, мафкуравий қолиплардан воз кечилгани билан ҳам боғлиқ. Бироқ нисбатан узоқроқ пайтда – ўз даврида қўлма-кўл ўқилган “Ўткан кунлар”, “Мехробдан чаён”, “Кеча ва кундуз”, “Шум бола”нинг бугун ҳам ўқувчилари кўп. Бугунги авлоднинг қилаётган ижодий изланишлари, яратадиган асарларига баҳо беришга, тўғриси, ёшлиқ қиласман. Кейин улардан кўнглим тўлиш-тўлмаслиги кимгадир қизиқ эканига ҳам шубҳам бор.

– *Биз “Жаҳон адабиёти” журналининг 2014 йил 1-сонида рус ёзувчиси В.Ерофеевнинг мақоласига нисбат берган ҳолда “Инсон идеалми?” деган савол кўйган эдик. Ҳақиқатан ҳам, шу кунгача жаҳон ва миллий адабиётда яратилган мумтоз ҳамда баркамол образлар идеал қаҳрамонлар эдими? Ўзи, инсон идеал бўла оладими? Ёки инсон тафаккурини муайян бир қолига соладиган барча адабий-эстетик қолиплардан воз кечиб, умуминсоний қаҳрамонлар эмас, балки шахсий қаҳрамонлар, умуминсоний характерга эга бўлган, халқаро миқёсда шуҳрат қозонган бадиий идеаллар эмас, балки бир муайян авлод кайфияти, руҳиятини ифодалаб берадиган идеаллар яратиш даври келдими?*

Баходир Каримов: Инсоннинг идеаллиги нисбий. Чунки одамзод

унутувчан, ожиз ва шошқалок, нафс бандаси қилиб яратилгандир. Бадий образ, бадий қаҳрамонлар қусурсиз идеал қилиб яратилиши мумкин. Бунда ҳеч бир ажабланарлик жиҳат йўқ. Бадий адабиёт ва санъатнинг табииати, аслида, шу идеалликни талаб қиласди. Шунда чексиз гўзал, олийжаноб, мард, улуғвор, оддий қаҳрамонларни санъат муҳиблари севиб қолади. Бундай юксак маънавиятга эга идеал инсонларни тасвирлаш учун ҳам улкан қалб керак адига. Ўтган замон адабиётида Пелагея Ниловна, Павел Корчагинлар бор эди. Улар таъсирида шўро одами шаклланди. Шўро одамини қаҳратон совук ҳам, жазирама иссиқ ҳам енга олмасди. Тинимсиз меҳнатга кўмилиб, “барибир паҳтани терамиз” деб кўкрак кериб тураверар эди улар...

Идеал бўлиб кўринган одамда ҳам заифликлар, қусурлар бўлади. Фақат одам ўзининг қусурларини яхши фазилатлари эвазига андавалаб юради. Бундай қусур бирорда кўп, бирорда камроқ. Шу боис нисбий равишда одамлар яхши ва ёмонга ажратилади. Ҳаётда шундай вазиятлар бўладики, тасавурлар алдайди. Ташқи кўриниши – кийим-кечаги, бўйинбоғи, ҳатто айтаётган сўзлари бағоят гўзал кимсаларнинг баъзан амали ноқис бўлади; арзимаган нарсалар учун тубанлашади; аразлашиб, ҳайвонлашади. Шахсий манфаатига зид келса, энг яқинини ҳам ҳеч аямасдан жарга итариб юборади. Аммо одам ҳаётда яхшиларга кўпроқ дуч келади. Яхши одамларнинг эзгуликлари эвазига маъюс қалб ёришади.

Бир гапни алоҳида таъкидлашни истар эдим. Оллоҳнинг танлаган элчилари, инсониятга тўғри йўлни кўрсатиш учун сараланган пайғамбарлари ҳар қандай хато-нуксон, қусурлардан, мол-дунё муҳаббатидан холи бўлади. Улар инсониятга тўғри йўл кўрсатишда идеал бўла оладилар, албатта. Зотан, Яратгувчи шуни хоҳлаган, уларнинг юрагини қора доғлардан тозалаган. Агар идеал инсон масаласида гап кетадиган бўлса, Нуҳ, Сулаймон, Айюб, Ёкуб, Юсуф, Исо, Мухаммад алайхимуссаломлар башарият учун идеал инсонлар бўлиши мумкин. Чунончи, дунё адабиётида бу табаррук элчиларнинг ибратли ҳаёт тарзига доир ўлмас бадий асарлар, муқаддас Китобларга асосланган гўзал қиссалар, кўплаб таъсирили ҳикоялар мавжуд...

Бугунги авлод, мустақиллик даври одамлари ичиди ўзини енгган, дунёнинг ўткинчилигини англаган, гўё умрбод дунёда қоладигандек ҳар ишини чин дилдан бажараётган, айни дамда шу бугун ўлиб қоладигандек у дунё учун озуқа тўплаётган одамлар бор экан, ўз нафсидан, моддий манфаатларидан устун келган ҳақиқий шахслик рутбасига кўтарилган фидойи, инсофли, сабр-тоқатли инсонлар бор экан, бадий адабиёт, албатта, уларни қайсиdir даражада идеал қаҳрамон сифатида тасвирлаши мумкин, деб ўйлайман.

Умид Ёкубов: – Беайб Парвардигор, ноумид шайтон, инсон мукаррам. Булар – бир кишининг шахсий фикри эмас. Халқимиз неча-неча асрлар давомида қанча мураккаб йўлларни босиб ўтиб, ҳаёт ва тафаккур тарзидан келиб чиқиб, шу хulosада тўхтаган. Уларнинг ўзгариши қийин. Кейин ўзгартиришга ҳозирча ҳожат ҳам йўқ.

Виктор Ерофеевнинг сухбатини ўқидим. В.Ерофеев оти чиқсан ёзувчи, Достоевский ижодининг француз экзистенциализмига таъсирини пухта ўргангандек олим (адиб номини таратган “Телба билан яшаш” асари айнан шунинг таъсири бўлса керак). Унинг илгарироқ анча баҳс-мунозараларга сабаб бўлган “Рус қалби энциклопедияси” асарига ҳам кўзим тушганди. Кўп ўтмай, Россия зиёлилари ва ёшларидан бир гурухи Ерофеевни

“русофобия” (рус миллатига негатив муносабатда бўлиш)да айблагани (“Тажовузкор русофобия ҳақида очиқ хат”)дан ҳам хабарим бор (гарчи унинг ўзи кейинроқ “Литературная газета”даги сухбатида буни “оддий сиёсий чақув” деб баҳолаган бўлса ҳам). Ўтган йили бошида эса у “Дождь” телеканалида тарихий мавзудаги “Ишқибозлар” дастури меҳмони бўлиб, “Иккинчи жаҳон урушида юз минглаб инсонларнинг жонини сақлаб қолиш учун Ленинградни топшириш маъқулроқ эмасмиди?” деган савол доирасида билдирган фикрлари ҳам катта машмашага сабаб бўлди. Ўзини “тозақонли рус”, Менделеев шажарасига туташ ва радио ихтирочиси Поповнинг чевараси санайдиган Ерофеев чиндан ҳам “русофоб”ми ё йўқ – уларнинг ўзи ҳал қиласидиган муаммо.

В.Ерофеевнинг “Аргументы и факты”даги сухбати ҳам ўша “Рус қалби энциклопедияси”нинг давомидай туюлди. Аввало, бир нарсанни ойдинлаштириш керак: Ерофеев рус адабиёти бизни боплаб кетди (ёки бизга панд берди), деб биринчи марта айтиётгани йўқ, бироқ бунда у собиқ Иттифоқ мағкураси ҳосиласи бўлган социалистик реализмни назарда тутадими ё рус адабиётини – шуниси мавхум.

Модомики, “90-йиллар бошига келиб, каваклардан фаришталар эмас, фоҳишалар ва безори ўғрилар чиқиб келган” экан, бунинг учун рус адабиёти (айтайлик, ўша Толстой ё Тургенев) эмас, одамларни “Сусамбил”га элтиш”га ваъда берган соцреализм мағкурачилари айбор. В.Ерофеев доимо ўрнак сифатида кўрсатадиган Фарбда, айтайлик, ўша Франция ё Англияда бугун маънавий ахвол ҳавас қилгулик эмас: ўтган йилнинг ўзида нима ишлар бўлди: машҳур қўшиқчи Элтон Жон эркакка турмушга чиқиб, ҳамжинс “эри” ҳақида фахрланиб сўзламоқда; Кембриж университетида ўғил талабаларга юбка кийишга рухсат берилди; бир жинсли никоҳларни қонунийлаштириш Франция Президенти Франсуа Олланднинг асосий сайловолди ваъдаларидан бири бўлди ва у ҳокимиятга келгач, ваъдасини сидқидилдан бажарди ҳам. Хўш, бу маънавий инқизорлар учун биз Байрон, Вольтер, Руссо, Флобер ё Сартрни айблай оламизми? Албатта, мантиқсизлик-да.

В.Ерофеев “Рус қалби энциклопедияси”да “*Толстой, аскарни таърифлаб, руснинг асосий хусусияти – мўмин бўлиш, дейди. Ўйлашимча, рус – тарбияга ёпишиб олмаган. У фақат тарбияланган сифатида кўриниши беряпти, холос. Тарбия ҳақида Россияяда ҳеч ким ғамхўрлик қилмайди.Faқат бир хусусияти руслар бор – бетарбия кишилар. Дехқонлар, ишчилар, зиёлилар, ҳукумат – барчаси тарбиясиз.Хушбичим русни-ку қўяверинг – турган-битганни латифа*”¹”, деб ёзади. Бироқ соцреализмчилар ҳам, Ерофеев ҳам, бошқалар ҳам тан олса-олмаса, истаса-истамаса, Толстойни бугун ҳам ўқишияпти, эртага ҳам ўқилишига шубҳа йўқ. “Бўрон қуши”, “Пўлат қандай тобланди”, “Ёш гвардия” ўз-ўзидан унутилди, “Уруш ва тинчлик”, “Анна Каренина”, “Иқрорнома” эса бугун ҳам барҳаёт.

Нима учун? Чунки Лев Толстой инсонни ақл-идрок, жамиятни маърифат бошқариши керак, деб ҳисоблаган. Инсоннинг ўз устидан ғалаба қозонишини – мўминликни олий даражага ҳисоблаган.

И.Султон соцреализм асосий факторлари сифатида

¹ Ерофеев В. “Энциклопедия русской души”. lib.ru/EROFEEW_WI/encyclopedia.txt

“Толстой, описывая солдат, говорил, что главный русский тип – покорный человек. Я думаю, что русский – это тот, к кому не прилипает воспитание. Он лишь делает вид, что воспитан. О воспитании в России никто не заботится. Есть только один тип русских – невоспитанные люди. Крестьяне, рабочие, интеллигенция, правительство – все невоспитанные. А элегантный русский – вообще анекдот.”

революцион воқелик, коммунистик партия раҳбарлиги, миллий ҳамда жаҳон адабиёти ва санъатларининг ўтмишда йиққан ижобий (!) тажрибасини санайди¹. Энди ўзингиз ўйланг, ёзувчига асарни қандай ёзишни ўргатиш – онага қандай кўринишда бола туғишини кўрсатма беришдай гап (беодобликка йўйманг-ку, менга ҳамиша соцреализм – исталмаган ҳомиладорлик каби туюлади). Ҳа, соцреализм сунъий туғилгани, инсон ва миллат тафаккури эркинлигига қарши бўлгани учун ҳам кўп яшамади: қуруқ шиорбозликдан нари ўтолмаган том-том “эъжод” намуналари тузум ағдарилиши билан эсдан чиқди. Лекин “мен “прямой” ёзаман”, дегичлардан қанча-қанчаси шулар билан овора бўлиб умрини елга совургани, миллионлаб инсонлар асл санъатдан чекланиб, фақат хукмфармо партия ғояларини мадҳ этган “асар”ларни ўқишга мажбурлангани – шуниси ачинарли. Ахир бадиий асардан партияий ғояларга содиқлик ва аниқлик талаб қилиш имкони берилиши билан минглаб “тўринг нурга тўлгур Шариф”лар (М.М.Дўст) бир қўлда лупа-ю бир қўлда гурзикарвон билан ҳар сатрдан хато излагани, “Қодирийни сотиб шоир бўлган” (М.Юсуф) “мехробдан чиққан чаён”лар каммиди. Бу гапларни ўша даврдаги газеталарда чиққан саҳифа-саҳифа уйдирмалардан ҳам билса бўлади. Масалан, Абдулла Ориповнинг машхур “Биринчи муҳаббатим” шеъри “ур калтак-сур калтак” қилинган бир “мақола”даги парча ёдимда қолган: “қизиқ, шоир “мен кимга суюнгайман”, деб ёзибди. Ана, партияга суюн, пролетарларга суюн... ”. “Шариф”нусха кабиларнинг бундай “ихтиро”лари – фирт латифа. Лекин уларни ўқиб, кула олмайсиз. Ва бир ҳақиқат ойдинлашадики, агар адабиётни маълум ғоявий қолипга солиш имкони бўлганида “ёзувчидан маркесча-ленинча дунёқараш ва материалистик таълимот билан қуролланиш”ни талаб қилган компартия албатта буни уddeллаган бўларди. Ваҳоланки, “юрагимиз партияга тегишли” деганларнинг ёзилдиқлари тузум ўзгариши билан унутилди. Унутилди! Уларга энг ҳақли жазо ҳам аслида шу эди. Вақт ғалвиридан ўтолмаган – “чехнаган асарлар”нинг умрини эса “бошқа асарларга қўшиб берган бўлсин” (Фахриёр).

Ўтган асрда биргина Иккинчи жаҳон уруши воқеалари тасвирланган қанча нарсалар ёзилди: жилд-жилд. Бироқ уларни ўқиб, одамнинг урушга боргиси келарди. Ўша асарлар билан параллел равищда Хемингуэй “Алвидо, курол”, “Fiesta”ни ёки Ремарк “Фарбий фронтда ўзгариш йўқ”, “Қарзга олинган ҳаёт”ни ҳам ёзди-ку. Хемингуэй ё Ремаркни қўйинг, ўз даврида Распутин асарлари, дейлик, Фадеевнинг қораламаларидан қиймати паст кўрилгани аниқ. Лекин Распутинни бугун ҳам ўқишияпти.

“Одам бу – хавотир”, дейди Ж.П.Сартр. Яъни, у наинки ўзи учун, балки бутун башарият учун ҳам тўлиқ ва теран жавобгарлик ҳиссисидан қутула олмайди. “Одам бу – ҳайвон билан Ало Одам ўртасида тортилмиси арқон – у тубсиз чоҳ узра осилиб туради”, – дейди Нитшенинг “Зардўшт”и (негадир, унинг “дорбозлик санъати”ни фаромуш этган ҳолда). – “Ўтмоқ хатарли, ярим йўлда қолмоқ хатарли, орқага ўғирилиб қарамоқ хатарли, қўрқии ва тўхташи хатарли. Одам мақсад эмас, кўприкдир, одамнинг шунисинигина севиш мумкин”.

Ёки Достоевский “ажина”си, Лермонтов “зерикиш”и, Нитше нигилизми, Киркегардона “хавотир”, Хайдеггерча “унутилган”лик – “ўз ҳолига ташлаб қўйилган”лик, Камюнинг “умидсизлик” назарияларида одамнинг коинотдаги ўрни изланаркан, С.Фюмнинг ўша машхур ибораси

¹ Иzzat Султон, “Адабиёт назарияси” 390-391 бетлар.

ёдга тушаверади: “Санъат ўз олдига қандай мақсад қўймасин, барибир, Ҳудо билан баҳс бойлашишга киришиган даҳрийликдир”.

Инсон табиат асоси, меҳвари бўлгани учун ҳам мукаррам. Одам бор экан вақтда, жонзорлар турмушида маъно бор. Холик ва маҳлуқ тушунчаси бор. “Сен бўлмасанг, фалакларни яратмасдим”, деган муқаддас аҳд бор. Олам ўзгариши учун одам ўзгариши керак. Тасаввури, дунёкараши, ички олами ўзгариши керак. Фақат одамгина ўзини ўзи қутқара олади. Факат одамгина танлай олади. Чунки, бизга билим олиш, сўзлаш, ақл, туйғу, идрок, фаросат... берилган. Оқлов учун йўл қолдирилмаган. Шунинг ўзи ҳам одамни ягона ва мангу Тўғри Йўлга – маънавий покланиш йўлига, ҳидоятга хизмат қилишга бошлаш учун етарли.

– Бугун дунё бўйича китоб ўқимаслик ва “адабий саводсизлик” эпидемияси жуда кенг тарқалмоқда. Бутунлай ўзгача дунёқараши ҳамда тафаккур тутумларига эга бўлган авлоднинг бирламчи эҳтиёжлари рўйхатидан китобнинг, хусусан, адабиёт номи тушиб қолгандай. Вазият шу кетишида бўлса, неча асрлар бўйи яратилган улкан бадиий хазиналар музей экспонатлари қаторига қўшилиб қолиши ҳеч гап эмас. Бунга сабаб нима деб ўйлайсиз? Бу тарзда савол қўйши бир қарашида жўндай туюлади. Сабаби фан ва техниканинг жадал ривожи, маданий соҳадаги глобаллашув ёшлиар вақтини тигизлашириб юборди. Бугунги авлод дунёнинг турли минтақаларида яратилаётган илмий-техник ютуқларни ҳазм қилишга зўрга вақт топа олишаётгандек туюлади. Аммо техник тараққиёт қанчалик жадаллашмасин, инсон моҳияти, қалби ўзгармади... Аксинча, фикрлаш доирасининг торайгани, юракнинг кичрайгани, маънавиятнинг тубанлашгани, инсон қалби яратган гўзалликлар қадрисизланаётгани, минг-минг ишлик маданий қадриятларнинг унупилаётганини кузатиб туриб, адабиётнинг жсамиятдаги, бутун дунё маънавий-руҳий тараққиётидаги ўрни қаерда қолди, замонамиз ёзувчилари шундай глобал муаммолар қарисисида нима учун сукут сакламоқдалар, деган савол тугилади. Бутун дунёда ёшлиар томонидан китоб ўқиши дараражасининг кескин тушиб кетишига уларни ишонтира оладиган мафкура, эргаштира оладиган етук образлар яратилмаётгани сабаб эмасми? Агар яратилаётган бўлса, нима учун ҳалқаро миқёсга чиқмади?

Баҳодир Каримов: Китоб инсон ақли билан кашф этган бебаҳо қадрият; инсоният тарихидаги энг улкан хазиналар кошонаси. Ундан маънавий-маърифий озиқа олинади, бироқ бойлиқ асло тугамайди. Ўқиганлар билан ўқимаганларни, афзаллар билан афсалларни, оқиллар билан жоҳилларни тенглаштириб бўлмайди. Китоб шу тенгсизлик аломатини ўртага қўяди.

Одатда ҳашаматли биноларни моҳир усталар қуради. Бу уйга олимлар, оқиллар, донишмандлар ва уларнинг китоблари ёруғлик олиб киради. Илмдан бебаҳра кўнгил – ожиз, китобсиз уй – қоронғи-зулмат. Тирик инсон вужудини руҳидан ажратиш имконсиз. Руҳсиз танада жондан асар йўқ. Шунга монанд, покиза жамият ва ориф одамлар мамлакати умрбоқий ҳамда ҳикматли китоблар ёрдамида қурилади.

XX асрда китоб ёнида турли техник воситалар, хусусан, телефон пайдо бўлди. Кун узоғи шапалоқдек матоҳига тикилиб ўтирган ёшларни кўраман. Улар табиат қўйнида саёҳатга чиққанларида ҳам, теварак-атрофдаги гўзалликдан кўзлари кувнамайдиган, дарёning шовуллаб

оқишию дарахтлар рақсига, қушларнинг сайрашию қор ўйинига бепарво қараётгандек таассурот қолдиради (Адашаётган бўлсам, қани эди!). Нахотки, одам боласи шу даражада ҳиссиз, ҳайратсиз, юраксиз ва завқ-шавқдан маҳрум бўлиб қолса! Биз баъзан Фарбда меҳр-муруват, одамгарчилик, меҳмондорчилик йўқ деган тасаввурда юрамиз. Ҳолбуки, чет элда бир-икки ой яшаган одам сифатида айтишим мумкинки, хусусан, немисларда бундайга ўхшамайди. Бир кампир уйида ижарада турдим. У ҳафтада дугона-кампирлар билан қаҳваҳўрлик қилиб, биргаликда театр ва концерт томошаларига борганига гувоҳ бўлдим. Ўзбекистоннинг тарихий шаҳарларига қизиқиб, ўтган йили ёз фаслида шу кампир веналик бир дугонаси билан саёҳатга келиб кетди. Саёҳати олдидан немис тилига таржима қилинган ўзбек адабиётидан намуналар топиб ўқиди. Дейлик, у эски миллий одатлар таъсирида кексарган кампирдир. Аммо у бугунги барча майда техникани ҳам бемалол ишлатади. Уларнинг ёшлари чи? Қўлларида телефон, нетбук, планшет... Аммо ўринли-ўринисиз, керакли-кераксиз гап сатаётгани деярли учрамайди. Зарур маҳали ўша матоҳлардан фойдаланади. Кузатилган бир вазият: ҳар кими – олимни, ялкови, анқови, ҳатто йўлда юмалаган бир пивоҳўри ҳам китобга, журнал ё газетага мук тушиб ўқиётган бўлади. Китоб дўконларида қатор тизилган юмшоқ ўриндиклар, ёш болалар учун маҳсус ўйингоҳ шаклида безалган “митти кутубхоналар” ибор. Китобни олиб ўша ерда ўтириб ўқиёди, мазмуни билан танишади. Маъқул келса, харид қиласи. Индамай жойига қўйиб кетса ҳам бирорвнинг иши йўқ. Эҳтимол, анъянага айланган китоб байрамларимиз ёнига қўшимча равишда бундай тажрибаларни бизда ҳам қўллаш китоб ўқишга рағбатни кучайтирса керак...

Гарчанд китобат ва хаттотлик санъати техник жиҳатдан ўрама қофоз ёки уларни беш-ён нусхада кўлда кўчириб кўпайтиришдан тортиб, то миллионлаб тиражда босиб чиқариш, ҳатто электрон китоблар яратишгача бўлган узоқ йўлни босиб ўтган бўлса ҳам, китобнинг асл вазифаси, инсонлар ва жамият ҳаётидаги ўрни, кадр-қиймати ўзгарганича йўқ. Гарчанд бутун дунёда нанотехнологиялар, электрон дарсликлар, интернет саҳифалари ва билим олишнинг шу каби бошқа воситалари ёруғлик тезлигига ўсаётган бўлса ҳам, менинг назаримда, китобга қизиқиш сўнмайди. Сўниши мумкин эмас. Чунки дунёдаги ҳеч бир восита китобнинг ўрнини тўла-тўқис боса олмайди. Одам яхши китобларни мутолаа қилишдан завқланиб, оқ қофозга муҳрланган донишқалб ҳароратини ҳис этиши ва олийжаноб бир инсоннинг юрак уришини сезиб туриши лозим. Рух камоли, дил парваришининг белгиси шу бўлади.

Қоғозни гўё жонлантириш, моддага бамисоли ўлмас рух баҳш этиш – истеъдод эгаларининг, чин адилларнинг саодатли қисмати. Шу каби юксак ўлчовлар билан бугун биз яшаётган кунларга ҳам назар ташлаш лозим. Айрим китобларнинг қадр топмаётгани, кўпминг нусхада босилган баъзи китобларни бирорта ўқувчи ўқимаётгани – бундай ҳакиқатдан ҳам кўз юмид бўлмайди. Алоҳида таъкидлаш жоизки, қайси жанрда ёзилганидан қатъи назар, яхши китобга талаб ҳар доим бор ва бундан кейин ҳам бўлади. Ўқилавериб муқоваю ички саҳифалари анчамунча уриниб қолган, ҳатто титилиб кетган китоб муаллифлари нақадар баҳтли ва аксинча...

Умид Ёқубов: – Дунёни билмадимку-я, бироқ ёшларимиз орасида китоб кутилганидан камроқ ўқилаётгани чин. Тўғрироғи, савия борасида ачинарли: улар тасаввурни шоир бир-икки яллачи, ёзувчи эса серурӯғ

сериал – “роман” ёзаётган “азаматлар” бўлиб қоляпти. Энг ёмони, дид пасайиб кетмоқда. Бунинг сабаблари қўп ва уларнинг аксарияти ўтиш даври муаммолари билан боғлиқ: айрим китоб ўқиганлар ўқимаганлардан пастроқ молиявий имкониятларга эгалиги; вақт тифизлашгани; замон шиддатининг онг-қалбга кўчгани; кундалик турмушда маънавият масаласининг моддий тўкинликдан кейинги ўринга тушгани – “бутламок” калимасининг бутга айланган“и (Фахриёр), китоб ўқимасдан ҳам тўкин яшаши имкони борлиги.

Албатта, қуруқ дийдиё билан иш битмайди. Президентимиз Ислом Каримов “Адабиётга эътибор – маънавиятга, келажакка эътибор” рисоласида таъкидлаганидек, “Энди одамлар, ёшлиар китоб ўқимай қўйди, деб фақат нолиб ўтирмасдан, таъсиричан замонавий ахборот воситалари орқали адабиётимизни кенг тарғиб этиши, хусусан, Интернет имкониятларидан фойдаланиб, етук бадиий асарларни ёшлиарга етказиши устида ҳам жиҳдий боши қотириши зарур”.

Бугун мамлакатимизда ҳар уч юртдошимиздан бири интернетдан фойдаланади (холбуки, бу кўрсаткич 2010 йилда бор-йўғи 2,8 миллион нафар эди). Бироқ интернет орқали бадиий асар ва сурат/кўшик/клип/фильм кўчириб-юклаб олиш орасидаги фарқ қанча? Балки юз, минг баробардир. Баъзан ижтимоий тармоқлар (айниқса, facebook)да бирор асар ҳақидаги шарҳларга кўзимиз тушади, лекин шунда ҳам саводли ўқувчининг қизғин баҳс-мунозарага чорлайдиган фикрларини кам ўқиймиз. Аксарияти лаҳза кайфияти. Шунчаки. Иримиға. Фикр таъсирилашувлари, алмашишлар тезлашиб, кенгайса, дид чархланади, тафаккур қувватланади. Бироқ бунинг учун аввало мутолаа маданияти ривожланиши лозим.

Дунёда электрон китоб учун “Reader” дастурлари ва қурилмалари ишлаб чиқариш кўлами кенгаймоқда. Бугунги ўқувчи шу даражада ялқов бўлиб кетдики, замонавий “Reader”ларда сурат ва видео томоша қилиш, аудиоматериаллар эшитиш мумкин, ҳатто китобни ўқиб берадиган функция мавжуд. Бугун жаҳонда электрон китоблар савдоси ҳажми босма китобларга tengлашиб, ҳатто ошиб ҳам бормоқда. Мана, яқинда, Марказий осиёда ягона китоб дўёкони – “Китоб олами” иш бошлади. Қатор мамлакатларда иқтисодий инқироз, табиий оғатлар, ички можаролар оқибатида моддий эҳтиёжлар – қорин ғами биринчи ўринга чиқиб қолган бир пайтда Ўзбекистонда “Маърифат маркази” каби кўплаб илм-зиё, маънавият ва маърифат масканлари барпо этилмоқда, бир неча йилдан бери “Китоб байрами”, ярмаркалар ўтказилипти. Баъзи жойларда келин сепига китоб қўшиш урфга кираётir.

Шуларга қарамай, оилавий китобхонлик йўқолиб бораётгани чаток (Абдулла Қодирийнинг машхур оилавий суратини эсланг. Адид қаҳрамонларини бежиз китобхон сифатида тасвириламаган-да). Унинг ўрнини сериалхонлик, гийбатхонликлар эгаллаб бўлди. Демак, сериал ва фильмлар савиясини кўтариш керак, назаримда. Яна бир гап: ғарб фильмлари, сериаллари, клипларида ҳам китобхон одамни эзма, анқов-хаёлпараст, жисмонан кучсиз, кўрқоқ сифатида тасвирилаш кучайди. Ҳатто болакайлар оммавий кўраётган “Маша ва айиқ” мультфильмида ҳам сўйлоқтиш қизалоқча китобларнинг устига ўтирволиб, бўтқа ейди. Буларнинг бари ёшларни китобхонликдан совитиши табиий. Демак, қаҳрамонга ҳам кўп нарса боғлиқ экан-да.

Йўқ, барибир, бадиий хазиналар музей экспонатлари қаторига қўшилиб қолмаса керак. Агар шундай бўлса, ёшлиар, албатта, китобни ўқиб кўриш

учун музейга боради (худди адабиёт ўлса, унга бағишилаб марсия ёзилгани каби). Китобхонлик пасайгани оқибатида ҳаётимиизда таҳлил йўқолиб боряпти, эснаш кўпаймоқда. Мия қизиса, эсналади. Бироқ бу қизиш тафаккур ва тасаввурнинг кўп ишлаётганиданми ё бошқа майда-чуйда ташвишлар туфайлими? Кейин ҳар хил “азайимхон-фолбин-“илгир”лар” уруғи кўпайиб, уларнинг эшиги ҳаддан ортиқ гавжумлашмоқда. Мен чин эътиқодли, одамлар ихлосини қозонгандар, иймонли қори домлаларни эмас, гапи ва амали тескари, фирибгар чаламуллаларни назарда тутяпман. Учтўрт йил бурун биттаси ўзини пайғамбар ўзлон қилиб, “муридлари”га пешобини “ҳада” килгани ҳақида ўқигандик, бир “хонимча” эса тамаки тортиб, оғзидан чиқкан тутуни билан эшигига келганларга “дам урар” эмиш (ким билсин, бу ҳам бизнеснинг бир турига айландими?). Ҳайрон қоласан, одамлар ёзувчи ё психология қабулида бўлиб, сұхбатлашиб, ўзини қийнаётган руҳий муаммоларга ечим топишига ишонмайди, лекин қамоқдан чиққанми, ўғри-фирибгар, хотинбоз ё фохишами – ўзини “қўл олдим”, деб ўзлон қиласа бўлди – эшигига бориб ётиб олади. Буларнинг бари – ҳодиса кетидан кувиш кучайиб, қадар ва таваккалдан юз ўғирилиб, айтилган гапга лаққа ишониш одатга айланиб, алҳол китоб ўрнини ахборот эгаллаб бораётганидан далолат. Ўзи ҳақида ўйламай, ўзини таҳлил қилмай, ўзи билан ўзи курашмай қўйган одам фолбинма-фолбин изғиди-да. Майна ё қарғанинг кўлмакда қанотини тозалаётганини кузатганимисиз? Қандай берилиб ўзини поклайди-я. Ахир одам онгли жонзот, исм илми эгаси-ку! Ўзини маънан тозаламаган кимсанинг манзили маълум.

“Дунёни қилич, шаҳвоний ҳирс, пул ё манфаат бошқаради”, деган гап бор. Бугун эса бу борада аниқ ниманидир кўрсатиш қийин. Айтайлик, ўтган йили машҳур халқаро мусиқа танловларидан бири – “Eurovision”да австриялик “соқолли аёл”нинг ғолиб чиқиши инсон қалбини асраш ҳақида асаб олиб-асаб бераётган жаҳон маънавиятчиларига ўзбекча бир иборани эслатди: “Сенинг гапинг... менга нима?”. Тўғри-да, миллионлаб зиёли глобаллашув, айнан, “оммавий маданият” ҳосиласи бўлган “бир жинсли никоҳ”, “никоҳсиз-оиласиз яшаш”, “ҳайвонлар билан никоҳ”нинг умуминсоний маънавиятни емириши, инсоний ҳаёт тарзини издан чиқариши ҳақида тун-кун жаврамоқда, қанча лойиҳалар амалга оширилмоқда, миллиардлаб маблағ сарфланмоқда. Бу ёқда эса... Ахвол шу бўлгач, замонамиз ёзувчилари сукут сақламаганда ҳам алар “шамол куни чақирган”¹ бўлиб қолмайдими? “Кулфат доноларнинг маҳри азалий...” (Ж.Байрон) Хўш, шу кетишида бўлса, Кончита кабилар ёшлар учун идеалга айланиб қолиши ҳеч гап эмас. Ўйлаб қўрайлик: нима учун ёшлар Дон Корлеоне ё Пўлат Аландарни, Худо ва ҳукумат қонунларини бузганига ҳам қарамай, яхши кўради? Чунки бу қаҳрамонларда пул-давлат бор (худди ўша эртакдаги бойваччанинг кирқ ёвқур йигитни кирқ кунда ўзидек хотинчалиш қилиб олгани каби).

Хўш, инсон барибир ўз қаҳрамонига эҳтиёж сезар экан, замон қаҳрамони қандай бўлиши керак? Ҳар ҳолда ҳеч қачон хато ё гуноҳ иш қилмайдиган, ҳар томонлама мукаммал, факат ғалаба қозонадиган, пуфлаб шиширилган, ҳаёт ҳақиқатидан йироқ, шиор кўтариб югурадиган одамни бош қаҳрамон билиш қанчалар мантиқсиз эканини соцреализм керагича исботлаб берди-ку. Бу дунё санъатида ҳам, томошабин тасаввурида ҳам аллақачон эскириб улгурди.

Қолаверса, Президентимиз Ислом Каримов 2010 йил 30 августда

¹ “Шамол куни чақирма, товушинг зое кетар” мақоли кўзда тутилмоқда.

“Бухоро маданий маркази” мажмуида вилоят мусиқали драма театри очилишида замон қаҳрамони ҳақида гапирар экан, “ёшларни тўғри йўлга бошлашда панд-насиҳат билан кифояланиб бўлмас”лиги, “эзгуликни, юртпарварликни, инсоний фазилатларни камол топтиришга хизмат қиласидиган амалий ишлар қилиши керак”лигини алоҳида таъкидлади. Шундай экан, бугун ижодкорлардан сўралаётган замон қаҳрамонини янги Корчагин, деб тушуниш, шубҳасиз, авомлик бўлади. Бироқ шу мақсадда саҳнага қўйилган бир қанча спектаклларни томоша қилиб, ҳафсала пир бўлиши аниқ. Бир саҳна асарида бош қаҳрамон – кеча дорулфунунни битирган тирмизак бола бирпасда катта фермер бўлиб кетиб, ҳар ишчисига уй қуриб текин тарқатиб юборди-я. Охирида андак ҳавойи ва узун монолог ҳам ўқиди. Хўш, бундай томошаларнинг кимга кераги бор? Ахир вақт кетяпти, авлодлар улғаймоқда, замон шиддатлашяпти. Ҳар қандай образ жонли, табиий бўлсагина, томошабин унинг кечинмаларини ўзидан топа олсагина, шу образ халқ қалбидан чуқур жой олади. Санъат реал манзарани натураллаштириш ё бўрттириш эмас, балки бадиий таҳлил ва синтез орқали ифодалашдир. Ўқувчи қаҳрамон фожиаси ё ютуғида ўзини кўрмаса, ўзини топа олмаса, нима қилсан?! Шукур Холмирзаев айтганидек, “Биз кўриб-яшаб турган ҳаёттисиздир: инсоннинг ноёб сифатлари, қусурларю эврилишлари, буюкликлари ҳар сонияда намоён бўлмоқда. Вазифа – уларни кўриши, англиш, маззини чақиши ва тасвирлаши орқали инсонларни олий нурга – эзгуликка тортишдан иборатдир. Шу йўлдан адашмасак ва бизни адашишга мажбур этмасалар, бас, қолгани ўзимизга боғлиқ экан”.

Алишер Навоий “отангнинг (Одам Атонинг) ғанимини (иблисни) дўст тутма” дер экан, оловни тупрок, нафсни сабр ва шукр билан енгиш мумкинлигини айтади. Бугун санъатда шуни – “ота ғанимини дўст тутмаслик”ни эплаш ҳам катта гап бўлиб қолди (“Балки одам эмас, кечиккан жазо” (А.Кутбиддин). Баҳсга эса Лев Толстой нуқта қўяди: “Иймонни билиш ҳам бутун инсоният ва унинг ақли каби сирли бир ибтиоддан келиб чиқади. Бу ибтидо – Худодир, бу инсон жиссмининг ҳам, ақлининг ҳам ибтидоси. Менинг жиссмим менга Худодан ворислик йўли билан қандай етиб келган бўлса, менинг ақлим ва ҳаётни танишимнинг ҳамма ривожланиши босқичлари ёлгон бўлиши мумкин эмас...”.

Адабиёт ҳамма замон, ҳар қандай муҳимтда ҳам инсон табиатини гўзал қилишига, унинг қалбини тозалашига хизмат қилиши керак. Инсон юрагида тугилган дард рост, самимий бўлса, шунда у бошқалар юрагида, жасамият қалбида акс садо беради. Дарди йўқ одамнинг, изтироби, кечинмалари, азоблари носамимий бўлган ижодкорнинг сохта ҳайқириқлари, сунъий хитоблари, зўраки уринишлари адабиётда вақтнинчалик кўкка кўтарилиши мумкиндир-у аммо кутилган самарани бермайди. Худди фарзанднинг она қорнида қачон пайдо бўлиши, унинг тугилиши, тугилганда ҳам қай ҳолатда тугилиши масаласидаги мураккаблик адабиётда ҳам, бадиий асар тақдиррида ҳам кузатилади. Фарзанд тугилади, тарбияланади, насл қолдиради. Бадиий асар ҳам инсон қалбида тугилади, сайдалланади, жасамият ҳаётида акс садо беради. Бу ерда ёлгон, юзакилик ва қўрқўона муносабатга ўрин йўқ. Бугун буюклик даъвосида адабиётни сунъийлаштирувчи янги услугуб, янги оқим ниқоби билан иши қўришига уринаётганлар кўпайиб бораётгандек туюлади. Нима деб ўйлайсиз, адабиётда турли ребуслар, бошқотирмалар муҳимми ёхуд ҳаётий

драмалар... Адабиёт янгиланадими ёхуд инсон шахсига муносабат, ифода, қараашлар ўзгарадими?

Баҳодир Каримов: Бугунга келиб бироз тафти совуган, ҳеч нарса ҳал бўймаган эса-да, муҳокамалар гирдобига тушган, аслида аллақачонлар дунё адабиётчилари чўнтағидан тушиб қолган “модернизм” мавзусини яна қайтадан кун тартибиға қўйиб, бу хақда узундан-узун баҳс очиш ўринизиз кўринади. Тўғриси, уни ёқлаш, оқлаш ёки инкор этишнинг ҳозир мавриди эмас. Чунки бундай баҳсларни ҳар бир миллий адабиёт бошидан ўтказади, шекилли. Оврупа адибларининг асарларини bemalol оригиналда ўқиган Лев Николаевич Толстой ўз вақтида ёзган экан: “Бизнинг замонда Нитшенинг ахлоқсиз, дағал, баландпарвоз, пойинтар-сойинтар сафсаларига файласуфларнинг энг охирги сўзи сифатида қаралмоқда”. Шунингдек, поэзиянинг табиий ва соддалигини қадрлаган адаб бир адабий сухбатида ўйлаб топиб, сунъий ёзаётган “янги” шоирларнинг шеърларини “бу шеърлар эмас, лўттибозлик (шарлатанство), бемаънигарчилик (ерундистика)”, деб атайди. “Ўрта асарларда уни “маънисиз тўқилган сўзлар”, дейишган”, деб қўшимча қиласди. Адаб уларда қофия ва вазн мавжуд бўлса ҳам, сунъий ва бемаъни сўзлар йиғиндиси деб баҳолайди. Толстой ўзи гувоҳ бўлган ярим асрлик рус шеърияти ва унинг вакиллари шуҳратига муносабат билдирар экан, талабни ниҳоятда юкори қўяди. Майков, Полонский ва Фетни “мужмал, ишониб бўймайдиган”, Некрасовни адабий иқтидордан мутлақо мосуво, Алексей Толстойни сунъий ва воқеий-насрий шеърлар ижодкори деб баҳолайди. Кейинги рус шеърияти намояндаларига – ўз даврининг ёшларига нисбатан “уларнинг ўзлари ҳам билишмайди нималар ёзаётганини”, деган баҳони беради. Ва ниҳоят, бугун биз учун ҳам ҳаво ва сувдек лозим бўлган яна бир фикри шуки, соғлом адабий танқид дидли китобхонни тарбиялашга, китобхонда эстетик дидни шакллантиришга ёрдам бериши лозим. Тарихдаги бу ходисалардан ибрат олиш керак.

Менга жарангдор, табиий, ҳикматли, самимий, жўшқин, оҳангли, таъсирчан, сирли, фалсафий; тафаккурни чархладиган, юракни тўлқинлантирадиган, тўғриликни ўргатадиган, иймонни мустаҳкамлайдиган, руҳиятни юксалтирадиган, охиратни эслатадиган; яшашга қувват берадиган, поэтик қолипга тушган, дўст-душманни танитадиган, эзгу амалга ундейдиган; бир неча марта ўқишга арзидиган, ўлим ходисасига табиий муносабатни шакллантирадиган, барча муаммолари охиригача ҳал қилинган, муаммолари устида доимо муҳокамалар юритиладиган асарлар маъқул келади.

Умид Ёқубов: – Алгебрада шундай қоида бор: тенгламани кимdir бир соатда, кимdir умр бўйи ечади. Иккисида ҳам жавоб бир хил: бўш тўплам. Биринчи ҳолатда тенгламанинг жавобсизлиги жавоб ўрнида қабул қилинади, иккинчи одам эса шу тенгламани умр бўйи сон-саноқсиз усувлар билан ишлаб кўраверади. Адабиётда янги шакллар изланишига сабаб ҳам шу – “ҳаётнинг мазмуни нима?” деган тенгламани бошқача усуlda ишлаб кўришга уриниш. Соф бадииятни Аскад Мухтор “мангу савол”, дер экан, “сутчи хотин кенжаси”нинг ёзувчига берган саволи эсга тушади: “Сўрок зўрми ё ундов?” (Эркин Аъзам).

Ҳазрат Навоий айтганидек,

**“Ихтилофи жузв¹ ила кулл² мундадур –
Ким тараққи-ю таназзул мундадур...”**

Барча ўз йўлини тўғри ҳисоблайди. Ҳар ким Йўлни ўз йўли томонга буриш учун уринади, ўзини устун қўяди... Йўллар наинки бир-бирига, балки ўз-ўзига ҳам хилофлашади. Зеро, кўрлар Филнинг қисмига бутунлик даъвосини қилганидек, Йўловчилар ҳам ўз йўлини Манзил демоқлиқдан тийилмайди. Ҳолбуки, бир-бирини инкор этаётган кишилар, аслида, англаб-англамай айнан бир нарса (ЎЗ) ҳакида сўзлайдилар...

“Нимадир кетди... Бус-бутун, қайтмас бўлиб. Куюнмайсан. Кетгани чин бўлсин, дейсан пичирлаб. Бироқ борса-келмасга равона бўлган нарсалардан тушган соялар ва узоқ туриб қолган соялардан мерос захмогорлар босган жойларга нур туша бошлади”, деб ёзганди Аҳмад Отабой мустақилликнинг бошларида. Янги давр адабиёти – қафасга суюниб ўрганганд руҳнинг янги матрица излаши эди. Балки шунинг учун ҳам “реализм керакми ё модернизм?” деган баҳс келиб чиқди, шекилли.

Сартр экцизентенциализм ҳакида мулоҳаза қиларкан, “менга яқинда бир аёлнинг нуфузли даврада қўпол иборани ишлатиб, кейин узр сўраш ўрнида “чамаси, мен экцизентенциячи бўлиб боряпман”, деганини айтишди”, дейди. Шу каби адабиётимизда ҳам андак ола-курок, “олабўжи” сифат ёзилдиқларни киноя аралаш “модерн асар”, дейиш урфга кирди. Тасаввурни янгилайдиган, моҳиятни сал “бошқача”роқ ифодалайдиган адабни ёт унсурга, плагиатга, тақлидчига – “чангальзор-сельвада койот қувиб юрган”га чиқариш (М.М.Дўст) ҳам осон бўлиб қолди. Балки тўқайга ўт кетса, ҳўл-қуруқ баравар ёнар, лекин онгли жамиятда ўз истеъоддосизлигини шаклпастлик ортига беркитадиган лўттивоз билан сўзни, метафорани, тасаввурни янгилашга уринаётган ижодкорга бир хил баҳо берилиши – адолатдан эмас. Чунки лойка дарё – бу чуқур дегани эмас.

Ҳар қандай адаб ичидагини айтиб олиш учун ўқувчини қимиirlатмай қўйишини, китобдан бош кўтармай қолишини истайди. Шу мақсадда турли шакл-услублардан фойдаланиши табиий. Айтайлик, бу борада Боккаччо, Мопассан, Маркес шаҳвоний кадрлардан, Сервантес саргузаштлардан, Нитше ўткир (чида бўлмас) нигилизмдан фойдаланганни маълум. Таассуфки, сўз янгиланиши бизда асосан шакл ўзгариши сифатида тушунилмоқда. Масалан, шевада ёзилган асар – дохиёна асар (худди энг зўр ёзувчилар абсурд адиллар, дейилгани каби), каби тушуниш авж олди. Илонни “жилон” ё ипни “жип”, деб ёзган билан таржимада “змей” ё “нитка” бўлади-ку, барибир. Гап “ўша”нинг “аши”, “бойнафи”, “анови” тарзида айтилишида эмас, “Мен”нинг “У”даги тажаллисиададир. Бир тил ичida қолган бадий тажрибалар, албатта, безак, бироқ адабнинг асосий ютуғи эмас. Тоғай Мурод асарларини бошқа тилга ўгиргандан охори кетиб қолганидек, Фахриёрнинг “Сулаймон насиба ҳат излаб келади” ё Бахром Рўзимуҳаммаднинг “Қора доскага БЎР билан қандайдир имлони битоётган ОН бирдан пайдо бўлиб қолади БЎРОН” каби тил тажрибаларини таржима қилиш қийин.

Менимча, адабиётда турли ребуслар, бошқотирмалар ёхуд ҳаётий драмалардан ҳам кўра инсоннинг ўзини енгишига эришиш муҳим. Бу асарнинг биринчи варагида “Дада, менинг илдизим қаерда?” деб савол

¹ Жузв – бўлак, парча.

² Кулл – бутун, яхлит.

бериб, тўртинчи саҳифага борганда “Дада, мен илдизимни топдим!” деб хитоб қилиш эмас, албаттга.

Адабиётни янгилаш учун, балки, аввало, кундан-кун бир-бирига қоришиб кетаётган бадиият ва публицистик характерни мутлақо ажратиб олиш вақти келгандир. Бадиий публицистика бугунги ё эртанги саволларга жавоб ахтариб, маълум вақт оралиғида ечилиши муқаррар муаммоларни ўртага кўйса, далил ва факт, ёзма ҳужжатлар ва унинг ижросига суюнса, Соф Бадиият ечим излайдиган савол то Инсон тирик экан, ўз-ўзи билан курашар экан, барҳам топмайди. Чунки одам руҳи, ўзи яратиб – ўзи вайрон қилиб бораётган қадриятлар доим эврилиб туради. Кафка “жавоби ўзида бўлмаган саволларга ҳеч қачон жавоб топилмайди”, деган. Адабиёт – жавоби ўзида бўлмаган саволларга ҳам жавоб излаб кўриш дегани. Соф Бадиият – инсоннинг ўз-ўзи билан мангу кураши ифодаси. Буни публицистикада бир қадар ифодалаш мумкин, аммо уни тўла-тўқис бирор-бир қоидага бўйсунмаган ҳолда ифодалаш фақат ва факат адабиётнинг қўлидан келадиган иш. Жўн дидактика эса на публицистика ва на бадииятдир. Одам – мангу кураш. Унинг ҳаёт пилиги Умид ермойига ботирилган ва Шубҳа оловида тобора қуиға ёниб келмоқда – юксалиш учун. Соф бадиият – ана шу мангу кураш ифодаси. Ҳикоя ё шеър, мақола ё сухбат бўлсин, кучли асарни барibir кучли шахс яратади.

Аслида ҳикоя ё эссе бўлсин, одамга, миллатга фойдаси тегса бўлди. Кейин дунё адабиётида жуда кўп даҳолар жанрларни унча тан олмаган. Айтайлик, Борхес. Уни шоир деса шеърий асарлари насрга ўхшайди, ёзувчи деса насрый битиклари илмий тадқиқотлар каби, олим деса мақолалари шеър ё ҳикоядан кам эмас. Уларни китоблардан олинган таассурот ё иқтибослар йиғмаси деб биладиганлар ҳам талай. Аммо Борхесни ўз битикларининг қайси жанрга таалуқли бўлишидан кўра уларнинг инсон камолотига қанчалик хизмат қилиши кўпроқ қизиқтирган.

Лекин бизда ҳали Борхес даражасида инкор қилинадиган назариянинг ўзи яратилгани йўқ. Бугун ҳам соф бадиият нималигини белгилаб берадиган, замонавий ва пишиқ-пухта Адабиёт назарияси йўқ. Афсуски, шундай. Тўғри, шунга яқин нималардир қилингити, аммо асосий масала – Соф бадиият масаласи ечилмаган. Шу боис ҳам бадиий асарга ҳали-ҳануз “нима ҳақида” деб савол беришади. Бугун ёшлар шеър деб ўқиётган кўп нарсалари аслида қоғияга солинган эссе (лавҳа ё қатра) эканини, айрим роман деб билаётганлари аслида узунроқ очерк эканини англашлари учун аввало Соф адабиёт назарияси керак. Шу туфайли ҳам чин ижод билан қалбакилик гоҳо қоришиб кетмоқда. Балки, бугун уларни ўқувчига ажратиб бера оладиган битта Абдулла Қаҳҳор етишмаётгандир. Соф бадиият – инсон тафаккури ва тасавурурининг бадиий инъикоси, тимсол билан тиллашиш, дунёни, инсонни янгича идрок этиш ва ўша идрокни ифодалаб, керак бўлса, исботлаб бериш. Бироқ “ёзиш – танлай олиш салоҳиятидир” (А.Камю). П.Лагерквист айтганидек, “одамнинг маънавий эҳтиёжларига дахл қилиш санъатнинг ютуғи эмас”. Адабиёт – маънавий тозаришга, ибодатга айлангандагина ўз моҳиятига ёвуқ келади.

– Бугунгача бўлган авлоднинг эътиқодида маънавият, адабиёт ва китоб муҳим аҳамият касб этган эди. Бугуннинг ёшлари эса ҳаёт маъносини боишқа асос, моҳиятда кўришаётгандек туюлади. Бунинг оқибати нималарга олиб келади, деб ўйлайсиз?

Баходир Каримов: Агар моддият асосига бўлса, унинг ёнида

маънавият қасри қад ростласа, бундан хавфсирамаган маъқул. Агар рухияти учун озуқа излаётган бўлса, юраги кирланганини сезиб, уни тозалаш ниятида юрган бўлса, бунинг оқибати хайрлидир. Ҳамма нарса ўз аслига қайтади: одам тупроққа, от қозигига, мис мисга қўшилиб, тилла тилладек қадрланади.

Ғарбдаги файласуфлардан бири: “Одамнинг аввал қорнини тўйдириш керак, кейин унга маъруза ўқиган маъқул. Акс ҳолда оч одамга бироннинг гапи ёқмайди”, деган мазмунда яхши гап айтган экан. Бугун турли соҳаларда фаолият юритаётган ёшларнинг моддий эҳтиёжи қонгач, нафсини тўйдириб бўлмаслигини билгач, Искандарнинг бу дунёда қўллари бўш кетганини бутун моҳияти билан теран англагач, хайрсаховат, инсоф, сабр-қаноат ва бошқа гўзал инсоний фазилатларга амал этишини ўзлари учун дастуриламал қилиб олишига зарурат туғилади. Зоро, бу жараёнда улар, албатта, адабий-маърифий таълим-тарбияга, ота-боболардан қолган ҳикматлар, китоб насиҳатига эҳтиёж сезади. Шу зайлда ҳар қандай одам китобга қайтади, деб ўйлайман. Моддият ёшларнинг юрагида уя қурмаса, ҳамма иш аъло бўлади. Жалолиддин Румий ҳазратлари айтадики:

*Сув агар хорижсdir – таянч кемага,
Сув агар доҳилdir – аянч кемага.*

Сув бамисоли кеманинг уммон юзида сузишига имкон берганидек, мол-мулк ҳам одамнинг ҳаётда завқ-шавқ билан тик оёқда юришига ёрдамлашади.

Умид Ёкубов: – Президентимиз “Юксак маънавият – енгилмас куч” китобида “маънавият қотиб қолган ақидалар йиғиндиси эмас, аксинча, доимий ҳаракатдаги узлуксиз жараён” эканини эслатаркан, таъкидлайди: “Қаерда ҳүшёрлик ва жонкуярлик, юксак ақл-идрок ва тафаккур ҳукмрон бўлса, ўша ерда маънавият қудратли кучга айланади”.

Одам аввало ўзидан огоҳ бўлишни, ўзи олдида жавоб беришни ўрганиши керак. Нима учун тонгда кўз очиб, нега уйқуга ётаётгани ҳақида ўйлаб кўриши керак.

“Чўқинтирган ота” фильмида руҳоний сув тубида ётган тошни Донга чақиб кўрсатади: “Мана, қаранг, қуп-қуруқ. Европаликлар ҳам худди шундай... Худо уларнинг юрагига кириб бормади”. Бугун берилиб жума намозини ўқиб, сўнг масжиддан чиққач ҳам барибир тарозидан ураётган қассобни ё ўзи емайдиган сомсани “тақволи жойдан”, деб сотаётган сомсачини кўрганда, шу эпизод эсга тушади. Одамлар баъзан бирбирига ишонмай қўяётгани, айрим жойларда фирибгарлар кўпайгани, ота боласини, ака укани, қариндош-уруг ё ҳамқишлоқлар бир-бираини алдаб, хорижга олиб бориб, сотиб юбораётгани – қалбларда бўшлиқлар вужудга келганидан далолат. Ҳалқимиз бундайларни “Худодан нўхтасини узган”, дейди.

Бугун ёшлар орасида энг оммабоп санъат – фильм, куй-қўшиқ, қизиқчилик... (балки бунга ёзувчи-шоирларга қараганда артистларнинг бойроқ яшаси ҳам сабабдир). Юқорида айтганимиз “соқолли хоним”нинг Европа саҳнасига чиқиши – Ғарб санъатида XX аср бошларидаёқ авж олган нигилизм, фазилатга айланган фанатизм, жинс алмаштириш (эркак ва аёл ролини бир-бирига ўйнаттириш) тажрибаси берган “хосил”. Юртимизда илк театр пайдо бўлганда аёл ролини ўйнаган эркак актёрларнинг исми афишада ёзилмас экан. Чунки ҳалқдан кўрққан, уялган. Бугун эса бир қизиқчимиз эридан калтак еган хотин қилиғини

кўрсатаркан, ўзининг сўзини беихтиёр ўзига такрорлайсиз: “Та-а-вба-а!”. Яқинда бир кино кўрдим: “Пайшанбадан пайшанбагача”. Тўрт ошнадан бири (у яна ўқитувчи!) қизга айланиб қолади, ошналаридан бирининг ва укасининг (!) эса унга... кўнгли суст кетиб, тегажоғлиқ қилишни бошлайди. Шукрки, шундан нарига ўтишмайди.

Бугун сотқинлик, иккюзламачилик, бирорнинг ҳаққини ейиш, иғвогарлик, кўролмаслик, нафс балоси, мансабига қараб лаганбардорлик қилиш, гап ташишу фийбатдан жирканиш сустлашмоқда. Сотқин, иғвогар, иккюзламачи, ғаламис одамлар спектакль ё киноларимизда енгилади. Лекин томошабин улардан қаттиқ нафратланмайди. Чунки ён-веримизда шундай одамлар ҳам ҳаёт кечириб юрганига ўзимиз гувоҳмиз. Маънавий хасталиклар тузатилмас экан, Комил Инсон манзили узоқлашиб бораверади.

– Бир куни йўл четидаги бир-бираига ҳазил-хузул қилиб турган 19-20 ёшлар атрофидаги иигитларнинг сұхбати қулоққа чалинди. Улардан бири, нимадандир гап чиқди-ю, шеригига: “Хой, Отабек, Зайнабга айтаман, сенга заҳар беради”, деди. Рости, бу гапни эшишиб қувондим. Бу ҳарқалай, машхур асаримизни ўқиган, ундан қандайдир хуласалар чиқарган ўкувчининг фикрлари эди. Кейин уларнинг қўпол, бир-бирини бехурмат қилиб айтган гапларидан ҳафсалам пир бўлди. “Зайнаб заҳар беролмайди, ман ўша заҳарни асарингнинг автори Тоҳир Маликка ичираман”, деба керилди мўйлови сабза урган олифта иигит. “Хей ўқимаган, бу китобни Тоҳир Малик ёзмаган, уни Абдулла Қаҳҳор ёзган-ку”, деди шериги ҳозиржавоблик билан. “Эй, барибир эмасми?” деба енгилтаклик ва совуққонлик билан қўл силтади униси. Бўлаётган сұхбатни эшишиму бугунги ёшлар савияси, мумтоз адиларимизга бўлган муносабатини кўриб нокулай ҳолга тушибим. Бу ерда гап айлана-айлана яна А. Қаҳҳор таъбиридаги “Адабиёт муаллими”га келиб тақалади. Бугун таълим тизимида бекиёс ўзгаришлар, юксак ислоҳотлар амалга оширилмоқда. Аниқ, табиий фанлар ва спорт соҳаларида ёшларимизнинг қўлга киритаётган ютуқларини кўриб, севинчингиз ичинчизга сигмайди. Аммо адабиёт ўқитиши масаласи деганда, кўриб турганимиздек, кўпгина ёшларнинг савияси ҳаминқадар, оддий нарсаларни ҳам билишмайди. Бу борада сизни қийнаётган муаммолар нимада ва бу масалада қандай гоя-таклифларни илгари сурган бўлардингиз?

Баҳодир Каримов: Кўпгина занжирли муаммоларнинг ечими оила, мактаб, тарбиячи-муаллимларга бориб тақалади. Адабиёт муаллимлари касалга ўхшаб, ҳиссиз, маҳзун ҳолатда; уйида хотини билан тортишган эркак, эри билан жанжаллашган хотин ўша кайфияти билан синфонага кириб борса, бу хасталик вируси ўқувчига ҳам юқади. Машғулотларда болаларнинг умри баъзан елга соврилади. Аслида, адабиёт муаллими лоқайдлик душмани бўлиши лозим.

Ўйлаб кўрайлилек: айрим мактаб, коллеж ва лицей муаллимлари таълим стандарт ва дастурларида белгилаб берилган мавзуларни ёлчитиб ўргатармиканлар? Агар ўргатишса, биласизми, нима бўлади? Ўқувчи билимдон бўлиб қолади. Мустақил китоб ўқийдиган, мустақил равишда тестларни ечадиган бўлиб кетади. Бунинг оқибатида муаллимлар хузурига билимдон ўқувчи қўшимча дарс олиш (репетиторлик) учун келмай қўяди.

Маънавий-ахлоқий, адабий-маърифий тарбия хусусида айтилмаган

гап қолмади. Юнон файласуфларидан тортиб, Шарқнинг машхур алломаларига қадар фавқулодда ақлли ва доно фикрларни, бир дунё ҳикматларни айтишган. Шайх Саъдийнинг “Гулистан” у “Бўстон” и ҳам, ҳиндларнинг “Калила ва Димна”си ҳам, Хос Ҳожибининг “Кутадғу билиг” асаридан тортиб, Авлонийнинг “Туркий Гулистан”идан ўтиб, то Тоҳир Маликнинг “Одамийлик мулки” гача – ҳамма-ҳаммасининг ўзакнегизи жуда чиройли, оқил, таъсирчан, ўхшатиш ва сифатлашти таълимтарбияга оид ҳикматлардан иборат. Ҳамма гап айтиб, ёзиб қўйилган, сиёхлари ҳам қуриб битгандек гўё... Битта нарса қолибди – амал қилиш. Ким амал қилсин? – Мен, сен, у! Биз, сиз, улар!

Бугун тарбиядан нолиб, фарзандлар ахлоқидан кўнгил тўлмас экан, демак, бу маънавий хасталикни даволаш йўлларини излаш керак бўлади. Бу йўлларни узоқлардан излаб, гапничувалатмасдан, тадбирни ўзимиздан, уйимиздан бошлаш лозим. Ота-она фарзанднинг қўшқаноти, суюнчи, таянчи, таъминотчиси, табиби, муаллими, етакчиси, йўлбошчиси...

Агар уйингизда бир кун чироқ ёнмаса, нима бўлади? Зулмат! Агар бирор кун оила ош-нон билан таъминланмаса-чи? Очлик! Ур-тўполон! Оилавий муҳит ота-онанинг ёнма-ён, бамаслаҳат, бақамти ҳаракати туфайли, машхур мақолнинг бир парча қисмига ўхшатиб айтиладиган бўлса, бўйинтуруқни баравар тортиш билан томорқа шудгор бўлади, унга уруғ қадалади, уруғлар униб-ўсади, ҳосилга киради.

Бугун кўп мактаблар яққақанот, кўплаб тарбия масканларида омочнинг бир тарафи бўш, айрим ўкув даргоҳлари отадан тирик етим. Ўн йиллардан бери расмий ва норасмий доираларда гапираман – мактабларга эркакларни қайтаришни бошлаш керак. Қанчалар мураккаб бўлмасин, эркак зотини тарбияга, таълимга қайтармоқ лозим.

Хусусан, биздаги йирик шаҳарларнинг мактабларида жамоанинг бир юз бир ходими орасида икки-учта – бошланғич ҳарбий таълим, жисмоний тарбия ё меҳнат ўқитувчиси эркаклар, холос.

Мактаб дарс жадвали, журнали, қўнғироғи, эшикбони, муаллимаси ва яна бир қанча “сюжет элементлари”дан таркиб топган бўлади. Зоро, энг муҳими – дарс ва энг ночори ҳам – дарс... Негадир бугун мактабда таълим олаётган болалар бетўхтов-тинимсиз репетиторга қатнайди. Ота-она эса бунга шароит яратиб беради. Репетиторлик масканларининг пайдо бўлиши мактаблардаги машғулотларнинг сусайишига сабаб бўлмадимикан?

Қадим мадрасаларда гўё кийгиз китоблар ўқитилган, асрлар давомида янгиланмаган, ҳошияхонлик авж олган... Мадраса муаллимлари фақаттинга бир хил гапни такрорлаган... Лекин негадир ўша замонлардан дунёни оғизга қаратган хоразмийлар, бухорийлар, самарқандийлар, термизийлар, фарғонийлар, насафийлар, шошибийлар ва бошқа кўплар туркистонийлар ушбу рубъи маскунда улғайган. Расадхоналар бунёд этиб, юлдузлар ҳаракатини тадқиқ этишган. Битта чарм муқовали кўлланмани бир неча авлод асрлар давомида ўқиган. Тезнусха ва фотонусхага олиниб, қўлма-қўл тарқатилмаган. Ҳар икки йилда дарслек ёзиш бўйича кимўзар танловлари ҳам эълон қилинмаган...

Замонавий таълим даргоҳларининг барчасини бир хил деган фикрдан йироқман. Юралдан ишлаб, ўқийдиган тиришқоқ бола ҳақиқий одам бўлсин, юрт ишига ярасин, деб жон куйдираётган муаллимлар кўп, умид шуки, уларнинг ҳаммаси ҳам шундай бўлса, шояд.

Умид Ёқубов: – Битта ҳолатга қараб, бутун бошли ёшларни саводсизликда айблаш адолатдан бўлмас. Мумтоз адабиётни пухта биладиган, замонавий ёзувчиларни битта қўймай ўқиб борадиган ёшлар ҳам кўп. Хорижий тилларни ўқитиш кўлами кенгайиб, сифати яхшиланмоқда. Бу ҳам ёшлар мактабдаёқ жаҳон адабиёти билан кенгроқ танишишига хизмат қиласди.

Албатта, адабиётнинг таълимдаги ўрни ва аҳамияти аниқ ё табиий фанлар ёки спортдан паст бўлиши мумкин эмас. Лекин адабиётчи ёшларнинг халқаро майдонда довруқ қозониши бу соҳа вакилларига қараганда суст, анча паст. Ҳар йили қанча ёшларга филологлик дипломи берилади. Лекин уларнинг кўпи мактабга ишга борар экан, асосан репитеторлик ишини йўлга қўяди. Ўқувчилар адабиётни асосан дорулғунун имтиҳонига тайёргарлик нуқтаи назаридангина ўрганмоқда. Кейин филолог педагог битирувчилар орасида ўғил болалар кам. Борлари ҳам асосан таҳририятларга жойлашади. Адабиёт ўқитиш, асосан, аёлларнинг чекига тушмокда. Балки адабиёт ўқитувчиларининг республика анжуманларини кўпроқ ташкил этиш, тил ва адабиёт таълимига оид нашрлар адади ва сифатини ошириш, кўламини кенгайтириш керакдир. Илгари ёшлар ёзувчиларга бетиним хатлар ёзишгани маълум. Бугун жуда кўп ижодкорларимиз ўз сайтига эга, ижтимоий тармоқларда фаол мулоқотга киришмоқда. Лекин адабиёт муаллимлари шу имкониятлардан эплаб фойдала оляптими?!.. Масалан, бугун ижодкор йўл босиб узоқ қишлоққа бориши шарт эмас: интернет бор, демакки, адабиёт дарсини бирор ижодкор билан онлайн мулоқот тарзида ҳам ташкил этса бўлади-ку! Ким бунга халал беради ё қаршилик қиласди? Ҳеч ким. Ёшларнинг фикри юксалса, миллат юксалади ва бундан барча хурсанд бўлади, албатта.

Бугун ёшларга ўзбек бўлиб дунёга келиш, яшаш – бу аввало қисмат, сўнг эса масъулият эканини англатадиган, шева-ю бидъатга чалғимайдиган, том маънода ўзбек феноменига хизмат қиласдиган миллий адабиёт сув ва ҳаводек зарур. Нажот – адабиётда. Агар миллий адабиёт кўмакка келмас экан, ўзбек кўнгилни бой бериш ҳавфи ортади. ЎЗлик – ўзимизники. У шаклан эврилиши мумкин, аммо ҳеч қачон йўқолмайди. ЎЗликнинг англанмаслиги – фожиа. Фожианинг англанмаслиги эса мукаррар ҳалокатдир. Одам ўз-ўзини тарбия қилгандагина, ўзини ўзгартира олгандагина, энг оғир шароитлардан ҳам асраб ўтоладиган қадриятлари бўлгандагина... Борлиққа таъсир кўрсата билиши мумкинлигини эслатиш ўзбеккўнгилни асраб қолиш ва яна қайта тарбиялашнинг энг мақбул йўлидир. Зотан, Ўзбек-Инсон ҳодисаси — бу нуқул чопонга бурканиб, дўппини қийшайтириб, чойхонада палов ейдиган кимса эмас, балки томирида асрлар оша яшаб келаётган характер-йўлни англайдиган Инсондир.

Алимурод ТОЖИЕВ сұхбатлашиди



Отаназар МАТЕҚУБОВ

ЎЗБЕК МУСИҚАСИ

“Бугунги конференциямизнинг мақсади – Ўрта асрларда Шарқ оламида яшаб ижод этган буюк аллома ва мутафаккирларнинг илмий меросини чуқур муҳокама қилиши ва англаши, унинг замонавий цивилизация тарихида тутган ўрни ва ролига баҳо беришдан иборат.

Ана шу бебаҳо илмий меросни янада теран тадқиқ этиши ва оммалаштиришга қаратилган саъӣ-ҳаракатларга янги турткি берииш, Шарқнинг улуғ алломалари томонидан амалга оширилган қашифиётлар замонавий илм-фар ва тараққиёт учун нақадар долзарб ва зарур эканини очиб беришнинг аҳамияти ҳам шунчалик муҳим деб ҳисоблайман¹.

Миллат номи, барҳаёт куй ва ашулалари ҳамда уларнинг илмий асосларини ифодаловчи “ўзбек мусиқаси” сўз биринчесини устувор тушунча сифатида сарлавҳага чиқарилишининг ўзи замон талаби ва ижтимоий эҳтиёжлар нишонасиdir. Дарҳақиқат, Ўзбекистон азалдан жаҳоншумул мусиқий қадриятлар диёри: бу заминда асрлар давомида шаклланган муштарак ҳалқ ижодиёти, шунингдек, турли навлардаги маъмулий ҳамда мумтоз куй ва ашулалар, достон йўллари, бутун бошли мақом мажмуула-ри ўзбек мусиқасининг амалдаги урф-одатлари сифатида яшаб келмоқда, алломалари бунёд этган рисолалар ва нота ёзувларининг илмий салоҳияти бугунги кунда ҳам ҳайрат уйғотмоқда².

Мўътабар мусиқий меросимиз қадимий намуналарининг муаллифлари номаълум бўлса-да, улар ўзига хос барқарор асос – матн тарзида миллат хотирасида яшаб келмоқда. Белгили мақом йўллари Рост, Наво, Ушшоқ ва бошқалар, “Феруз”, “Тановар”, “Муножот” каби сон-саноқсиз кўйлар асрлар оша гўё хатга битилган матндеқ оҳорини йўқотмади. Бу мумтоз асарларнинг куй, вазн ва шакл асосларининг пухта ишланганлиги шубҳа туғдирмайди. Ваҳоланки, улар муайян мусиқий асар (таснифот-композиция) сифатида қачонлардир ва қайсиdir етук мусанниф (композитор сўзининг маънодоши) томонидан яратилган, албаттa³. Бу мерос ўзининг юксак бадиий ҳамда ижтимоий аҳамияти туфайли авлоддан-авлодга ўтиб, умумхалқ мулки ва маънавий озуқасига айланиб кетган. Жонли мусиқий қадриятларимизнинг хаётбахш кучи ҳам шунда.

Демак, муаллифсизлик ёки хатга ёзилмаслик мусиқий меросимиз намуналарининг камчилиги эмас, аксинча, яшаш тарзи. Шунга эътиборан,

* Отаназар Матёкубов – санъатшунослик фанлари доктори.

¹ Ислом Каримов. Ўрта асрлар Шарқ алломалари ва мутафаккирларининг тарихий мероси, унинг замонавий цивилизация ривожидаги роли ва аҳамияти. “Ҳалқ сўзи” газетаси. 16.05.2014 № 95 (6025).

² Шўро даврида “ўзбек мусиқаси” деганда биринчи навбатда, композиторлик ижоди назарда тутлиби, асл миллий қадриятлар ҳалқ ижоди, фольклор тарзида кўрилиб келинди.

³ Бунда ўзбек мусиқасининг азалдан амалиётда қарор топган мусанниф(бастакор)лик ижодиётни назарда тутлиди. XX аср бошларидан эътиборан жорий этилаётган композиторлик ва унинг одатдаги ижод турларига муносабати эса алоҳида масала.

бундай асарларнинг улкан ва салобатли бир сифати нисбатан мумтоз ёки классик деган сифатилиши табиийдир. Сўнгги пайтларда мусиқий истилоҳда меросимизнинг изчил равишда мўътабар одатга айланган мазкур қатламини мутаориф (урф этилган) дейишлик қайтадан расм бўлмоқда¹.

Мумтоз мусиқага мутаорифлик нисбатини бериш энди пайдо бўлган тушунча эмас. Форобий “Катта мусиқа китоби”нинг кириш қисмида мусиқий асарларнинг эшитувчилар орасида қарор топишида маърифий урф-одатларнинг аҳамиятини алоҳида қайд этади. Одат тарзида шаклланадиган нафс (хис-туйғулар) ва унинг гўзал суврат (шакл)ларидан бири бўлмиш мусиқий ва малака (санъат)ларни Форобий “амалий мусиқий санъат” дейди. “Равшан бўлдики, мусиқа санъатининг баъзи асослари урф-одатдаги [мутаорифий] илмлардан, баъзиси эса табиий [физика, акустика] фандан, баъзиси эса ҳандаса [геометрия] санъатидан, баъзиси адад [арифметика] ва баъзиси амалий мусиқа санъатидан олинади. Аммо, биз [айтиб] берган нарса урф-одат асослари ва назарий илмлардан олингани мана шундан кўпроқдир”²².

Темурийлар даврида Самарқанд ва Ҳиротда яшаб ижод этган буюк мусиқийшунос Ҳўжа Абдулқодир Марофий (1354–1435) эса ўзининг “Мақосид-ул-алҳон” асарида мумтоз мусиқий мабда (сарчашма)ларни худди шундай ҳисоб, ҳандаса каби риёзий ёки табиат илмларидан бошланадиган ҳамда мутаорифий амаллардан ҳосил бўладиганга ажратади³. Барҳаёт наволар, жонли удумлар бўлиб бизгача етиб келаётган мусиқий меросимиз айнан шу мутаорифий тоифага мансубдир.

Мутаорифийлик (традиция) шунчаки ўз-ўзидан авлоддан-авлодга ўтиб борадиган одат эмас. Мусиқийдек ҳаётбахш санъатда, мутаорифийлик доим маълум қонуниятлар асосида кечадиган ижод (яратувчанлик) жараёни. Эҳтиёж (қонун-қоидалар) ва ижод (яратувчанлик, доимий янгиланиш) муштараклиги эса, эркинликда яшайдиган жонли мусиқий жараённинг пойдеворидир.

Шунга кўра, ўзбек мусиқасини бир бутун воқеълик сифатида идроклаш учун негизидаги қонун-қоидалар тизими ҳамда уларнинг амалдаги янгиланиш (ривожланиш) жараённини атрофлича тасаввур этмоғимиз лозим. Бу жонли жараённинг ҳаётда қолдирган из, ўтмиш тарихини аниқ хужжат ва фактлар асосида ўрганиш мақсадга мувофиқ. Бизнинг соҳада эса, бундай ишончли далил ва бирламчи манба – бу асрлар давомида мунтазам равишда меросга айланиб борадиган жонли жараённинг ўзи ва унда сайқал топиб, миллий қадрият сифатида барқарорлашган бадиий ижод намуналариридир.

Демак, мутаорифлик – ўз-ўзидан қувват олиб, олдинга интилиб борадиган узлуксиз оқим. Унинг ўзида ўтмиш ва бугунги кун мувакқат (вақтда кечадиган) бир бутун жараён тарзида мужассамлашади. Жонли жараён изини нотага олинган матн шаклида ёзиш, барқарор ички қонун-коидаларини эса, тушунча, атама ва яхлит назариялар сифатида ифодалаш мумкин. Узлуксиз жараёнда кечадиган мусиқий асар тарҳини матн суратида тасаввур этиш имкониятини берувчи нота ёзувининг илк намунаси бизда танбур чизғилари матни шаклида XIX асрнинг сўнгги чорагида жорий этилди.

¹Форобий, Хоразмий, Ибн Синолардан тортиб – Кавкабий ва Дарвиш Али рисолаларида мұқаддас мусиқий одатларга нисбатан “мутаориф” тушунчаси кўпланилган.

Шўро даврида бу ўринда европача “традиция” сузини “ањана” деб таржима этиш одат этилди. Бир тарафдан бу сўз “урф”, “одат” калималарига маънодош. Лекин “ањана” кўпроқ авом одатларни назарда тутганилиги сабабли бу атамани нафосатли мусиқа санъатининг юксак салоҳиятли мумтоз навларига кўра ишлатиш илмий мантиқка қанчалик тўғри келишини ўйлаб кўриш мақсадга мувофиқ.

² Форобий. Катта мусиқа китоби. Қоҳира. 1967. С.173.

³ Абдулқодир Марофий. Мақосиду-л алҳон. Техрон. 1384/1965.

Қирқ олти йилдан зиёд (1864–1910) хукумат тепасида турган шоир, бастакор ва мусиқийшунос Мухаммад Раҳимхон Феруз (1846–1910) ҳомийлиги ва раҳнамолигида Хоразм Олти ярим мақоми бир бутун мажмуа сифатида хатга туширилди. XX асрнинг 20-йилларида келиб ноёб истеъод соҳиби, закий шоир, созанд ва мусиқийшунос, қўли гул санъаткор Мухаммад Комил Девоний (1887–1938) ўз салафлари ишини давом эттириб, худди шу нота ёзуви воситасида Хоразм мумтоз мусиқасининг қадимийроқ қатлами бўлмиш дутор мақомларининг етти туркумини куй ва сўз матнлари билан Олти ярим мақом (Танбур мақомлари)га қўшиб ёзиб олди. Хоразм мусиқашуносларининг жуда катта тарихий ва илмий аҳамиятга эга бўлган бу топифи ўзбек мусиқаси тарихининг зарҳол саҳифаларидан биридир.

Танбур чизғилари кашф этилганидан 40 йил кейин, Бухорода ҳали мақом пирлари Ота Жалол (1845–1928) ва Ота Ғиёс (1859–1927)лар ҳаёт пайтида маърифатпарвар давлат арбоби, адаб ва аллома Абдурауф Фитрат (1886–1938) қўшиши билан ўз даврининг етук мусиқачи-этнографи Виктор Александрович Успенский (1879–1949) Шашмақом мажмуасининг асосий (яъни Фитрат “шўъбачалар” ва кейинги тадқиқчилар “иккинчи гурух шўъбалари” дейдиган маъмулий қатламидан ташқари) қисмини тект тизимидағи европача нота ёзуvida хатга туширди.

XX аср ўрталарига келиб Ўзбекистон ва Тожикистонда Шашмақомнинг миллий шакллари жорий этилиши муносабати билан уларни давлат сиёса тига кўра расмийлаштириш мақсадида тегишли нота ва сўз матнлари ҳам яратилди. Шу алфозда тожикистонлик устозлар Бобоқул Файзуллаев (1894–1964), Шоназар Соҳибов (1903–1972), Фазлиддин Шаҳобов (1911–1974)лар ишлаган 5 жилдлик “Шашмақом” Москвада нашр этилди¹. Унга мувозий равишда Ўзбекистонда Юнус Ражабий (1896–1977) ёзувидаги “Ўзбек ҳалқ мусиқаси” тўпламининг 1–5 китоблари ва 6 жилдлик “Шашмақом” юзага келди².

Мустақиллик даврига келиб, замон эҳтиёжлари кесимида мақомшунослик борасида жиддий изланишларга йўл очилди. Замонавий илмларга таянган янги авлод вакиллари майдонга чиқа бошлади. Шулар қаторида навқирон мақом устози Рустам Болтаев ва мусиқашунос Ботир Раҳимовларнинг номларини қайд этиш мумкин. Улар Хоразм танбур чизғилари устида узоқ йиллар илмий ва ижодий изланишлар олиб бориб, мазкур ёзувлардаги нота матнларини замонавий тект тизимида ўгиришга ва ижроларини тиклашга мусяссар бўлдилар³.

Танбур чизғиларининг қайтадан кашф қилиниши замонавий ўзбек мақомшунослигининг янги босқичга кўтарилиб бораётгани далилидир. Ўз вақтида улуғ устозлар қўли билан битилган мўътабар нота ёзувларининг кенг илмий муомалага жорий этилиши умумбашарий миқёсга молик тадбир. Ваҳоланки, у бир вақтлар деярли узилиш арафасига етиб қолган жонли удумларнинг ворисийлик ришталарини тиклашдаги амалий аҳамияти билан бир қаторда, ўтмишнинг буюк мусиқийшуносларидан мерос қолган илмий ютуқларни замонавий фан тараққиёти хизматига жалб этиш имкониятини ҳам туғдиради.

Мазкур муносабат билан бир нарсага алоҳида эътибор бериш зарур. Гап шундаки, тобора пухталашиб бораётган хат ва овоз ёзувларининг юзага

¹ Б.Файзуллаев, Ш.Соҳибов, Ф.Шаҳобов. Шашмақом. В 5-ти томах. Под редакцией В.М.Беляева. Москва, 1952–1967.

² Ю.Ражабий. Ўзбек ҳалқ мусиқаси 1-5 китоблар. Тошкент, 1954–1959; Шашмақом. 6 жилдли. Тошкент, 1966–1974.

³ Матёкубов О., Болтаев Р., Х.Аминов. Хоразм танбур чизиги. Тошкент. 2010.

келиши ва мерос намуналарини нотага ёзиш, жонли мусиқий жараённинг аслиятига зид эмас. Нота тўпламларининг пайдо бўлиши миллий мусиқий мероснинг “оғзакилик” (нотасизлик) моҳиятини ўзгартирмайди. Унинг бисотидаги ижодий эркинликни ҳам инкор этмайди. Аксинча, созанда вужудидаги бойликларни узоқ муддат авлодлар хотирасида сақланишида ёрдамчи восита бўлиб хизмат қиласди. Бошқа тарафдан, жонли жараён ижод маҳсулни бўлган нодир асарларнинг мағзини бўлғуси авлодларга етказишга даъват қиласди. Шу билан бирга улуғ санъаткорлар ижод маҳсулларининг тарихда колдирган изларини акс эттирувчи ишончли хужжат бўлиб ҳам хизмат этади.

Жонли жараён, яъни амалдаги мусиқий асарларнинг ўзидан ташқаридағи манбаларни шартли равишда икки: асосий ва қўшимча тоифаларга ажратиш мумкин. Асосийси – мусиқий илмга оид маҳсус рисолалар. Қўшимчаларини мусиқа ҳақидаги фикрлар, ҳалқ оғзига тушган афсона ва ривоятлардан тортиб – ёзма баён этувчи тарихий ва адабий манбалар, шунингдек, тасвирий санъат асарларининг қадимий намуналари ташкил қиласди. Бизнинг мавзуу нұктаи назаридан, унинг маъно-моҳиятига оид рисолалар етакчи аҳамият касб этишини инобатга олиб, олдин қўшимча манбалар хусусида қисқача тўхталиб, сўнг бевосита мусиқа илми масалалари ҳақида батағсилоқ сўз юритишни қулай кўрдик.

Мусиқий рисолалар, одатда, назарий йўналишга қаратилган бўлади, ва уларда умумий қонун-қоидалар мавҳум риёзий тилда баён этилади. Ижодиётнинг нозик сифатлари, хусусан, эл-элатларнинг куй ва ашулаларига хос жиҳатлар, кўпинча назарий қарашлардан ташқарида қолади. Шунинг учун қўшимча маълумотлар, гарчан асосий мусиқий рисолаларга нисбатан иккинчи даражали аҳамиятга эга бўлса ҳам, ўтмиш тарихини ўрганишда назарий қонун-қоидаларни тўлдириб, маълум давр мусиқий ҳаёти ҳақида кенгроқ ва атрофлича таассурот пайдо этиш имкониятини беради.

Илмий рисолаларда назарий андоза (модул)лар сифатида келтирилган куй ва усул доиралари, нав ва шаклларнинг тархи, чолғу созлари, мақом ва шўъбаларнинг таъсир (этос) кучига оид таърифлар мавжуд. Уларнинг ҳаёт мазмунига боғланган ҳолатларини тарихий ва адабий асарлар, бадиий ижод ва тасвирий санъат намуналаридан топишимиз мумкин. Дарҳақиқат, Абдулқодир Марогий ёки Абдураҳмон Жомий (1414–1492) рисолалари билан танишиб, маълум тушунча ҳосил қилганимиздан кейин Алишер Навоийнинг (1441–1501) “Мажолис-ун-нафоис”, Восифийнинг “Бадоеъ-ул-вақоє”, Султонийнинг “Мажолис-ул-ушшоқ”, Бобурнинг “Бобурнома”сини ўқидиган бўлсак, илмий-назарий тасаввурдаги тартиб ва низомлар гўё ҳаёт воқеаларига чулғанган манзаралардек кўз олдимизга келади.

Маълум тараққиёт даражасига эришган классик мусиқа навларининг тадрижий ривожланишини, у ҳақдаги илмий фикрлардан ажралган ҳолда тасаввур этиш амри маҳол. Қадимда “етук назариядан амалийроқ амал йўқ” деган ҳикмат машхур бўлган. Ҳақиқатан ҳам, узоқ ва яқин тарихга разм соладиган бўлсак, мумтоз мусиқамизнинг нав ва шакллари мунтазам равишда ўзгариб, алмашиб турса-да, улар негизидаги илмий асослар, ўлчов ва низомлар, бир сўз билан айтганда, устувор қонуниятлар барқарор сақланиб келаётгандигининг гувоҳи бўламиз. Ана шу қонуниятларни ифодалашнинг энг изчил ва унумли шакли илмий рисолалар хисобланади.

Бу жиҳатдан ҳам ўзбек мусиқа маданияти бебаҳо илмий қадриятлар хазинасидир. Форобий (870–950), Хоразмий (Х аср), Ибн Сино (980–1037)лар Шарқ Уйғониши даврининг қомусий алломалари ва айни чоғда

музиқийшунослик илмининг асосчилари эканлигини жаҳон аҳли эътироф этади. Уларнинг мусиқий соҳадаги илмий қарашлари умумий универсал характерга эга, албатта. Лекин ана шу умумийлик таркибидаги назарий қарашларга мос келадиган далилларнинг кўпчилигини бизнинг бугунги жонли мусиқий меросимиз намуналаридан топишимиш мумкин. Айниқса, Эндиликда ҳам изчил ривожланиб келаётган бизнинг мақомот удумларининг ўқ илдизлари, айнан шу устоз мусиқашунослар меросидан озуқа олаётган лигининг ўзини жуда муҳим тарихий воқелик дейишга арзиди.

Яна бир эътиборли топик: Форобий, Хоразмий, Ибн Синолардан кейин, XIII асрдан бошлаб “Иккинчи Ўйгониш даври” деб эътироф этиладиган замонларда шундай бир таълимот юзага келди, у нафақат Шарқ, балки Ғарб мусиқий тафаккурига ҳам салмоқли таъсир кўрсатди. Ақл-идрок негизларига таянган таълимот тарихда умуминсоний мусиқий қадриятлар китобининг ёрқин саҳифаларидан бири бўлиб муҳрланди. Бу – “илми адвор” (“доиралар илми”) таълимотидир. Ҳазрат Навоийнинг “Сабъаи сайёр” ида хоразмлик Улуг Ҳожа тилидан айтилган байтларда мусиқа икки – илмий-назарий (илми адвор) ва амалий (фанни мусиқий) тармоқларга ажратилади:

*Менки тушимши буён гузор манга,
Мулки Хоразм эрур диёр манга.
Санъатим анда соз чалмоқ иши,
Билмайин мен киби ишишни киши.
Илми адвору фанни мусиқий,
Мендин ул илм аҳли таҳқиқий.*

Илми адвор моҳиятган бутун ислом дунёсида кенг томир отган мумтоз мусиқанинг асосларини ташкил этувчи куй ва усул доираларини назарда тутади. Куй доиралари (жамълар) аслида еттита тўрт поғонали ва ўн иккита беш поғонали дастлабки куй бирикма (жинс)ларининг риёзий тилда ўзаро алмашлаш (комбинациялаш)дан ҳосил бўлади. Шунга кўра, назарий жиҳатдан куй доираларининг умумий миқдори 84 га teng (7 x 12 = 84) деб олинади. Айрим ҳолларда беш поғонали жинсларни 13 та хисоблайдилар. Унда жамълар миқдори 91 (7 x 13 = 91)та бўлади. Куй доираларининг ҳар бири таркибига қараб тартиб сонлари билан белгиланади. Шунингдек, таъбига мувофиқ мажозий номлари билан ҳам юритилади: Рост, Ушшоқ, Бузрук, Наво ва х.к.

Усул доиралари ҳам худди шундай, дастлабки асл зарб (рунн, жуз ёки фаръ ҳам дейилади) ва зиҳоф бирликларининг ўзаро алмашуви ва уларнинг кўшилишидан пайдо бўлади. Шунинг учун айрим усуллар унинг таркибидаги зарбларининг умумий миқдорига қараб, риёзий бирликлар номи билан ифодаланади: мураббаъ (тўртлиқ), мухаммас (бешлик), мусаддас (олтилик), мусаббаъ (еттилик), мусамман (саккизлик) ва бошқалар. Ёки куй доиралари каби мажозий номлар билан юритилади: Талқин, Талқинча, Чапандоз, Қашқарча, Соқийнома ва бошқалар.

Куй доираларининг энг мукаммал (яни, таркибидаги соф бўйдлар зуларбъ-квартा, зулхамс-квинта, зулкулл-октаваларнинг умумий миқдори боскичлар сонига teng ёки улардан кўп бўлса) 12 таси алоҳида олий навга ажратилиб, “машхур жамълар” (“жамоати машхура”), 12 парда, 12 мақом ёки “мақомот” деб юритила бошланди. Шундан эътиборан, “адвор илми”ни созандалар орасида “ўн икки мақом” дейиш ҳам одатга кирган. Эндиликда адвор илмини “мақом таълимоти” ёки “мақом тамойили” (“мақом принци-

пи") дейиш Европа олимлари орасида ҳам расм бўлмоқда¹. Қизиги шундаки, бугунги кунда Ғарб мусиқа ахли мақом таълимотига нафақат назариёт, балки истиқболли амалий ижод услуби сифатида қараб, унинг имкониятларидан унумли фойдаланиш йўлларини ахтариш устида бош қотирмоқда.

Адвор назарияси ақл-идрок билан сархисоб этиладиган риёзий илмлардан бошланади. Қуй доираларининг асосини ташкил этувчи бир октава дои-расидаги ўн етти поғоналик товушқатор ягона маҳраж (дастлабки бирлик 243/256 нисбатидаги бақия бўъди)дан ҳосил қилинади. Лекин унинг назарий асосларини ишлаган Сафиуддин Абдулмўмин Урмави (1216–1294) хисоб, ҳандаса ва фалакиёт билимларини пухта эгаллаган етук назариётчи ва айни чоғда аruz ҳамда мусиқа билимдони, шоир, созанда ва бастакор бўлган. Шунинг учун ҳам унинг адвор назарияси, мусиқий амалиётни янги босқичга кўттарган муштарак илмий-амалий таълимот бўлиб майдонга чиқди.

Умумшарқ адвор таълимотининг жаҳоншумул аҳамият касб этиб, гуллаб-яшнаган даврида беназир созанда ва мусиқийшунос, шеършунос ва шоир, диний ва дунёвий илмларни пухта ўзлаштирган аллома Абдулқодир Мароғий (1354–1435) номи билан боғлиқ. Олдинлари у Бағдодда мусиқа ва бошқа нафис санъатларнинг моҳир билимдони Султон Санжан Жалоир саройида хизмат қилган. Бағдод забт этилгандан кейин, Соҳибқирон Амир Темур томонидан у Самарқандга юборилган. Мароғий, сўнгра Ҳиротда Шоҳруҳ Мирзо саройида хизмат қилди. Адвор илмини мусиқий мағкура сифатида юксак босқичга кўтарилиши ҳам шу давр билан боғлиқдир. Замондошлари Мароғийни “соҳиби адвор” (адвор эгаси), “саромади адвор” (адвор илмининг пешкадами) деган унвонлар билан даражалаганлар.

Бу жараённинг биз учун аҳамиятли томони шундаки, у Темурийлар салтанатининг пойтахтлари Самарқанд ва Ҳиротда илм-фан, адабиёт, мусиқа, меморчилик, китобот ва бошқа нафис санъатлар тараққиёти авж палласига чиқкан пайтларга тўғри келади. Фитрат таъбири билан айтилганидек, “Хусайн Бойқаро ҳамда Алишер Навоийнинг ҳимоялари остида чиғатой адабиёти, чиғатой мусиқасининг “олтин даври” курила бошлайдир”². Мусиқий борасида бу маданиятнинг тамал тоши қўйилишида эса Абдулқодир Мароғийдек алломаи замонларнинг хизмати алоҳида аҳамият касб этади. Бугунги кунда Темурийлар даври Марказий Осиё замаддунининг “олтин даври” эканлигини американлик атоқли олим Фредрик Стэрр ҳам эътироф этмоқда³.

Маълумки, XIV–XV асрларда Марказий Осиёда қад кўттарган ўзбек тилидаги адабиёт “чиғатой адабиёти” номи билан тарихга кирган. Ҳусайн Бойқаро, Алишер Навоий, Захириддин Бобурлар ушбу адабиётнинг буюк намояндалариdir. Унинг билан мувозий ривожланган мусиқий ҳам худди шундай аҳамиятга моликдир. Кейинги асрларда бизнинг заминда қарор топган мумтоз мусиқий тизимнинг ўқ томири ҳам айнан шу “олтин давр”дан озиқа олади. Демак, Алишер Навоий давридаги “илми адвор” билан бугунги кундаги мақомот навлари орасида бевосита ворисийлик ришталари мавжуд дейишимизга катта асос бор.

Мазкур мусиқий ва адабий юксалиш даврида Ҳиротда Жомий ва Навоийлар даврасида тарбия топган ва “замонасининг Мароғийси” деб шуҳрат қозонган забардаст мусиқийшунослардан бири Мавлоно Нажмиддин Кавка-

¹ Ю.Холопов, Л.Кириллина, Т.Кюрегян, Г.Лыжков, Р.Поспелова, В.Ценова. Музыкально-теоретические системы. – М., 2006.

² Фитрат. Ўзбек классик мусиқаси ва унинг тарихи. – Тошкент, 1993. С.40.

³ S.Fredirick Starr. Lost enlightenment: Central Asia's golden age from the arab conquest to Tamerlane. – Copyright @ 2013 by Princeton University Press.

бийдир (1533 йили вафот этган). Ҳирот вайрон этилганидан кейин Бухорога қайтгач, бу азим шаҳарда ажойиб бир мактаб яратди. Қисқаси, Бухоро гўзал санъатлар, ҳусусан, мусиқа борасида Ҳирот “олтин даври”нинг вориси бўлиб майдонга чиқди. Бу жараённи мерос ворисийлигидаги аҳамияти ўта муҳимдир. Зеро, Бухоро замонасининг йирик давлатларидан бири сифатида Темурийлар даврида юзага келган юксак маданият, жумладан, унинг мусиқий удумларини ўзига сингдиришда ва кейинги йирик санъат ўчоғларига, жумладан, Бобурийлар салтанатига элтишда воситачи бўлиб хизмат қилди.

Бухоро мусиқийшунослик илми борасидаги Нажмиддин Кавкабий, Дарвиш Али Чангий (XVI асрнинг иккинчи ярми – XVII аср бошлари) каби намояндалари билан бутун ислом дунёсига донг таратди. Бу алломалар, Форобийдан бошланган буюк мусиқашунослар салафининг сўнгти вакиллари бўлиб тарихга муҳрланди. Шарқ мусиқашунослик илмининг тадрижий тараққиётини бу алломаларнинг меросидан ташқарида тасаввур этиш қийин.

XVII аср ўрталарида Бухорода нафис санъатлар инқирозга юз тута бошлаганда, Кавкабий ва Дарвиш Али мактаби вакиллари Ҳиндистонга, Бобурийлар саройига талпиндилар. Лекин қандай бўлмасин, юксак мусиқий маданият бирданига сўниб кетмади. Балки ичга бекинган ботиний салоҳият бўлиб, ўз вақти-соатини пойлади. Бу мусиқий қудрат XVIII аср ўрталарига келиб “Шашмақом” байроғи остида яна зоҳир бўла бошлади. Аслида илдизлари мозийга туташ Шашмақом удумлари шу қадар пойдор ва теран бўлиб чиқди, у бутун минтақага катта таъсир ўтказди.

Мазкур ижод тўлқинида XIX аср бошларида Хоразм мусиқашунос ва созандалари Шашмақомнинг ўзга тарихий шароитлардаги янги нави “Олти ярим мақом” мажмуасини ишладилар. Сал кейинроқ Қўқонда Амир Умархон саройининг созандалари 18 йил Урганчда яшаб мусиқий тарбият топган қашқарлик Устоз Худойберди бошчилигига Шашмақомнинг сараҳборлардан ташқаридаги наср ва шўъбачалар гурухига монанд қилиб, бошқа бир мажмуа яратса бошладилар. Эндиликда у “Фарғона-Тошкент мақом йўллари” номи билан юритилмоқда. Сўнгра, XX аср ўрталарида давр ижтимоий эҳтиёжлари тақозоси билан янги тарихий шароитларга мосланган “Тожик Шашмақоми” ва “Ўзбек Шашмақоми” юзага келди. Бугунги кунда уларнинг барчаси, яъни Бухоро Шашмақоми, Хоразм мақомлари, Фарғона-Тошкент мақом йўллари, тожик Шашмақоми ва ўзбек Шашмақоми ягона мақомот нав тизимини ташкил этади ва ўзининг ички ва ташки сифатлари билан олдинги “илми адвор” таълимотининг давомчиси бўлиб майдонга чиқади. Ана шу мақомот тизимининг беш навидан тўрттаси ўзбекистон заминида яшаб келмоқда.

Шундай қилиб, мақомот навларининг ўзаги – Шашмақом тамойиллари мумалага жорий этилиши билан Марказий Осиё мусиқий тафаккури тарихида янги давр бошланади. Илми адвор таълимоти ҳукм сурган даврларда ўзига хос назарий қарашлар ҳамда иборалар тизими юзага келиб, у Сафиуддин Урмавий, Абдулқодир Марғий ва Абдураҳмон Жомий рисолаларида аксини топган эди. Кавкабий ва Дарвиш Али замонларида амалий билимлар олдинга чиқа бошлади. Ва ниҳоят, Шашмақом зоҳир бўлган пайтга келиб, мутаорифийлик ва унинг йўлдоши бўлган “амалий илмлар” (ёки “оғзаки назария”) тўла-тўқис устуворлик касб этди.

Илми адвор ва Шашмақом мусиқий тизимларининг ички муносабатлари ҳақида сўз борар экан, энг аввало, шуни таъкидлаш керакки, назариётдан амалиётга интилган илми адвор ва аксинча, амалиётдан назариётга қараб йўналтирилган Шашмақом таълимотлари ўртасида ўтиб бўлмайдиган

тўсиқ ёки бир-бирини инкор этувчи зиддият йўқ, албатта. Ваҳоланки, бу икки таянч нуқталик муштарак умумий жараённинг амалий ва назарий жиҳатларига урғу берилиши ва ижтимоий эҳтиёжлар ўзгариши натижасида содир бўлган ҳолат, деб тушунмоқ лозим. Хуллас, ўн икки мақомни шашмақомга дўниши, шунчаки ташқи сифат эмас. Улар, моҳиятан, ўзининг ички қонун-қоидаларига асосланган икки алоҳида тизимни ташкил қиласди.

XIX асрда Бухорода бир қатор мусиқий рисолалар яратилган. Улар, асосан, Шашмақомнинг урф этилган шеърий матнларидан иборат баёзлар. Шундай бўлса ҳам, бу манбалардан шеърий матнлар билан бир қаторда, Шашмақомнинг мусиқий таркиботи, тартиб ва низомларига оид қимматли маълумотлар олиш мумкин. Ана шу нуқтаи назардан рисола-баёзлар Шашмақом мусиқий тизими хусусида умумий таассурот ҳосил қилишда муҳим аҳамият касб этади.

Рисола-баёзлардан келиб чиқсан ҳолда, Шашмақом тафаккурини тушуниш учун энг аввало, ўта муҳим бўлган иккита масалага алоҳида эътибор қаратмоқ зарур. Улар, биринчидан, унинг маъно-моҳиятини белгиловчи калит тушунча – “Мусиқий Шашмақом” таърифи; иккинчидан, мусиқий Шашмақомнинг бутунлиги ва ички таркиботини белгилашда етакчи омиллар бўлган парда (лад) – яъни, мусиқий товушнинг паст-баландлик чегараси ва вазн (усул) – вакт, замон миқдори тизимлари асосий тамойил эканлигидир.

Рисола-баёзларнинг кўпчилиги биринчи сахифанинг устига қизил сиёҳ билан ёзилган куйидаги таъриф билан бошланади: “**Мусиқий Шашмақом – олдин ўтган азиз ва мукаррам устозлардан қолган меросдир**”¹. Жумланинг маъноси: Мусиқий Шашмақом мажмуаси – қадим ўтган (мутақаддим) устозлар ижодига мансуб мутаориф (урф этилган) муқаддас мерос демакдир. Шунга кўра, уни илми адворга ўхшаб “ақлий” (назарий) илмлардан эмас, балки “нақлий”, яъни “оғзаки” равишда одат этилган билим ва мала-калардан, мутаорифийликдан келиб чиқувчи тартиб ва низомлар дейишга хақлимиз.

Мажмуа номи таркибидаги “мусиқий” (мусиқийлик, яъни илми мусиқийга алоқадорлик) унинг сифатидир. Бошқача қилиб айтганда, илмий асослари мавжудлигининг нишонаси. Дарҳақикат, Шашмақомнинг тизим сифатида ташкил топишида ҳамда унинг бутунлигини белгиланишида айнан том маънодаги мусиқий тамойиллар – парда (лад) ва усул (ритм) ҳал қилувчи аҳамиятга эга. Мусиқий Шашмақом тизими олти бош мақом (шундан “шашмақом” атамаси келиб чиқади; у “олти даромад” ёки “олти сарахбор” ҳам дейилади) ва ўн саккиз ёрдамчи-наср парда тузилмаларидан таркиб топиши рисола-баёзлардаги маълумотлар билан тасдиқланади.

Фитрат таъбири билан айтилганда, “бизнинг классик мусиқамиз “Шашмақом” исми билан юргузилган олтиқато (таъкид бизники – М.О.) куйлардан иборат”². Ана шу олти қатор асос куй (парда-лад-modus) ёки олти мақом ва уларга эргашган ўн саккиз наср (ёрдамчи парда жамламалари – ладлар) Шашмақом парда тизимини (лад системасини) ташкил қиласди. Шунга кўра, мусиқий баёзларда қайд этилган Шашмақом таърифи, Фитрат томонидан бошқача сўзлар билан, лекин ўхшаш маънода ифодалangan дейиш мумкин. Энг муҳими, қандай таърифланишидан катъий назар, олти бош ва ўн саккиз ёрдамчи парда тузилмаларидан иборат яхлит

¹ ЎЗР ФАШИ. Қўллёзма №8827. – В. 1а.

² Фитрат. Ўзбек классик мусиқаси ва унинг тарихи. – Тошкент, 1993. Б. – 10.

тизим, ҳанузгача Шашмақом ва ундан андоза олинган бошқа мақомот навларнинг лад асосини ташкил этиб келмоқда.

Мусиқий баёзлардан кейин Шашмақом мусиқий мантиқини илмий асослашга уриниш Абдурауф Фитрат (1886–1938) томонидан бўлди. У давр талаб ва эҳтиёжларидан келиб чиқкан ҳолда, Шашмақом меросини миллий мусиқий тизим тимсолида кўришга ҳаракат қилди. Шу мағкура асосида мавзуга оид бош асарини у “Ўзбек классик мусиқаси ва унинг тарихи” деб номлади. Фитрат чинакам олим ва у қўллаган ҳар бир иборанинг маъно юки бор. Унинг “Адабиёт қоидалари” асарида “классик” тушунчасига қўйидагича изоҳ берилади: – “...шу вақтда (Аристотель замони назарда тутилади – М.О.) даражаларга ажралган шоирларга классик шоирлар, асарларига-да классик асарлар дейилганким, бошқаларга ўрнак бўларлик мумтоз асарлар демакдир”¹.

Фитрат мусиқий таълимоти “шарқ мусиқаси асос назария эътибори билан бирдир” деган тамойилдан бошланади². Бунда бирламчи “музиқий” иборасининг ўзиданоқ, илмий асосларга эга нав хақида сўз бораётганини маълум бўлади. Демак, сўзсиз эътироф этиладиган “ўзбек мумтоз адабиёти” атамасига маънодош сифатида “ўзбек классик мусиқаси” тушунчасининг жорий этилишининг ўзи миллий мағкуруни идроклаш йўлидаги дадил қадам бўлди.

Бошдан айтиш зарурки, Фитрат ўзбек классик мусиқасининг том маънодаги назарий асосларини яратишга ожиз эканлигини очиқ-ойдин тан олади. “Мени мусиқий билан муносабатим шудир: ўзимизнинг мусиқамизни севаман, кўбда тинглайман, мусиқамизга бўлган бу муносабатимнинг буйруғи билан бу тўғрида ёзилган эски-янги асарларни ахтариб, топиб текшираман. Бундан ортиқ бир нарсам йўқ. Шу қадарфина бир ҳозирлиқ билан эл куйларимизнинг оҳангини текшириш йўлида, албатта, иш кўра олмайман. Буни мендан кутиш ҳам бўлмайдир”³. Шундай бўлса-да, аллома ўзининг ўткир зеҳни ва илми билан ўзбек мусиқасининг туб негизи – парда тизимиға хос бўлган қатор сифатларни кўра билди ва мавзуга оид бир қанча истиқболли тушунчаларни юзага чиқарди. Улар орасида “оҳанг усули” (интонация), “асос куй” ёки “куй асоси” (лад), “олти қатор куй” ёки “олти қатор асос куй” (олти қаторли лад тизими) каби маънодор атамалар буғунги кун миллий мусиқашунослиги учун жуда муҳим аҳамиятга эга.

Фитрат меросининг яна бир эътиборли қисми у томонидан тузилган Шашмақом мундарижасидир⁴. Бу йиғма жадвал ишланишида айрим хатоликларга йўл қўйилган бўлса-да, (масалан, талқин ва чапандоз қисмларини “асос куйлар”, яъни мустақил парда тузилмалари қаторига чиқарилиши), буғунги кунгача у Шашмақом тарҳи умумий кўламишининг энг тўлиқ ва мукаммал андозаси бўлиб келмоқда.

Афсуски, қатағон йилларида Фитрат ва унга ўхшаган миллатпарвар маърифатчилар ҳамда том маънодаги бутун бошли миллий мусиқа меросимиз таъқиб остига олиниб, истеъмол доираси сунъий равища чегараланди. Ўзбек мусиқасининг тадрижий тараққиётидаги бундай бурилиш асрлар оша давом этаётган удумлар ва унинг азалий йўлдоши бўлиб келаётган тафаккур ворисийлигига катта путур етказди. Бу талофатнинг асорати узок йиллар давом этди.

¹ Фитрат. Танланган асарлар. – Тошкент. Б. – 85.

² Фитрат. Ўзбек классик мусиқаси ва унинг тарихи. – Тошкент, 1993. Б. – 5.

³ Кўрсатилган асар. Б. – 10.

⁴ Қаранг: Кўрсатилган асар. Б. – 15-24.

Бироқ чинакам табиий йўл билан одатга кирган мусиқий қадриятларнинг ҳаётбахш илдизлари шу қадар кучли эдики, салгина имконият пайдо бўлиши билан у янгидан аслига қараб интилди. Ўзбекистонда ана шундай вазият Сталин вафотидан сўнг, 50-йилларнинг ўрталаридан юз тута бошлади. Мусиқий мерос борасида мазкур ижобатнинг самараси қилиб амалдаги нав ва шаклларни ўз ичига олувчи 9 жилдлик “Ўзбек халқ мусиқаси” тўпламининг нашрини қўрсатиш мумкин. Бу улкан мусиқий мажмуанинг аксарият қисми (1-5 китоблари) атоқли созандо ва бастакор Юнус Ражабий (1896–1977) томонидан ноталаштирилган¹. “Ўзбек халқ мусиқаси”нинг 5-жилди тўлалигича Бухоро мақомларига бағишиланган.

1959 йилда Ўзбекистон радио ва телевидение қўмитаси қошида академик Юнус Ражабий раҳбарлигига “Мақом ансабли” тузилди. Шундан эътиборан миллый мақомшуносликнинг янги даврига қадам қўйилиб, қатағон йилларида топталган ва узилиш арафасига етиб қолган мақом удумларининг ворисийлик ришталари қайта тиклана бошланди. Бу тарихий воқеанинг ижтимоий-сиёсий ва илмий аҳамияти шундаки, улуғ аллома Юнус Ражабий-нинг саъй-ҳаракатлари туфайли мақомот тизимининг “Ўзбек Шашмақоми” деган нави юзага келди ва унинг асослари тегишли нота матнлари ва уларга мувофиқ овоз ёзувлари билан хужжатлаштирилди².

Миллый қадриятларни қайта тиклаш муносабати билан мусиқашунослик илми борасида ҳам сезиларли ўзгаришлар рўй бера бошлади. Мазкур даврда ўзбек мусиқа меросининг илмий асосларини ўрганишда икки забардаст олим Юзеф Кон (1921–2002) ва И.Ражабов (1928–1986)лар фаолияти алоҳида ўрин тутади. Уларнинг ўзбек мусиқасининг туб негизини ташкил этувчи лад-парда асосларига бўлган қарашларини, шартли равища “ташқаридан” (яъни европача услублар кесимида) ва “ичкаридан” (яъни ўзида одат тусини олган йўл-йўрикклар) ёндашувлар дейиш мумкин. Уларни моҳиятган қарама-қарши ёки зид назариялар эмас, аксинча муайян мавзуга икки хил ёндашув ва бир-бирини тўлдирувчи қарашлар деб ҳисоблаш мақсадга мувофиқ.

Шундай қилиб, замон ва макон нуқтаи назаридан мислсиз бойликларни ўзида мужассамловчи ўзбек мусиқаси – мавжуд воқеълик. Унинг жонли урфодатлари жавҳарининг доимий йўлдоши бўлиб келаётган фикр, мулоҳаза ва илмий қарашлар ана шу воқеъликни идрок этишда ишончли таянч манба бўлиб хизмат қиласди. Ўзбек мусиқасининг мўътабар жонли удумлари ва уларга вобаста маълумот, тушунча ва назариялар йиғиндинисин олти жилдли мажмуя шаклида саранжомлаб, уларни қуидагича номладик:

1. Тарих саҳифалари (қадим замонлардан – мустақиллик давригача);
2. Манба ва матнлар (Форобийдан – Фитратгача);
3. Назариёт (парда, усул ва таълифот);
4. Амалиёт (ижро, ижод, нав ва шакллар);
5. Ўқув қўлланмаси (нота матнлари ва CD овоз ёзувлари);
6. Луғатнома (мухтасар қомус).

¹ Ўзбек халқ музикаси. 1-5 китоблар. Нотага ёзиб олувчи Юнус Ражабий. – Тошкент, 1954, 1955, 1956, 1957, 1959.

² Шашмақом. 6 жилдли. Нотага ёзиб олувчи Юнус Ражабий. – Тошкент, 1966–1976; Шашмақом. Юнус Ражабий раҳбарлигидаги Ўзбекистон радио ва телевидение қўмитаси қошидаги “Мақом ансамбли” ижросида. 22 пластинкадан иборат.

XX АСР ЎЗБЕК МУСИҚАСИ ТАРИХИДАН АЙРИМ МАЪЛУМОТЛАР

1918. Тошкент. Туркистон халқ консерваторияси 1923 йилда Тошкент мусиқа техникумiga айлантирилган. Моҳиятнан том маънодаги олий ўқув даргоҳи вазифасини бажарган. Унинг биринчи талабалари Ўзбекистон халқ артистлари Имомжон Икромов, Юнус Ражабий ва бошқалар ўзбек мусиқасини тадқиқ ва тарғиб этишга катта ҳисса қўшганлар.

1920. Тошкент. Ғулом Зафарийнинг миллий руҳдаги “Ҳалима” операси саҳналаштирилган. Бу асар давр матбуотида қайд этилишича, 500 марта намойиш этилиб, “бенефист” сифатида эътироф этилган.

1920. Бухоро. Шарқ мусиқа мактаби. “Консерватория” сўзининг луғавий маъноси “урф-одатларни сақлаш”, “мактаб” демакдир. 1924 йилдан мусиқа техникуми, кейинчалик мусиқа билим юрти, ҳозирда коллеж.

1934 йил. Миллий оқимдаги ўқув муассасалари бекор этилиб, ягона қолипда Европа йўналишидаги бошланғич ўрта ва олий ўқув даргоҳлари фаолият юрита бошлади. Москва, Ленинград, Тошкент, Киев, Минск, Боку консерваторияларининг қолипи бир: “Шаклан миллий, мазмунан социалистик”.

1930 йиллардан эътиборан Ўзбекистонда одат тусига кирган халқ ижодиёти ва бастакорлик билан бир қаторда расмий йўл билан давлат сиёсати даражасига кўтарилилган янги ижодий йўналиш – европача оқимдаги “кўповозлик” мусиқий тафаккури жорий этила бошланди. Мазкур йўлдаги илк тажрибалар қаторида В.А.Успенскийнинг (1879–1949) Хуршид либреттоси асосида яратилган “Фарҳод ва Ширин” операсини (1934) кўрсатиш мумкин. Моҳиятнан мақом йўлларига асосланган бу асар тингловчилар томонидан қизгин кутиб олинди. Бироқ “Фарҳод ва Ширин” 1937 йилда Москвада ўтказилган биринчи Ўзбек декадасида намойиш этилганда, сиёсий ва бадиий тарафлардан танқидга учради. Шундан сўнг, 1939 йилда М.Ашрафий ва С.Василенколар ҳамкорлигига К.Яшин либреттоси бўйича ёзилган инқилобий мавзудаги “Бўрон” асари мажбуран “биринчи ўзбек операси” деб расман эътироф этила бошланди.

1950 йиллар ўрталаридан кўповозлик мусиқа ижодиёти йўналишида Т.Содиқов (1907–1957), М.Ашрафий (1912–1975), Д.Зокиров (1914–1985), М.Бурхонов (1916–2002), С.Юдаков (1916–1990), И.Ақбаров (1921–2011), Ф.Янов-Яновский (1934), Т.Курбонов (1936–2006), М.Тожиев (1944–1996), У.Мусаев (1948–2000), М.Бафоев (1946) каби композиторлар майдонга чиқдилар.

Композиторлар ижодига мувозий равишда Т.Жалилов (1896–1966), Ю.Ражабий (1896–1977), Ф.Содиқов (1912–1976), М.Мирзаев (1912–2000) каби атоқли бастакорлар миллий руҳда ёрқин куй ва ашулалар яратдилар.

Мустақиллик даврига келиб, миллий мафкура шаклланиши муносабати билан одатдаги бастакорлик ва янги композиторлик ижодиётлари умумий “бастакорлик” атамаси билан юритила бошланди. Бу қадриятларнинг янги мафкура ва ижтимоий эҳтиёжлар талабига мослашув жараёнини идроклаш ва холис баҳолаш ўзбек мусиқашунослигининг истиқболдаги долзарб вазифаларидир.



Испания Европанинг жануби-ғарбидаги, Пиреней ярим оролида жойлашган. Ахолисининг асосий қисми испанлар; бундан ташқари, каталон, галисий, баск сингари миллатлар вакиллари истиқомат қиласди.

Испан халқи узоқ тарихи мобайнида турли маданиятлар таъсирида яшаган. Турли даврларда карфагенликлар, сўнг римликлар Испания худудини эгаллаб, ўзларининг ҳукмини ўтказишга ҳаракат қилган. VIII асрда Пиреней ярим ороли араблар томонидан фатҳ этилади ва бу ерда Қурдoba амирлиги тузилади. Шундан сўнг Испания худудида савдо-сотиқ ишлари авж олади, фан ва маданият тараққий этади.

Испанлар XV асрда она Ватани мустақиллигини кўлга киритиб, ягона давлат тузишга эришадилар. Ҳарбий-иктисодий салоҳияти юксалган Испания ўз ерларини кенгайтиришга ҳаракат қилиб, 1504 йили Неаполь Қироллиги ва Сицилияни, 1516 йили Нидерландияни кўшиб олади. Куч-қудрати билан донг таратган испан флоти (масалан, машҳур “Енгилмас армада”) ёрдамида янги кашф этилган Америка қитъасидаги қатор ўлкалар ҳам Испания Қироллиги ҳукми доирасига олинади. Бироқ испанларнинг қўли доим ҳам баланд келавермайди. Ҳатто 1808 йили Испания ерлари Франция томонидан босиб олина бошлигади ва испан халқи мустақиллик учун курашга отланади.



*Мустақиллик санаси –
1918 йил 17 октябрь
Пойтахти – Мадрид
Майдони – 504,782 км²
Аҳолиси – 43 209 511 киши
Давлат тили – испан тили*



XX асрда содир бўлган жаҳон миқёсидаги сиёсий жараёнлар Испанияни ҳам четлаб ўтмади. Иккинчи жаҳон уруши арафасида генерал Ф.Франко диктатураси ўрнатилгач, мамлакатда ҳурфикарлилик чекланиб, турли тақиқлар кучайди. Ўтган асрнинг тўртинчи чорагидан мамлакат таҳтига келган қирол Хуан Карлос I давридан ҳар соҳада ривожланниш бошланди. Бугун Испания дунёдаги илм-фан, маданият ривожланган, иқтисоди бақувват мамлакатлари қаторида туради.

Ўзбекистон билан Испания ўртасида XV асрда ёк алоқа ўрнатилган. Жумладан, Кастилия қироли элчиси, машҳур саёҳатчи Руи Гонсалес де Клавихо 1404 йили Самарқандга келиб, Амир Темур ҳузурида бўлган ва бу сафари ҳақида эсадаликларида батағсил ёзган. Мамлакатимиз мустақилликка эришганидан кейин Испания билан савдо-иктисодий ва маданий-маърифий соҳаларда ҳамкорлик йўлга кўйилди.



Адабиёт

Испания худудида турли даврларда ёйилган маданиятлар испан адабиётига ҳам ўз таъсирини ўтказмай қолмаган, албатта. Испан адабиёти ўрта асрларда ҳалқ ижоди, юнон, Рим ва араб маданиятлари таъсирида шаклланган. Тадкиқотчилар испан адабиёти тарихини тўрт босқичга бўлиб ўрганадилар: 1) шаклланиш даври; 2) Уйғониш даври; 3) тушкунлик ва тақлид даври; 4) қайта тикланиш даври.

Бошқа ҳалқларда бўлгани сингари, испан адабиётининг дебочаси ҳам ҳалқ оғзаки ижоди билан бевосита боғлиқ. Хусусан, ҳалқ бахшилари (хучлар)нинг оғзаки ижодиёти испан адабиётининг шаклланишига туртки бўлган. Хучлар куйлаган “Сид ҳақида кўшиқ” достони испан адабиётининг дастлабки намунасиdir. XII асрга мансуб ушбу достонда испан ҳалқининг миллий қаҳрамони – босқинчиларга қарши курашда донг таратган афсонавий Родриго Диас де Вивар жасорати мадҳ этилади. “Сид ҳақида кўшиқ” достонининг тили анча дағал, ифодаси қуруқ бўлиб, рицарлик даври кайфиятини акс эттириши жиҳатидан аҳамиятлиdir.

Испан ҳалқ оғзаки ижодининг яна бир намунаси романслардир. Дастлаб тилдан-тилга ўтиб юрган ва тинимсиз ўзгаришда бўлган испан романлари фақатгина XVI асрга келибгина “Romanceros” номи билан тўплам ҳолига келтирилади. Романсларда асосан мустамлакачиларга қарши курашган испан қаҳрамонлари улуғланган. Мазмунига кўра тарихий, рицарлик, севги-муҳаббат ва ҳажвий романслар фарқланади.

XIII асрга келиб қаҳрамонлик мавзуси билан бирга диний-маърифий шеърлар ҳам яратила бошланди. Ушбу йўналишда самарали ижод қилган шоирлардан бири Гонсало де Берсеодир. У ўз шеърларини “prosa decir, dictato”, яъни куйлаш эмас, ўқиш учун, деб ҳисоблайди.

Бу даврда яратилган, ҳам қирол, ҳам шоир, “Донишманд Альфонсо” номи билан танилган Альфонсо X қаламига мансуб тарихий йилнома ва шеърлар эътиборга молик. Бутун Испания тарихини ёритган қирол геометрия, ҳукуқшунослик, астрономия ва фалсафа билан жиддий шуғулланган.

Бундан ташқари, XIV асрда “Аполония ҳақида китоб”, “Александр ҳақида китоб”, “Рицарь Сифар” романлари ҳам кўзга ташланади. X.Мануэлнинг “Граф Луканор” китобидаги инсонпарварлик оҳанглари испан адабиётида сезиларли воқеа бўлди.

Испан маданиятининг “олтин асри” XVI асрдан XVII аср ярмигача давом этди. “Испанияда илм-фан ҳайратланарли даражада гуллаб-яшнади ва бутун Европага таъсир қилди”, деб ёзди бу ҳақда машҳур олим Эразм Роттердамский. Ушбу даврда испан адабий тили фойтда тараққий этди ва қирол Карл V даврида мамлакатларо мулоқот воситаси даражасигача кўтарилди.

Испан адабиёти тарихида атоқли шоир Хуан Руис (1283 – тахм. 1350) Уйғониш даврини бошлаб берди. Унинг “Саодатли мұхаббат мадхи” китобидаги реализм рухи испан адабиёти кейинги тараққиётiga кучли таъсир қилди. Шоир асарида Рим мумтоз адиллари ва араб ҳикоялари, шунингдек, француз шеърияти оҳангларидан маҳорат билан фойдаланади. Зотан, ушбу давр испан адабиёти итальян ва француз Уйғониш даври таъсирида шаклланди, деярли барча асосий жанрлар ривожланди. Хуан Боскон-и-Алмуховир (1490–1542), Гарсиласо де-ла Вега (тахм. 1501–1536) сингари шоирлар саройда хизмат қилиш баробарида ватанпарварлик, маърифат руҳида шеърлар ҳам ёзишди.

Испания адабиёти тарихида қолган ижодкорлардан яна бири Лопе де Вегадир (1562–1635). Ҳалқчил драмалари билан шуҳрат қозонган де Вега жуда самарали ижод қилган. Унинг икки мингга яқин пьеса (шуларнинг 426 таси бизгача етиб келган), уч мингдан ортиқ сонет ёзгани маълум. Дарвоқе, Лопе де Вега асарлари бугун ҳам кўплаб испан кино ва театр режиссёрлари назарида бўлиб, унинг айрим асарлари экранлаштирилган. Бундан ташқари, 1932 йили Мадрид шахри ҳокими томонидан таъсис этилган театр соҳаси бўйича Лопе де Вега номидаги йиллик мукофот мунтазам равишда муносиб топилган ижодкорларга тақдим этиб келинади.

Машҳур адаб Мигель де Сервантес Сааведра (1547–1616) ижоди Испания Уйғониш даврининг гултожи бўлди. Дастреб диний йўналишда таҳсил олган ва Папа муридлари қаторида Италияга борган Сервантес Европа флотининг Лепанто яқинида туркларга қарши олиб борган жангиди яраланади, юртига қайтишда денгиз қароқчилари қўлига тушиб, 5 йил Жазоирда асирликда яшайди. Сервантес 1585 йили Мадридда нашр этилган “Галатея” романи билан танилиб, шундан кейин гарчанд 20-30 та пьеса ёзган бўлса-да, бу асарлар изсиз кетади. 1603 йили “Дон Кихот” романининг 1-қисми нашр этилиши биланоқ Сервантес номи бутун Европа бўйлаб машҳур бўлиб кетади. Ёзувчи 1615 йили романнинг 2-қисмини эълон қиласди. Бундан ташқари, Мигель де Сервантес “Панднома ҳикоялар” ва “Парнасга саёҳат” достони, “Персилес ва Сихизмунданинг саргузаштлари” романини ёзади.

XVIII асрда испан адабиётида француз классицизмига тақлидий асарлар яратилиб, француз тили сарой ҳаёти ва зодагонлар орасида кенг ёйилди. XVIII асрнинг иккинчи ярми бошларида миллий адабиётда бироз жонланиш сезилди. Таниқли испан танқидчиси, ёзувчи Падре Исла адабиётдаги дабдабали ифодаларга қарши чиқишлилар қилди. Шоир Висенте де ла Уэрта эса испан адабиётидаги француз мактабига муросасизлиги билан танилди. Унинг 1778 йили нашрдан чиқкан “Шеърлар” тўплами халқона оҳангларга бойлиги билан ажralиб туради.

Испан адабиёти XIX асрда Испаниянинг сиёсий ҳаётидаги ҳодисаларни тўлиқ акс эттиришига кўра фойтда аҳамиятлидир. Хусусан, Наполеон истиносига қарши кураш инқилобий романтизм оқимининг ривож топишига

олиб келди. Ушбу оқимнинг йирик вакили, Фигаро тахаллуси билан танилган Хосе Мариано де Ларрадир (1809–1837). У ўз очеркларида жамиятдаги турли оғрикли нуқталарни ғоятда ўткир сатира тифига олади. Бор-йўғи 28 йилгина яшаган бўлса-да, де Ларра Испания маданияти тарихида муносиб ўрин эгаллади.

Ушбу даврда ижоди кўзга ташланган шоир Хосе де Эспронседа (1808–1842) шеър ва достонларида буржуа тузумини ҳар тарафлама танқид қилди.

Испан танқидий реализми XIX аср ўрталарида шаклланди. Унинг йирик вакили – Бенито Перес Гальдос (1843–1920)нинг тарихий романлар туркуми (“Миллий эпизодлар”) ватанпарварлик руҳи билан сугорилган. Натурализмнинг назариётчиси ва йирик вакили Э. Пардо Басан (1852–1921) биринчи бўлиб “Халқ қизи” романнада ишчилар ҳаётини тасвирлади.

XIX аср охири – XX аср бошларида испан адабиётининг нафақат миллий миқёсда, балки дунё бўйлаб танилган намояндалари етишиб чиқди. Бир эмас, бир неча испан ижодкори нуфузли Нобель мукофоти билан тақдирланди. Таниқли драматург Хосе Эчегарай-и-Эйсагирре (1832–1916), файласуф-ёзувчи Мигель де Унамуно (1864–1936), ёзувчилар Рамон Мария дель Вальс-Инклан (1866–1936), Пио Барохи-и-Неса (1872–1956), адабиёт бўйича Нобель мукофоти совриндори Хасинто Бенавенте-и-Мартинес (1866–1954), Антонио Мачадо (1875–1939), адабиёт бўйича Нобель мукофоти лауреати Хуан Рамон Хименес (1881–1958), Федерико Гарсиа Лорка (1898–1936), Сервантес мукофотининг совриндори Рафаэль Альберти (1902–1999) ва бошқалар сўз санъатининг равнақига катта хисса қўшдилар.

XX асрнинг иккинчи чорагида мамлакатда диктатура режими ўрнатилгач, испан адабиёти тушкунликка учради, кўп адиллар чет элга кетиб қолди. Нобель, Сервантес мукофотлари совриндори, Испания Қироллик Фанлар академиясининг аъзоси Камилло Хосе Селанинг (1916–2002) романлари ўша даврнинг нисбатан яхши асарлариdir. Унинг биринчи “Паскуал Дуартенинг оиласи” (1942) романи 40–50-йиллардаги испан адабиёти учун характерли бўлган тремендизм (исп. “tremendo” – даҳшатли) оқимини бошлаб берди. Тремендист-ёзувчилар инсоннинг дунёда чинакам ёлғизлигини, ўлим, зўравонлик инсон ҳаётининг муқаррар бир қисми эканини назарда тутдилар. Йирик замонавий испан прозаиги Мигель Делибес (1920–2010) ҳам ижоддининг бошланғич даврида шу оқим таъсирида бўлган. Кейинги йилларда оддий одамларнинг ҳаётини холис акс эттириши билан ном қозонган адаби Долорес Медио (1911–1996), уруш даври қийинчиликларини қаламга олган Ана Мария Матуте (1925–2014) ҳаётни ҳақконий тасвирлаш билан бирга инсон рухиятининг нозик жиҳатларини очиб бердилар. Бундан ташқари, Хулио Лъямасарес (1955 йили туғилган), Антонио Буэро Вальехо (1916–2000), Мануэль Васкес Монтальбан (1939–2003) ва бошқа шоир-ёзувчиларнинг ҳам замонавий испан адабиётида ўз ўрни бор.

Испания номини дунёга танитганлардан яна бири файласуф, санъатшунос, адабиётшунос Хосе Орtega-и-Гассетдир (1883–1955). Санъат ҳодисасига буткул янгича ёндашган олимнинг “Санъатнинг ғайриинсонийлашуви”, “Роман ҳақида ўйлар” сингари асарлари Фарбий Европа фалсафий қарашларига кучли таъсир этди.

*Отабек САФАРОВ
тайёрлади*

Тасвирий санъат ва меъморчилик

Испаниянинг энг қадими, ҳозирги кунгача мўъжиза туфайли сақланиб қолган ёдгорликлари ибтидоий ҳаётнинг полеолит даврига тўғри келади. Сантильяна-дель-Мардан унча узоқ бўлмаган жойдаги Алтамир горининг деворига ўйиб ёзилган тасвиirlар бунинг ёрқин исботидир.

Рим империясининг хукмронлиги даврида қурилиш соҳаси, яъни фаввора, кўприк, амфитеатр ва аркалар бунёд этилгани бу меъморчилик соҳасидаги ютуқларни кўрсатади. Масалан, Тахо дарёси бўйидаги олти аркадан иборат, ўртасида Зафар аркаси жойлашган Алькантараравоқи яхши сақлаб қолинган.

Ўрта асрлар санъати ва архитектурасида эса араблар истилосининг таъсири сезилиб туради.

Испания тарихида араблар ва берберлар билан бўлиб ўтган 711–714 йиллардаги жанг муҳим ўрин тутади. Испанлар Шимолий Африкадан келган араб ва бербер мусулмон лашкарларини “маврлар” деб аташади. Араблар истилосидан сўнг, араб-испан ва бербер-мағриб одатларини бирлаштирувчи Мавритания санъати шаклланди.

Геометрик шаклларга бой тарзда интеръерни безатиш, ҳайвонлар сурати солинган нақшлар ва каллиграфик орнаментлардан фойдаланувчи асулемо (ёки асулемес) техникасида Мавритания усулининг алоҳида жиҳатлари кўзга ташланади. Араблар Мавритания иншоотларидағи тақасимон арка элементларини вестготлардан ўзлаштирганлар. Мавритания аркаларини Испания жанубида, айниқса, Андалусияда кўп учратиш мумкин. Шунингдек, Гранададаги Альгамбра саройи, Курдобадаги масжид, Севильядаги Ла-Хиральда минораси дунёга маълум ва машҳур.

Испан меъморчилигидаги роман ва готика услублари Франциядан кириб келган. Кўпгина роман черковлари Каталония йўлида қурилган. Уларни яrimайлана шаклидаги аркалар ва кичик ойналарга эга улкан деворлар ажратиб туради.

Готика архитектураси Испанияда XII аср охирида пайдо бўлди. Леондаги XIII асрда қурилган бош черков ушбу услугуга ёрқин мисолдир.

Испанияда қолган Мавритания усталари декоратив жиҳатдан ривожланганлиги билан ажралиб турувчи христиан-мусулмон услуги – мудехарни яратдилар.

XIV аср бошида Испанияда яrimайлана аркалар ва антик безаклардан фойдаланилган мустаҳкам симметрияни характерловчи, Уйгониш даври гояларини илгари сурувчи ренессанс архитектураси кенгайди. Илк испан ренессанси платереско (“платеро” – “заргарлик”) номи билан машҳур бўлиб, у нозик декорлари ва кумуш заргарлик ишловларини эслатувчи буюмлари (Леондаги Сан-Маркос карvonсаройи) билан фарқланади.



Испания Уйғониш даври ренессанс маданияти Нидерландия ва Италия маданиятлари асосида пайдо бўлди. Бунда ўзга давлатлар санъати тўлалигича ўзлаштириб олингани йўқ, албатта, бироқ ренессансни хорижда тажриба орттирган испан меъморлари, рассом ва ҳайкалтарошлари ижодида мазкур икки давлат урф-одатлари сезилиб туради. Қисқа вақт ичидаги сезиларли ривожланишни бошидан ўтказган Испанияда Валенсия, Севилья, Толедо каби маданият ва санъат гуллаган шаҳарлар пайдо бўлди.

Бу жараёнда Испания архитектураси бетакрор услугуга эришди. Архитектура доирасида зодагонлар ҳайкаллари ва черков меъморчилиги пайдо бўлди. Қироллар ҳукмронлиги остидаги мамлакат меъморчилиги қироллик қудрати ва буюклигини тарғиб қиласа эди. Кўпгина бинолар ҳарбий юришлардаги ғалабалар шарафига қурилди. Бунга мисол тариқасида Толедодаги португаллар устидан ғалаба сифатида қурилган Сан-Хуан де-лос-Рейес черковини ва французлар устидан ғалабага бағишланган Сан-Кантене ёдгорлигини келтириш мумкин.

Барокко йўналиши архитектурага серҳашам ҳайкалтарошлиқ намуналари, ғайриодатий декорлар, драматизм ва ҳаракатни олиб қирди. Барокконинг испан варианти Чурригера архитекторлар оиласи шарафига “чурригереско” деб номланган. Вальядолид университети биноси испан барокко услубида қурилган.

Филипп II 1561 йил Мадрид шахрига асос солгандан сўнг, Мадрид ва унинг атрофида қаср ва саройлар қурила бошланди. Тициана, Тинторетто, Бассано, Босха, Брейгеля каби шаҳарларни испан ва Европа рассомларининг асарлари билан безатишиди.

Испания халқ меъморлиги жойлашган ерига кўра ўз расмларига ажралади: мисол учун, шимолда олд айвон ва ёғоч болохонаси бор тошли уйлар қурилган бўлса, Кастилияда кўпинча ёғоч синчли, жанубда эса деворлари лой сувоқли ва оқланган, қуёш нурларини қайтарувчи уйлар қад кўтартган. Қишлоқ жойларда, айникса, дарё кам ва доимий шамол эсувчи ерларда, шамол тегирмонлари кўп учрайди. Бир нарса аниқки, исталган жой, ҳаттоки энг кичик испан қишлоғида ҳам асосий майдон – Пласа Майор (Plaza Mayor) бўлиб, у ерда одатда черковлар, маъмурий бинолар, магазин ва барлар мавжуд. Очик майдонда эса байрамлар, концерт, халқ ўйинлари ва албатта бутун дунёга донгдор бука жангни ўтказиб келинади.

Испаниянинг ўрта асрлар санъатида черковнинг бевосита таъсири сезилиб турганлиги боис ижодкорларнинг ишларида диний мавзулар устунлик қилганини кўриш мумкин. Масалан, рассом Эль Греко ижоди; “Мариянинг меърожи”, “Троица” (“Учлик”), “Чўпонларнинг саждаси”, “Якшанба” каби асарлари унинг диний йўналишда ижод этгани ва черков учун асарлар яратганидан далолат беради.

Испан рассомлик намуналарини Диего Веласкес (1599–1660) ва Франиско Гойя (1746–1828)нинг ижодида топиш мумкин. Замонавий санъатга эса уч испан рассоми асос солган: – Пабло Пикассо (1881–1973), Жоан (Хуан) Миро (1893–1983) ва Салвадор Дали (1904–1989). Модернизм даври рамзларини яратган бу буюк рассомларнинг асарлари мамлакатнинг Мадрид (Прадо музейи, София қироличасининг санъат маркази), Барселона (Пикассо музейи, Замонавий санъат музейи), Бильбао (Гугенхайма музейи), Фигересе (Дали театр-музейи) каби шаҳарларнинг йирик замонавий санъат музейларида сақлаб келинмоқда.

Агилар саройидаги Пикассо музейи XV асрда Беренгер де Агилар оиласига тегишли эди. Кейинчалик эса граф Санта Каломнинг шахсий мулкига айланди. Унинг олд томони, айниқса, пастки қаватдаги ноёб готика ойнаси XVIII асрдаги қайта таъмиглашда шикастланди. Узоқ йиллар у ташландик ерлигича қолган эди. Бир неча реставрация ишларидан сўнг, 1963 йил 9 марта муниципалитет қарорига мувофиқ Агилар саройида Пабло Пикассо музейи очилди. Ўзига хос каталония готикаси, конструктив аниқлик, одийлик, камтарин шакллар бу ерда янада кўримли ва тушунарли туюлади.

*Камола РАҲМОНОВА
тайёрлади*

Мусиқа ва рақс

Испания мусиқаси ранг-баранг бўлиб, баск, галисий, каталон, кастилия, андалусия каби маҳаллий услубларга ажратилади. Ҳар бир услуб Испаниянинг ўзига хос турли ҳудудлари билан боғлиқ. Жумладан, баск мусиқаси – асосан Испаниянинг басклар истиқомат қиласидаган Баскония аҳолиси орасида кенг тарқалган. Басклар қадимдан жанговор халқ бўлганлиги боис, уларнинг мусиқасида ҳам ҳарбий жанговорлик руҳидаги йўғон овоз билан куйланадиган қўшиқ етакчилик қиласиди. Милоддан аввалги VI асрда Испания ҳудудида яшаган ибер қабилаларининг шимолий томондан кириб келган кельтлар билан аралashiши натижасида баск халқи пайдо бўлган. 1910 йилда басклар тарихини тадқиқ қилган Ф. Гаскуэ уларнинг мусиқаси Франциянинг Бретен вилояти ва Буюк Британиянинг Уэльс ҳудудида яшаган халқлар мусиқасига жуда ўхшаш эканлигини таъкидлайди.

Кatalония мусиқасида эса француз ва ҳабашлар мусиқасининг таъсири катта. Испания марказида жойлашган Кастилия ҳамда жанубдаги Андалусия ва Галисий вилоятларида истиқомат қилувчи халқларнинг мусиқаси ҳам ўзгача ҳисобланади.

Милоддин аввалги 1100 йилда Ўрта Ер денгизи орқали Испания ҳудудига кириб келган финикийлар, юнонлар, карфагенликлар ўзлари билан бирга, шарққа хос бўлган мусиқий меросини ҳам олиб келганлар. Милоддан аввалги V асрдан бошлаб испан халқи мусиқасига лотин-рим мусиқаси ҳам ўз таъсирини ўтказган. Рим географи Страбон ўзининг “География” асарида испан халқларининг мусиқа асбобларидан арфа, икки тешикчали най, труба, турли ногоралар, шунингдек, пантамино кўринишидаги рақслари ҳақида маълумот берган. Рим империяси даврида Испанияга христиан дини билан бирга, ушбу динга хос бўлган турли диний ва мусиқий мадҳиялар, куйлар кириб келди ва христиан дини мадҳиялари испан тилида ижро этила бошланди. Шу билан бирга, испаниялик Исидора, Евгений Толедский (656 йилда вафот этган), Индефонсо (607–667) каби



композиторлар диний мадхияларга испан қўйларини басталадилар. Шу билан бирга, улар испан мусиқаси шакланишига ҳам ўз таъсирини ўтказди.

711 йилда Гибралтар бўғози орқали кириб келган араблар Испанияда ўз ҳукмронлигини ўрнатгач, испан мусиқасига араб мусиқаси ўз таъсирини кўрсатди. Жумладан, араб мусиқачиси Зариаб испан ва араб оҳанглари асосида 10 000 дан ортиқ кўшиқ ёзган. Ушбу кўшиқлар асосан Испаниянинг Андалусия ҳудуди аҳолиси орасида кенг тарқалган.

XIV асрда трубадурлар (сайёр шоир, кўшиқчилар) мусиқаси жанри равнақ топган. Шунингдек, испан кўшиқчилари томонидан кантига, албада, пастурая, ретроен жанрларидағи қўйлар маромига етказиб ижро этилган. XV аср ўрталарида лўлиларнинг катта тўлқини Испания жанубига кириб келди ва испан тилида ўз оҳангларининг оммалашишига ҳисса кўшди.

XV–XVI асрларда яшаган испан мусиқашунослари Б. Рамос де Пареха, Ф. Салинаслар испан мусиқаси назариясини яратганлар. Бу эса XVII–XVIII асрларда испан миллий мусиқаси асосида опера жанри – сарсуела ҳамда лирик мусиқали комедия жанри – тонадилья вужудга келишига олиб келган.

XIX аср охири испан мусиқаси ривожига катта ҳисса кўшган Ф. Педрел ва унинг издошлари И. Альбенис (1860–1909), Э. Гранадос (1867–1916), М. де. Фалья (1876–1939) янги мусиқа мактабларига асос солдилар. Уларнинг ижоди испан мусиқасининг юксак чўққиси ҳисобланади. Исаак Альбенис – моҳир композитор, истеъоддли пианиночи ҳисобланади. Унинг испан қўйлари асосида яратган “Пепита Хименис”, “Флоридалик Сан Антонио” каби опера асарлари жаҳонга машҳур бўлди. Энрико Гранадос эса фортепиано қўйлари асосида яратилган испан миллий рақсларини жаҳон сахнасига олиб чиқкан. Мануэль де Фальянинг ёшлиги Испания шарқида жойлашган Кадис оролида ўтган. Бу орол аҳоли орасида қадимий финикияларнинг мусиқаси кенг тарқалган. Мануэль де Фалья ушбу мусиқа қўйлари асосида яратилган кўшиқларни тинглаб катта бўлган. Кейинчалик у Парижга ўқишга кетиб жаҳон мусиқаси сирларини ўрганади. Унинг “Тўрт испан пьесаси” асари фортепианода ижро этилган бўйлиб, бутун Испания бўйлаб саёҳати давомида яратилган. Шунингдек, у яратган “Андалусия”, “Каталония”, “Кастилия”, “Баскония” каби асарларда испан миллий мусиқаси ва рақслари мужассамланган. Мануэль де Фальянинг “Испания тунги боғлари”, “Монтаньеса”, “Атлантида” ораториялари айниқса европаликлар аҳолиси орасида кенг тарқалган.

XIX аср ўрталаридан Испанияда мусиқа муассасалари ҳам очила бошлади. Жумладан, 1830 йили Мадридда, 1847 йилда Барселонада консерваториялар очилган.

XX аср испан ижрочилик санъати юксак поғонага кўтарилди. Миллий озодлик уруши йилларида испан мусиқашунослари С. Бакаресе, Э.К. Чапи, К. Паласионларнинг ватанпарварлик рухида яратилган қўйлари ва кўшиқлари омма орасида севиб ижро этилган. Генерал Франко диктатури (1939–1975) даврида кўпгина испан мусиқачилари чет элларга чиқиб кетишига мажбур бўлган.

Хозирги кунда замонавий мусиқа мактаблари – Барселона, Мадрид, Бенидром ва ҳатто Канар оролларида ҳам мавжуд. Мусиқачилар испан қўйларини жаҳонга танитмоқда. Испанияда замонавий опера намояндаларидан Хоце Карреранинг тенори, Пласидо Домингонинг драматик тенори ва лирик баритони, Монсеррат Кабальенинг сопраноси жаҳон операсида машҳур ва маълумдир.

Испан рақслари – эҳтиросга бой, ўзгаришлар, завқ-шавқли, гитара ва қайроқлар

билин ижро этиладиган рақслар туркуми. Испан рақсларини тўрт гурухга ажратиш мумкин: а) Испания халқ рақслари; б) Фламенко рақслари; в) мумтоз рақслар; г) замонавий испан рақслари.

Испания халқ рақслари XV асрда пайдо бўлган “мореска” рақси бутун Европа халқларига таниш. XII асрда француз рақслари таъсирида шаклланган сарабанда рақси, буқа жангини акс эттирган пасадобл рақси, шунингдек, хота, сардана каби рақслар ҳам испан халқининг миллий рақслари қаторига киради.

Испан миллий рақсларидан бири – фламенко кўп мамлакатларда маълум ва машхур. Ундаги ҳар бир шўх ва жозибали ҳаракатлар испан халқининг миллий рухи билан суғорилган. Дастлабки фламенко рақси испан лўлиларининг ҳаёти, маданияти, мусиқа санъатини акс эттирувчи куй ва қўшиқлар жўрлигига ижро этилган. Кейинчалик испан миллий маданияти бойиб, фламенко ашула рақсларига бутун Испания аҳолисининг турмуш тарзи ва маданий ҳаётини акс эттирувчи жозибали белгилар қўйилди.

Испан йигит ва қизларининг гитарадан тараалаётган куйига жўр бўлиб, жуфт-жуфт рақс тушиши ҳам ўзгача гўзал. Баъзан испан раққос ва раққосалари мусиқасиз, сахна полида депсиниб, муайян куйни эслатувчи товуш чиқариши, хонандаларнинг жўр бўлиб, шўх ашулалар айтиши, мухлислар қарсаги янграётган садолар шунчалик жозибалики, уларни кўриб ва эшишиб диллар хушнуд бўлади. Хуллас, фламенко испан рақс санъатини дунёга танитган сарчашма санъат намуналаридан бири. Фламенко билан балет уйғунлашган рақслардан бири – “Estilizacion” испан мумтоз рақси сифатида жуда машхурдир.

*Шерали Қўлдошев,
ЎзДСМИ доценти*

Театр



Испанияда томоша санъатининг шаклланиши антик даврларга бориб тақалади. Хусусан, Пиреней ярим оролида яшаган қабилаларнинг халқ маросим ўйинлари ва пантомима рақслари илк театр учқунлари сифатида намоён бўлган. Том маънода театр анъаналарининг қарор топиши эса қадимги Рим билан боғлиқ. Маълумки, милоддан аввалги I ва милодий V асрлар оралиғида Испания Рим мустамлакасига айлантирилган. Мазкур жараёнлар бевосита Рим театр маданиятининг Испанияда ҳам кенг тарқалишига олиб келди.

Ўрта асрлар Испания театр санъатида диний йўналишдаги мистерия ва литургик драмалар етакчилик қилди. Тахминан XVI аср ўрталарида Испанияда диний мифология сюжетлари асосида саҳналаштирилган “муқаддас спектакллар” номли драмалар пайдо бўлди. Чуқур миллий асосга эга халқ комедия театрлари шакллана бошлади. Кейинчалик улар испан театр санъатининг қарор топишига кучли таъсир кўрсатди.

XIV–XV асрлар Испанияда кўнгилочар сарой театрлари ташкил этилди. Мазкур театрларда асосий ролларни қирол ва қироличага хушомад қилувчи ҳаваскор сарой аъёнлари ижро этишган.

XVI аср иккинчи ярми Испания ижтимоий ҳаётида черковлар асосий ўринни эгаллади. Шу боис черковлар қошида корраль деб аталувчи оммавий ҳаракат театрлари ҳам пайдо бўла бошлади. Дастлабки шундай театрлар Мадридда ташкил топди. 1572 йил “Корраль де ла Крус”, 1582 йилда эса “Корраль дель Принсипе” театрлари очилди. Улар Барселона, Валенсия, Севилья каби катта шаҳарларда ҳам томошалар қўя бошлади. Гарчи бу театрлар черков тасарруфидаги бўлса-да, улардаги спектакллар кенг оммага мўлжалланган эди. Уларда Уйғониш даври инсонпарварлик гоялари устувор бўлган. Ўша даврнинг энг машҳур муаллифларидан бири испан драматурги Лопе де Вега эди.

XVI аср охирлари корраль театрларида қўп сонли профессионал труп-палар иштирок этган. Уларни таникли актёрлар бошқаришган. Бироқ коррал театри фаолияти осон кечмаган. Қирол саройи мулоғимлари ҳар қандай йўл билан бўлса-да, бундай театр ижодини ўз назоратига олишга уринган. Ҳамма жойда репертуар устидан шафқатсиз цензура ўрнатилган, зодагонлар мавзусидаги спектаклларга одатда рухсат берилмаган, баъзан эса маълум актёрларнинг саҳнага чиқиши тақиқланган.

Худди шу даврда испан жамиятининг юқори табақа вакиллари манфатини ифодалаган сарой театрлари ривожланган. Шунинг учун ҳам улар ҳокимиёт томонидан алоҳида назорат қилинмаган. XVII аср бошларида Эль Прадо ва Буэн Ретиро қироллик саройларида нафақат аъёнлар, балки, оддий ахолининг ҳам саройга киришига рухсат берилган ва спектакллар учун маҳсус бинолар жиҳозланган. Қироллик театри репертуарида асосан мифологик мавзудаги пьесалар саҳналаштирилган.

XVII аср охирида Испания сиёсий кудратининг таназзули билан театр ҳам миллий асосларини йўқотиб, том маънода француз классик ва сентименталь театри таъсирида қолиб кетди. XVIII асрда испан буржуазиясининг кучсизланиши “сайнет” ва “сарсуел” номли бир пардали маиший мусиқа комедияларининг қўпайишига олиб келди. Мазкур жанрда зодагонларнинг биқиқ турмушки ва сарой мұхитини нозик пародиялаб ифодалаган Роман де ля Брус (1731–1794) шуҳрат қозонди.

Франция театрининг XIX асрдаги таъсири испан театрида романтизм йўналишининг кучайишида кўринади. Галиано (1789–1865), Хосе Эчегерай (1832–1916) ва бошқа драматурглар ўзларининг романтик драмаларида ҳақиқатдан чекиниб, эски испан театрини тиклашга интилишган. Ўша даврнинг эътиборли драматургларидан Перес Гальдос (1845–1920) ўзининг реалистик пьесаларида сарой романтизмiga кескин қарши чиқади. У клерикализмни (“Электра”) танқид қилиб, хайриҳоҳлик билан шаҳар хунармандлари ҳаётини (“Фортуната Хасина”) ифодалайди.

XX асрда кўпгина испан театрлари репертуари ўз йўналишини оддий одамлар хоҳишига кўра ўзгартириди. Мамлакатнинг аксарият театр саҳналарида кичик жанрлар, шунингдек, комедия ва мелодрамалар устунлик қила бошлади. 1931 йил Испанияда республика бошқарув тартиби жорий қилингандан сўнг испан театрини ислоҳ қилиш бўйича муайян ишлар амалга оширилди. Таъкидлаш жоизки, шундан кейин театр анчагина демократик кўриниш касб эта бошлади.

Фашистлар диктатурасининг ўрнатилиши (1939–1975) испан театрига салбий таъсир кўрсатди. Жабр-зулмлар бироз тарқалгач, эски драмалар саҳна юзини кўра бошлади. Шу тариқа испан театр яна оёқка турди. 1975 йилда Испания давлати театр биноларини томошабин талаби ва

дидига мос қилиб, соҳани қайта ривожлантириш ҳаракатига тушди. 1978 йили Мадридда Халқ демократик драма театри маркази ташкил этилди. Унда ҳозирги замон драматурглари Х.М.Мендес, Ф.Нева, Л.Риаса асарлари қаторида Сервантес, Гарсия Лорка асарлари ҳам саҳналаштирилди. Мадрид билан бирга Барселонада ҳам “Озод” кооператив театри ташкил топди.

Бугунги кунда испания театрлари Европанинг етакчи театр марказларидан ҳисобланади. Айниқса, Мадрид ва Барселонада фаолият юритиб келаётган қирқقا яқин театр замонавий мумтоз саҳна асарларини томошабинларга ҳавола этмоқда. “Гарсия Барбон”, “Лопе де Вега”, “Вильяморта”, “Сарсуэл”, Кироллик театрлари, “Лисеу”, “Фоля” каби катта театрлар ҳозирда қизғин ижодий изланишда. Мазкур театр жамоалари испан саҳна санъатини дунёга танитиб келмоқда.

*Гуломжон МИРАҲМЕДОВ
тайёрлади*

Кино



Испания кинематографияси қарийб юз йилдан зиёд фаолияти давомида нафақат Европа, балки, бутун жаҳон кино мухлисларининг эътирофига сазовор бўлди.


Жаҳонда кино санъатининг кашфиётчилари сифатида машхур ака-ука Люмерлар томонидан яратилган картиналинг дастлабки кино намойиши 1895 йилнинг 5 майида Мадридда бўлиб ўтди. Кейинчалик ушбу намойишдан таъсиранланган Александр Промио Барселона ва Мадридни тасмага муҳрлади.

Фотограф ва режиссёр Фруктуос Хелабертнинг “Қаҳвахонадаги жанжал” картинаси тасмага олинган илк испан бадиий фильми ҳисобланади. 1914 йилдан эса Барселона “кино ишлаб чиқариш маркази”га айланди. Флориана Рея суратга олган “Аразонча мардлик”, “Христофор Колумбнинг ҳаёти ва Американи кашф этиши” сингари дастлабки овозсиз фильмлар яратилди.

1928 йилда Мадридда киноклуб ташкил этилиши Испан кино санъатида янги босқични бошлаб берди. Киноклуб режиссёрлар учун маҳорат маркази бўлиб қолди, марказга кўплаб режиссёрлар ва кинооператорлар уюшди. Ҳудди шу йили режиссёр Франсиско Элиас Рикельме биринчи бор “Куёш дарвозасининг сири” номли овозли кинокартинасини томошабинларга тақдим этди.

1936 йили мамлакатда авж олган фуқаролар уруши тугагач, Кинематография миллий департаменти ташкил қилинди ва кинодан мафкуравий тарғибот минбари сифатида фойдаланила бошланди.

Бу даврда испан киносанъатида режиссёрлар Ф.Икинонинг “Тирик мурда”, Рафаэль Хильнинг “Нур изи”, Хуан де Рудиянинг “Ақлдан озган мухаббат”, Артуро Роман, Хосе Луис Саэнс де Эрсдиаларнинг “Раса” син-



гари фильмлари энг кўзга кўринган кино асарлари сифатида баҳоланганд.

1962 йилдан Испания Кино бош бошқармаси ташкил этилиши ва ҳукуматнинг қўллаб-қувватлаши замонавий испан киносининг шаклланишига турткى бўлди. Марио Камуси, Мигелия Пикассо, Франсиско Регейро, Мануэль Саммерс, Карлос Саура каби режиссрлар этишиб чиқди. “Тўла хола”, “Яхши муҳаббат”, “Алвондан сариққача”, “Ов” сингари бадиий фильмлар мухлислар томонидан илиқ кутиб олинди. Мавзулар кўлами ва жанрлар хилма-хиллиги билан испан кинематографияси Европада ўзига хос ўрин эгаллади.

Кино асарларни тарғиб килиш мақсадида 1967 йили Испаниянинг Ситжес шаҳрида кинофестиваль ўтказилди. Кейинчалик бу тадбир Каталония Халқаро кинофестивали сифатида машхур бўлиб кетди ва Европа кинематография танловларининг энг яхшиларидан бири бўлиб қолди. Айниқса, бу кинофестиваль фантастика йўналишида намойиш этилган фильмлари билан ном қозонди. Бу жанрда ижод қўлган, режисср Хесус Франкони киномухлислар яхши танийди.

Кастилия лаҳжасидан ташқари бошқа испан лаҳжаларида ҳам маданий мерос яратиш ишлари кенгайиб кетди. Кўплаб санъат асарлари яратиладиган ва тадқиқ қилинадиган марказлар вужудга келди. Масалан, Каталония кинематография институти ва бошқалар шулар жумласидандир. Уларда нафакат режиссрлар, балки кинооператорлар, актёрлар тайёрлаш ишларига ҳам катта эътибор берила бошланди.

Мамлакатда ишлаб чиқилган фильмларни қўллаб-қувватлаш учун турли йўналишдаги мукофотлар таъсис этилди. Хусусан, 1987 йили испан фильмлари учун Оскар даражасидаги Гойя мукофотига асос солинди.

Бугунги кунда ҳам испан киносанъати тараққиёт йўлида давом этмоқда. Испания кўплаб халқаро кинофестиваллар, танловлар, анжуманларга мезбонлик қиласиди. 1953 йилда ташкил қилинган “Сан-Себастенда-Кино” халқаро фестивали ҳозирги кунда Вальядомида шаҳрида ўтказиб келинмоқда.

Испан киноси халқаро миқёсда ҳам алоҳида ўрин тутади. Соҳада кўплаб таникли режиссрлар, операторлар, актёрлар самарали ижод қилиб келмоқда. Улар орасида кинооператор Нестор Аммендос, актёрлар: Фернандо Рей, Антонио Бандерос, Фернандо Фернан Гомес, Хавер Бардем, актрисалар: Пенелопа Круз Моура, Морибел Верду ва бошқалар бор. Улар испан киносанъатининг ҳақиқий кашфиётлари саналади.

*Иқбол МЕЛИҚЎЗИЕВ
тайёрлади*

Музей



Испания музейлари ўз бағрида санъатнинг нодир дурдоналарини сақлаб келаётган тарихий аҳамиятга эга кўхна бинолар сифатида дунёга

машҳур. Шундай музейларидан бири Мадрид шаҳрининг тарихий марказида жойлашган Прадо музейидир (испан тилида “үтлок”, “майсазор” деган маъноларни англатади). 1405 йилда қирол Энрике III бу ерда овчилар уйчасини курдиради. Кейинчалик бу уйча ўрнида қирол Карл I ўғлига атаб сарой барпо этади.

Бугунги кунда Прадо музейи Европанинг энг яхши рангтасвир галереяларидан бири ҳисобланади. Музей 1830 йилда омма учун очиқ деб эълон қилинди. Прадо испан қиролларининг суратлар жамланмаси асосида шаклланган. Музей ташкил этилган вақтда бу жамланмада 319 та асар бор эди. Ҳозирда эса музей хазинасидан 8000 га яқин картина, 1000 дан зиёд ҳайкалтарошлиқ намуналари ва 12 000 дан ортиқ халқ амалий санъатининг нодир намуналари ўрин олган. Музей италян, фламанд, испан, инглиз, француз, немис мактаби каби рангтасвир ҳамда ҳайкалтарошлиқ, декоратив санъат намуналари, қаламтасвир ва эстамп (ганч, гипс, қофоз ва бошқаларга босиб туширилган ёки кўчирилган гравюра, расм) асарлари бўлимларига бўлинади. Прадо музейида Диего Веласкес, Эль Греко, Франсиско де Гойя, Хусепе де Рибера, Франсиско де Сурбаран каби дунёга машҳур рассомларнинг асарлари сақланади. Пабло Пикассонинг машҳур “Герника” асарини ҳам айнан шу музейда учратиш мумкин. 2003 йили музей Тицианнинг дунё музейлари хазинаси ва шахсий коллекциялардан ўрин олган барча асарларини тўплаб катта кўргазма уюштириди.

Испания қироли Филипп II номи билан боғлиқ музейлардан бири бу Эскориалdir. У Мадрид яқинидаги Сьерра де Гвадаррама тепалигида жойлашган. Эскориаль меъморий мажмуасига “дунёning саккизинчи мўъжизаси”, “тошдаги симфония” каби номлар билан таъриф берилган.

Эскориаль мажмуасининг қурилиши 1557 йил 10 августда бошланган. Дастреб бу ерда Филипп II авлиё Лаврентийга атаб черков барпо этади. Қирол Карл V даврида эса черков атрофига сарой қурилади. Саройнинг биринчи фиши 1563 йилда кўйилган. Қурилиш 21 йил давом этади. Саройнинг бош меъмори Микеланжелонинг шогирди Хуан Баутиста де Толедо эди. Унинг вафотидан сўнг сарой қурилишига 1569 йилда машҳур меъмор Хуан де Эрера киришади. Қасрнинг безак ишларида энг сифатли қурилиш материалларидан фойдаланилган. Саройни безашда ўз давриниг энг яхши усталари қатнашган. Ёғоч ўймакорлиги ишлари Куэнке ва Авила, мармар безаклари Арасен томонидан ишланган. Ҳайкалтарошлиқ намуналари эса Милан шаҳридан келтирилган. Бронза ва кумуш безаклари Толедо, Сарагос ва Фландрия усталари томонидан бажарилган. 1584 йил 13 декабрда мажмуанинг охирги тоши кўйилган. Шундан сўнг рассомлар, безакчи усталар безак ишларини бошлашган. Улар орасида италиялик машҳур рассомлардан П. Тибалдини, Л. Камбязо, Ф. Кастелло ва бошқалар бор эди.



Эскориаль мажмуаси 15 галерея, 16 патио (ички эшиклар), 13 бутхона, 300 монастир, 86 зина, 9 минора, 9 орган сози, 2673 ойна, 1200 эшик, 2 музей ва 1600 картинали жамланмадан иборат.

Эскориаль мажмуаси таркибида иккита катта музей мавжуд. Биринчи музейда Эскориалнинг курилиши, меъморларнинг иш режалари, лойиҳалари, эскизлари, курилиш ашёлари ва масштабли моделлар сақланади.

Иккинчиси бадиий музей ҳисобланиб, у 9 та катта хонадан иборат. Музей залларида XV–XVI асрларга оид полотнолар ўрин олган. Улар орасида Босх, Веронезе, Тинторетто, Ван Дейк каби машҳур рассомларнинг асарлари мавжуд.

Эскориаль мажмуаси очиқ осмон остидаги музей ҳисобланиб, меъморий иншоотлар санъати асари даражасида безатилган. Биргина Эскориаль таркибига кирувчи черковнинг шифти ва меҳроб қисмини 43 испан ва италиялик рассомларининг асарлари безаб турибди. Эскориаль пантеони эса бронза, мармар ва яшм тошлари билан ишлов берилган ноёб меъморий обида ҳисобланади.

Испания музейлари орасида асосан тарихий-бадиий ҳамда уй-музейларни кўплаб учратиш мумкин. Жумладан, Сальвадор Далининг Фигерас шаҳридаги театр музейи, Жирона вилоятидаги Пуболь қасри рассом истиқомат қилган тарихий обидалар ҳамда унинг ижодига бағищланган замонавий музейлардир. Шундай музейлардан машҳур испан рассоми Пабло Пикассо ижодига бағищланган, Барселона ва Малага шаҳарларидаги музейларни, Толедодаги Эль Греко ҳаёти ва ижоди билан боғлиқ музейни санаб ўтиши мумкин.

*Гулирањо ОРИФЖОНОВА
тайёрлади*



ИСПАН ШЕЪРИЯТИДАН НАМУНАЛАР

ЎЙГОНИШ ДАВРИ ШЕЪРИЯТИДАН

*Рус тилидан
Маҳкам МАҲМУД
таржимаси*

Ўрта асрларда аслзода табақа вакиллари бўлган испан шоурлари антик поэзиядан кўра кўпроқ Данте, Петрарка, Саккетти, Тассо, Ариосто шеърларидан таъсирланиб итальян шеърияти мактаби йўналишида терцетлар (учликлар), канцоналар, сонетлар, эклогалар, элегиялар ёза бошладилар. Бу йўналиш етакчилари Хуан-Боскон-и-Алмуҳовир, Гарсиласа де-ла Вега, Диего Мендоса, Балтасар дел-Алласар, Фернандо де Эррере ва бошқалар мамлакатнинг ички ва ташқи сиёсатида фаол иштирок этадилар. Гарсиласа де ла Вега насл-насаби “Испан Плутархи” деб шуҳрат қозонгган тарихчи Фернан Гусманга боғланади. У бир айби учун испан қироли Карл V томонидан Дунай дарёси оролидан бирига сурғун қилинади. Шоир 35 ёшида Францияга қарши Прованс урушида ҳалок бўлади. Асарларини Боскон-и-Алмуҳовирнинг беваси ўз эрининг асарлари билан бирга нашр этади. Машҳур испан адаби ва шоури Мигел де Сервантес номи эса барчага яхши таниш. Испания Уйғониш даври сўнгидағи санъаткорлардан бири бўлган Сервантес шеърларида ватанпарварлик руҳи кучли. Биз куйида испан Уйғониш даврининг мазкур уч ижодкори шеърларидан айрим намуналарни эътиборингизга ҳавола қилмоқдамиз.

ХУАН БОСКОН-И-АЛМУҲОВИР

(1490–1542)

Таниқли испан шоури, жамоат арбоби. Барселонада зодагон оиласда туғилган. 1507 йилдан қирол саройида, жумладан, император Карлос I саройида хизмат қилган. 1532 йили Испаниянинг Италиядаги мухтор элчиси бўлган. У шеъриятда “Италия мактаби” асосчиларидан бири ҳисобланади.

(Дўстим дон Диего де Мендосага мактубдан)

Бу дунёда йўллар кўпdir,
Хатарларни қолдиrsanг ортда,
Шунинг ўзи яхши йўлdir.

Сарсон кезмай дунё бўйlab,
Оиласда топдим роҳат,
Аёлимга садоқат сақlab.

Баъзилар мол-дунё излаб,
Кўшини юртни қилар вайрон.
Найзабозлик қилар хезлаб.

Менга уруши, бойлик керакmas,
Бирвларни қириши керакmas,
Конхўр юрак тоза юракmas.

Менга маъқул яшаши тинч-омон,
Оиламда ёзиб дастурхон,
Табиатдан топамиз эҳсон.

Кўнглим тинчdir, аёлим гўзал,
Гоҳи вақтлар чиқса-да жанжал,
Ярашурмиз шу он, шу маҳал.

Камчилик йўқ емоқ-ичмоқдан,
Қисилмадик сира томоқдан,
Фарзандлару набиралар ҳам.

Болали уй бозор дейдилар,
Шодлик йўқ уй мозор дейдилар,
Болалар одобли, кўнгил хотиржам.

Шаҳарда ҳам уй-жойимиз бор,
Агар шаҳар бўлиб қолса тор,
Қишлоқ кутар бизни интизор.

Бизни кутар ям-яшил ўтлоқ,
Яшил қирлар ва узумзор боғ,
Гоҳо келар шаҳардан дўст-ёр.

Ёз чилласи бунда қийнамас,
Ғир-ғир эсар шамол ҳар нафас,
Сурув-сурув қўйлар қайтишар.

Ўйнаб-кулиб қирлар бағридан,
Биз ҳам бироз ҳориб қайтамиз,
Уй томонга – дала сайдидан.

Уйимиизда ёзиқ дастурхон,
Уй бекаси кутар шод-хандон,
Йўл чарчогин унумтамиз тез.

Дастурхонга қўйилар шу кез
Турли мева-чева, тузлама.
Чанқоқбосди шарбат ҳам тайёр.

Патнисларда тилларанг узум,
Олма, ноклар устидарайхон.
Саховати беминнат кузнинг.

Пишилоқ ҳам бор эчки сутидан,
Сигир сути ҳозир согилган,
Товуқ гўшти келар кетидан.

Қонли урушларда топилган шуҳрат,
Қотиллик-ла топилган бойлик
Кимга керак, тинчлик чиройлик.

ГАРСИЛАСО ДЕ-ЛА ВЕГА

(1501 ёки 1503–1536)

Испан шоири, ҳарбий амалдор. Толеда саройга яқин бўлган зодагон оиласада туғилган. Карл V хукмронлиги даврида ҳарбий ҳаракатларда иштирок этган, дипломатик вазифаларни бажарган. Унинг ижоди испан шеъриятининг ифтихорига айланниб, мақол ва шиорларга айланган. Адабий мероси унчалик катта бўлмаса-да, жаҳон шеърияти ихлосмандларининг эътиборини қозонган.

ИККИНЧИ ЭЛЕГИЯ

Босконга баҳшида

Дўстим Боскон, зиёрат қил
Дардан элин доҳийсин.
Уларни куйламиши Вергилий.

Боши узра ҳилтирадар
Испан байроғи,
Африка қаҳрамони –
Юртимиз кўз қароги.

Жангда ўзин аямай,
Кўрсатаркан жасорат,
Мукофот истар кўнгил,
Ўлим учун каффорат.

Аммо оқил одамлар
Истамайди урушини.
Тинч меҳнат қилиб улар,
Истар давр сурини.

Аҳли диллар кўзлайди
Фазл-ла камол топишни.
Сира истамас улар
Низо, жсанжсал, қотишни.

Баъзилар бор заҳарда
Яхши кўрсатар ўзин.
Ботинида аксинча
Ўяр дўстларин кўзин.

Мен ўртача йўл тутдим,
Шуҳрат топиб ижоддан,
Зеб-зийнатни унутдим.
Узоқман гирдибоддан.

Баъзилардай кечалар
Висол излаб чопмадим.
Шилқимлик, бузуқликдан
Бирор маза топмадим.

Элегия ёзай деб,
Қайга боилар қаламим?
Ёзганим сатира-ку,
Ё олдимми аламим?

Бўпти, дўстим, энди қайтай,
Мавзумининг бошига.
Маъюс оҳанг ярашиади
Гарсиюса ёшига.

Гоҳо мақтov эшишиб,
Яшайман камтарона.
Сиздай азиз дўстларни
Килиб гоҳо тарона.

Фаришталар безайди
Умрим лаҳзаларини,
Қайгу чарчоқ иўқолар
Ижод боғчаларида.

Илҳом париларига
Дилим очиб яшайман.
Ижоду меҳнат билан
Вақтни ортга ташлайман.

Аммо қалбда оғир дард,
Ватанимдан жудолик
Не-не бойлиқдан аъло
Ўз юртимда гадолик.

Уруши тангриси – Марсга
Кўн ўиллар қилиб хизмат,
Энди барча топганим –
Кувгиндилик ва гурбат.

Жудолик диёрида
Олов куйдирап жиссими.
Тириклиқда кўрмасам,
Ватанга етар иссими.

Бундан кўра яхшийди
Жанг чогида ўлганим.
Кўрмас эди ганимлар
Ўзга юртда сўлганим.

Умидим бор – дўстларга
Узларим айтарман.
Гар ўлмасам, бир куни
Она юртга қайтарман...

МИГЕЛЬ ДЕ СЕРВАНТЕС СААВЕДРА

(1547–1616)

Машхур испан адаби. У Испаниянинг Алькала-де-Энарес шаҳарчасида кўчманчи табиб оиласида туғилган. “Сеҳргарлар мени омаддан жудо қилиши мумкин, аммо улар мени жасорат ва эркдан маҳрум қила олишмайди” – бу сўзлар Сервантеснинг жаҳон адабиётида машхур “Дон Кихот” романидан олинган бўлиб, том маънода муаллифнинг таржима ҳолини англатади. Сервантес аввал Италиядаги яшайди ва ўша ерда 1570 йили ҳарбий хизматга ёлланади. 1580 йили Испанияга қайтиб, ҳаётини янги соҳа – театрда бошқатдан бошлайди.

Сервантес бутун ҳаёти мобайнида шеър ёзган. Аммо у шеърларини насрий асарлари таркибига киритиб, қаҳрамонларига нисбат беради. Фақат XX асрга келиб унинг шоир сифатида ўзига хос овози борлиги кашф этилди.

ИСПАНИЯ НИДОСИ

Эй, озод, тоглардан юксак осмон,
Кўнгилни ёритиб турасан ҳамон,
Испания яшинар меҳринг нуридан,
Халқим севар сени кўнгил тўридан.
Аммо, тингла, турғил қошимда,
Сўйлай, нелар ўтмиши бошимдан.
Қайгуларим айлайин баён,
Тингла мени, ҳамдард, меҳрибон.
Бир замонлар баҳтли эдим мен,
Ҳозир эса аҳволим ёмон.

Үйимга ўт қўйди ганимлар,
Зилзиладан ёрилди бағрим.
Не чандиқлар қолди танимда.
Ёвуз кучлар тилдилар сагрим.
Хоинлар қулликка мени сотдилар,
Гоҳ Юнон, Карфаген ўтга отдилар.
Билмадим, не учун мунчалар сазо,
Эҳтимол, гуноҳим учун бу жасоз.
Сенинг ҳукмингиди бу, эй, осмон,
Ё тақдирда борми шум замон?

Наҳот бегоналар ҳукм этар бунда,
Жабру зулм қилар кундузу тунда.
Наҳотки мусаффо бўлмас осмоним,
Наҳот яна келмас ҳурлик замони?
Қачон эсар бунда баҳтим шамоли,
Байрогим ҳилтирад очиб жамолин?
Ўйлаб кўрсам, ўзимда айб бор,
Ўглонларим севар жсангу жсадални,
Урушларда шуҳрат излайди тақрор,
Аҳилликни билмас, бекарор.

Уларга бегона қардошлиқ руҳи,
Низою жсанжалдан излар шукуҳин.
Фалокатлар қанча келса ҳам боиға,
Бирлашмас, тилаги, мақсади боиқа.
Ганимларга қўл келар бу ҳол,
Ўзаро низолар қилар бемажол.
Барбарлар гурилла бирар бемалол,
Юртда ҳамжисуҳатлик бўлмаса доим,
Юртни ҳам, халқни ҳам севмас худойим.

ЛУИС ДЕ ГОНГОРА

(1561–1627)

Рус тилидан
Омон МУХТОР таржимаси

Мумтоз испан шеърияти намояндаси. У зодағон оилада түғилиб, асосан, фан ва дин аҳли даврасио салтанат доирасида ҳаёт кечирганига қарамай, доим оддий одамлар орасида бўлгани, камтар, хокисор яшагани илми адабиётларда таъкидланади. Гонгора шеърияти унинг ҳаёттлик даврида ёқ катта шуҳрат қозонган. Унга бағишлиб китоблар ёзилган, рассомлар унинг тасвирини ўз асарларида муҳрлаб қолдиргандар. Гонгора шеърларида тафаккур кенглиги ва манзаралар тиниқлигини Гарсия Лорка ҳам таъкидлаган.

Гонгора Farbga ҳам, Шарққа ҳам бирдек чексиз ҳурмат билан қарайди. Ҳикоятларга ўхшаши асарларини шоирнинг ўзи романтик руҳда, испан халқ кўшиқларига суюниб ёзгани учун романслар деб атайди.

СЕВГИ ЕРУ КЎКДА БЎЛГАН МУНОЖОТ

Ўтиб-ўтмай шўх-шиодон
Тўй-томуша, онажон,
Шуми дунёда шева?
Қолдим ёшгина бева.
Қандай қилмайин, ахир,

Кўзёшимни шашиқатор? –
Ичган май бўлиб тахир,
Аскарликка кетса ёр.
Кўйинг, борай қирғоқча,
Дардларимни ювмоқча!

Нега кўндинг мен шўрлик,
Керакмиди шу никоҳ? –
Бир дам баҳтдан масрурлик,
Сўнг ийлда қазилган чоҳ.
Қайсиdir олис ерда
Сенга келса ўлим гар –
Билгин, мени ҳам бирга
Кўмган каби бўлурлар.
Қўйинг, борай қирғоққа,
Дардларимни ювмоққа!

Сени этмоқни ҳалок,
Аниқ, истайди ганим.
Кўксим қанча қилмай чоқ,
Музга айланган таним.
Гарчи ёргадир олам,
Дилда сўнди бутун нур.
Бу не ҳасрат? Не алам? –
Қўзларимни куйдиур.
Қўйинг, борай қирғоққа,
Дардларимни ювмоққа!

Қўйинг! Дарё бўйида
Таралсин ўтли оҳим.
Ёнганим ишқ кўйида –
Шудир фақат гуноҳим.
Оқизмай қанча кўзёш,
Узилдим қора қундан.
Кўксимда оғир бир тоши,
Қутулмоқ мушкул ундан.
Қўйинг, борай қирғоққа,
Дардларимни ювмоққа!

Менинг ўрнимда ким у
Чекмасди мендек нола?
Юрибман баъзан жим-у,
Дардим кўкка ҳавола.
Қалби бўлган ҳар бир жон
Сезса, титрап зоримдан.
Айрилдим-ку, онажон,
Мен ўз навбаҳоримдан.
Қўйинг, борай қирғоққа,
Дардларимни ювмоққа!

Биз ухламай гоҳи тун,
Исиниб қалб қўрида –
Эслайман – кўздан учқун
Сочардик ой нурида.
Шу баҳт косаси синди,
Энди ой зор, мен ҳам зор.
Кўрпа-тўшагим энди
Ерда ётган қалин қор.
Қўйинг, борай қирғоққа,
Дардларимни ювмоққа!

* * *

Ўз қавмининг пешвоси ҳабаши,
У – жангларда билмай хавотир
Қилич сермаб елган баҳодир,
Керак пайтда мулоийим, дилкаши.
Ҳар қадамда қулми, хўжами –
Унга шундан берар эътибор.
Тўлдиради одам кўчани,
Ў ўтганда кўчадан кибор.
Билгани ор, шараф ва амир,
Ҳарбда келган нақдинадан бот
Масжидларни тиклаган бу зот,
Барча ишида излайди замир.
Унинг баъзан иродасидан
Гарчи ёвлар қучганлар зиндан –
Бирор чиқиб эл орасидан
Пичоқ қайраб юрмаган тинҳон.
У испанлар тортганда қўшин,

Қайтарган ҳам қонли босқиндан...
Фақат билмас амир хоҳишин,
Амир қандай хаёлга минганд.
Ўйламас у, қилмас тасаввур
Тайёрланган не жазо унга.
Юрт эгаси даргазаб бир қур –
Хукм қилар уни сургунга.
Не гуноҳи хизматда юрган
Мард-валломат Абусалимнинг?
Севмоқликни у раво кўрган
Амирга ҳам ёқкан санамни.
Мавританлик ўша, юзи ол –
Гул отади гоҳ шом, гоҳ саҳар.
Йигит учун кулгилари бол,
Амир учун гўёки заҳар.
Аламзада ҳукмдор учун
Қилган каби йигит хиёнат.

Абусалим бўлсин деб дилхун,
Асли рашиқдан бутун қиёмат.
Мана, йигит ноилож, қара,
Энди ғурбат йўлида борар.
Келиб тўхтаб, Гвадалквивара¹
Суви билан отин сугорар.
Ёлларида қўнгироқчалар,
Мана, тақиб гўё зар қанот –
Алланечук бетоқатланар
Ва депсинар соҳилдаги от.
Худди рақсга тушар жонивор,
Бир сўз билан талпинган йўлга.
Чавандоз ҳам тўкканча виқор,
Энди олар тизгинни қўлга.
Елқадаги ёпқичи ҳарир,
Нақшларида арабий ёзув:
“Биз кирган йўл бир умр ҳарбодир,
Кўзёшлиарни оқизмаймиз дув!”
Эгнидаги ёпқич ва чакмон
Ҳилтирайди елларда хур-хур.
Гарчи руҳи шикаста, бежсон,
Кўзларида ўлмаган еурур.
У ҳис этар, келмас қуролдан,
Шижкоатдан галаба... Тақдир –
Камарига аммо тақилган
Толедода ясалган шамишир.
Оқ пар унинг дубулгасида,
Бошин дадил кўтарган жўмард –
Қалби қолиб ўз ўлкасида,
Туйса ҳамки баёнсиз бир дард.
Ўз юртига бир кун, эҳтимол,
Қайтиб келар умид отида.
Ёри билан гарчи йўқ висол,

Шу ўй тураг унинг ёдида.
Мармолехо, Архондан² ўтар,
Теграсида тоғлар ва қирлар.
Уни қатор шаҳарлар кутар,
Унинг қавми бўлган фақирлар.
Кўришиб бир, хайрлашарлар
Зодагонлар, беклар ҳам саф-саф.
Дарчалардан гўзал аёллар
Кўз ташлашиб қўяр у тараф.
Ўлар олар кўзларига ёши,
Йигит учун чекиб надомат –
Етармикан йигитда бардош,
Гарибликда чўкмасми қомат?
Қайлиги-чи, Абусалимнинг
Кўйдиргандан айрилиқ доги –
Ерга уриб тарс-тарс қўлини,
Қонар унинг ҳар бир бармоғи.
Эшишилса кўчадан бир сас,
Чопар дарча олдига дарҳол.
Афсус, унинг кутгани эмас,
Мадаҳ берар биргина хаёл:
“Баҳодирим! Тилиб кўксимни,
Гарчи томар кўздан ёши ирик –
Унумтмайман, билгинки, сени,
То дунёда эканман тирик!”
“Муҳаббатим! Қолмагин толиб,
Дер хаёлан унга йигит ҳам. –
Ҳеч пайт келмас юракдан голиб
На бу ҳижрон, на зулму ситам!” –
Ўз-ўзича шивирлаб шундай,
Қалбида бир дунё галаён –
Унинг руҳи ёришиб кундай,
Мана, борар Андуҳар³ томон.

* * *

Умидим сўнганида, кўриниб тиниқ осмон –
Зил қонқа очилганча, мен тирилдим ногаҳон.

Арзир кўк гумбазига чизсам энди нақшу зар –
Тұтқун әдим, узилди устимдаги кишинлар.

Агар қуёши нуридан бошдан тегса бир парча –
Қонқага тикилмасдан, ўзим очардим дарча.

Топиб мўъжаз бир қайиқ, келтирганча қирғоқча –
Бандиликдан қутулиб, қочар әдим йироққа.

Лекин мен мингган қайиқ синган эди бошданоқ –
Кун кўрмаслик насибам, бўлгандан қуруқ таёқ.

¹ Гвадалквивара – Испания Жанубидаги дарё.

² Мармолехо, Архон – Жанубий Америкадаги тоғлар.

³ Андуҳар – Испаниядаги шаҳар.

*Мен барибир, ҳаётни севгандан тушмадим паст,
Бир күн илоҳа Амур қилганда ҳам менга қасд.*

*Ўша болакай узди қўксимга камондан ўқ –
Бахтим аравасида борар эдим, дардим йўқ.*

*Юракда пуч орзулар, умиддан терс бир ҳолат:
Дўзах аро роҳату жсаннат аро малолат.*

*Қанча талпинса арзир чиндан ҳам, сенга, осмон,
Ерда сенинг нурингдан баҳра топар ҳар бир жон.*

*Сенда ёнган буюк шам айтар тангрига сано –
Оlam тўла мушк-анбар, гарчи қисматдир фано.*

*Биласизми, менга ким дарсин берди ўйлашининг? –
Дея, ҳозир даврими бор рост гапни сўйлашининг.*

*Бу – сен эдинг, сенъора, менга шафқатсиз санам –
Лекин менинг руҳим – у, менинг яйраган танам.*

*Бир дам бериб эътибор, тинглагин, нозик малак,
Топган телба феълимдан менинг ўзим ҳам ҳалак.*

*Гоҳида ҳатто итинг мени бир тўнками, деб –
Усти-бошимни бутун ғажиб ташлар, бериб “зеб”.*

*Ҳар гал айланиб чиқиб теграмда хотинталоқ –
Кейин, шиин биткариб, отиб қолар шаталоқ.*

*Неча бора оқшомлар ҳасратдан тугаб бардои –
Шудгор қилиб кўчангни, териб чиқдим майдад тоши –*

*Кўриб боқишинг бир қур дарчангга тошлар отиб –
Умиддан саҳаргача қолдим кўчада қотиб.*

*Неча кунлар дардингда яшадим ютганча қон –
Бундоқ ўз хизматимга ўзим ҳам қолиб ҳайрон.*

*Овора-сарсонлигим баъзан тегди жонимга,
Озиб, ёпишиб кетди этим устиконимга.*

*Неча муддат шу тахлит мен юрдим гариб ва хор –
Ўз-ўзига бепарво, ўз-ўзига гамгусор.*

*Қўлим чарчаб-толгунча, қоралаб сонсиз бетлар –
Кейин тўёкиб ташладим сен ҳақингда сонетлар.*

*Телба алжирашлардан бари эди иборат –
Сени кулдирди, холос, мен қурган бу иморат.*

*Не ёзсан, рост деб билдим, сен-чи, хушрўй, хушқомат, –
Барисини атадинг бирорларга хушомад.*

*Кеч тун чалиб гитара, мен ҳайқирдим неча бор:
– Қултум сув бер, сеньора, юрак куймоқда, нигор.*

*Лекин боқмай ҳолимга, менга құлмадинг шафқат, –
Устимга бир чөлак сув сепди қүшнилар фақат...*

*Хайр энди, барибир меҳрибонсан сен, дилдор, –
Ёзда қүёшиңинг тафти, қишида илинганиң қор.*

*Барибир, раҳмат, менга сен ўргатдинг күп бора:
Ҳар бир телба ўзи излашни чора.*

* * *

*Барбарлардан¹ жанғда тортиб олинган,
Кенг бир ўтлоқзорға ҳайдаб солинган,
Қон юққан, топталиб қолган ўтлардан
Хұрксиниб чекинган
Учқур отлардан –
Оранлик² бирини шошмасдан танлар.
Испан саркардаси сүмбатни англар, –
Билар от баҳосин гижинглашидан,
Қулогини динг этиб сүз тинглашидан.
Ниҳоят, минар у шу учқур отга,
Кейин, қарагандек ўлжаса жонзотга –
Ғаним саркардасин олар ортмоқлад,
Йұлға тушиб кетар отига бөглад.
Энди йүлда борар чиқарыб қанот –
Сокин далаларни құмсаң қолган от.
Гоҳ-гоҳ ерга құниб сапчиган учун
Отнинг түёғидан сачрайди учқун.
Қора танли асир хұрсынар ҳар дам,
Қунишиб олган у, унинг боши ҳам.
Бир маҳал ўзининг ҳолидан огоҳ
Бўлгандек ахийри, ийглар баногоҳ.
Сал паришион боқар асирга испан
Бир оз нокулайлик түйғандек ҳисдан.
Наҳот, жанғда шердек ташланган ҳабаш
Турад ожизлиқда қўрқув аралаш?
Истаб кўтармоқни бу ҳолдан парда,
Мағлуб саркардадан голиб саркарда –
Сўради: сабаб не бундай бебардош,
Ғўр бола сингари тўқмоққа кўзёш?
Шунда, берилмасдан жаҳл-зардага,
Бағрикенг сүз қотган бир саркардага –
Иккинчи саркарда иқрорга борди,
Қалбида беркингандардини ёрди:
– Сен бўлмай фақатки қудратли ҳарбий,
Кўксингда бор экан юракнинг зарби.*

¹ Барбар – варвар, ёввойи.

² Оран – Жазоирдаги порт-шаҳар.

Мени икки қатла айладинг асир,
 Жангда – бир, одамлик жабхасида – бир.
 Менинг дардларимни билмоқ истайсан,
 Балки қистамайсан, балки қистайсан.
 Шу он дунё кўзга бўлса ҳамки тор,
 Мен бутун ҳолатни қиласман изҳор.
 Тугилдим Гельнахда, бамисоли сел
 Босқинга ўшандада учраганди эл.
 Онам олиб кетди Тременон томон.
 Отам ўлган экан – онам гапидан –
 У корсарлар аро бўлган капитан.
 Мелиондан келган оила билан
 Кўп пайт қўшини турдик биз тасодифан.
 Улар мавританик боёнлар қавми,
 Қизи бор, эслатар худди оловни.
 Ёшлидан эркимга бўлди кушандада,
 У малика эди, мен гарид бандада.
 У бир саҳро қизи, саҳрода илон
 Заҳар тўплаб юриб, олган каби жон.
 Шундай гўзал эди ва лекин у қиз,

Нурдан яралгандек покиза, нафис.
 Гуллар раиш этгудек чехраси гулгун,
 Ўялиб туради қарисида кун.
 Соchlари мавжидан дарё хижсолат,
 Қошу кипригиди тун каби ҳолат.
 Унга қарасанг, бас, қамашарди кўз,
 Бир нима дейшига топилмасди сўз.
 Биз ёнма-ён ўсдик ўша илк ёшидан,
 Амур қалбимизга ўқ отди бошдан.
 Эски достонларга ўхшии жойи ўйқ –
 Бизга таъсири қилди икки хилда ўқ.
 Ўқ менинг кўксимни айлади пора,
 Гўё бир шоҳ эдим, бўлдим бечора.
 У қиз-чи, кундан кун бедард, бепарво,
 Қайрилиб қарашини кўрмади рало.
 Ҳеч билиб бўлмасди кўнглида не бор,

Босган қадамимда – тиклагани дор.
 Бумайли, қанчага сенда бор бардош,
 Дегандек мен томон отар эди тоши.
 Алқисса, яқинда у юмишаб бир оз,
 Сен асирим, деди қилганича ноз.
 Мен бу кун енгилиб, сенгаман асир!
 У менинг устимдан кулмасми, ахири?
 Бутун воқеа шу, тўғриси, жаноб,
 Дунёда кимса йўқ менчалик хароб.
 Икки асирликнинг ўртасида фарқ
 Қидириб, бўлдим мен изтиробга гарқ...
 Бу дил изҳоридан испан қолди лол,
 Жисмини чулгади ширин бир хаёл –
 Қанийди, шу йигит сингари содда
 Ҳар ким устун кўрса ишқни дунёда.
 Тортуб от жиловин, деди:

– Эй ҳабаши!
 Сен шу дам эслаган тенги ўйқ маҳваш
 Чиндан этган бўлса юрагингни ром,
 Қолган даъволарнинг барчаси ҳаром.
 Севги еру кўкда бўлган муножсот,
 Аммо ҳар ким олмас бундай мукофот.
 Тангрим сенга бермии ҳайбатингга мос
 Катта бир юракда катта эҳтирос.
 Тангрим сенга бермии боз қилсан нақл,
 Эҳтиросдан бўлак муносиб ажл.
 Яралаган экан кўксингни Амур,
 Боргин, ёр олдида асирликда тур.
 Мен-чи, ёт қўшикни қўйибман куйлаб,

Бирорнинг асирин менини ўйлаб.
 Кўлимдан келгани – сенга эрк сийлов,
 Сен учун талаб ҳам қўлмайман тўлов.
 Менга керак эмас бирон сийму зар,
 Етар бўлмаганим менинг ишиқбузар!
 Бундан сўнг тутганда ишиқни муқаддас,
 Ҳар қачон мени ҳам эслайсан, иш бас! –
 Шундай деб сакради саркарда отдан,
 Асирин туширди “учқур қанот”дан.
 Тирик сўз, бор ҳолат этганча таъсир,

Унинг оёғига йиқилди асир.
 Деди:
 – Ҳаётда кам сендеқ валломат,
 Сенга йўлиқканим мен учун омад.
 Қалбим ва хурматим бўлсин сенга бојж,
 Ҳеч пайт менга ўхшаб қолма ноилож –
 Доим сенга бўлсин ҳаётда паноҳ –
 Менинг сизинганим Ягона Оллоҳ.
 Ёмғир ёққандада ҳам, ёққандада ҳам қор –
 Эзгу амалларинг бўлсин давомдор!

ХУАН РАМОН ХИМЕНЕС

(1881–1956)

Рус тилидан
 Ўқтамой ХОЛДОРОВА
 таржимаси

Атоқли испан шоири, Нобель мукофоти совриндори (1956). Могер шаҳарчасида ўзиға тўқ банкир оиласида туғилган. Севилья университетининг юридик факультетига ўқишига киради, бироқ бу соҳада ўқиши унга ёқмайди. У бўши вактларини расм чизиш, немис, француз, испан романтик шеърияти вакилларининг асарларини ўқиши билан ўтказар ва ўзи ҳам шеър ёзишини бошлаганди. Шеърлари илк бор испан журналида нашр этилганида Хуан 16 ёшда эди. 19 ёшида унинг “Настарин қалби” ва “Нимфиялар” номли китоблари чоп этилди. 1900 ишли Хименес модернист шоир Рубен Дарио билан танишади. “Бу учрашув менинг ҳаётимда унумилмас ва муҳим босқичга айланди”, деб ёзади шоир. Унинг “Сатрларим” (1902), “Ғамгин оҳанглар” (1903), “Олисдаги боғлар” (1904), “Чўпон кўшиғи” (1905), “Кўклам наволари” (1910), “Мунгли кўшиқлар” (1908–1910), “Дилгириллик” (1912) ва бошқа китоблари эълон қилинган.

Хименес она тилининг фусункорлигини чуқур ҳис қилган ижодкор. Унинг шеърларида сўз, оҳанг ва тасвирлар бир-бири билан чамбарчас боғланган... Бу унинг ёшлигида тасвирий санъат билан шуғулланиб, мойбўёқда суратлар ишлаганидан бўлса керак.

* * *

У оқиомнинг шамоли
 ишиқни учириб елди...
 Полъ Верлен

Куз оқиомин шамоли эсди,
 Олтин япроқ узилди қанча.
 Бунча гамгин дарахтлар тунда,
 Бўнча узоқ чўзилди кеча.
 Кўкда хира сариқ ой аста
 Сузар туннинг қора йўлида.
 Кўз ёши йўқ, йўқдир бўса ҳам
 Унинг сўнаётган нурида.

Дарахтларга оҳиста айтгум
 Тилло япроқлар-чун йиғламанг,
 Кўклам келса яшилланасиз,
 Шоҳда гарчи буткул ёқилсанг.
 Дарахтзорлар гамгин, жисм турар
 Хазонларга тутгандай мотам.
 Олтин япроқлар-чун йиғламанг,
 Хазон бўлар яшил япроқ ҳам.

* * *

Январнинг дам олии оқшоми
Бирор жонзот кўринмас уйда.
Яшил саргии товланиб қуёши
Деразамдан оқиб киради
Хонамга,
Гулларимга
Ва томади томчи нур бўлиб.

Сўриб олинган гамгин ҳаво
Зерикарли, чўзилган Вақтда.
Қотган очиқ саҳифаларда.
Бўшаган уй, оёқ учидা
Кўнглим бораар аста чайқалиб
Тушаётган нон ушогини
Нигоҳ ташлаб кўраман кафтда.

КУЗ ҚЎШИФИ

Кун ботарга кетар турналар
Улар учиб бораар... Қаёққа?
Заррин барглар олиб кетаётган
Кўмуши дарё оқар... Қай ёққа?
Кетгум олтин ангиззор бўйлаб
Кетаману билмам қаёнга?
Йўл бўлсин, эй, олтин куз – сулув,
Йўл бўлсин, эй, сизга, кўмуши сув.

* * *

Умид ўзингники, ўхшашибир
ялтираган зебу зийнатга,
юраклардан худди гилофдай
авайлааб тортаман узлатга;

ва у билан сайр этгум бодга,
ардоқлайман худди қизимдай,
эркалайман келинчак каби
боз қолдиргум ёлғиз бутунлай.

* * *

Фақат гул бўлмоқни қилгумдир ҳавас,
Фақат юлдуз бўлсам, бошқа ҳеч не, бас.
Лекин бу мўъжиса насиб этар кимга,
Қарайман, тирқишидан кўринар менга.

ЛУИС ГАРСИЯ МОНТЕРО

(1958 йил туғилган)

Испан тилидан
Зиёдулло ЖОНИҚУЛОВ
таржимаси

Замонавий испан шеъриятининг таниқли вакили. Гранада шаҳрида туғилган. Гранада университети Испан филологияси кафедрасининг катта ўқитувчиси. У Федерико Гарсиа Лорка номидаги мукофот, Севилья шаҳри мукофоти, 1982 иили “Хорижлик боғбон” шеъри туфайли қўлга киритган Адонаэ мукофоти, Гранада олтин медали, Сервантес номидаги мукофот ва бошқаларга сазовор бўлган.

МАТЬЮС ҚҮШИК

Уч ийл ўтди, юзида ҳамон
 Тонг саҳардан узилган калом.
 Юрагингни парчалар мудом –
 Коронгилик ҳар ённи босар.
 Йўлакларда зимиштон, қаранг,
 Елкам узра эшикни қоқар.
 Юрагингни парчалаб шу дам,
 Судраб кетар зулмат қаърига.
 Музлаб кетган эҳтирос мудом
 Танҳо турар сўзлар ортида.
 Одимлар у оҳиста, сокин,
 Қайгу олар ўз қаърига жим.
 Кулбам сари бир кетар шарпа,
 Маъюс қуйни эслатар, у ким...
 Кўча узра сунъий нур балқар,
 Учта кема лангарин ташлар.
 Ёнимда ногаҳон ўшал нур ўтар,
 Бамисли зарб уриб эшикагин эшар.

МЕНИ ТАЪҚИБ ҚИЛАР...

Таъқиб қилар мени тинмасдан,
 Фарнотанинг қўнгироқлари.
 Толиқсам гар сени излашдан,
 Далда берар кенг кўчалари.

Қамраб олар момоқалдироқ,
 Денгиз ичра тин олар тўлқин.
 Сукунатга чўмса-да, бироқ,
 Тошиб борар унда ҳансираш.

Боғлар мункиб чиқарар ҳордиқ,
 Ёз ҳам эшик қоқиб тинмайди.
 Аста-секин кичраяр борлиқ,
 Мен уларда яшайман аммо.

Бўса истаб севишган диллар,
 Кўзларимга ташлар нигоҳин.
 Ҳавотирдан юрагим гуллар,
 Безовта қалб ёришар тинсиз.

Сокин шаҳар хаёлга чўмиб,
 Күшларига қараб яйрайди.
 Бизни бу чарх сирларга кўмиб,
 Наҳот яна имдод истайди.



САРХАДЛАР

*Роман очколар билан ютса,
ҳикоя нокаутлар билан голиб келади.
Роберто Арльт*

ШАРАФЛИ БУРЧ

Испан ёзуечиси Шоан Игнасио Тайбонинг журнал саҳифасида бериладётган ҳикояси – “Одамлар, кимсиз ўзи?” дельфин боласи ҳақида. Тўгрисину айтсан, уни 1985 йили таржима қилгандим. Ўша пайтда мен ҳикояни қай тарзда тушунганин, фикр-мулоҳазаларим қанчалик асосли ва холисанилло эди, эсимда йўқ, лекин бугун уриниб кўрмоқчиманки, зора, жўяли гап айтиб, ўқувчини ўзимга ҳамфирқ қилолсам, нозикфаҳм, зукко адабиёт мухлисининг эътиборини қозонолсам.

Ҳикоя дельфинча, унинг Фуко деган бола билан дўст тутингани, унинг ҳикоялари орқали инсон ҳаётидан боҳабар бўлиши ва ниҳоят, одамзод билан дельфинлар ўртасида тасаввур қилиб бўлмас фарқ мавжудлиги, буни енгизнинг сира иложи ўқлиги – бундай оғир қисматдан ҳеч қачон қутуполмаслигини сезиб қолгач, ҳамма нарсадан кўнгли совиб, олисларга бош олиб кетиши ҳақида. Бу мажозий ҳикоя. Лекин ҳар қандай бадиий асар нима ҳақда бўлиши ва қандай услугуда ёзилганидан қатъий назар, ўқувчини бефарқ қолдирмадими, уни ўйга толдира олдими бас, у яшашга лойик, бинобарин, у ҳақиқий адабиёт маҳсулси сифатида эътироф этилиши шарт. Адабий асарга ҳаётда бундай бўлмайди, деган мезонлар билан қарааш нотўғри ва хатодир. Унда одамга адабиёт нима қилиб берарди, ундан кўра фойдалироқ ишлар билан шуғулланган маъкул, қабилида фикр юритадиган манфаатпараст, чўнтағиу нафсидан бошқа нарсани билмайдиган ва тан олмайдиган, тор фикрли, чекланган кишига айланаб қолади.

Мазкур ҳикоя мажозий ёзилгани билан унинг рамзий маъноси теран ва биз кутгандан кўра ҳаққонийдир. Инсон ҳаёт ўйлида адолат ва тўғрилик, муруват ва беозорлик билан зулм ва адоват, фаҳш ва зўравонлик, тубанлик ва разилликни енга опса, бу ҳаёт бани башар орзу қилган – эзгулик ўйли бўлади. Одамзодни порлоқ келажакка ана ўша эзгулик ўйли элтади. Тарихда алломалар буни ҳидоят ўйли, деб таърифлашган. Дунёда дарахтлар, жониворлар, паррандалар зуғумдан йирок, табиат уларни онгли қилиб яратмаган, шунинг учун улар ўз қилмишларига масъуль эмасдирлар, улар табиат ҳукмига имтоат этиб яшайдилар ва бу йўлдан оғишмайдилар. Инсон-чи? У ҳар бир қилмишига жаевобгар, чунки у ақл-идрок соҳиби қилиб яратилган. Агар у тўғри йўл қолиб, шунчалик қўдратли неъмат – ақл-идрок билан ҳам инсонийлик ман этган, инсоф ва диёнатдан воз кечиб разолатга юз тутса, нафсишинг кулига айланса, у энди одамгарчиликдан чиқкан бўлади. “Одамлар, кимсиз ўзи?” ҳикоясида дельфин боласи яқин дўсти Фуқодан эшиштган гапларни сира ҳазм қилолмайди: уларнинг (одамларнинг) тонг саҳардан ярим кечага қадар ишлапшлари бойлик орттираман, деб ҳаётларини хавф остига қўйишлари, фаровон яшаш ва муҳтожликтан халос бўлиши учун ўзларини ўққа-чўққа уришлари дельфин боласини ларзага солади. Бу инсон ҳаётининг бир парчаси, майли, бусиз иложи йўқ. “... Дельфинча Фуқодан сўради ва йиглаб юборди, вахоланки, дельфинлар одатда йиғламас

эдилар: Биз ахир дўстмиз-ку, нега ахир сен ўзинг яшаётган қишлоқни, мана шу кўрфазни, мени яхши кўра туриб ташлаб кетмоқчи бўляяпсан? Нега, нима учун?” Лекин содда дельфиннинг бу саволларига Фуко тугул, каттаталар ҳам жавоб беролмайди. Фуконинг ўртаниб берган жавоби эса, шунчаки дийдиёдек туюлади. У: “...Бизнинг кўрфазда балиқ қолмади, одамлар сувени заҳарлашди, булғашди, балиқлар қирилди ёки олисларга кетиб қолди, балиқчилар кун кўра олмаяпти. Бу ерда қолсанг, сен ҳам ҳалок бўласан” – дейди.

Дельфин буларни эшишиб дөвдираб қолади. Нафакат у, бошқа жониворларга акл, забон берилса, улар ҳам шу кўйга тушар эдилар. Фақат инсон бундай ҳолга тушмайди. У дөвдирамасдан, ҳар бир ишини билиб, онгли равишда амалга оширади. Бутунлай бошқа мақсадда берилган акл-идрок уни ёвузликдан, мисли кўрилмаган манфур ишлардан сақлашга қодир эмас. Иккита одамнинг ўртасидаги ноиттифоқлик, иззат-нафс туфайли туғилган адоват ўз йўлига. Лекин бугунги кунда ер юзида тинмаётган хунрезликлар-чи, ким қиласяпти бундай ишларни? Ёки ўша қонхўр бўрилар, одамхўр тимсоҳларми? Дельфинни қийнаган жамики саволларнинг замонида мана шундай тушунчалар ётади. Ёки тушунарлироқ айтадиган бўлсак, дельфин боласининг оддийгина саволлари шу оламшумул азобли муаммоларга олиб боради. Ҳикоя якунида дельфиннинг ноласи дунёда инсон нималарга маҳкум экани, бу “нималар” инсониятни фожиага элитишининг башорати сифатида янграйди: “Одамлар бизларга мутлақо ўхшамас экан. Сизлар ваҳший экансиз, сизларга заррача зиёни етмаган бўлса ҳам балиқларни ўлдирасиз, сувларни заҳарлайсиз, ер юзида ҳаёт чашмаларини қуритасиз. Ўзгаларни яксон қилиш, қиши, ўлдиришига шароит яратасиз, йўл қуясиз!”

Ҳикоя ёзилганига 40 йилча бўлди.

Бу гапларни бугун мактаб ўқувчиси ҳам билади. Бироқ буни билишдан нима фойда? Ёки инсоннинг келажаги ҳақида қайгуриш керак эмасми, фойдаси бўлмаса?! Ёзувчи ҳаётдаги бунақа муаммоларни ҳал қилиб бериши шарт эмас, илло, ҳал қила олмайди ҳам, қолаверса, бундай вазифани у ўз уҳдасига олмаган. Унинг юксак бурчи, мақсади бутунлай бошқа. Игнасио Тайбо адабиётнинг атомдан кучли эканини билади. Айни чоғда дунёни адабий асарлар билан ўзгартириб бўлмаслигини ҳам тушунади. Зоро, мана шу билим ва тушуниш уни “Одамлар, кимсиз ўзи?” деган ҳикояни ёзишга мажбур қилган. Бу зарбулмасал эмас, реалистик ҳикоя, фақат воқеалар, ҳикоя қаҳрамонлари ҳаётдан олинмаган. У ёзувчининг кўнглидаги воқелик маҳсулни.

Испан ёзувчиси Хуан Бенетнинг асарлари тили, қаламга олинган воқеаларнинг ғайритабиилиги, фалсафаси, мақсади ҳеч қайси бир ёзуечи асарига ўхшамайди. Мигель Делибес, Камило Хосе Села, Сото Висенте, Гарсия Павон сингари адаблар бир замонда яшагани билан ижодий ўйналишлари, услублари ўртасида катта фарқ бор. Лекин бундай ижодий ранг-баранглилар бир-бираига ҳалал бермайди. Аксинча, шу сабабли испан адабиётини турфа хил мевали дараҳтлардан ҳосил бўлган боққа мензазаш мумкин. Мана, Хуан Бенетнинг “Райхенау” ҳикояси. У ёзувчининг ўзига хос услуги, ижод йўли ва диапазонини белгилашга бемалол хизмат қила олади.

Умуман олганда, Хуан Бенетнинг ҳикоялари эътирозга ўрин қолдирмайдиган даражада бадиий ўзига хослиги билан китобхон ёътиборини жалб этади. Унинг ўтган асрнинг иккичи яримида адабиётга кириб келиши мунакқидлар томонидан “неоавангардизмнинг бостириб қириши” сифатида баҳоланган эди. Бир қарагандан ёзувчи учун нима ҳикоя қилингани эмас, қандай ҳикоя қилингани мухимроқдек туюлади. Унинг асарларида қаҳрамонлар, персонажлар тили алоҳида ажратиб турмайди: қаҳрамонлар тили билан муаллиф тили бир хил. Жумлалар узун ва чалкаш, бири-бираига қоришиб кетганилигидан ажратиш қийин оҳанглар, изоҳлар, кўшимча тушунтиришлар, аллақайси китоблардан олинган образли ифодалар узук-юлук туюлади ва шу туфайли нореалга ўхшайди. Гўё гапираётган одам асосий фикр, мақсадни унумтиб кўйгандек, адашиб кетгандек... Ўз ҳолича шунинг тагиага етмоқчи бўлади-ю, бироқ ожизлик қилади, қурби етмайди. Хуан Бенет романлари ва ҳикояларида хавотири, сиқилиш ва нималарни дидир қўмсаши оҳанглари кучли, буларни у мутлақо адабий тил воситасида ҳосил қиласи.

Ўша роман ва ҳикояларда воқеалар гўё икнр-чикиригача акс эттирилаёт-гандек, шу билан бирга улар мужмал ва мавхум бўлади. Аслида ўқувчи нима

бўлганини, нега шундай бўлганини билолмайди ёки шу хусусда аниқ бир фикрга келолмайди ёки турлича хулосалар чиқаради.

Хуан Бенетнинг изланишлари ўтган асрнинг 60–70-йилларида Испания адабиётидаги ўзгаришлар билан боғлиқ.

“Райхенау” ҳикояси қаҳрамонининг қиёфаси ҳам йўқ, биз кўниккан тарздаги “типик”лиги ҳам кўринмайди. Бир одам кечаси ўйлдан адашиб ташландиқ карвонсаройда тунаб қолади. Туни билан еахима босади, хотиржам ухломайди. Ҳар хил товушлар туфайли дилида иштибоҳ, хавотир ва қўрқув уйғонади, бироқ ўша карвонсарой хўжайинининг уқтирган гапларига қулоқ солмайди, яъни ёрдамга чақирмайди. Ўша пайтда у ёш, сергайрат, келажакка ишонч ва умид билан боқарди. Орадан кўп ишлар ўтади. Ўша кимса яна шундай вазиятга тушади. У энди сармоядор, ёши улуғ, орзулари рӯёбга чиқкан – лекин юрагида илгаригуғайрат-шижоатдан асар йўқ – у қўрқоққа айланган, ўзлигини ўйқотган. Ёшлидаги ғурур-шижоати қани, қаерга кетди? Одам икрор бўлмаса ҳам ўзини ўзи алдаётмайди. Инсон табиатига хос ножоиз хусусиятлар мардлик, сабр-бардош, жўшқинликдан устун келдими, тамом, ҳикоя қаҳрамонининг аҳволига тушиси мукаррар. Ўзи буни сезадими-сезмайдими, фарқи йўқ, турмуш уринишлари, мол-дунёга ҳирс қўйиш оқибатида шу кўйга тушади, ҳаёт учун кураш, оғирчилликларни енгисига юрагида заррача куч тополмайди. Ёзувчининг бизга айтмоқчи бўлган гапи, менимча, шундай.

Хуан Бенет ҳамда бошқа испан ёзувчиларининг асарлари ўзбек тилида илк бор эълон қилиниши хайрли ишларнинг давом этаётганидан далолатдир.

Таржимондан

Шоан Игнасио ТАЙБО

(1949 йили туғилган)

Испан ёзувчиси Шоан Игнасио Тайбо Мадридда таваллуд топган. Унинг аждодлари мамлакатнинг шимоли-гарбидаги Галисия вилоятидан пойтахтга кўчиб келишганди. Адаб Мадриддаги Комплутенсе университетидаги жамиятшунослик йўналишида таҳсилини якунлагач, 1976 йили Галисияга қайтиб журналистика соҳасида фаолият юрита бошлайди. 1975 йилдан Тайбонинг галисия лаҳжасида ёзилган бир қатор китоблари чоп этилган. Адабнинг ҳукмингизга ҳавола этилаётган “Одамлар, кимсиз ўзи?” ҳикояси 1981 йили ёзилган.

ОДАМЛАР, КИМСИЗ ЎЗИ?

Ҳикоя

I

*Рус тилидан
Олим ОТАХОН таржимаси*

У ҳали кичкина пайтларидаёт, отаси одамларга яқин борма, гарчи денгизда тириклик қиласидаганлар унчалик бадкирдор бўлишмаса ҳам, бекордан-бекорга тош ёки калтак билан уриб дилингни сиёҳ қилиб қўйишлари мумкин, деб тайинлаган, бироқ дельфин боласи унда ҳали жуда мурғак, бунинг устига гапиришни ҳам билмас, шу боис бу билан отаси нима демоқчи бўлаётганини тушунмаган эди.

Орадан ийллар ўтди. Ўша пайтларда улар суви мусаффо, ҳароратли ва сокин кўрфазда яшашар, у ерда балиқ мўл-кўл бўлиб, ҳаммаларига етиб

ортар, бинобарин, дельфинлар қорин ташвишидан бутунлай фориғ эдилар.

Ўзига айтилган гапни ҳали тушунмаса ҳам, лекин сузишга келганда дельфинчага етадигани йўқ эди, у шунчалар моҳирона сузар эдики, гарчи очик денгизга чиқмаса ҳам бир ўзи қўрфазда эмин-эркин сузib юра оларди. У атрофидаги мавжуд оламни билишга қизиқар, ҳамма нарсадан бохабар бўлишни истар, паррандалар, одамлар ҳамда дельфинлар ҳаётини, одатларини кузатишдан баҳра олар, қисқаси, дунёдаги барча болалар сингари ҳар куни ўзи учун бир янгилик кашф этарди.

Шу ваядан кунларнинг бирида у тап тортмасдан қирғоқча сузib борди. У ҳали қирғоққа етиб бормаёқ ўша ерда юрган аллақандай ғайритабий мавжудотларга кўзи тушди. Бунақасини у ҳали қўрмаган эди, улар дельфинларга ҳам, балиқларга ҳам ўҳшамасди. Бу ғалати мавжудотнинг қўли, оёғи, боши бўлиб, эгнита яна алланимабалоларни кийиб олганди, дельфин боласи фақат улардаги калла нималигини тушуниб етди, негаки бунақа аъзо денгиз жониворларида ҳам бор эди-да! Қолган нарсаларининг фарқига бормади... Дельфинчага отаси булар одамлар, деб таърифлаган мавжудот эканини дабдурустдан англаётлади, ўз-ўзидан улардан нега қўрқиши кераклигини эса мутлақо тушунмади.

У одамлар сезиб қолмасликлари учун эҳтиёткорлик билан қирғоқка сузib келди, тўғрисини айтганда, у бошқа дельфин болаларига нисбатан ўйинкароқ бўлгани билан ҳар ҳолда эҳтиёткор ва итоатгўй эди. Ҳозир ҳам сувдан бошини хиёл чиқариб, соҳилни дикқат билан қўздан кечирди.

Дельфинча ҳар куни эрталаб, кун энди ёйила бошлагандан ота-онаси билан бирга денгизга балиқ овлаш учун чиқадиган таги ясси кема ортидан эргашиб юради. У ўша кеманинг капитани билан унинг икки нафар ёрдамчи матросларини аллақачон таниб олган эди. “Кармина” деб номланган бу кема ана шу уч кишига тегишли эди. Дельфинчани ўзига ўҳшаган, катталар доим овга ўzlари билан олиб чиқадиган кичкина одамча – куралай қўз бола қизиқтириб қолганди. Ўша бола энди-энди тетапоя бўлганига қарамай чайқалиб-чайқалиб сузаётган кемада йиқилмасдан бемалол юра оларди. Кичкинтой болани катталар ҳамиша бир хилда, Фуко деб чақиришар, шу сабабли дельфинча унинг исми Фуко эканини билиб олганди. Бу дельфинча ўрганиб олган одамзод тилидаги биринчи сўз эди.

Ҳар куни эрталаб балиқчilar кема билан қирғоқ орасига тўр ташлаб қўйишишар, боланинг отаси билан матрослар тезроқ гапиришни ўргансин, деган мақсадда Фукони гапга тутишарди. Дельфин боласи ҳар бир сўзларини илиб олаётгани уларнинг хаёлига ҳам келмасди.

Дельфинлар бошқа жониворларга нисбатан анча-мунча идроки баланд эканидан у секин-аста одамларнинг тилида гапиришни ўрганиб олди. Кема билан ёнма-ён сузib бораётган маҳал катталар ўргатаётган сўзларни қайтараётган Фукога эргашиб, то ёдлаб олмагунча ўша сўзларни қайта-қайта тақрорларди. Ота-онаси олдига қайтиб борганда эса улар боласига дельфинча гапиришни ўргатишар эди; дельфинлар тили ғоятда гўзал, лекин шу билан бирга ўзлаштириш анча мушкул эди, уларнинг товушлари эса бамисли қўшиқ каби мураккаб ва баланд пардаларда янграп эди. Нафсилемарни айтганда, бу тилда истаган нарса ҳақида гапириш мумкин эди, бу тилда ўзга болалар, қушлар ҳамда одамларнинг оғзидан чиқаётган ҳамма гапларни айтса бўлади, факат “ўлдираман сени”, “бошингга ит кунини соламан” қабилидаги ўта хунук, қўрқинчли ва таҳдидона сўзларни айтишга ярамасди, чунки бунақа тушунчалардан дельфинлар тамоман бехабар эдилар.

Охир-оқибат, дельфин боласи ўзининг қадрдон она тилида ҳам, одамзоднинг тилида ҳам бир хилда бемалол гапиришни ўрганиб олди. Бирок буни у ҳали амалда қўллаб кўрмаган, шу чоққача катта одамлар ва болалар билан сухбатлашиш унга насиб этмаган эди.

II

Кунлар кетидан кунлар, ойлар ўтди. Фуко улғайиб қолди, дельфин ҳам. У балиқ овлагани чиққан кемани кузатиб юришни яхши кўрарди; кема билан ёнма-ён сузига бораётганда дельфинча одамлар эътиборини жалб қилиш учун дам-бадам сувдан сапчиб ҳавога отилар, катталар бунга ортиқча аҳамият беришмас, чунки улар кема атрофида сузига юрган дельфинларнинг бундай қилиғига аллакачон кўнигиб қолишган эди. Кунлардан бир кун дельфин боласи Фуконинг ўзига қизиқсиниб қараётгани, бу ҳам етмагандек мароқ билан томоша қилаётганини пайқаб қолди. Кема очиқ денгизга чиқиб кетгтан пайларда дельфин боласи зерикиб қоларди: унинг ортидан эргашиб боролмас, ҳали ёш экани туфайли кўрфаздан чиқиб, олисларга сузига боришдан кўрқар эди. Иттифоқо, бир куни эрталаб Фуко барвақт уйғонди ва катталарни кутиб ўтирмай ўзи денгиз ёқасига борди. Дельфин боласи шу ерда, доимгидек кеманинг ён-верида кутиб туради. У катталарнинг йўқлигидан фойдаланиб, беозоргина кулаётгандек туюлгувчи тумшугини сувдан чиқарди. Фукиньо уни кўриб ҳайратдан қотиб қолди, негаки, шу чоққача у биринчи марта дельфинни бунақа яқиндан кўриши эди, у факат одамларни, мушуклар билан паррандаларни ва яна кемада овланадиган балиқларни кўрганди, холос, шунга қарамай у дельфинларнинг балиқларга мутлақо ўхшамаслигини, терилари эса одамларнига қараганда юмшоқ ва майинроқ эканини англаб етди. Дельфин Фуконинг исмини айтиб чақирида, ундан ҳол-ахвол сўраган бўлди.

Фукиньо дельфинчадан кўркмади, дельфинча ҳам ундан ҳуркмади, зеро, ёлғиз катталаргина ўzlари нималигини билмайдиган нарсалардан қўркишади. Кичкинтойлар эса аксинча. Фуко дельфин боласи ўзига ўхшаб галисий тилида гапира олишидан, катталар эрталаб соҳилга келишганида доим нари юришидан боҳабар бўлди. Бора-бора дельфин боласи унинг энг қадрдон, ажралмас дўстига айланди. Нафсилемрини айтганда, Фуко ҳам дельфиннинг бирдан-бир дўсти бўлиб қолди.

III

Шу асно кўклам келди. Кунлар узайди, Фуко ҳар куни овга чиқиши олдидан барвақт туриб, денгиз бўйига келарди. Катталар ҳали уйкудан турмаган маҳал икки ўртоқ сувда ким ўзарга ўйнашар, мириқиб чўмилишар, ҳаммаёққа сув сачратиб сакрашар, ичакузди қўшиқлар айтиб, тинмай яирашар эди. Маза қилиб ўйнаб бўлишгач, олдинма-кетин отаси билан матрослар келишар, узоқ пайсалга солишмай “Кармина”да денгизга йўл олишарди. Дельфин боласи энди кема қаерга бормасин, унинг ортидан кузатиб борар, зеро, у одамлардан ҳам, вахимали денгиздан ҳам чўчимайдиган бўлиб қолганди.

Қисқаси, ота-онаси дельфинчанинг одамдан дўст орттирганини асло билмасдилар. Фуко ҳам дельфин билан дўстлашиб қолгани хакида хеч кимга айтмас, негаки, катталар аксар ҳолларда ҳамма нарсадан хавотир олиш тутул, ҳеч нарсани тушунишни истамас, улар ҳатто энг оддий нарсалар, айттайлик, дельфиннинг биз одамларга ўхшаб гапира олишига ҳам ишонишмас эди.

Фуко ов тугаб, уйларига қайтишгач, қош қорайгандан кейин ҳам денгиз бўйига келарди, у кела солиб ўзини сувга отар ва алоҳа, икки ўртоқ – дельфин билан инсон қайиқ ва соллар орасида ёнма-ён сузиб юришарди. Улар биргаликда кўрфаздаги ҳавзада чўмилаётган бойларнинг болаларини кузатишар, гоҳо-гоҳо ўша болалардан битта-яримтаси ҳавза ён деворидан бошини чиқарib Фуко билан дельфинни томоша қилар, боёқишилар ҳеч қачон қумлоқ соҳилда, денгиз ёқасида ўйнолмас ёки дельфин билан дўстлашолмас, бу икки қадрдон ўртоқ билан сухбат қуриш у ёқда турсин, салом-алик ҳам қилишолмас эди. Кўпинча бойларнинг ўз болаларига панд-насихатларини, ўгитларини эшитиб, улар ҳайрон бўлишарди: “Денгизда чўмилишни хаёлингга ҳам келтирма, чўкиб кетасан” ёки “анови балиқчи бола билан ўйнама, у сенинг тенгинг эмас” ё “кўп хаёл суваверма, бошинг оғриб қолади” қабилидаги гапларидан маълум бўлишича ота-оналари бу болаларга ҳеч нарсанираво кўришмас эди. Боёқишилар, бу икки ўртоқнинг шўх-шодон, беғараз кулгилари туфайли янада завқлироқ туюлаётган шўхликларига маҳлиё бўлиб қараб туришар, Фуко билан дельфин эса одамзод ҳеч қачон тўймайдиган ҳаёт завқидан маст ҳолда яйрашарди.

Ҳавзада чўмилаётган болалар орасида ширингина, кулчаюз, шахло кўзли қизалоқ ҳам бор эди, Фуко ундан кўзини узмасди ва нима учундир унинг давлатманд одамнинг қизи эканидан ич-ичидан куюнар ва оҳиста хўрсиниб кўярди. Дельфинлар бой нима, камбағал ким, деган нарсани тушунишмайди. Чунки уларнинг ҳаётида бунака тушунчаларнинг ўзи йўқ эди; улар пул билан бойлик нималигини билишмайди; одамлар ҳаётининг мана шу жиҳатларини дельфинча Фукодан эшитиб ҳайрон бўлди, у бир нарсани сира ҳазм қилолмасди – қиз бой хонадонда, Фуко камбағал оиласда ўсган бўлса нима қипти, асосийси – иккови ҳам ёш, тенгқур-ку!

Икки дўст ғира-шира оқшом қоронғисида овдан қайтиб келаётган баҳайбат кемаларни томоша қилишни яхши қўришар, қуёш заволга юз тутган маҳал уфқнинг алвон жилоларда товланишини кузатишдан завқланишар эди. Ёз оқшомининг таровати, осмондаги ранглар жилоси икки ёшнинг дилига бир дунё қувонч баҳш этарди.

Фуко билан дельфин улғайиб бораради. Улар улғайган сари вақт ўтиши тобора тезлашаётгандек бўларди. Улар ҳар куни бирга ўйнашар, бир-бирларига қизиқарли ҳангомалар айтиб беришдан чарчашмас, дельфинча ҳеч қачон бормаган заминдаги ҳаёт ҳақида гапирса, дельфин денгиз сирлари ҳақида сўзлар эди.

Кунларнинг бирида дельфиннинг исми нималигини ҳам билмаслиги Фуконинг эсига тушиб, ундан исмини сўради. Ўртоғи унга дельфинларнинг ҳар хил исмлари – касатка, грinda, денгиз мушуги, афолина, белобочка деган номлари бор, лекин сен сўраётган исмлар йўқ, деб жавоб берди. Фуко ажабланди, у дельфинларнинг умумий номи керакмас, мен қадрдон дўстимнинг исмини билгим келяпти, холос, деди. Буни билишнинг нима кераги бор, минг қилса ҳам бошқа биронта дельфин одамзод тилида гапирмагандан кейин, менинг ҳеч қанақа исмим йўқ, дея ўзича тушунтирган бўлди дельфинча, сен сўраётган бунака исмлар ёлғиз одамлар билан уй ҳайвонларида бўлади, денгизда яшовчи жониворларнинг ҳаммаси бир хил ном билан аталади, улар бирга яшаб, бир-бирларини яхши билгандан кейин исмларнинг нима кераги бор?!

Фуконинг кўнглида дельфиндан сир сақлайдиган гапи йўқ эди, нега деганда дельфин унинг бирдан-бир дўсти-ку! Бироқ йиллар ўтиб, улар

ўсиб улғайгач, Фуко бу ўйин-кулгилар, бирга вақт ўтказишлар ўзига ёқмай қолаётганини пайқади: у куни бўйи ишлаб чарчарди. Энди у дельфинга ҳар хил нарсаларни гапириб ўтирас, кўпроқ ҳеч қачон дўстлашиб кетолмаслиги рўйи-равшан бўлиб бораётганини ҳис қилас, чўмилаётган болалар ҳаётига қизиқар, бу ўзгаришларни ўртоғидан яширишга ҳаракат қилас эди. Пировардида, Фуко бундай ўзгариш сабабларини изоҳлаб бериш учун шундай сабабларни рўкач қилас эдики, дельфин боласи буни ҳеч қачон тушуна олмасди.

Фуко одамга ўхшаб ҳаёт кечиришлари учун кун-уззукун ишлашга мажбур экани, пулдор ота-оналарнинг болалари эса ишлашни хаёлларига ҳам келтирмаслиги, балиқчининг боласи эртадан-кечгача ишлаб ҳам, очиғи, рўшнолик кўрмаслиги тўғрисида гапиради. Улғайиб катта бўлгани учун янам кўпроқ ишлашга мажбурилиги, бунинг устига мактабда ўқиши, ҳафтада олти кун дарсларга қатнашга мажбурилиги, хуллас, бундан буён умрининг охиригача шундай яшашга маҳкум эканлигини тушунтироқчи бўларди. Дельфин галисия тилини билгани билан унинг гапларини мутлақо тушунмасди, бунинг сабаби яна ўша дельфинлар ҳаёти билан боғлиқ нарсалар эди, зеро, уларни денгиз бокарди, улар ҳолдан тойгуналари тер тўкиб ишлашлари шарт эмасди, мол-дунёга зарурат сезишмасди, одамлар сингари бойлик орттираман, деб ҳаётларини хавф остига қўйишиларнинг ҳожати йўқ, фаровон ҳаёт ва муҳтожлик деган тушунчалар уларга бегона. Шунинг учун дельфинча Фуконинг ақли тобора хира тортиб бораяпти, деб хисоблашдан ўзга важ тополмади.

IV

Ёз тугаб, қиши яқинлашди. Кўрфаз суви совуқлик қила бошлагани етмай қандайдир ғалати нордон, дори-дармон ҳиди ёхуд таъми келадиган бўлиб қолди, дельфин боласи Фуконинг дараги бўлмаган кунлар бепоён денгизга чиқиб кетишни афзал кўрар, у ерда ўзининг ҳамжинслари кўп, суви эса шўртанг ва тоза бўларди.

Кунларнинг бирида Фуко отаси билан матрослардан анча илгарироқ кемага келди. Денгиз устини туман қоплаган эди. У ўпкаси тўлиб, келган заҳоти ўксисб-ўксисб йиғлашга тушди, дельфин боласи унинг кўз ёшларини биринчи марта кўриши эди. Фуко ўзини сира босолмади, охири кўз ёшлари қуриб, чукур хўрсинди-да, тилга кирди. Биз бошқа кўришмаймиз, деди. Дельфинлар ёлғон гапиришни билишмайди, улар умуман ёлғон нима эканидан бехабардирлар, бироқ бизнинг дельфинча Фуко айни лаҳзаларда алдаяпти, деган ҳаёлга борди, чунки унинг тушунчасига кўра, икковлари ораларидан кил ўтмайдиган дўст бўлишса, ўрталаридан гап ўтиб, уришиб қолишмаган бўлишса, нега бундан буён бутунлай кўришолмас эканлар? Бир-бирларига заррача ёмонликни раво кўрмайдиган икки қадрдан нега бирдан учрашолмай қоларкан?

Бу кун уларнинг ҳаётидаги энг қайғули кун бўлди. Кўрфазни туман қоплагани учун денгиз ичкариси, қирғоқ яқинидаги қоялар ҳам кўзга чалинмасди. Кўрфаз тугул денгизда ҳам балиқ қолмаган, балиқчилар балиқ овлагани, дельфинлар емиш излагани анча олисга боришлари лозим бўлиб қолган эди. “Кармина” кемаси хийла кичик эканлиги сабабли балиқ овлагани денгиз ичкарисига боришолмасди, чунки у кучли тўлқинлар зарбига дош беролмасди. Фуконинг отаси “Кармина”ни сотиб

юборди, бироқ унинг пулига нисбатан йирикроқ шхуна сотиб олишнинг иложи бўлмади, шу боисдан Фуконинг отаси, ўзи ва икки нафар матрос улкан бир кемада ёлланиб ишлашга қарор қилишган эди, ўша кема “Кармина” сингари уларнинг тасарруфида бўлмай, икки дўстга ҳавас билан қараган ўша кулча юзли ширинтой қизнинг отасига тегишли эди.

Дельфинча балиқ овлагани шундай баҳайбат кемада, бунинг устига, яна шунаقا олисларга бориш шартми, дея боши қотарди. Ҳаммаси пул учун, деб тушунтиарди Фуко, отаси пул топиб, янги бир кема сотиб олиш мақсадида шунга қарор қилибди. Балиқчи қушлар қирғоққа яқин келиб, қанот қоқа бошлади, бу ёмғир ёғишидан дарак берарди. Дельфинча Фуқодан энди нима қиласан, деб сўраганди, у шундай жавоб берди:

– Мен пул топиш учун ишлашим керак, тушунаյпсанми? Бизнинг энди “Кармина” миз йўқ, мен энди олисларга кетишига мажбурман. Бу ерларда денгиздан балиқ овлаш мумкин эди, энди эса балиқ ҳам қолмади. Шунинг учун мен бошқа юртларга кетаяпман. У шунчалар узоқда жойлашганки, у ерлардан қайтиб келишимга ҳам ишонолмаяпман. Шу сабабли биз хайрлашишимиз керак. Бошқа ҳеч қачон кўришолмаймиз, деб қўрқаман.

– Лекин нега, Фуко, нима учун? – деб сўради дельфин боласи ва йиғлаб юборди, вахоланки, одатда дельфинлар йиғламас эди. – Биз ахир дўстмизку, дунёда энг садоқатли оға-ини бўлиб юргандик-ку, нега ахир, сен ўзинг яшаётган қишлоқни, мана шу кўрфазни, мени яхши кўрсанг, ифорли ёз тонгларини, қиши фаслини, туман қоплаган қояларни ва ёмғирни яхши кўрсанг, дельфинларсиз, ҳамқишлоқларингиз қандай яшайсан? Нега ҳаммасидан юз ўгириб, уларни унутиб, олисларга бош олиб кетмоқчи бўляйпсан? Тушунтириб бер менга, Фуко, нега, нима учун?

Фуко кўзларига куйилиб келаётган ёшни тўхтатолмай жавоб қайтарди:

– Чунки энди бизнинг кўрфазда балиқ қолмади, энди балиқ денгизда ҳам йўқ. Сармоядор кишилар сувни заҳарлашди, булғашди, балиқлар қирилди, қолганлари ҳам бу ерлардан олисларга кетиб қолди, балиқчилар кун кўролмаяпти. Бу ерда қолсанг, сен ҳам ҳалок бўласан.

Фуко тўғрисўз бўлганига қарамай дельфин боласи унга ишонмади ва уни яна саволга тутди.

– Нега улар сувни ифлос қилишади? Нима сабабдан балиқларни қириб юборишиади? Нима фойдаси бор бунинг?

Фуко елка қисди ва кўнгли бузилиб деди:

– Пул учун, улар пул дардида шундай қилишган.

Буни эшишиб дельфин боласи довдираб қолди.

– Одамлар бизларга мутлақо ўҳшамас экан. Сизлар ваҳший экансиз, сизларга заррача зиёни етмаган бўлса ҳам балиқларни ўлдирасиз, сувларни заҳарлайсиз, ер юзида ҳаёт чашмаларини куритасиз, ўзгаларни яксон қилиш, қириш, ўлдириш, вайрон қилишга шароит яратасиз, йўл қўясиз! Фақат инсонларгина бир-бирига шундай адоватда яшар экан. Сизларнинг тилингизни ҳеч қачон ўрганмасам бўлар экан-а! Алвидо, Фуко-Фукиньо, биз бошқа ҳеч қачон кўришмаймиз!

У шундай деди-да, бепоён денгиз сари сузуб кетди. Мусаффо ҳаводан ўпкасини тўлдириб нафас олиш учун сув юзасига чиққанида Фуко ҳалиям, энди ўзларига тегишли бўлмаган “Кармина” кемасида қимир этмай, тобора узоклашиб бораётган дўстининг ортидан термилган кўйи йиғлаб турарди. Бироқ дельфин боласи изига қайтмади. Нега дегандা унинг ҳафсаласи пир бўлган, аламидан ўртанар, қолаверса, Фукони ҳам, одамларни ҳам бутунлай унутишга, улар ҳақидаги хотиралардан ҳам

воз кечишига қарор қилган эди. У дengизнинг чуқур қатламлариға қадар тушди ва олис-олисларни кўзлаб сузид кетди. Дарҳақиқат, сув тахир, дори-дармон билан мой ҳиди анқирди. Бу ҳид уни бехузур қилди.

Дельфинчанинг иложи борича узоқроққа кетгиси келарди. Фукони, кўрфазни, бу қўланса сувнинг таъмини бутунлай унутишни истарди. У ота-онаси билан хайрлашгани борди. Лекин ёлғиз онасини учратди. Онаси аччиқ-аччиқ йиғларди. Отаси жон бераётган эди. Унга одамзод ҳиди анқиётган заҳарли сув туфайли шундай бўлди, дея тушунтиришиди. Дельфинчанинг кўз ёшлари қуриган, у энди йиғлаёлмас эди. Қолаверса, дельфинлар камдан-кам ҳолларда йиғлайди.

V

У бир пайтлари қадрдон бўлган маскандан тезроқ бош олиб кетиш учун бор кучи билан сузид борарди. Уни олис сарҳадлар чорларди. У ошиқкан томонда – йирок-йироқлардан инсон яшайдиган замин бутунлай кўринмайди, на одамлар, на кемалар, на қайиқлар, на зулм бор эди у ерда. У дельфиннинг боласи эди, бундан буён ёлғиз дельфинлардан дўст орттиради. У энди асло одамзодга яқин бўлмайди, уларни, Фуко-Фукиньони хар қанча соғинмасин, дельфинча ўз қароридан қайтмайди.

Хуан БЕНЕТ

(1927–1993)

Испан адаби Хуан Бенет ўз асарларида жамиятга танқидий кўз билан қараб, алоҳида олинган шахснинг ундаги ўрнини кўрсатишга уринади. Ёзувчининг “Қабр” (1971), “Самуил қаршисидаги Саул” (1980), “Ғира-ширада” (1989) романлари турли тилларга ўгирилган.

РАЙХЕНАУ

Хикоя

Унга бир замонлар у шундай деганди:

– Бирон кориҳол бўлса, мана бу қўнғироқ тугмасини босинг, мен дарҳол етиб келаман.

Буни у доимий равиша битта жумлани тақрорлайвериб одатланиб қолган одамдек айтмаганди; тўғри, унинг мижозлари айтарли қўп эмасди, лекин башибир бу билан унинг нима демоқчи бўлганини ўша пайтда у фахмламаган эди – қаттиқ толиқкан, кўзлари юмилиб-юмилиб, тезроқ ўринга етиб олиш хаёлидаги одамга бу хил гапларнинг таъсир қилиши ҳам амримаҳол эди, ўзи шундоқ ҳам бу нусханинг афт-ангорини кўриб энсаси қотаётган бўлса.

Ярим кечаси у чорраҳада адашиб, юра-юра пировардида, дабдаласи чиққан тоғ йўлига тушиб олди ва чамаси икки соатлардан сўнг, бир замонлар қурилиб, ҳалигача сақланиб қолган биттаю битта темир симёғоч қаққайиб турган текис асфальт йўлга етди, симёғочнинг энг тепасига ўрнатилган кўрсатиш белгилари, бу белгилар остидаги ёзувлар шунчалик ҳам едирилиб кетган эдикни, машина чироқларининг ўтқир ёғдусида ҳам ўқиб бўлмасди. У йўл ҳаритасини кўздан кечириб ҳам қайси томонга юриш кераклигини

аниқлаёлмай боши қотди ва тусмоллаб кетаверди, ниҳоят, бир неча чақирим юргач, бамисли одамлари қирилиб, ўзи харобага айланган номаълум бир қишлоққа етиб келди. Қишлоққа кираверишдаги кўчанинг икки тарафида хом гиштдан қурилган ўн-ўн иккитача уйлар кўланкаси аранг кўзга чалинар, симёғочдаги биттаю битта кувватсиз, хира лампочка йўлни ёритолмас, қисқаси, толиқцани ва алламаҳал бўлиб қолгани учун “Рехон – 23 км.” деган белгили ёзув кўрсатган томонга йўл олишдан ўзга илож тополмади. Кўп ҳам юрмади, кескин бурилишдан ўтиб, йўл ёқасидаги пештоқида “тунашхона” деб ёзилган пешлавҳа аранг кўринаётган баланд бинони кўриб, ўйлаб ўтирумасдан ўша тарафга бурилди.

Қўнғироқни икки бор чалгандан сўнг чироқ ёнди ва болохона деразаси очилиб, аллакандай кимса худди уйқуси бевақт бузилган одамдек норози оҳангда нима кераклигини сўради, унинг шу ерда тунамоқчи эканини эшишиб рози бўлганига қарамай, авваламбор қўрслик билан машинани уйнинг орқасига кўйиши буюрди. Эшикни ҳадеганда очмай узоқ ҳаяллади ва охири камарини боғлаганча чиқиб келди-да, ичкарига таклиф этди ва ҳужжат ҳам сўрамай, мўъжазгина жавондан 9 рақами зарб этилган темир тўгаракка осилган узун қалитни олди.

Енгил-елпи қурилган эски бинонинг ичи зах эди, бир замонлардаги ночор ва диққинафас қарвонсаройни эслатувчи ҳовли ниҳоятда ғарид, бефайз кўринар, арзимаган майдо-чуйда, лекин зарур нарсалар – шафтоли данагидек лампочка нурсиз, йўлкалар бир ахволда эди. Ётоқхона бундан ҳам хароб эди: йўлига бўлса-да, бир дона сурат илинмаган ялангоч девор, бир бало сим каравот, ёғоч қути ва юз-кўлни чайишгагина мўлжалланган кичкина чиганоқдан бошқа бор-йўғи битта фанер стул турарди. Хўжайнинг келсак – у шак-шубҳасиз хўжайин эди – у ҳақда нима дейиш мумкин, унинг ўз ишини уччалик хуш кўрмаслиги, фақатгина мўмай даромад қўриш ёки бор сармоясини сақлаб қолиш мақсадидагина шу ишга қўл ургани сезилиб турарди. Хонага киргач, қалитни бера туриб, каравот тепасига илиб қўйилган резина нокка ишора қилди:

– Бирон гап бўлса, мана шу орқали қўнғироқ қилинг, дарҳол етиб келаман.

У туйқус шу факирона кулбада бир амаллаб тунни ўтказиб олсан бўлди деган хаёлда ухлаб қолди, бироқ кўп ўтмай ғарак-ғарак терга ботиб уйғониб кетди. Анча вакт ажриққа ағнагандек у ёнбошидан бу ёнбошига ағдарилиб ётди, чойшабдан келаётган хид кўнглини бехузур қилиб сира ухломади, ана шунда қулоғига дафъатан аллақандай ғўнғир-ғўнғир овозлар чалинди: девор ортидами, кимсасиз йўлакдами, бўм-бўш ошхона ва тунашхона ходимларининг саранжом-саришта хонасининг орқа тарафидами икки-уч киши шовқин солиб гаплашарди – уларнинг ҳиринглаб кулишлари ва ёқимсиз овозларидан нима ҳақда гаплашаётганларини англаб бўлмасди.

Ухлаб-ухломай, кўнгли ғашланиб ўрнидан турди-да, чироқни ёқди, овозлар ўша заҳотиёқ тинди. У менинг хонам деразасидан кўчага тушган ёруғ бақир-чақир қилаётган одамларга огоҳлантиришдек таъсири қилди, шекилли, деб ўйлади ва энди барибир ухломаслигига кўзи етса ҳам енгил тортиб чироқни учирди. Бироқ зум ўтмай ғўнғирлаш яна эшитилди, бу сафар янайм яқинроқдан баландроқ янгради; тинимсиз гапираётган одамларнинг гап-сўзларини тушуниб бўлмас, фақатгина бир маромда давом этаётган товушлар хавога сингиб кетар, гарчи унинг қулоғига етиб келмаётган бўлса ҳам худди бу гапларнинг бари ўзига тегишлидек туюларди. Йўқ, бу товушлар битта ердан келмаётгани аниқ, ҳатто бунинг қай тарафдан келаётганини ҳам илғаб бўлмасди – бу товушлар бамисли ҳамма томондан: жавонлар

ортидан, кўшни хоналардан, кўчадан келаётгандек бўлар, бу ҳам етмагандек кўнглида йиғилиб қолган жирканч сирларини бир-бирига тўкиб солаётган аёлларнинг овози эди, узуқ-юлуқ, мубҳам гап-сўзларни ойдин кеча қўйнида сомеъ кўчага шамоллар учирив чиқар, лекин ялдо кечаси бу шовқиннинг ҳавога сингиб кетишига йўл қўймас, ҳавотир тўла тун бамисли уларни бир ерга тўплаб ўйин бошламоқчи бўлаётганга ўхшарди.

У яна чирокни ёқди, лекин лампочка лип-лип этиб турди-да, куйдимикан, ўчиб қолди, буни аёллар ўзларини гўё чўчитиб юборган нур устидан ғалаба қозонганликларининг аломати, деб қабул қилишдими, қувноқ оҳангда яна гапларини давом эттирдилар, бу ўзларига ҳеч ким халал беролмаслиги муқаррарлигини ҳис қилган одамларнинг тантанасини эслатарди.

У қора терга ботганча ўрнидан турди, хона хийлагина салқин эди, ноилож у яна ўрнига кириб ётди ва бошини буркаб олди... ажабо, гўё овозлар яқингинадан, шундоққина ёнгинасидан, ҳатто чойшаб қатларидан эшитилаётгандек бўлди. У апил-тапил чойшаб остидан бошини чиқарди-да, тепасида осилиб турган нок шаклидаги резина қўнғироқни қўлига олди, лекин босмади, сўхтаси совуқ меҳмонхона хўжайинининг гердайган авзойини эслаб, журъат қилолмади. У нима қиласарини билмай бир неча дақиқа жим ётди, сўнг қандайдир жазава ичида резина нокка тилини теккизди, чида бўлмас даражада кучайиб, тобора баландлашиб бораётган овозлар таъсирида гангид ўзини кўярга жой тополмай, асаблари қақшаб, дам туриб-дам яна ётиб олганча нега ва нима учун бундай ахволга тушаётганини англаёлмай ўпкаси тўлиб йиғлагиси келаётганини ҳис қилди, бу холат исканжасидан тонгга қадар қутуолмади, эрталаб қутулдим, деганда совуқ тер босиб, ҳаво етмай, ҳолсиз ётарди: манглайнини каравотнинг муздек темир панжарасига босиб, бакрайганча электр қўнғироқнинг симини ушлаб ётар экан, қўнгилсиз тунни бошидан кечириб, бардош бера олгани учун ич-ичидан ғуурланди ва ҳатто ҳеч кимни ёрдамга чакирмагани учун ўзидан фаҳрланди.

Эртасига эрталаб бир кеча тунаганининг ҳақини тўлар экан – айтишга ҳам арзимайдиган – меҳмонхона хўжайининг тунги можаро ҳақида чурк этиб оғиз очмади; эҳтимол, ўша пайтлари минг хил қийинчиликлар исканжасидан қутуолмай эзилиб юрганини қарамай ўзига бўлган ишончни йўқотмаган эканми, меҳмонхона эгасининг энсаси қотиб ҳамда нигоҳларида зуҳур этган таҳқирона ифодани англаган ва бирон муаммо туғилиб қолса, тортинмай чақираверинг, деган иddaони сезмаганга олганди – ҳолбуки, қўнғироқ тугмасини шундай босса кифоя эди, зеро, меҳмонхона хўжайини пиchinг қилмаган ва огоҳлантиргмаган, балки шунчаки эслатиб қўйган эди – бу ёғи ўзингиздан қолар гап йўқ – зеро, хизматчилик шундай дейишни тақозо этарди; у бекорга қўнғироқ қилиб безовта қилишнинг ҳожати йўқ, демоқчи экан; кечаги қўргилик таклиф этилган хизматдан воз кечиб такаббурлик қилгани учун юборилган жазо, қолаверса, кейинги сафар шундай вазиятларда ўйлаб бирон қарорга келиши учун сабоқ эди, аслида, ҳолбуки, бундан қутулиш жуда осон эди – бунинг учун қўнғироқ тугмасини босса, бас, бу хусусда меҳмонхонага кириб келганидаёқ уни огоҳлантиришган эди-ю...

Бу воқеа бир замонлар у ўта оғир, машаққатли ва уни ёлғиз яшашга мажбур этадиган касб – ўша пайтларда у ерларда турмуш учун унчалик зарур бўлмаган маҳсулотларни сотиш билан шуғулланар эди. Аммо ўзининг ғайрати, ташаббускорлиги ва тиришқоқлиги сабабли кўпам ўтмай ҳеч кимга боғлиқ бўлмаган, мухтор мавқеига эришиб фаровон ҳаёт кечира бошлаган, чет эл маҳсулотларини сота бошлагач эса бориб турган сармоядор тижоратчига ҳамда ҳар йили бир марта узоқ даволаниш учун ҳавоси мусаффо,

шифобаҳш масканларга бориб дам олишга мажбур кашандага айланган эди. Мўъжазгина юқ ташувчи машинаға одамлар учун керак-нокераклиги номаълум нарсаларни ортиб, қишлоқма-қишлоқ юрганида кунлардан бир кун ярим тунда йўл устидаги меҳмонхонага бориб қолган даврга ҳам анча йиллар бўлди. Агар, мабодо ўша тунги мажарони унутмаган бўлса, у холда, уни ўша қийналиб юрган маҳаллардаги энг кўнгилсиз, машъум воқеалардан бири, деб хисоблаган бўларди. Башарти эсидан чиқмаган бўлса, эҳтимол, ҳозирги некбин ҳаётининг ёки бугунги маъмур турмушининг муқаррар дебочаси, деб таърифлаган бўлур эди.

У яна уйгониб кетди: томоғи ачишиб нафас олишга қийналди, бир пайтлардагидек қоронғи тун ўз табиатини – ҳукмини намойиш эта бошлади, фақат бу сафар атрофида бутунлай ўзгача манзара намоён эди. Бу сафар – Констанц кўли ёқасида – ғўнғир-ғўнғир товушларга тўла туннинг кумуш либоси товланар, бамисли бу овозлар сокин ва пурвиқор қарағайларнинг шовқини, жўқа дарахти билан шумтолларнинг оҳиста шитирлашлари, теракларнинг шовиллаши – улар баайни одоб юзасидан қарсак чалаётгандек бўларди бу ақл бовар қилмас сирли эврилишлар ила тунни бедор ҳамда вақтичоғлик билан ўтказмоқчи бўлаётган алланечук гойибона ҳилқатнинг қовушмаган, маънисиз ўйинлари инсон ақл-идроқига таъсир этмас эди. Шамол янги ўйинларни кутиб эсишдан, япроқлар қарсак чалишдан тўхтаганда аллақайдан – соҳил ёқалаб қад ростлаган сон-саноқсиз дарахтлар ортидан қиз-жуvonларнинг баланд асабий ва инжиқ кулгилари янграб қоларди.

У деразани ёпди, ёпди-ю ўша замоно хонага қаердандир ёши ўтинқираган аёлларнинг ғўнғир-ғўнғири, тийиксиз кулгилари ёпирилди – буларнинг бари гўё унга имо-ишора қилаётгандек, унинг эътиборини жалб этиш учунгина хонани эгаллай бошлагандек туюларди, бу товушлар сурбетларча беписанд ёпирилар, ҳатто чироқни ёқиб, меҳмонхона ходимларини чақирганда ҳам бу ҳол хонани тарк этмайдиганга ўхшарди.

Бирдан у бир пайтлардагидек журъати етмаётганини пайқаб қолди ва бир замонлар худди шундай вазиятга тушиб қолганини эслади-ю, Рехъон билан Констанц кўли яқинидаги Райхенау йўлларида адашиб-улоқиб юрган кезларда унинг ўзини доимий равишда кузатиб, кўздан қочирмай, ортидан изма-из юрганларини (буни у унга имо-ишора қилиб кўйганди) англаб етди; ҳолбуки, улар хайрлашаётган лаҳзаларда, ўша онларданоқ ва ҳатто кейинчалик, то шу кунга қадар ҳам у ўзини тинмай таъқиб этиб келаётганди, зотан, ўша тонгда меҳмонхонадан чиқиб кетаётгандадаёқ у энди бошқа шароитда худди илгаригидек ўзига ўшандагидек ишонч билан юрмаслиги, таслим бўлажаги, ёрдам зарур бўлиб қолса, ёрдам қўнғироғининг манфур тугмасини муқаррар босажагига ишонч ҳосил қилганди. У илкис йўлакка солинган поёндоздан юриб келаётган қадам товушларини эшилди, эшилмоқ тугул бу кимнинг қадам товушлари эканини таниди ва бир пайтлар ёрдам керак бўлиб қолса ҳеч иккиланмасдан қўнғироқ тугмасини босиш лозимлигини норози оҳангда таъкидлаган ўша, энди... Зеро, у ўзи жорий этган ўйин қоидаларини сариқ чақага олишмагани учун, менсимай, йиллар давомида шаънига нолойқ ишлар қилавериб, аламзада қилиб кўйишгани учун интиқом онлари келганидан мағруронга қадам соҳибига эшикни очиш қийин эмаслигини фаҳмлади. У ўрнидан турмади. Ёстиқдан хиёл бош кўтариб, орқаси билан деворга сунянган кўйи нари сурила бошлади ва эшик лўқидонини ишонч билан очган кўли, сўнг бамисли ганч ва елимшакдан ясалганга ўхшаш қадди-қомати орқали унинг ўша эканлигига ич-ичида икрор бўлди.



АЛЕХАНДРО АМЕНАБАР



Испан режиссёри, сценарийнавис, бастакор ва актёр – Александро Аменабар 1972 йили Чилининг Сантьяго шаҳрида таваллуд топган. Унинг оиласи 1973 йилда Испанияга кўчиб келади. Отаси чилилиқ, онаси испаниялик Александронинг болалиги Испаниянинг гўзал ва бетакрор кўчаларида кечади.

1990 йилда Комплутенсе Мадрид университетининг информатика фанлари бўлимига ўқишга қабул қилинади, аммо бир йил ўтар-ўтмас у кино оламига қизиқиб қолади ва қисқа метражли фильм суратга олиш мақсадида ўқишни ташлаб кетади. Режиссёр “Бош” номли дебют иши учун 1991 йили Профессионал бўлмаган киноижодкорлар ассоциацияси (AICA) томонидан тақдирланади. Кино оламининг бундай илик муносабати Александрони янада тўлқинлантиради. Бир йилдан сўнг унинг иккинчи қисқа метражли “Ўрдаксимон қанотли”

фильми Эльче ҳамда Карабанчеледа бўлиб ўтган фестивалда совринни кўлга киритади. 1994 йили ёш режиссёр томонидан яратилган навбатдаги қисқа метражли “Ой” номли фильм сценарийси учун ҳам Луис Гарсия Берланги номидаги мукофотга ҳамда энг яхши фильм мусиқаси учун Профессионал бўлмаган киноижодкорлар ассоциациясининг совринига сазовор бўлади.

Ўзига ишончи ортган Александро катта фильмга кўл уришга қарор қилади. У тасвирга олмоқчи бўлган фильмнинг сценарийсини ўқиган режиссёр Хосе Луис Куэрда фильм сюжетига қизиқиб қолади ва ушбу фильмга продюсерлик қилишни таклиф этади. Ёш режиссёр бундай имкониятни кўлдан бермаслик учун “Диссертация” номли тўлиқ метражли фильмни суратга олишга киришиб кетади. Натижада Испания кинематография санъати ва фанлари академиясининг Гойя миллий киносовринини кўлга киритади. Шу билан бирга бу фильм Брюссель кинофестивалида кумуш Гран-при, Валдивийдаги (Чили) кинофестивалда томошабинлар томонидан энг яхши фильм дея эътироф этилади. Ундан ташқари “Диссертация” фильми Берлин кинофестивалида кинотанқидчилар томонидан яхши кутиб олинади.

Александронинг биринчи тўлиқ метражли фильмида ҳозирги кун

кино бизнес олами билан боғлиқ муаммо кўтариб чиқилган. “Диссертация” фильмида ёшлар онгини заҳарлашда асос бўлаётган ваҳшийликлар, ноинсоний хислатлар акс этаётган баъзи фильмларниң қай тарзда вужудга келиши ҳақида ҳикоя қилинади. Режиссёр бу фильм орқали нега аксарият томошабинлар зўравонлик тасвириланган фильмларга қизиқишаётганини таҳлил қилишга ҳаракат қиласди.

Режиссёр иккинчи тўлиқ метражли “Кўзингни оч” фильмни билан ҳам муваффақиятга эришади. 1997 йилда яратилган бу киноасари туфайли у Берлин кинофестивалида режиссёрик иши учун тақдирланади, Токиодаги фестивалда Гран-при соҳиби бўлади.

2001 йили Венеция кинофестивалида режиссёр “Бошқалар” фильмни учун “Олтин Шер” совринини қўлга киритади. Фильм продюсери сифатида машхур актёр Том Круз иштирок этади. Фильмда бош қаҳрамон ролини эса таникли актриса Николь Кидман ўйнайди.

Ижодий изланишдан тўхтамаган режиссёр 2004 йили “Ичи дengiz”,



2009 йили “Агора”, 2015 йили эса “Қайтиш” фильмларини томошабинлар ҳукмига ҳавола этди. Бу фильмлар ҳам мамлакат ва дунё миқёсида турли совринларга лойик топилди.

Александро Аменабарнинг ижодий фаолиятига назар ташлар экансиз, унинг ҳар бир фильмни кинотанқидчилар ва томошабинлар томонидан катта қизиқиш билан кутиб олинаётганига гувоҳ бўласиз.

*Нодира ҚОСИМОВА
тайёрлади*

Журнализмининг 2015 йил 9-сонида эълон қилинган рассом Чингиз Аҳмаров мўйқаламига мансуб “Етти гўзал” суратлари ёзувчи Дадаҳон Нурий томонидан тақдим этилган. Суратлар адабнинг шахсий архивида сақланмоқда.



ПЕРЕ БОРРЕЛЛ ДЕЛЬ КАСО



Мусаввир, график Pere Borrell del Caso 1835 йил 13 декабрда Шимолий Испаниядаги Жирона вилоятининг Пучсерда шаҳрида туғилган. Дель Касо 21 ёшга тўлганда оиласи билан Барселонага кўчиб кетади. У ерда шаҳарда машхур бўлган Лотъя тасвирий санъат мактабида рассомликни ўргана бошлайди. Кейинчалик ўз маҳоратини ошириш мақсадида тасвирий санъат академиясига ўқишга киради. Академияда унга мусаввир Клауди Лоренцале, Луис Ригалтлар, Пабло Мила рассомлик сир-синоатларини ўргатади. Кейинчалик изланувчан ёш мусаввир устозлари ўргатган

романтизмдан кўра реализм йўналишида ижод қилишни афзал кўради.

Дель Касо 1868 йили хусусий санъат мактабига асос солади. Бу ерда Рикард Канальс, Адрия Гуал, Рома Рибера, Ксавьер Ногес кабилар ундан таълим олиб, иқтидорли рассомлар бўлиб етишади. 1897 йилда дель Касо рассом Франческо Гуаш билан бирга тасвирий санъат жамиятини ташкил қиласди.

Пере Боррелл дель Касо ҳаёти давомида уч юздан ортиқ асарлар яратган. Унинг ижодий меросин катта қисмини портрет жанридаги картиналар ташкил этади. Жмладан, “Ёш қиз портрети”, “Аёл портрети” асарлари машҳур. Рассом ижодида реализм йўналиши устивор бўлгани учун тасвиirlарида ҳаётийлик, табиийлик мезонлари аҳамият касб этади. Манзара жанридаги суратларини у туғилиб ўстган Пучсердага бағишлаган, уларни асосан болалиги ўтган тоғлар билан ўралган гўзал табиат бағрида яратган. Шу ўринда “Пучсерда манзараси” ва “Манзара” картиналарини мисол қиласа бўлади. Унинг натюроморт жанридаги ва диний мавзудаги асарлари ҳам бор.

Дель Касонинг кўзга кўринган асарларига “Танқиддан қочиш”, “Икки бола сурати” картиналарини киритиш мумкин, мусаввир суратларни чизишда тромплей, яъни оптик иллюзия усулидан фойдаланади. Журнализмиз муковасини безашда фойдаланилган “Икки қиз” сурати ҳам рассомнинг машҳур асарларидан бири бўлиб, муаллиф унда тромплей усулини қўллади. Картинада кулаётган икки ёш қиз тасвиirlangan, яшил кийимли қиз тирсаги билан сурат рамкасига суюниб турибди, иккинчиси ўртоғига ниманидир кўрсатмоқчи, унинг кўрсаткич бармоғи суратдан ташқарига чиқиб тургандек туюлади. Бу сурат ҳозирги кунда Каталан модернизм музейида сақланади.

Пере Боррелл дель Касо 1910 йил 16 майда Барселонада вафот этган.

Аброр УМАРОВ
тайёрлади

УЛАР ҲАМ ШУ ОЙДА ТУГИЛГАНЛАР...

6 ОКТЯБРЬ 1882–1937 йиллар. КАРОЛЬ ШИМАНОВСКИЙ, польшалик композитор, пианиночи, педагог. XX асрнинг биринчи ярмидаги поляк мусиқа маданиятининг йирик намояндаларидан. “Қирол Рожер”, “Хагит”, “Шаҳзода Потёмкин”, “Хофиз қабри”, “Абадий ёшлиқ” сингари асарлари билан санъат оламига яхши таниш.

7 ОКТЯБРЬ 1934 йил. НОВЕЛЛА МАТВЕЕВА, россиялик драматург, адабиётшунос, шоира. “Лирика”, “Ўйинчоқ кема”, “Буюмлар қалби”, “Дарё”, “Қўшиқлар қонуни”, “Соҳиллар ватани”, “Сонетлар”, “Карвон”, “Қизалоқ ва пластилин” сингари қатор китоблар муаллифи.

10 ОКТЯБРЬ 1930 йил. МЕДЕЯ АМИРАНАШВИЛИ, грузиялик опера хонандаси, Грузия халқ артисти. Бир қатор миллий мукофотлар совриндори. “Миндия”, “Евгений Онегин”, “Иоланта”, “Отелло”, “Дон Карлос”, “Фауст”, “Богема”, “Баттерфлай хоним” каби операларда бош ролларни ижро этган.

11 ОКТЯБРЬ 1942 йил. АМИТАБХ БАЧЧАН, хиндиистонлик машҳур киноюлдуз. Ижодий фаолияти давомида “Оловли йўллар”, “Қонун ва қасос”, “Гоҳи шодлик, гоҳи ғам”, “Зулмат”, “Боғон”, “Устоз” каби фильмлардаги қатор роллари билан шуҳрат қозонган.

20 ОКТЯБРЬ 1854–1891 йиллар. АРТУР РЕМБО, буюк француз шоири. Унинг “Ярамас болалар”, “Шайтонваччалар”, “Ялангоёқ сайёҳ, ўйноқи шамол” шеърий асарлари ўз даврида катта шов-шувга сабаб бўлган. 1995 йили Агнешки Ҳолланд Артур Рембога бағишилаб “Тутилиш” фильмини суратга олади ва кинокартина оламшумул муваффакиятга эришади.

21 ОКТЯБРЬ 1929 йил. УРСУЛА ЛЕ ГУИН, америкалик фантаст-ёзувчи. “Хьюго” (6 марта), “Небьюла” (7 бор), “Локус” (21 марта) сингари илмий фантастика йўналишидаги миллий мукофотлар соҳибаси. “Зулматнинг чап қўли”, “Бенасиблар”, “Малафрена”, “Сўнгги соҳилда” каби асарлари билан танилган.

22 ОКТЯБРЬ 1844–1823 йиллар. САРА БЕРНАР, машҳур француз актрисаси. Асосан жиддий драматик роллар ижро қилгани боис “Авлиё Сара” номини олган. 70 ёшида 13 ёшли Жульєтта образини гавдалантирган актриса Соль (“Эрнани” Гюго), Маргарита хоним (“Камелилли хоним”), Теодора (“Теодора”) каби роллари билан ҳам шуҳрат қозонган.

24 ОКТЯБРЬ 1904–1961 йиллар. МОСС ХАРТ, америкалик драматург. “Жентльмен битими”, “Юлдуз порлади”, “Хафта пьесаси”, “Буюк томоша”, “Ханс Кристиан Андерсен”, “Пулитцер театри”, “1936 йилнинг Бродвей мелодияси” (“Энг яхши сценарий” номинациясида “Оскар” мукофоти билан тақдирланган, 1936) сингари кўплаб фильм ва сериаллар муаллифи.

25 ОКТЯБРЬ 1941 йил. ЭНН ТАЙЛЕР, америкалик ёзувчи ва адабий танқидчи. “Пулитцер” мукофоти совриндори. “Эртанги кун насиб қилса”, “Тасодифий сайёх”, “Самовий саёҳат”, “Ер ноз-неъматлари” каби асарлар муаллифи.

1930 йил. ЖУМАНИЁЗ ЖАББОРОВ, шоир, драматург ва таржимон. Абулқосим Фирдавсий “Шоҳнома” асарининг катта қисмини ҳамда Байрон, Лермонтов, Шевченко, Тагор, Ҳофиз Шерозий каби адиллар ижодидан намуналарни ўзбек тилига ўтирган. Унинг “Баҳор нафаси”, “Гулшан”, “Субҳидам хаёллари”, “Лирика”, “Қуёш юрти”, “Кўнглим гўзали” шеърий тўпламлари, “Ўжарлар”, “Тўйдан олдин томоша”, “Нексия” пьесалари ва болаларга бағишлиланган “Тоғдаги учрашув”, “Гулжаҳон ва Ҳасанжон” каби тўпламлари бор.

26 ОКТЯБРЬ 1935–2009 йиллар. ЭРГАШ КАРИМОВ, таниқли ўзбек театр ва киноактёри, Ўзбекистон халқ артисти. У “Шоҳи сўзана”, “Дил-дили Зайнаб”, “Уч баҳодир” каби кўплаб спектаклларда роллар ижро этган. Антон Чехов ва Сайд Аҳмад ҳикоялари асосида тайёрланган томошаларда бир қатор образлар яратган. Телеминиатюралар театрида ижро қилган ҳажвий роллари билан кенг эътироф топган. “Учрашув” ҳажвий телесериални миллий кулги санъатининг мумтоз намунаси бўлиб қолди.

30 ОКТЯБРЬ 1821–1881 йиллар. ФЁДОР МИХАЙЛОВИЧ ДОСТОЕВСКИЙ, буюк рус ёзувчиси. Жаҳон адабиёт тида шоҳ асарлар дея тан олинган “Хўрланганлар ва ҳақоратланганлар”, “Қиморбоз”, “Жиноят ва жазо”, “Телба”, “Ака-ука Карамазовлар”, “Ўлик уйдан мактублар” сингари нодир асарлари билан дунё сўз хазинаси бемисл ҳисса кўшган.

31 ОКТЯБРЬ 1795–1821 йиллар. ЖОН КИТС, инглиз шоири. “Зулматдан чиққан кабутар”, “Ёлғизлик” сонетлари ва “Гиперион”, “Изабелла”, “Авлиё Агнесс арафаси”, “Ламия”, “Юонон кўзасига қасида”, “Эндимион” каби шеърлари 26 ёшли шоир номини абадиятга муҳрлади. Илк ва сўнгги шеърий тўплами “Шеърлар” 1817 илии нашр этилган.

1922 йил. АНАТОЛИЙ ПАПАНОВ, атоқли рус театр ва киноактёри. “Автомобильдан сақланинг”, “Бриллиант қўл”, “Ун икки стул”, “Тарсаки” каби олтмишдан зиёд фильмларда роль ижро этган. “Сеними, шошмай тур!” туркум мультфильмларидағи бўри овози билан танилган дубляж актёри саксондан ортиқ мультфильмга овоз берган.

Севара АЛИЖОНОВА тайёрлади

РЕЗЮМЕ

✍ Очередной номер журнала посвящается Испании. В рубрике «Глобус» дан краткий обзор истории и сегодняшнего облика испанской национальной культуры: литературы, изобразительного искусства, музыки, танцев, театра и кино.

✍ Рубрика «Незабываемые личности» освещает жизнь и творчество Александро Аменабара, режиссера, оставившего неизгладимый след в истории кинематографа Испании, фильмы которого были награждены престижными международными премиями.

✍ Рубрику «Мередианы поэзии» украсили достойные образцы творчества известных испанских поэтов Хуана Боскон-и-Алмуховира, Гарсиласо де ла Вега, Мигеля де Сервантеса Сааведра, Хуана Рамона Хименеса, Луиса Гарсия Монтеро. Проза Испании представлена в рубрике «Рассказ о рассказе» новеллами Шоана Игнасио Тайбо «Люди, кто вы?» и Хуана Бенета «Рейхенау», а также вы имеете возможность насладиться произведениями таких авторов, как Педро Угарте, Хуан Рамон Хименес, Федерико Гарсия Лорка в рубрике «Проза».

✍ «Сага о Форсайтах», благодаря которой английский писатель и драматург Джон Голсуорси обрел мировую популярность – монументальная серия произведений, посвященная судьбе состоятельной семьи Форсайтов. В рубрике «Проза» представлена первая книга «Собственник», в переводе Хабибы Зияхановой.

✍ Романы «Униженные и оскорбленные» Фёдора Достоевского, «Мадам Бовари» Гюстава Флобера, «Ботагоз» Сабита Муканова, юмористические рассказы Антона Чехова – вот неполный список произведений, умело переведенных на узбекский язык переводчиком Зияхановой. Последние годы своей жизни она посвятила книге «Собственник». Однако по причине болезни не смогла довести начатое дело до конца. Часть романа, переведенная на узбекский язык Хабибой Зияхановой и представленная вниманию читателей в данном номере журнала, наглядное свидетельство высокого профессионализма переводчика.

✍ Испанская поэзия немыслима без произведений Федерико Гарсия Лорка. Для узбекских читателей окно в мир творчества данного автора было открыто известным поэтом Шавкатом Раҳмоном. В рубрике «Из сокровищницы мастеров перевода», посвященной переводческой деятельности Раҳмона, представлены стихотворения Лорки, переведенные им на узбекский язык.

✍ Статья профессора Казакбая Юлдашева «Постмодернизм: суть, корни и признаки» о явлении, проявляющемся в различных сферах и порождающем множество дискуссий и полемик. Автор обстоятельно описывает историю, процесс формирования постмодернизма, а также анализирует, в каком виде и в какой степени он проявляется в современной культуре. Читайте в рубрике «Литературоведение. Философия».

✍ Привлекают ли читателя герои-идеалы в художественном произведении? Возможно ему ближе образ человека с обычной судьбой, похожий на него самого? Может ли человек служить идеалом для других? Журнал «Жаҳон адабиёти» приглашает поклонников литературы принять участие в дискуссии, в основу которой легли эти и подобные тому вопросы. В рубрике «Процесс» вы можете ознакомиться с мнениями первых участников диспута на заданную тему.

RESUME

✍ This issue of the magazine is devoted to Spain. A brief review about history and present of Spanish national culture: literature, pictorial art, music, dance, theatre and cinema is given in column “Globe”.

✍ A column “Unforgettable Persons” throws light on life and creative work of well-known producer Alejandro Amenabar who left his mark on history of Spanish cinema and whose films were awarded prestigious international prizes.

✍ Deserving examples of works written by well-known Spanish poets Juan Boscon Almukhovir, Garsilaso de la Vega, Miguel de Servantes Saavedra, Juan Ramon Jimenez, Luis Garcia Montero enriched the column “Meridians Of Poetry”. Spanish prose presented by Shoan Ignacio Taibo’s “Who Are You, People?” and Juan Benet’s “Reihenau” novellas in “Story About Story” heading. You can also read works by Pedro Ugarte, Juan Ramon Jimenez, Federico Garcia Lorca in “Prose” column.

✍ An English writer and dramatist John Galsworthy became one of the most popular authors after writing “The Forsyte Saga”, his monumental series of works about fate of respectable Forsytes’ family. The first book of this series named “The Man of Property” translated by Habiba Ziyohonova is presented in “Prose” column.

✍ Fedor Dostoevsky’s “Humbled And Insulted”, Gustav Flaubert’s “Madam Bovary”, Sabit Mukanov’s “Botagoz”, Anton Chekhov’s humorous stories – this is a short list of works translated into Uzbek by H. Ziyohonova. She devoted the last years of her life to the translation of “The Man of Property”, but couldn’t finish it because of an illness. A part of the novel translated into Uzbek by H. Ziyohonova and presented to readers in this issue is an obvious example of translator’s high skill.

✍ It is impossible to imagine Spanish poetry without works of Federico Garcia Lorca. Popular Uzbek poet Shavkat Rahmon introduced our readers with poems of this great author. Lorca’s works translated by Sh. Rahmon into Uzbek presented in the heading “Treasures of Great Translators” dedicated to Sh. Rahmon’s translation activity.

✍ Professor Qozoqboy Yuldashev’s article “Post-modernism: Essence, Roots And Signs” is about the phenomenon which shows itself in different spheres and evokes various polemics. The author describes the post-modernism’s history and process of formation in detail and also analyses forms and degrees of post-modernism in modern culture. Read in the column “Literary Criticism. Philosophy”.

✍ Do ideal characters attract a reader in a work of art or a personage with a usual fate similar to him is closer to him? Can one person become an ideal to other people? “Jahon adabiyoti” magazine invites admirers of literature to take part in the discussion about such kind of questions. You can read opinions of the first disputants in “Process” column.

Жаҳон **АДАБИЁТИ**

2015 йил октябрь сони

Навбатчи муҳаррир: О.САФАРОВ
Техник муҳаррир: Д.ҲАМИДОВА
Мусаххих: Д.АЛИЕВА
Компьютерда саҳифаловчи: М.АЛИЕВА

ИНДЕКС 828, 829

2007 йилда №0252 рақами билан лицензия олинган.
Ўзбекистон Матбуот ва аҳборот агентлигига рўйхатга олинган, №189.
Уч босма табоқ ҳажмгача бўлган кўлёзмалар қайтарилмайди.
“Жаҳон адабиёти” журналида эълон қилинган асарларни кўчириб босиши
да ва қайта нашр этишда таҳририятнинг ёзма розилиги олиниши шарт.

Таҳририят манзили:

100129, Тошкент, Навоий кўчаси, 30.
Телефонлар: (0371) 244-41-60, 244-41-61, 244-41-62.
Сайт: www.jahonadabiyoti.uz
E-mail: jahonadabiyoti@list.ru

Босишига руҳсат этилди 18.11.2015 й. Бичими 70x108 1/16. Офсет қофози.

Офсет босма. Шартли босма табоқ 18,2. Нашриёт босма табоги 20,0.

Адади 2220 нусха. 4005 рақамли буюртма. Баҳоси шартнома асосида.

“Жаҳон адабиёти” журнали компьютерида терилиб, “Sharq” НМАКда чоп этилди.

Босмахона манзили:

100000, Тошкент ш., Буюк Турон кўчаси, 41-үй.

© Жаҳон адабиёти, 2015 й.